

Jág₁ Dse₃ quió'₅ Diú₄ a₂ca₂tó'₂ San Lucas ne₄ Si₂

Jág₁ a₂ca₂rë₃lióg₃ Si₂ a₂ca₂jmo₃ San Lucas

1 ¹ Juin₅ bá₄ dsa₂ i₂qui₂ca₂nio₃ ne₄ ca₂can₃ ta₁ ca₂tó'₂ ne₄ si₂
ca₂le₃jé₃ jág₁ 'a₂ lia'₂ dsón'₂ niog₅ ca₂lë₃ jë₄ quián₂ jnia'₅₄, ² lia'₂
con'₂ lé₅ ca₂jme₃tag₅ dsa₂ i₂ca₂té₂ ne₄ lia'₂ con'₂ le₂'uig₅₄ jme₁ca₂rë₃lióg₃,
ton'₂ ca₂jme₃'o₅₄ ca₂'é₂ jág₁ dse₃. ³ Ján₃ bá₄ le₂jaun₂, jniá₂ né₃ ma₂caún₃
'í₁ dse₃ lin₃ 'a₂ lia'₂ ma₂já₅ jë₁le₂'uig₅₄, jaun₂ bá₄ líng₂ dsi₂ten₅₄ a₂tó'₄ ne₄
si₂ la₂ ca₂le₃jé₃ lia'₂ con'₂ lé₅, a₂tsíng₂ ne'₅₄ 'ne₂, gui'₅₄ Teófilo,^a ⁴ ia₁jaun₂
ñi'₅₄ dse₃ a₂dsón'₂ tí₅ jág₁ a₂ma₂ca₂rë₃tíng'₃.

'É₂ jág₁ ángel quián₅ Diú₄ a₂le₃chan₂ Juan₅₄ i₂chon₃ dsa₂ jmig₂

⁵ Jmig₄ lia'₂ con'₂ jme₁lín₄ Herodes rag₅₄ 'uë₃ Judea, jme₁chan₂ jan₂
jme₂dsa₂ i₂jme₁chen₂ Zacarías, i₂jme₁tén₄ le₃quió'₅ co₂nió'₃ jme₂dsa₂
quián₅ Abías. Dsa₂ mí₂ quián₅ jme₂dsa₂ 'éi₂ né₃ jme₁chen₂ Elisabet,
i₂jme₁lín₄ tsi₁jon₂ quián₅ jme₂dsa₂ Aarón. ⁶ Le₃oin₃ jme₁lín₄ dsa₂ dsen₃
le₃ne₄ Diú₄, jme₁jme₂ti₃ 'éi'₃ quió'₅ Te₁gui'₅₄. A₂chain₂ le₂jaun₂ né₃, tsá₃
'ein₂ qui₂le₃bóg'₂ dso₄ jua'₅₄ 'e₂ dso₄ le₃bóg'₂. ⁷ La₁ 'i₁jan₂ guein₂ tsá₃
i₂ma₂ca₂rë₃chán₃ quián₅, ia₁ jme₁lín₄ Elisabet jan₂ 'io₅₄ quen₂.
Jme₁ma₂cain'₅₄ ma₂guein'₂ 'ñio₅ lin₃ jain₂ jain₂.

⁸ Co₂ráun₂, ca₂lë₃ jme₁ca₂té₂ jmig₄ a₂tin₅₄ jme₂dsa₂ i₂quian'₅₄ Zacarías
a₂jme₃ti₃ ta₁ a₂tióin₂ ne₄ Diú₄, ⁹ a₂jmo₃ lia'₂ con'₂ lé₅ tag₄ chí'₅ quió'₅
jme₂dsa₂. Të₃jë₄ jmig₄ jaun₂, ca₂o₃ág₃ jág₁ ca₂tín₂ Zacarías, a₂'í₂ dsi₂néi₂
ja₁jñió₅ quió'₅ Te₁gui'₅₄ a₂dsí'₂ chen₂. ¹⁰ Të₁lia'₂ 'ein₅₄ dsí'₂ chen₂
ne₄chei₂ né₃, dsa₂ juig₂ guë'₂ le₃ca₁'né₄ bá₄ le₁ñi'₂ chi₂lén'₂ Diú₄.

¹¹ Të₃jë₄ jaun₂ ca₂jme₃jnia₅ jan₂ ángel quián₅ Te₁gui'₅₄ ne₄ Zacarías
të₂le₃ gu₂ ne₁ ja₁lé₄ ne₄chei₂. ¹² Jme₁ca₂jág₂ Zacarías, ca₂ja₃gó'₃ dsí'₅ 'ñio₅
lin₃, ca₂lia'₂ tsá₃ a₂ñi₅ jmo₃ ca₂jén'₃. ¹³ La₁ ca₂juá'₂ ángel:

—Zacarías, tsá₃ lë₁jmo₂ gang'₃, ia₁ ma₂nág₂ Diú₄ jág₁ quiáng'₂
a₂chi₁lein'₅₄, jaun₂ le₃chan₂ jan₂ guein₂ dsa₂ ñe'₂ quián₅ Elisabet dsa₂ mí₂
quiáng'₂. Guein₂ 'éi₂ quiang'₅₄ Juan₅₄. ¹⁴ Jmó'₂ 'io'₂ le₃chang'₂, o₂'ñi₃
o₂jñia₃ 'au'₂ né₃, ján₃ bá₄ juin₅ i₂të₃ dsí'₅ jë₁ma₂chain₂. ¹⁵ Ia₁ lén₂ dsa₂
juin'₂ le₃ne₄ Te₁gui'₅₄. Tsá₃ vino 'ín'₂, on₃ guë'₂ ti₁jmg₃ né₃; Jme₂dsí'₂
Jñió₅ bá₄ ma₂rë₂rín₅ tē₂dsí'₅ né₃ a₂le₃chain₂. ¹⁶ Co₃jéin'₂ juin₅ lin₃ dsa₂
juig₂ Israel le₃quió'₅ Te₁gui'₅₄ Diú₄ quián₅. ¹⁷ 'Éi₂ i₂já₅ ne₄ jui₅ quió'₅
Te₁gui'₅₄, 'ein₅₄ jme₂dsí'₂, ton'₂ 'io₂₃ jui₅bí₂ jui₁lia'₂ a₂jme₁'io₅ Elías,
a₂jme₃dsiain₁₂ mi'₅₄ ja₁con₂ dsa₂, quian'₅₄ chi'₂-guein₂ quián₅,
a₂co₃jéin'₂ jui₁lia'₂ i₂tsá₃ ne'₅₄, jme₃tag₂₃ le₃tiin₂ le₃ñí'₂ a₂dse₃. Le₂në₅
jmo₃ co₂jñia₅₄ dsa₂ ia₁jaun₂ guein₃ Te₁gui'₅₄.

^a3 o₃, “'ne₂ i₂'nióg'₃ Diú₄.”

¹⁸ Jaun₂ ca₂ŋag₃ Zacarías ca₂ŋí'₃ ángel:

—ǎ'A₂ bá₄ lia'₂ lé₂ le₃guion₅₄ jniá₂ a₂tí₅ dsón'₂ jág₁ ně₅? Ia₁ dsa₂ ma₂guen'₂ bá₄ jniá₂, le₂jaun₂ guë'₂ dsa₂ mí₂ quiáng₃ i₂ma₂dsi₁juin₅₄ ŋi₂ ján₃.

¹⁹ Jaun₂ ca₂ŋag₃ táng₃ ángel:

—Gabriel bá₄ jniá₂, chéng'₅ le₃ne₄ Diú₄. A₂cheng₅₄ bá₄ guio₃ a₂juá'₄ jág₁ dse₃ la₂ ne'₅₄. ²⁰ La₁ tē₂ně₃, cóng'₂, tsá₃ ma₃jág₁ le₃dsiá'₁ ca₂lia'₂ ca₂lě₃ le₂ně₅, 'uig₅₄ ia₁ a₂tsá₃ 'éng'₂ jág₁ quió₃ a₂le₃ti₃ jē₁ma₂dsin₃ jmig₄ jaun₂.

²¹ Dsa₂ juig₂ ně₃, le₁jnia₂₃ a₂o₃'in₅ Zacarías, dsi₂gó'₃ dsí₅ ia₁ a₂ca₂rě₃'in₄ 'éi₂. ²² Jme₁ca₂o₃'ín₃ ně₃, la₁ tsá₃ ma₃jág₁ le₂dsia₃, jaun₂ ca₂rě₃lí'₄ bá₄ dsa₂, cha₂ a₂ca₂jág₃ dsi₂néi₂ guá'₅ templo. A₂jnia'₅₄ qui₂bí₂ gu₂ bá₄ jmo₂₃ léi₄, ia₁ ma₂coin₅₄.

²³ Jme₁ca₂dsin₃ jmig₄ a₂jme₃ti₃ ta₁ jaun₂, jaun₂ ŋái'₃ bá₄ ja₁quió'₄.

²⁴ Cang₂ jaun₂ ně₃, ca₂can₃ Elisabet dsa₂ mí₂ quiáin₅ guein₂. Tē₁lia'₂ jaun₂, tei₄ bá₄ ca₂'í₃ dsi₂néi₂ quió'₅ con'₂ 'ŋiá₂ tsi'₂. 'Ein₅₄ qui₂dsi₂jnia₅ dsí₅, lín₂. ²⁵ “Co₂ně₅ ca₂rě₃'ŋi₃ dsí₅ Te₁gui'₅₄ a₂lǐng₅ le₂la₂, ia₁jaun₂ tsá₃ ma₂'ag₃ dsa₂ 'lig'₅₄.”

'Ē₂ jág₁ jan₂ ángel quián₅ Diú₄ a₂le₃chan₂ Jesús

²⁶ Jŋéi₂ tsi'₂ ma₂ne₁ŋó₄ a₂quian₅ Elisabet guein₂; Diú₄ ně₃ ca₂chein₃ táng₃ ángel Gabriel caun₂ juig₂ ja₁tén₄ Galilea ja₁chei₂ Nazaret,

²⁷ a₂ca₂i₁jme₁jniai₂₃ ne₄ jan₂ dsa₂ mi₄ i₂jme₁ma₂li'₅₄ jág₁ a₂jéin'₂ gu₂ quian'₅₄ i₂chen₂ José, jan₂ dsa₂ tsi₁jon₂ Rag₅₄ David. Dsa₂ mi₄ 'éi₂ jme₁chen₂ María. ²⁸ Jaun₂ ně₃, ca₂'í₃ ángel dsi₂néi₂ ja₁'en₅₄ María, jaun₂ ca₂juá'₂:

—iSiang'₃ María! i'E₂ gué₄ dsen'₃ 'ne₂, ia₁ quiong'₅₄ Te₁gui'₅₄!^b

²⁹ La₁ jme₁ca₂nág₂ María jág₁ ně₅, 'ŋio₅ lín₃ ca₂i₃gó'₃ dsí₅, jaun₂ ca₂'náu'₃ dsí₅ 'e₂ bá₄ jein₅ jág₁ jaun₂. ³⁰ Jaun₂ ca₂juá'₂ táng₃ ángel:

—Tsá₃ lē₁jmo₂ gang'₃, María, ia₁ a₂dse₃ dsí₅ Diú₄ jmo₂₃ ja₁cong'₂.

³¹ Ní₂, 'í₂ jan₂ guein₂ tē₂'au'₂; le₃chan₂ jan₂ guein₂ dsa₂ ŋe'₂ quiáng'₂, jaun₂ quiaín'₅₄ JESÚS. ³² 'ŋio₅ juin'₂ lén₂; quiong₃ dsa₂ a₂lín₅ Ja₁ŋi'₅₄ Diú₄ i₂guá₅ guei'₅₄ lín₃. Te₁gui'₅₄ Diú₄ ně₃, dsio₃ ne₄ta₁ quió'₅ David jme₂gui'₂. ³³ Jaun₂ jme₃góin₃ con'₂ tan₅₄ ne₄ chi'₂ dsio₄ Jacob, jaun₂ tsá₃ ma₃lǐg'₂ jmig₄ dsi₃ŋí₂ 'éi'₃ quió'₅.

³⁴ Jaun₂ ca₂ŋag₃ María ca₂ŋí'₃ ángel:

—ǎ'A₂ bá₄ lia'₂ lé₂ a₂ně₅? Ia₁ tsá₃ dsa₂ ŋe'₂ cuíng₅.

³⁵ Jaun₂ ca₂ŋag₃ ángel:

—Jme₂dsí₂ Jŋi₅ bá₄ jmo₃ a₂lé₂ le₂jaun₂ ja₁cong'₂; jui₅bí₂ quió'₅ Te₁gui'₅₄ i₂guá₅ guei'₅₄ bá₄ lio₃ 'én'₁ quió'₅. Jaun₂ lě₃, guein₂ jŋi₅ó₅

^b28 A₂lín₅₄ chog₅₄ si₂ juá'₂ ján₃: “Ma₂jme₂gu'₅₄ Diú₄ jme₂gon'₅₄ 'ne₂ con'₂ gué₄ ca₂le₃jín₃ dsa₂ mí₂.”

i₂le₃chan₂ 'éi₂, quiong₃ dsa₂ Ja₁ŋi'₅₄ Diú₄.^{c 36} Ján₃ bá₄ le₂ně₅ Elisabet
 ríng'₂, o₁ŋia'₅₄ ma₂guein'₂, ma₂tě₂ŋŋéi₂ tsi'₂ a₂quain₂₃ guein₂, jaun₂
 le₂ně₅ bá₄ le₃chan₂ jan₂ guein₂ quián₅ i₂tě'₂ dsa₂ 'io₅₄ quen₂.³⁷ Ia₁
 'i₁caun₂ tsá₃ 'e₂ cha₂ jua'₅₄ a₂tsá₃ qui'₅₄ jmig₄ Diú₄.

³⁸ Jaun₂ ca₂juá'₂ María:

—Ŋí₂, dsa₂ i₂jme₂ti₃ ta₁ ne₄ Te₁gui'₅₄ bá₄ jniá₂; jui₁le₅₄ ja₁cong₂ con'₂
 lé₅ jág₁ quiáng'₂.

Jaun₂ ca₂ŋá'₃ ángel ja₁coin₂.

Ca₂i₁jag₅₄ María ja₁quió'₄ Elisabet

³⁹ Tě₃jě₄ jmig₄ jaun₂, ca₂ŋó₃ María tě₂le₃ dséi₂ jui₅ juig₂ niog₅ má'₂
 ja₁tén₄ Judea. ⁴⁰ Jaun₂ jme₁ca₂dsióg₃, ca₂'í₃ dsi₂néi₂ quió'₅ Zacarías,
 ca₂cuin₃ Diú₄ Elisabet. ⁴¹ Jme₁ca₂nág₂ Elisabet a₂cuag₅ María Diú₄,
 dsi₂jui₅ jaun₂ bá₄ ca₂jín'₂ guein₂ tě₂dsí₅, jaun₂ ca₂rě₃cain'₂ Jme₂dsí₂
 ŋŋió₅. ⁴² Jaun₂ ca₂'í₃ co₂mí'₅₄, juá'₂:

—i'E₂ gué₄ 'ŋio₅ jme₂gu'₅₄ Diú₄ 'ne₂, lia'₂ con'₂ gué₄ 'i₁jan₂ dsa₂ mí₂
 sián'₂, le₂jaun₂ guè'₂ guein₂ quiáng'₂ ně₃! ⁴³ ĺ₂'ein₂ bá₄ jniá₂, já₅ chog₅₄
 Te₁gui'₅₄ quiáng₃ ja₂jag₅₄? ⁴⁴ Ia₁ dsi₂jui₅ jme₁ně₂cuag'₅₄ Diú₄, ca₂jín'₂ 'io'₂
 jén'₅ guein₂ quiáng₃ tě₂dsi₃. ⁴⁵ i'E₂ gué₄ dsen'₃ 'ne₂ a₂ca₂rě₃'éng'₂, ia₁
 le₃ti₃ ja₁cong'₂ a₂ma₂juá'₂ Te₁gui'₅₄!

⁴⁶ Jaun₂ María ně₃, ca₂juá'₂:

Jme₂juin'₂ tě₂dsi₃ Te₁gui'₅₄.

⁴⁷ Jme₂dsí₂ quió₃ ně₃, 'io'₂ jén'₅

le₃quió'₅ Diú₄ quiáng₃ i₂lió₂.

⁴⁸ Ia₁ Diú₄ ca₂jéin'₃ ne₅₄ ja₁con₂ jniá₂

dsi₂ŋég₂ i₂jme₂ti₃ quián₅.

Jaun₂ ně₃, le₂tan₅₄ le₃ne₄ jui₅ ja₁ŋó₄,
 tě₂ dsa₂ líng₅ i₂rě₂gon'₅₄ quián₅ Diú₄.

⁴⁹ Ia₁ 'e₂ gué₄ 'uan'₂ Diú₄,

ia₁ ca₂jmo₃ caun₂ a₂juè'₂ ja₁cong₂;

i'e₂ gué₄ ŋŋió₅ a₂chein₂!

⁵⁰ Co₂tan₅₄ bá₄ ŋéi₂ dsí₅

le₂tan₅₄ tsi₁jon₂ dsa₂ i₂jme₂go₃.

⁵¹ Quian'₅₄ gu₂ bėn₂, ca₂jmo₃ caun₂ a₂juè'₂

a₂tsá₃ 'ein₂ qui'₅₄ jmig₄.

Ia₁ co₂ŋei'₅₄ ca₂guiain'₃ 'uě₃

dsa₂ i₂con'₂ ŋí'₂ dsí₅ guion₅₄ jmo₂₃ táin'₅.

⁵² Ca₂'liain'₃ cau₅ i₂jme₁tián'₄ can'₅₄,

a₂ca₂dsiain₃ táng₃ i₂jmo₅ me'₂.

⁵³ Dsa₂ i₂jme₁chan₂ 'on₄,

ca₂jme₃tau₅₄ quian'₅₄ a₂dse₃.

^c35 o₃, “Jaun₂ ně₃, guein₂ i₂le₃chan₂ 'éi₂ quiong₃ dsa₂ guein₂ ŋŋió₅.”

I₂ŋí₄ jme₁chan₂ dse₃ guè'₂,
 ca₂'uág'₂ ca₂chei'₃ lín₃.
⁵⁴ Ca₂jme₃'oin₅₄ dsa₂ juig₂ Israel i₂jme₂ti₃ quiáin₅,
 ca₂dsia₃ ŋéi₂ dsí₅ ca₂dsáu'₃ dsí₅
⁵⁵ con'₂ lé₅ jág₁ quió'₅
 ca₂tsí'₃ Abraham jme₂gui'₂ jniog₄
 quian'₅₄ ca₂le₃jín₃ tsi₁jon₂ quiáin₅ co₂tan₅₄.
⁵⁶ Con'₂ 'ni₅ tsi'₂ ca₂dsin₃ ca₂'í₃ María ja₁quió'₄ Elisabet. Cang₂ jaun₂
 ŋái'₃ táng₃ ja₁quió'₄.

Ca₂rë₃chán₃ Juan₅₄ i₂chon₅ dsa₂ jmig₂

⁵⁷ Cang₂ jaun₂ ca₂dsin₃ jmig₄ a₂le₃chan₂ guein₂ quián₅ Elisabet, jaun₂
 ca₂rë₃chán₃ jan₂ guein₂ dsa₂ ŋe'₂ quiáin₅. ⁵⁸ Jaun₂ ca₂rë₃ŋi₅ o₁riin'₅₄,
 quian'₅₄ dsa₂ i₂tián'₅ cau₅ quió'₅ né₃, 'a₂ lia'₂ ca₂jmo₃ Te₁gui'₅₄ dse₃ dsí₅
 ja₁con₂ 'éi₂. Jaun₂ ca₂jmo₃ 'io'₂ quiong'₅₄.

⁵⁹ Jaun₂ ca₂lë₃ né₃, jme₁ca₂të₂ jnia₃ jmig₄, ca₂o₃lén₂ dsa₂ ca₂ti₃ lo₄
 guein₂, jaun₂ jme₁'nio₃ quiong₃ Zacarías lia'₂ chen₂ jmei₂. ⁶⁰ La₁ ca₂juá'₂
 chog₅₄ guein₂:

—Jan₂'ón₄. Juan₅₄ bá₄ le₃chein₂.

⁶¹ Jaun₂ ca₂ŋag₃ táng₃ dsa₂:

—'I₁jan₂ o₁ríng'₂ tsá₃ i₂chen₂ le₂në₅, jme₁né₄.

⁶² Jaun₂ ca₂jmo₃ dsa₂ léi₄ quian'₅₄ gu₂ a₂ca₂tsí'₃ jmei₂ guein₂ 'a₂ guè'₂
 lia'₂ 'nio₃ 'éi₂ le₃chen₂ guein₂. ⁶³ Jaun₂ ca₂mi₃ 'éi₂ ca₂'nau₅₄ jau₅₄ 'ma₂,
 jaun₂ ne₄ jaun₂ ca₂tióng₃: “Juan₅₄ bá₄ chein₂.” Jaun₂ ca₂i₃gó'₃ dsí₅
 ca₂le₃jín₃ tioin'₅₄. ⁶⁴ Dsi₂jui₅ jaun₂ ca₂ján₃ mi₂'o₄ Zacarías, ca₂'ág₂ 'ua₁
 táng₃ le₁tsi'₂, ca₂dsia₃ jág₁, ca₂jme₃juin'₂ Diú₄. ⁶⁵ Jaun₂ ca₂i₃gó'₃ dsí₅
 ca₂le₃jín₃ dsa₂ i₂tián'₅ cau₅, jaun₂ le₂tan₅₄ juig₂ te₁'i₁ 'uë₃ má'₂ ja₁tén₄
 Judea né₃, ca₂i₃'ag₅₄ jág₁ ca₂le₃jé₃ a₂ca₂lë₃ jaun₂. ⁶⁶ Dsa₂ i₂qui₂ca₂rë₃ŋi₅
 a₂jaun₂ né₃, jme₁'nio'₂ dsí₅ i₂gú'₃ jág₁ në₅, qui₂ŋí'₅ le₂jan₂ le₂jan₂ dsia₂₃:
 “'E₂ bá₄ lén₂ guein₂ 'éi₂?” Ia₁ dsón'₂ bá₄ dsau₅ léi₄ jme₁quiong'₅₄
 Te₁gui'₅₄ guein₂ 'éi₂.

Le₂la₂ canto a₂ca₂jme₃juin'₂ Zacarías Diú₄

⁶⁷ Zacarías jmei₂ guein₂ né₃, rë₂cain'₂ Jme₂dsí₂ Jŋi₅o₅, qui₂ca₂'ë₃ jág₁
 ca₂cuë₃ Diú₄, ca₂juá'₂:

⁶⁸ Jui₁le₂juin'₂ Te₁gui'₅₄ Diú₄

quián₅ dsa₂ juig₂ Israel,

ia₁ ma₂guain₂₃ jë₄ quián₂ jniog₄

dsa₂ juig₂ quián₅, ma₂ca₂lió₂.

⁶⁹ Ma₂ca₂cuag₃ jniog₄ jan₂ i₂'uan'₂ lín₃

i₂lín₅ lia'₂ lé₅ caun₂ mi₁juí₁,

jan₂ i₂já₅ jë₄ tsi₁jon₂ David i₂ca₂jme₃ti₃ ta₁ ne₅₄,

a₂ja₂lioin₅₄ dsa₂ quián₅.

- ⁷⁰ Le₂ně₅ jág₁ quió'₅ ca₂cuë₃ ca₃ma₂líg'₂,
 ca₂juá'₂ tē₂le₃ quian'₅₄ dsa₂ i₂jme₁'é₂ jág₁,
 i₂jme₁lé₄ 'í₁ quiáin₅,
- ⁷¹ jme₁ca₂juá'₂ a₂lió₂ o₄gú₃ dsa₂ i₂'iog₅₄,
 i₂uig₅ dsí₅ jág₂ ně₃,
- ⁷² ja₁juá'₂ ně₃ a₂tiá'₃ ηéi₂ dsí₅
 ja₁con₂ dsa₂ can'₅₄ quián₂,
 ja₁juá'₂ ně₃ dsiog'₂ dsí₅ jág₁ jñió₅ quió'₅ ron₅.
- ⁷³ A₂ně₅ bá₄ jág₁ jaun₂ ca₂quiog₂
 jme₁ca₂'iin₃ 'ηiog₅
 ca₂tsí'₃ Abraham jme₂gui'₂ jniog₄:
- ⁷⁴ a₂ca₂juá'₂ a₂lió₂ o₄gú₃ dsa₂ i₂'iog₅₄,
 ia₁jaun₂ dsiá₁ tiá₂ dsi₅ jme₁ti₁ ne₅₄,
- ⁷⁵ ia₁jaun₂ le₂chong₂ rē₂ le₃ne₅₄, lé₅ 'í₁,
 ca₂le₃jě₃ jmig₄ chong₂.
- ⁷⁶ Jaun₂ tē₂le₃ ja₁con'₂ 'ne₂ guē'₂, jón₃,
 tē₂ dsa₂ a₂lín'₅ jan₂ i₂'é₂ jág₁ quián₅ Diú₄
 i₂guá₅ guei'₅₄ lín₃,
 ia₁ gog'₅₄ ne₄ jui₅ quió'₅ Te₁gui'₅₄
 a₂jmó'₂ co₂jñia₅₄ jui₅ quió'₅.
- ⁷⁷ 'Ne₂ bá₄ o₁jmo'₄ a₂le₃cuí'₅ dsa₂ juig₂ quiáin₅
 'e₂ jaun₂ a₂lión₂ dsa₂,
 tē₂le₃ quian'₅₄ a₂'én₂ dsáu₁.
- ⁷⁸ Ia₁ ηéi₂ bá₄ dsí₅ Diú₄ quián₂ jniog₄.
 Jaun₂ lē₃, tē₂ guei'₅₄ i₂juíg₃ bá₄
 chein₂₃ caun₂ si₂,
 ně₂jag₄ bá₄ ca₂jñia₃ caun₂ jmig₄ 'mí₂
- ⁷⁹ ja₁con₂ dsa₂ i₂tián'₅ jē₄ qui₁né'₃,
 ja₁'ei₅ 'én'₁ 'mú₃ ně₃,
 a₂jio₃ jniog₄ caun₂ jui₅ ja₁'ag₃ tei₄.
- ⁸⁰ Caun₂ ca₂i₃cón₃ bá₄ guein₂ 'éi₂, caun₂ rē₂'uain'₂ bá₄ tē₂le₃ jui₅
 jme₂dsí₂ ně₃; ca₂guá₂ caun₂ ja₁lé₄ 'uē₃ quein₂ co₂'ηiog₅, ca₂lia'₂ ca₂tē₂
 jmig₄ a₂ca₂jme₃jñiai₂₃ jin₄ dsa₂ juig₂ Israel.

Ca₂rē₃chán₃ Jesús

(Mateo 1:18-25)

- 2** ¹ Jaun₂ ca₂lē₃ ně₃ jmig₄ jaun₂ ca₂jmo₃ 'éi'₃ gui'₅₄ Emperador
 Augusto, a₂cho₃ si₂ tioin₃ ca₂le₃jín₃ dsa₂ ta₁caun₂ mī₂güí₃.
- ² (Jē₁le₂'uig₅₄ si₂ ně₅ ca₂cho₃ dsa₂ lia'₂ con'₂ jme₁lín₄ Cirenio dsi₄má'₂
 'uē₃ Siria.) ³ Jaun₂ jma₃quén₅ ca₂tín₂ dsa₂ ca₂le₃jín₃ dsi₃lein₃ juig₂ go₅₄,
 a₂qui₂dsi₃tioin₃ si₂.
- ⁴ Jaun₂ ca₂'í₃ José jui₅ ca₂o₃'ín₃ juig₂ Nazaret ja₁tén₄ 'uē₃ Galilea,
 ca₂ñái'₃ jui₅ 'uē₃ Judea a₂dsiáin'₄ Belén, go₄ David, ia₁ dsa₂ tsi₁jon₂

David bá₄ jme₁lín₄ José. ⁵ Ca₂i₁tioin₃ si₂ ja₁jaun₂ quian'₅₄ María i₂ma₂li'₅₄ jág₁ jéin'₂ gu₂ quiaín'₅₄; ma₂quiaín'₂₃ bá₄ guein₂ ñi₂₃. ⁶ Ca₂lë₃ në₃, con'₂ ma₂tioin'₅₄ ja₁jaun₂, ca₂dsin₃ jmi₄g₄ a₂le₃chan₂ guein₂ quiaín'₅. ⁷ Ja₁jaun₂ ca₂rë₃chán₃ guein₂ ne₅₄ 'éi₂ quiaín'₅, 'ein₅₄ ca₂lio₃ 'mi'₂, ca₂quio₂₃ 'ñió'₃ tsi₁gu₅ ja₁gué'₅ já'₂, 'uig₅₄ ia₁ a₂tsá₃ ma₃ja₁ca₂tíin₂ dsi₂néi₂ ja₁siá'₂ ja₁jñia₃.

Ca₂jme₃jnia₅ ángel ne₄ dsa₂ i₂jmo₅ 'í₁ já'₂ cha'₂

⁸ Uë₃ jaun₂ jme₁tion'₅₄ jñia₅ ja₁nau₂ co₂nió'₃ dsa₂ i₂jmo₅ 'í₁ já'₂ cha'₂ quiaín'₅, a₂'uë₂ jaun₂. ⁹ Ca₂jme₃jnia₅ jan₂ ángel quiaín'₅ Te₁gui'₅₄ ne₅₄, ca₂jnia₃ co₂tág₅ co₂'né'₅ quió'₅ Te₁gui'₅₄ le₃lág'₃ ja₁tioin'₅₄, jaun₂ ca₂rë₃gó'₅ 'ñio₅ lín₃. ¹⁰ La₁ ca₂juá'₂ ángel:

—Tsá₃ jmo₂ 'nia'₂ gang'₃. Ní₂, a₂i₃'é₃ jág₁ dse₃ bá₄ jniá₂ guio₃, caun₂ jág₁ quió'₅ ca₂le₃jín₃ dsa₂, jiá₃ cán₂ o₂'ñió₃ dsi₅. ¹¹ Ia₁ jmi₄g₄ në₃, ca₂rë₃chan₂ o₄quiaín'₂ 'nia'₂ juig₂ go₄ David, jan₂ i₂lió₂, i₂lín₅ Te₁gui'₅₄ I₂rë₂'ín₁ quiaín'₅ Diú₄. ¹² Quian'₅₄ léi₄ la₂ o₁quion'₂ 'nia'₂ 'í₁: dsian'₂ 'nia'₂ guein₂ rë₂bón'₅ 'mi'₂, rë₂quiaín'₂₃ 'ñió'₃ tsi₁gu₅ ja₁gué'₅ já'₂.

¹³ Dsi₂jui₅ con'₂ tsá₃ jáin₅, ca₂jfin₂ juin₅ lín₃ ángeles sián'₂ con₂ ángel 'éi₂, ca₂tóin'₂ jme₂juin'₂ Diú₄ ca₂juá'₂:

¹⁴ iJui₁le₂juin'₂ Diú₄ guei'₅₄ i₂juíg₃!

Ne₄ gua'₅₄ 'uë₃ në₃,

jui₁'ei₅ tei₄ ja₁con₂ dsa₂ mi₂güí₃

i₂ma₂dsia₅ Diú₄ dse₃ dsí₅ o₄quió'₄.

¹⁵ Ca₂lë₃ në₃, jme₁ma₂i₃len₃ ángeles guei'₅₄ i₂juíg₃, jaun₂ ca₂jme₃lióg₃ dsa₂ i₂jmo₅ 'í₁ já'₂ cha'₂ 'éi₂ qui₂ca₂tsí'₃ riin'₅₄:

—Ma₃ jniog₄ jui₅ Belén, ma₃ dsi₁jag₅₄ a₂ca₂lë₃ ja₁jaun₂, con'₂ lë₅ jág₁ ma₂në₂'é₂ Te₁gui'₅₄.

¹⁶ Ca₂i₃lëin₂ jaun₂ në₃ tē₂le₃ dséi₂. Dsón'₂ rē'₂ ja₁jaun₂ ca₂dsáin'₂ María quian'₅₄ José, guein₂ në₃ rē₂quiaín'₂₃ 'ñió'₃ gu₅ ja₁gué'₅ já'₂.

¹⁷ Jme₁ca₂jág₂, jaun₂ gué₄ ca₂dsia₃ 'a₂ lia'₂ lë₅ jág₁ a₂ca₂nág₂, a₂ca₂'é₂ ángel a₂'iin₂₃ guein₂, ¹⁸ jaun₂ ca₂i₃gó'₃ dsí₅ ca₂le₃jín₃ dsa₂ i₂ca₂nág₂ jág₁ a₂dsia₅ dsa₂ i₂quiaín'₅ já'₂ cha'₂ 'éi₂. ¹⁹ La₁ María në₃, 'no'₂ bá₄ dsí₅ ca₂le₃jé₃, 'e₂ jein₅ a₂lë₂ jaun₂. ²⁰ Dsa₂ i₂jmo₅ 'í₁ já'₂ cha'₂ në₃, ca₂i₃lein₃ bá₄ táng₃ qui₂jme₂juin'₂ Diú₄, qui₂cuë₂₃ ti₁'mag'₄ o₄quió'₄ ca₂le₃jé₃ a₂ca₂té₂ ne₅₄ quian'₅₄ a₂qui₂ca₂nág₂. Ia₁ ca₂le₃jé₃ bá₄ ca₂rë₃ti₃ con'₂ lë₅ ca₂juá'₂ ángel.

Ca₂i₁jme₁jniai₂₃ guein₂ Jesús guá'₅

²¹ Jme₁ca₂dsin₃ jñia₃ jmi₄g₄, ca₂ti₃ dsa₂ lo₄ guein₂, jaun₂ ca₂quiong₃ JESÚS^d lia'₂ con'₂ lë₅ ca₂juá'₂ ángel ca₂tsí'₃ María né'₃ a₂caun₂.

^d21 Lia'₂ chen₂ Jesús (hebreo: Yeshua) jein₅ jág₁ “Lió₂ bá₄ Te₁gui'₅₄.”

²² Jme₁ca₂dsin₃ jmig₄ a₂i₄ 'éi'₃ jmo₃ le₁jín₃ a₂jme₂ti₃ lia'₂ con'₂ lé₅ 'Éi'₃ quió'₅ Moisés, ca₂i₁lein₅₄ Jerusalén jñiai₂₃ guein₂ i₁jein'₅₄ ne₄ Te₁gui'₅₄.

²³ Ca₂jmo₃ le₂në₅ ia₁ ton₅ ne₄ Si₂ quió'₅ Te₁gui'₅₄: “Ca₂le₃jín₃ guein₂ dsa₂ ñe'₂ i₂ne₅₄ i₂le₃chan₂, léin₂ i₂lé₅ 'í₁ quián₅ Te₁gui'₅₄.”^e ²⁴ Ja₁jaun₂ ca₂jén'₃ ján₃ con'₂ lé₅ juá'₂ 'éi'₃ quió'₅ Te₁gui'₅₄: “On₃ i₁ju₂, o₃ co₂dsán'₃ i₁ju₂ bë₂ 'e₂.”^f

²⁵ Jmig₄ jaun₂, jme₁chan₂ jan₂ dsa₂ jë₄ juig₂ Jerusalén i₂jme₁chen₂ Simeón. Jme₁lín₄ jan₂ dsa₂ dsen₃ lín₃, i₂jme₁jme₂gan₃ Diú₄; jme₁chain₂ chi₁jñia₂₃ a₂guán₂ i₂cuë₃ lián'₂ quió'₅ dsa₂ juig₂ Israel. Jme₁quiong'₅₄ Jme₂dsí₂ Jñiós₅; ²⁶ 'éi₂ bá₄ ma₂ca₂'é₂ jág₁ ne₅₄ a₂tsá₃ jóin₂ ca₂lia'₂ ca₂jín₂ de'₂ I₂rë₂'ín₁ quián₅ Te₁gui'₅₄. ²⁷ Jmig₄ jaun₂ ñó₃ jiog₅ Jme₂dsí₂ Jñiós₅ jui₅ guá'₅ templo. Ja₁jaun₂ jme₁'ein₅₄ në₃ jme₁ca₂dsi₃lén₂ chog₅₄-jmei₂ guein₂ Jesús, jñiai₂₃ guein₂ a₂jmo₃ quiong'₅₄ con'₂ lé₅ tag₄ chí'₅ a₂quí'₅ 'Éi'₃.

²⁸ Jaun₂ ca₂jñau'₃ Simeón ca₂jñai'₃ guein₂, ca₂jme₃juin'₂ Diú₄, ca₂juá'₂:

²⁹ Në₃ gué₄ në₃, 'ne₂ juig₃ quiáng₃,

ma₂lé₂ dsiang'₅₄ tei₄

dsa₂ i₂jme₂ti₃ ne'₅₄,

lia'₂ con'₂ lé₅ jág₁ quiáng'₂.

³⁰ Ia₁ la₂ ca₂té₂ ne₃ i₂ma₂cheng'₂ lió₂,

³¹ i₂ma₂jmo'₅₄ co₂jñia₅₄ quián₅ ca₂le₃jé₃ juig₂ nación.

³² I₂la₂ bá₄ i₂lín₅ si₂

i₂jmo₃ tág₅ ja₁con₂ dsi₂nau₂;

i₂la₂ bá₄ i₂lín₅ dsa₂ i₂chi'₃ jlá'₁

juig₂ Israel quiáng'₂.

³³ Ca₂i₃gó'₃ dsí₅ bá₄ José quian'₅₄ chog₅₄ guein₂, o₄quió'₄ jág₁ a₂ca₂juá'₂ Simeón jaun₂, 'iin₂₃ guein₂. ³⁴ Jaun₂ ca₂jme₃gu'₅₄ Simeón quió'₅, jaun₂ ca₂juá'₂ ca₂tsí'₃ María chog₅₄ guein₂:

—Ní₂, 'en₅₄ jui₅ guein₂ la₂ jág₅, jmo₃ a₂dsi₃gan'₅₄ 'uë₃ juin₅ dsa₂ juig₂ Israel, o₃ të₂le₃ ron'₂ juin₅ 'e₂. Já₅ lín₅ caun₂ léi₄ quió'₅ i₂'ag₃ i₂náu₃ quen₅ i₂le₃'iog₅₄. ³⁵ Le₂në₅ bá₄ jióg'₃ 'í₁ le₃jniá₂ 'a₂ lia'₂ dsi₂jiog₅ dsí₅ dsa₂ le₂jan₂ le₂jan₂. La₁ të₂le₃ ja₁cong'₂ në₃, dsi₃ñíg'₂ në₂jag₄ bá₄ caun₂ ñi₁tág₂ dsi₂tia₃ të₂'au'₂.

³⁶ Ján₃ bá₄ jaun₂ jme₁'en₅₄ jan₂ guiong'₂ i₂chen₂ Ana, ja₁míg₄ Fanuel, dsa₂ tsi₁jon₂ Aser. 'Éi₂ në₃ jme₁'é₂ jág₁ o₄quió'₄ Diú₄ ján₃. Jme₁ma₂guein'₂. Mei'₂ bá₄ lia'₂ con'₂ ca₂jen'₂ gu₂. Guio₃ ñi₂ bá₄ ca₂rë₃quiain'₅₄ dsa₂ ñe'₂ quiáin₅. ³⁷ Quén'₂ ne₂guióg₂ rë₂dsí₂ quén₂ (84) ñi₂ a₂ca₂rë₃'nñi₂.^g Guiong'₂ 'éi₂ në₃ jme₁'ein₅₄ tián₂ i₁dsi₅ guá'₅. 'Uë₂-jmi₂ bá₄ jme₁jme₂ti₃ ne₄ Te₁gui'₅₄ chi₂lén'₂ Diú₄ a₂jme₂'iin₅₄ në₃. ³⁸ Hora jaun₂ dé₄ ca₂dsióg₃ ja₁tión₂ dsa₂, ca₂cué'₃ ti₁'mag'₄ Diú₄, ca₂dsia₃ jág₁

^e23 Éxodo 13:2.

^f24 Levítico 5:11; 12:8.

^g37 o₃, “Ma₂'ein₅₄ quén'₂ ne₂guióg₂ rë₂dsí₂ quén₂ (84) ñi₂.”

'iin₂₃ guein₂ tsí'₅ ca₂le₃jín₃ dsa₂ i₂tion'₅₄ i₂le₁jñia₅ a₂lión₂ dsa₂ juig₂
Jerusalén.

Ca₂i₃lein₃ táng₃ Nazaret

³⁹ Jaun₂ né₃ jme₁ma₂ca₂lë₃ jmo₂₃ ca₂le₃jé₃ con'₂ lé₅ ta₁ quí'₅ 'Éi'₃ quió'₅
Te₁gui'₅₄, jaun₂ ca₂i₃lein₃ jui₅ 'uë₃ Galilea, ja₁nio₅ Nazaret, juig₂ go₅₄.

⁴⁰ Guein₂ né₃, caun₂ ca₂i₃juin'₂ bá₄, caun₂ ca₂rë₃'uáin'₃ né₃, ton'₂ 'ñio₅
lín₃ ñi₅, Diú₄ bá₄ jme₁jme₂gu'₅₄.

Lia'₂ con'₂ me'₂ Jesús ca₂dsióg₃ i₁dsi₅ guá'₅

⁴¹ Ca₂le₃jé₃ ñi₂ jme₁dsi₂lén₂ chog₅₄-jmei₂ Jmig₄ Të₂'in₅₄ a₂të₅ Jerusalén.

⁴² Jme₁ca₂dsí'₃ Jesús guia₃-tín₂ ñi₂, ca₂i₃lén₂ táng₃ co₂dsia₅ jui₅
Jerusalén. Ia₁ le₂jaun₂ tin₂ dsa₂ ca₂le₃jé₃ ñi₂ dsi₃lén₂ jmig₄ jaun₂.

⁴³ Jme₁ca₂gú'₃ jmig₄, ca₂i₃lein₃ táng₃. Tsá₃ ca₂rë₃lí'₄ chog₅₄-jmei₂ jñia'₅₄
jaun₂ bá₄ të₁'ñia₄ Jesús Jerusalén, ⁴⁴ ia₁ lín₂ ma₂ñái'₅ bá₄ quiaín'₅₄ dsa₂
sián'₂. Caun₂ jmig₄ ma₂ne₁ñó₄ tioin'₅₄ jui₅ i₃lein₃ jme₁ca₂'nau'₂ jin₄
o₁riin'₅₄, jin₄ dsa₂ i₂cuin₂₃ né₃. ⁴⁵ La₁ tsá₃ ca₂dsáu'₂. Jaun₂ ca₂jéin'₃ táng₃
jui₅ ca₂i₃lén₂ Jerusalén ca₂i₁'niog'₂ ja₁jaun₂.

⁴⁶ A₂'ni₅ jmig₄ jaun₂ jme₁ca₂dsáu'₂ i₁dsi₅ guá'₅, guá₅ jin₄ të₅juá'₅, nag₂₃
jág₁, ñag₂₃ ñí'₅ 'éi₂ né₃. ⁴⁷ Jaun₂ ca₂i₃gó'₃ dsí₅ ca₂le₃jín₃ i₂tion'₅₄ nag₅
jág₁ quió'₅, ia₁ 'ñio₅ lín₃ ñi₅ 'a₂ lia'₂ qui₂jéin'₃ jág₁ quió'₅ dsa₂ 'éi₂.

⁴⁸ Jme₁ca₂jág₂ chog₅₄-jmei₂, ca₂i₃gó'₃ dsí₅, jaun₂ ca₂juá'₂ chog₅₄:

—Jón₃, ¿'e₂ lë₃ jmog'₅₄ le₂në₅? Nèi'₅, jniá₂ né₃, ma₂në₂i₁nio₁ 'i₅ dsi₅
'niog'₂ jnia'₅₄.

⁴⁹ Jaun₂ ca₂ñag₃ Jesús:

—¿'E₂ lë₃ 'nau'₂ 'nia'₂ jniá₂? ¿Tsa₁ ñi'₅₄ 'nia'₂ a₂ca₂tíng₂ 'ú₄ ta₁ quió'₅
Ñe'₃?

⁵⁰ La₁ tsá₃ ca₂ñí'₂ dsí₅ 'éi₂ 'e₂ jein₅ jág₁ jaun₂.

⁵¹ Jaun₂ ca₂jóin'₃ bá₄ quiaín'₅₄ chog₅₄-jmei₂ jui₅ Nazaret. Caun₂ bá₄
ne'₅₄ ca₂le₃jé₃ a₂të₂néi'₂ chog₅₄-jmei₂. La₁ tei₄ bá₄ 'ma₅ chog₅₄ dsí₅
ca₂le₃jé₃ a₂jaun₂. ⁵² Jaun₂ caun₂ ca₂i₃juin'₂ bá₄ Jesús, rë₂ niog₅ dsi₅₄, rë₂
chéin'₅ le₃ne₄ Diú₄, lia'₂ le₃ne₄ dsa₂ né₃.

'É₂ Juan₅₄ i₂chon₅ dsa₂ jmig₂ jág₁ caun₂ 'uë₃ quein₂ co₂'ñiog₅

(Mateo 3:1-12; Marcos 1:18; Juan 1:19-28)

3 ¹ Ñi₂ guia₃-ñiá₂ lia'₂ con'₂ jme₁lín₄ emperador Tiberio, jmig₄ lia'₂
con'₂ jme₁lín₄ táng₃ Poncio Pilato dsi₄má'₂ 'uë₃ Judea; Herodes
guë'₂ jme₁lín₄ rag₅₄ i₂jmo₅ 'éi'₃ 'uë₃ Galilea; Felipe riin'₅₄ guë'₂ jme₁lín₄
dsi₄má'₂ le₂tan₅₄ juig₂ Iturea quian'₅₄ Traconite; Lisánias né₃ jme₁lín₄
dsi₄má'₂ quián₅ Abilinia. ² Ján₃ bá₄ jmig₄ jaun₂ jme₁lín₄ jme₂dsa₂ dsen₅₄
Anás quian'₅₄ Caifás. Con'₂ jmig₄ jaun₂ dé₄ né₃, ca₂të₃ Diú₄ ca₂të'₃
Juan₅₄, ja₁ñi'₅₄ Zacarías, 'uë₃ co₂'ñiog₅ ja₁jme₁guá₄. ³ Juan₅₄ né₃ ca₂ñi₃
le₂tan₅₄ juig₂ te₁'i₁ ma₂quián₅ Cuá₃ Jordán, qui₂tsí'₅ dsa₂ a₂'nió'₅ tsóin₃

jmig₂, cuë₃ léi₄ a₂ma₂ca₂dsi₃quén'₅ dsí₅ ia₁jaun₂ le₃'én₂ Diú₄ dsáu₁.

⁴Le₂në₅ bá₄ ca₂lë₃ ca₂rë₃ti₃ con'₂ lë₅ jág₁ a₂ca₂tó'₂ Isaías ne₄ si₂, i₂jme₁'ë₂ jág₁ o₄quió'₄ Diú₄, a₂ca₂juá'₂:

Nag₃ dsa₂ co₂mi'₅₄ jág₁

caun₂ 'uë₃ co₂'ñiog₅, a₂juá'₂:

Jmo₄ 'nia'₂ co₂jñia₅₄ jui₅ quió'₅ Te₁gui'₅₄;

Nia₄ 'nia'₂ caun₂ jui₅ co₂dsau₅.

⁵Ca₂le₃jé₃ ji'₅₄ siá₅ 'nió'₅ le₃can'₂,

ca₂le₃jé₃ dsi₂con'₂, má'₂, 'nió'₅ 'ag₃ co₂rë₂;

Ca₂le₃jé₃ jui₅ qui₂rë₂guion'₂, 'nió'₅ lé₂ co₂dsau₅,

jui₅ a₂qui₂le₁quin'₅₄, 'nió'₅ lei₂.

⁶Ca₂le₃jín₃ dsa₂ mi₂güí₃ bá₄ jág₃

'a₂ lia'₂ lë₅ a₂jmo₃ Diú₄ lió₂.^h

⁷Jaun₂ ca₂'uin₂ dsa₂ quió'₅, ca₂o₃lén₂ mi₂₃ cho₃ Juan₅₄ jmig₂,ⁱ jaun₂ ca₂juá'₂ 'éi₂:

—i'Nia'₂ tsi₁jon₂ dsi₂mi'₂! ¿'Ein₂ bá₄ në₂chí'₃ 'nia'₂ a₂cuing'₂ long'₅₄ uig₅ a₂ja₂quián₃? ⁸Cuë₄ 'nia'₂ léi₄ jaun₂ a₂të₃dsón'₂ ma₂ca₂dsi₃quén'₅ 'au'₂. 'A₃ lë₁jui₁dsi₂jñia₅ 'au'₂ 'nia'₂ jua'₅₄ a₂jua'₅₄: “Lág₅ jnia'₅₄ tsi₁jon₂ Abraham”; ia₁ jniá₂ juá'₅, Diú₄ qui'₅₄ jmig₄ jmo₃ ca₂të₂ ni₁cang₁ tio'₅₄ la₂, lé₂ le₃jmói'₂ chí'₂-guein₂ quián₅ Abraham. ⁹Ia₁ ma₂lë₅ co₂jñia₅₄ ñi₁dsi₁ a₂qui₃uín'₂ ni₁'ma₂. Ca₂le₃jé₃ 'ma₂ a₂tsá₃ dse₃ míg₂ 'ag₅, uín'₂ dsi₃to'₅₄ si₂.

¹⁰Jaun₂ ca₂ñag₃ dsa₂:

—¿'E₂ bá₄ le₃jmó₁ jnia'₅₄ jaun₂ në₃?

¹¹Jaun₂ ca₂ñag₃ táng₃:

—I₂cha₂ tin₃ dsán'₃ tsin'₅₄, jui₁cué'₄ co₂dsán'₃ i₂tsá₃ cha₂ quió'₅; le₂jaun₂ guë'₂ jui₁lia'₂ i₂cha₂ a₂guë'₃, jui₁jme₂'oin₅₄ jui₁lia'₂ i₂tsá₃ cha₂ quió'₅.

¹²Ca₂o₃lén₂ i₂lín₅₄ i₂cán₂ 'lia'₅₄ quián₅ dsi₂tan₅₄ në₃, a₂'nio₃ tsóin₃ jmig₂, jaun₂ ca₂tsí'₃ Juan₅₄:

—Të₅, ¿'e₂ bá₄ lé₂ le₃jmó₁ jnia'₅₄?

¹³Jaun₂ ca₂jéin'₃ táng₃ 'éi₂ jág₁:

—Tsá₃ jmó'₂ 'nia'₂ jua'₅₄ a₂cán'₁ ñag₅₄ guë'₄ 'lia'₅₄ quió'₅ dsa₂, jua'₅₄ a₂dsi₁jui₁n'₅₄ con'₂ 'éi₃ qui'₅ si₂.

¹⁴Ca₂o₃lén₂ i₂lín₅₄ 'lióg₂ në₃, ca₂ñag₃:

—Jnia'₅₄ guë'₂ në₃: ¿'E₂ bá₄ ca₂tág₂ jnia'₅₄ jmó₁?

Jaun₂ ca₂ñag₃:

—Tsá₃ qui₁quiang'₄ dsa₂ jué'₅, jua'₅₄ a₂qui₁jñiá'₄ 'e₂ qui₁jñiá'₄ quió'₅, on₃ guë'₂ qui₁'níg'₄ dsa₂ jua'₅₄ a₂lë₁qui₁'nín'₄. Jui₁le₂'ñio₂ bá₄ 'au'₂ 'nia'₂ ján₃, con'₂ ma₂tí₅ 'liang'₅₄.

^h4-6 Isaías 40:3-5.

ⁱ7 lit. “tióg₂ Juan₅₄ jmig₂.”

¹⁵ La₁ dsa₂ ně₃, tsá₃ tei₄ le₁ 'ág₄ dsí₅ tioen'₅₄, le₁ njia₂₃ le₃ njí₅ chi₂ jua'₂ Juan₅₄ 'éi₂ bá₄ lín₅ I₂ rē₂ 'ín₁ quián₅ Diú₄. ¹⁶ Jaun₂ ca₂ juá'₂ Juan₅₄ 'ñiog₅, ca₂ tsí'₃ ca₂ le₃ jín₃:

—Jniá₂ ně₂ tiáng₃ 'nia'₂ jmiğ₂; la₁ i₂ já₅ chi₂ quín₃ ně₅, tióg₂ Jme₂ dsí₂ Jñiό₅, jē₄ si₂ ně₃. 'Éi₂ bá₄ i₂ 'uan'₂ gué₄ lia'₂ con'₂ gué₄ jniá₂, ca₂ lia'₂ jñia'₅₄ lau₂ ton₅ tag₅₄ bá₄ tsá₃ ca₂ títg₂ tsi'₅₄. ¹⁷ Ma₂ chi₁ chan'₂ si₂ jmu₂ a₂ jme₂ dse₃ míg₂ trigo. Cág'₃ dse₃ lín₃, con'₂ dsia₃ jmá'₃ a₂ dse₃, 'ma₃ dsi₂ néi₂. Dsí'₂ bá₄ jme₁ qui₅ dsi₂ si₂ ja₁ tsá₃ líg'₂ jmiğ₄ éi₃.

¹⁸ Jaun₂ le₂ ně₅ bá₄, 'lióng₂ jág₁ dse₃ siá'₂ ca₂ to'₂ Juan₅₄, ca₂ jme₃ tiin₂₃ dsa₂ jág₁ dse₃.

¹⁹ Ján₃ bá₄ ca₂ jéin₂ Rag₅₄ Herodes, ia₁ a₂ jme₁ ma₂ guá₅ 'éi₂ quian'₅₄ 'io₅₄ Herodías dsa₂ mí₂ quián₅ riin'₅₄,^j ne₄ 'lióng₂ gué₄ a₂ 'lig'₅₄ siá'₂ a₂ jme₁ jmo₅-dsáu₅ Herodes; ²⁰ la₁ tē₂ le₃ ñag₅₄ gué₄ ca₂ jme₃ ja₃: né'₃ 'má₃ bá₄ ca₂ tiáin₂ Juan₅₄.

Ca₂chon₃ Juan₅₄ jmiğ₂ Jesús

(Mateo 3:13-17; Marcos 1:9-11)

²¹ Jme₁ ma₂ ca₂ lē₃ choin₂₃^k jmiğ₂ ca₂ le₃ jín₃ dsa₂, jme₁ ma₂ ně₂ chon₃ a Jesús jmiğ₂, a₂ ma₂ chéin'₅ chi₂ lén'₂ Diú₄ ně₃. Tē₃ jē₄ jaun₂ ca₂ niá₃ dsi₄ i₂ juíg₃. ²² Ca₂ sión₃ Jme₂ dsí₂ Jñiό₅ chi₁ dsáin₃ jniái₂ lia'₂ jniá₂ jan₂ i₁ ju₂, ne₄ quió'₅. Jaun₂ ca₂ né'₂ jág₁ a₂ já₅ guei'₅₄ i₂ juíg₃ a₂ juá'₂:

—'Ne₂ bá₄ líng'₅ jón₃ quiáng₃ i₂ 'nióg₃ gué₄ lín₃; 'ñio₂ bá₄ dsi₃ 'ñio₅ lín₃ jing₅₄ 'ne₂.^l

Dsa₂ can'₅₄ quián₅ Jesús i₂ qui₂ ma₂ ñí₂ ma₂ dsi₃ jo₃

(Mateo 1:1-17)

²³ Con'₂ guióg₂-guiá₂ ñi₂ bá₄ jme₁ ma₂ 'en₅₄ Jesús lia'₂ con'₂ jme₁ ca₂ jme₃ lióg₃ ca₂ jme₃ tiin₂₃ dsa₂ jág₁ dse₃. Dsa₂ ně₃, jmo₂₃ dsí₅ a₂ lín₅ 'éi₂ ja₁ ñi'₅₄ Sē₄.

Jaun₂ Sē₄ 'éi₂ ca₂ já₃ ca₂ liin₃ ja₁ ñi'₅₄ Elí.

²⁴ Elí 'éi₂ guē₂ ně₃ ca₂ já₃ ca₂ liin₃ ja₁ ñi'₅₄ Matat;

Matat 'éi₂ guē₂ ně₃ ca₂ já₃ ca₂ liin₃ ja₁ ñi'₅₄ Leví

i₂ jme₁ lín₄ ja₁ ñi'₅₄ Melqui;

Melqui ně₃ jme₁ lín₄ chi'₂ quián₅ Jana,

i₂ jme₁ lín₄ chi'₂ quián₅ José;

²⁵ José ně₅ ně₃ ca₂ já₃ ca₂ liin₃ chi'₂ quián₅ Matatías;

Matatías guē₂ ně₃ ca₂ já₃ ca₂ liin₃ ja₁ ñi'₅₄ Amós;

Amós jme₁ lín₄ ja₁ ñi'₅₄ Nahum;

^j19 A₂ lín₅₄ chog₅₄ si₂: “Felipe riin'₅₄.”

^k21 lit. “tiáin₂.”

^l22 A₂ lín₅₄ chog₅₄ si₂ tsá₃ chi₁ ton₅ “i₂ 'nióg₃ gué₄ lín₃”, a₂ chi₁ ton₅ táng₃ “jmiğ₄ ně₃ ca₂ ling₃ ñéi'₅.”

Nahum guë'₂ jme₁lín₄ ja₁ñi'₅₄ Esli,
 i₂jme₁lín₄ chi'₂ quián₅ Nagai
²⁶ i₂jme₁lín₄ chi'₂ quián₅ Ma'at;
 Ma'at guë'₂ ca₂já₃ ca₂liin₃ ja₁ñi'₅₄ Matatías;
 Matatías guë'₂ ca₂já₃ ca₂liin₃ chi'₂ quián₅ Semei;
 Semei 'éi₂ né₃ ca₂já₃ ca₂liin₃ ja₁ñi'₅₄ i₂chen₂ José;
 José guë'₂ né₃ ca₂já₃ ca₂liin₃ ja₁ñi'₅₄ Judá;
²⁷ Judá 'éi₂ guë'₂ né₃ ca₂já₃ ca₂liin₃ ja₁ñi'₅₄ Joana;
 Joana 'éi₂ guë'₂ né₃
 ca₂já₃ ca₂liin₃ chi'₂ quián₅ i₂jme₁chen₂ Resa;
 Resa guë'₂ né₃
 ca₂já₃ ca₂liin₃ ja₁ñi'₅₄ i₂chen₂ Zorobabel;
 Zorobabel guë'₂ né₃
 ca₂já₃ ca₂liin₃ chi'₂ quián₅ i₂jme₁chen₂ Salatiel,
 i₂jme₁lín₄ ja₁ñi'₅₄ Neri,
²⁸ i₂jme₁lín₄ ja₁ñi'₅₄ Melqui,
 i₂jme₁lín₄ ja₁ñi'₅₄ Adi,
 i₂jme₁lín₄ chi'₂ quián₅ i₂chen₂ Cosam,
 i₂jme₁lín₄ chi'₂ quián₅ Elmodam,
 i₂jme₁lín₄ chi'₂ quián₅ i₂jme₁chen₂ Er,
²⁹ i₂jme₁lín₄ chi'₂ quián₅ Josué;
 Josué né₃ ca₂já₃ ca₂liin₃ ja₁ñi'₅₄ Eliezer;
 Eliezer guë'₂ né₃ ca₂já₃ ca₂liin₃ ja₁ñi'₅₄ Jorim,
 i₂jme₁lín₄ ja₁ñi'₅₄ Matat;
³⁰ Matat guë'₂ né₃ ca₂já₃ ca₂liin₃ ja₁ñi'₅₄ Leví;
 Leví guë'₂ né₃ ca₂já₃ ca₂liin₃ ja₁ñi'₅₄ Simeón;
 Simeón guë'₂ né₃ ca₂já₃ ca₂liin₃ ja₁ñi'₅₄ Judá;
 Judá guë'₂ né₃ ca₂já₃ ca₂liin₃ ja₁ñi'₅₄ José;
 José 'éi₂ guë'₂ né₃ ca₂já₃ ca₂liin₃ ja₁ñi'₅₄ Jonán;
 Jonán 'éi₂ guë'₂ né₃ ca₂já₃ ca₂liin₃ ja₁ñi'₅₄ Eliaquim;
³¹ Eliaquim guë'₂ ca₂já₃ ca₂liin₃ ja₁ñi'₅₄ Melea;
 Melea guë'₂ ca₂já₃ ca₂liin₃ ja₁ñi'₅₄ Mainán;
 Mainán guë'₂ ca₂já₃ ca₂liin₃ ja₁ñi'₅₄ Matata;
 Matata guë'₂ né₃ ca₂já₃ ca₂liin₃ ja₁ñi'₅₄ Natán;
³² Natán guë'₂ ca₂já₃ ca₂liin₃ ja₁ñi'₅₄ David;
 David 'éi₂ guë'₂ né₃ ca₂já₃ ca₂liin₃ ja₁ñi'₅₄ Isái;
 Isái guë'₂ né₃ ca₂já₃ ca₂liin₃ ja₁ñi'₅₄ Obed;
 Obed guë'₂ ca₂já₃ ca₂liin₃ ja₁ñi'₅₄ Bo'oz;
 Bo'oz guë'₂ ca₂já₃ ca₂liin₃ ja₁ñi'₅₄ Salmón;
 Salmón guë'₂ ca₂já₃ ca₂liin₃ ja₁ñi'₅₄ Na'asón;
³³ Na'asón guë'₂ né₃ ca₂já₃ ca₂liin₃ ja₁ñi'₅₄ Aminadab;
 Aminadab guë'₂ ca₂já₃ ca₂liin₃ ja₁ñi'₅₄ Aram;
 Aram guë'₂ né₃ ca₂já₃ ca₂liin₃ ja₁ñi'₅₄ Esrom;

Esrom guë'₂ ca₂já₃ ca₂liin₃ ja₁ñi'₅₄ Fares;
 Fares guë'₂ né₃ ca₂já₃ ca₂liin₃ ja₁ñi'₅₄ Judá;
³⁴ Judá guë'₂ né₃ ca₂já₃ ca₂liin₃ ja₁ñi'₅₄ Jacob;
 Jacob guë'₂ né₃ ca₂já₃ ca₂liin₃ ja₁ñi'₅₄ Isaac;
 Isaac guë'₂ né₃ ca₂já₃ ca₂liin₃ ja₁ñi'₅₄ Abraham;
 Abraham guë'₂ né₃ ca₂já₃ ca₂liin₃ ja₁ñi'₅₄ Taré;
 Taré guë'₂ né₃ ca₂já₃ ca₂liin₃ ja₁ñi'₅₄ Nacor;
³⁵ Nacor guë'₂ ca₂já₃ ca₂liin₃ ja₁ñi'₅₄ Serug;
 Serug guë'₂ ca₂já₃ ca₂liin₃ ja₁ñi'₅₄ Ragau;
 Ragau guë'₂ ca₂já₃ ca₂liin₃ ja₁ñi'₅₄ Peleg;
 Peleg guë'₂ né₃ ca₂já₃ ca₂liin₃ ja₁ñi'₅₄ Heber;
 Heber guë'₂ ca₂já₃ ca₂liin₃ ja₁ñi'₅₄ Sala;
³⁶ Sala guë'₂ ca₂já₃ ca₂liin₃ ja₁ñi'₅₄ Cainán;
 Cainán guë'₂ ca₂já₃ ca₂liin₃ ja₁ñi'₅₄ Arfaxad;
 Arfaxad guë'₂ ca₂já₃ ca₂liin₃ ja₁ñi'₅₄ Sem;
 Sem guë'₂ ca₂já₃ ca₂liin₃ ja₁ñi'₅₄ Noé;
 Noé guë'₂ ca₂já₃ ca₂liin₃ ja₁ñi'₅₄ Lamec;
³⁷ Lamec guë'₂ né₃ ca₂já₃ ca₂liin₃ ja₁ñi'₅₄ Matusalén;
 Matusalén guë'₂ né₃ ca₂já₃ ca₂liin₃ ja₁ñi'₅₄ Enoc;
 Enoc guë'₂ né₃ ca₂já₃ ca₂liin₃ ja₁ñi'₅₄ Jared;
 Jared guë'₂ né₃ ca₂já₃ ca₂liin₃ ja₁ñi'₅₄ Mahalale'el;
 Mahalale'el guë'₂ né₃ ca₂já₃ ca₂liin₃ ja₁ñi'₅₄ Cainán;
³⁸ Cainán guë'₂ né₃ ca₂já₃ ca₂liin₃ ja₁ñi'₅₄ Enós;
 Enós guë'₂ né₃ ca₂já₃ ca₂liin₃ ja₁ñi'₅₄ Set;
 Set guë'₂ né₃ ca₂já₃ ca₂liin₃ ja₁ñi'₅₄ Adán;
 Adán guë'₂ né₃ ca₂já₃ ca₂liin₃ co₂'nió'₄ ja₁ñi'₅₄ Diú₄.

Ca₂caun₃ i₂së₃dsen₃ táu₂ quió₅ Jesús

(Mateo 4:1-11; Marcos 1:12-13)

4 ¹ Jaun₂ Jesús né₃, ma₂rë₂riin₅ Jme₂dsí₂ Jñi₂ó₅, ca₂o₃'íin₃ Cuá₃
 Jordán. Ca₂jio₃ Jme₂dsí₂ caun₂ 'uë₃ quein₂ co₂'ñiog₅. ² Ja₁jaun₂
 ca₂i₁'i₅ tē₂láu₃ jmig₄, ia₁jaun₂ cáun₂ táu₂ i₂së₃dsen₃. Tsá₃ 'e₂ ca₂gué'₃
 'i₁ca₂juig₄ tē₁lia'₂ jmig₄ jaun₂. Jme₁ca₂dsan₃ jaun₂, jaun₂ gué'₄ ma₂i₁cón'₅
 'ñio₅ lin₃. ³ Jaun₂ ca₂juá'₂ i₂së₃dsen₃:

—Chi₂jua'₂ dsón'₂ líng'₅ Ja₁ñi'₅₄ Diú₄, jmo₄ jui₁le₅₄ i₁ñí'₄ ni₁cang₁ nē₅.

⁴ Jaun₂ ca₂ñag₃ Jesús:

—Chi₁ton₅ ne₄ Si₂: “On₃jua'₅₄ jmá'₃ quian'₅₄ i₁ñí'₄ le₃tan₅₄ dsa₂
 mi₂güig₃ le₃chain₂.^m ⁿ

⁵ Jaun₂ ca₂jio₃ táng₃ i₂së₃dsen₃ caun₂ má'₂ ja₁ñei₅. Ja₁jaun₂ ca₂'ë₃
 ca₂tiá₂ tei₄ ca₂le₃jé₃ juig₂ te₁'i₁ gua'₅₄ 'uë₃. ⁶ Jaun₂ ca₂juá'₂:

^m4 Deuteronomio 8:3.

ⁿ4 A₂lin₅₄ chog₅₄ si₂ juá'₂ ján₃: “a₂'nió'₅ le₂chain₂ nag₃ jág₁ quió'₅ Diú₄ né₃.”

—Gog'₂ 'ne₂ bá₄ dsia₅₄ jniá₂ ca₂le₃jé₃ juig₂ ně₅; 'ne₂ bá₄ gong'₂ lé₂, 'ó'₄ bí₂, qui₂jme₃juag'₂ dsa₂. Ia₁ a₂nio₅ ne₃ jniá₂ bá₄ ně₅, ton'₂ lé₂ le₃cué₄ jniá₂ 'ein₂ 'nio₃ cué₄. ⁷ Jaun₂ a₂lé₂ quiáng'₂ ně₁jua'₂ ca₂chi₁jne'₄ ne₃ jme₁juag'₂.

⁸ Jaun₂ ca₂ṇag₃ Jesús:

—Ne₄ Si₂^o quió'₅ Diú₄ chi₁ton₅: “Jme₁gan₃ 'nia'₂ Te₁gui'₅₄ Diú₄ quiáng'₂; ne₄ jan₂ 'éi₂ bá₄ ca₂tín'₂ 'nia'₂ jme₁ti'₄.”^p

⁹ Cang₂ jaun₂ ca₂jio₃ táng₃ i₂sě₃dsen₃ juig₂ Jerusalén, jaun₂ ca₂i₁chei'₂ caun₂ ja₁lé₄ ja₁nei₅ gué₄ ne₄ ni₁'ia'₂ guá'₅ templo, jaun₂ ca₂juá'₂:

—Chi₂jua'₂ 'ne₂ líng'₅ Ja₁ni'₅₄ Diú₄, tian'₅₄ ca₂tě₂ 'uě₃; ¹⁰ ia₁ chi₁ton₅ ne₄ Si₂:

Dsiog₃ Diú₄ o₄gú₃ ángeles quiáin₅,

jaun₂ jmo₃ 'í₁;

¹¹ guéi'₂ quian'₅₄ gu₂

ia₁jaun₂ tsá₃ jéng'₂ uig₅ nióg'₃ ni₁cang₁.^q

¹² Jaun₂ ca₂ṇag₃ Jesús:

—Ján₃ bá₄ juá'₂ ne₄ si₂: “Tsá₃ tang'₅₄ Te₁gui'₅₄ Diú₄ quiáng'₂.”^r

¹³ Jme₁ca₂dsan₃ ca₂le₃jé₃ a₂nio₅ ca₂juá'₂ i₂sě₃dsen₃ a₂cáun₂ táu₂ jaun₂, jaun₂ ca₂i₃uín₂ co₂'na₂, ně₁jua'₂ líg'₂ ca₂cuin₃ táng₃ jmig₄.

Ca₂jme₃lióg₃ Jesús ca₂jme₃tag₂₃ 'uě₃ Galilea

(Mateo 4:12-17; Marcos 1:14-15)

¹⁴ Ca₂ṇá'₃ táng₃ Jesús jui₅ 'uě₃ Galilea rě₂can'₂ Jme₂dsí₂ Ṇjió₅ tě₂dsí₅. Le₂con₂ juig₂ te₁'i₁ ma₂quián₅ jaun₂, ca₂i₃'ag₅₄ jág₁ 'ag₅ dsa₂.

¹⁵ Ca₂i₁jme₁tiin₂₃ dsa₂ le₂tan₅₄ guá'₅ sinagogas quió'₅ dsa₂, jaun₂ ca₂le₃jín₃ bá₄ dsa₂ jme₁jme₂juag'₂.

Dsiáin'₃ táng₃ juig₂ Nazaret

(Mateo 13:53-58; Marcos 6:1-6)

¹⁶ Jaun₂ ca₂ṇái'₃ jui₅ Nazaret, ja₁ca₂i₃juiin'₂. Caun₂ jmig₄ sa₅₄ ca₂'í₃ dsi₂néi₂ guá'₅ sinagoga, ia₁ le₂jaun₂ tiin₂. Jaun₂ ca₂nau₂ a₂'i₃ Si₂. ¹⁷ Jaun₂ ca₂cuě₃ dsa₂ si₂ rě₂bin₅ quió'₅ Isaías i₂jme₁'ě₂ jág₁ o₄quió'₄ Diú₄. Jme₁ma₂ně₂néi'₃ si₂, jaun₂ ca₂dsó'₂ ja₁chi₁ton₅ le₂la₂:

¹⁸ Dsín₂ Jme₂dsí₂ quián₅ Te₁gui'₅₄ ne₄ quió₃,

ia₁ ma₂ca₂'ag₃ jniá₂

a₂i₁'ě₃ jág₁ dse₃ jin₄ dsa₂ dsi₂ṇé₂.

Ca₂chei₃ a₂i₁'ě₃ jág₁ a₂lión₂ dsa₂ i₂qui₂le₁jní₅,

ton'₂ ján₃ guě'₂ jmo₅₄ jnia₅₄ jme₁ne₁ dsa₂ i₂ten₄;

^o8 A₂lin₅₄ chog₅₄ si₂ juá'₂ le₂la₂ ján₃: “Ṇjiag'₃ cau₅ quió₃ 'ne₂ Satanás, ia₁ ne₄ Si₂.”

^p8 Deuteronomio 6:13.

^q11 Salmo 91:11-12.

^r12 Deuteronomio 6:16.

qui₁long₁₂ dsa₂ i₂qui₂dsi₂ñí₂ uig₅ qui₂jmóg'₂ dsa₂;
¹⁹ a₂'é₄ jmi₄g₄ dse₃ a₂lió₂ Te₁gui'₅₄.^s
²⁰ Jaun₂ ca₂bíin₂ táng₃ si₂; ca₂jíin'₃ dsa₂ i₂jme₂'o₅₄, jaun₂ ca₂guá₂ táng₃.
 Ia₁ jaun₂ bá₄ tion'₅₄ dsa₂ ca₂le₃jíin₃ le₁ñi'₂, jág₂. ²¹ Jaun₂ ca₂jme₃lióg₃
 Jesús ca₂juá'₂:
 —Jmi₄g₄ në₃ ca₂té₂ ne'₅₄ 'nia'₂ ca₂rë₃ti₃ a₂juá'₂ Si₂ në₅.
²² Ca₂le₃jíin₃ bá₄ dsa₂ 'iin₂₃ dse₃ Jesús, dsi₂gó'₃ dsí₅ ca₂le₃jé₃ jág₁ jlá'₁
 a₂'uë'₂ 'o₅₄. Jaun₂ qui₂ca₂ñí'₃ riin'₅₄:
 —¿On₁jua'₅₄ i₂në₅ 'éi₂ i₂lín₅ ja₁ñi'₅₄ Sé₄?
²³ Jaun₂ ca₂juá'₂ Jesús:
 —A₂dsi₂jó'₃ já₅ jmi₄g₄ le₃jua'₅₄ 'nia'₂ juig'₅₄ jniá₂ quio₃^t la₂: “'Ne₂ të₅mí₅
 jma'₅₄ mí₅ 'ñiag'₂.” Le₃jua'₅₄ 'nia'₂ në₃: “A₂ca₂rë₃ne₄ jnia'₅₄ a₂ca₂jmo'₅₄
 Capernaum, ma₂në₃ jmo₄ ja₁lá₃ go'₅₄ ján₃.”
²⁴ Caun₂ ca₂juá'₂ bá₄:
 —A₂të₃dsón'₂ juá'₅ jniá₂ juíg₂ 'nia'₂, 'i₁jan₂ dsa₂ i₂'é₂ jág₁ quián₅ Diú₄,
 tsá₃ a₁jaun₂ jua'₅₄ a₂guei₃ dsa₂ dse₃ go₅₄. ²⁵ Tí₅ bá₄ jág₁ quió₃ a₂juá'₅ la₂,
 juin₅ dsa₂ mí₂ 'nág₂ i₂jme₁chan₂ Israel jmi₄g₄ lia'₂ con'₂ jme₁chan₂ Elías
 i₂jme₁'é₂ jág₁ o₄quió'₄ Diú₄, lia'₂ con'₂ ca₂rë₃'ín₃ 'ñio₅ lín₃ a₂gué'₃ dsa₂
 ta₁caun₂ juig₂ nación, ia₁ tsá₃ ma₃jmi₅ ca₂tang₂ 'ni₅ ñi₂ të₂ ca₂dsio₄. ²⁶ La₁
 ca₂lia'₂ quió'₅ 'i₁jan₂ 'io₅₄ 'nág₂ i₂jme₁chan₂ Israel, tsá₃ ca₂ñe₄ Elías,
 jñia'₅₄ lia'₂ quió'₅ jan₂ i₁náu₃ i₂jme₁guá₄ Sarepta^u a₂niog₅ quián₅ ciudad
 Sidón bá₄. ²⁷ Ján₃ bá₄ le₂jaun₂ jme₁chan₂ juin₅ dsa₂ i₂jme₁lín₄ 'mé'₅ 'iog₅
 juig₂ Israel, lia'₂ con'₂ jmi₄g₄ ca₂ñi₃ Eliseo i₂jme₁'é₂ jág₁ o₄quió'₄ Diú₄
 ján₃. La₁ ca₂lia'₂ 'i₁jan₂ i₂'éi₂ tsá₃ ca₂'lón₂, jñia'₅₄ lia'₂ jan₂ i₂jme₁chen₂
 Na'amán^v i₂jme₁chan₂ 'uë₃ Siria bá₄.
²⁸ Jme₁ca₂nág₂ dsa₂ jág₁ në₅, ca₂le₃jíin₃ con'₂ i₂tion'₅₄ guá'₅ sinagoga
 ca₂rë₃'néi₃ 'lig'₅₄. ²⁹ Qui₂ca₂nau₂ tioen'₅₄, ca₂dsei₂₃ juig₂, ca₂i₃lén₂
 le₁jio₂₃ ca₂të₂ ne₄ má'₂ ja₁lé₄ ni₁ 'lau₂ dsio'₅₄ juig₂, ia₁ a₂jme₁dsi₂jio₅
 dsí₅ jme₁tón₂ ja₁jaun₂. ³⁰ La₁ con'₂ ca₂ñi₅ bá₄ 'éi₂ jë₄ quió'₅, ca₂lón₂ ñái'₅.

Jan₂ dsa₂ i₂jme₁'en₅₄ jme₂dsí₂ 'lín'₅₄

(Marcos 1:21-28)

³¹ Jaun₂ ca₂ñó₃ Jesús juig₂ Capernaum, caun₂ juig₂ tén₅ 'uë₃ Galilea.
 Ja₁jaun₂ ca₂jme₃tiin₂₃ dsa₂ jme₁jmi₄g₄ sa₅₄. ³² 'Nio₅ lín₃ dsi₂gó'₃ dsí₅ dsa₂
 quian'₅₄ jág₁ quió'₅, ia₁ a₂'io₂₃ 'éi'₃ dsón'₂ bá₄ a₂jme₂tag₂₃. ³³ Dsi₂néi₂
 guá'₅ sinagoga ja₁tioen'₅₄ jaun₂, jme₁'en₅₄ jan₂ dsa₂ i₂'en₅₄ jme₂dsí₂
 je₂na'₅₄ të₂dsí₅. Jaun₂ ca₂guió'₃ 'éi₂, ca₂juá'₂:

^s18-19 Isaías 61:1-2.

^t23 quio₃: Jág₁ quió'₅ dsa₂ Jen'₅₄, co₂'nió'₄ le₃jua'₅₄, caun₂ jág₁ a₂ñí'₂ dsí₅ a₂ca₂quio₂ dsa₂
 can'₅₄, a₂dsia₅ dsa₂.

^u26 'Nio'₂ ja₁ton₅ 1 Reyes 17:7-24.

^v27 Na'amán: 'Í₂ 2 Reyes 5.

³⁴ —i'Ne₂ ně₃! ĩ'E₂ lē₃ tiáng'₅ jē₄ quián₂ jnia'₅₄, 'ne₂ Jesús Nazareno?^w
ĩA₂i₃'éin'₃ jnia'₅₄ bá₄ 'ne₂ ĩe'₃? Guion₄ jniá₂ 'ein₂ líng'₅: 'ne₂ líng'₅ I₂jñi₅
quián₅ Diú₄.

³⁵ Jaun₂ ca₂jí₂ Jesús, ca₂juá'₂:

—i'Tei₄ jmo₄; tén₃ dsa₂ ně₅!

Jaun₂ je₂na'₅₄ ně₃, ca₂tón₂ 'uē₃ tē₃ jág₅ ca₂le₃jín₃, jaun₂ gué₄ ca₂o₃'ín₃,
la₁ tsá₃ 'e₂ uig₅ ca₂jmóg'₂. ³⁶ Jaun₂ ca₂ja₃gó'₃ dsí₅ ca₂le₃jín₃, jaun₂
ca₂dsia₃ jág₁ jin₄ riin'₅₄, ca₂juá'₂:

—ĩ'E₂ bá₄ jág₁ ně₅? I₂nē₅ 'io₂₃ bí₂ jmo₂₃ 'éi'₃ lia'₂ ma₂'uin₂ bá₄ jme₂dsí₂
'lin'₅₄ jē₁ma₂ca₂juá'₂.

³⁷ A₂jaun₂ ně₃, ca₂i₃'ag₅₄ jág₁ le₂con₂ juig₂ te₁'i₁ ma₂quián₅ jaun₂.

Ca₂jme₃'lión₂ Jesús ma₂chog₅₄ Si₂mu₅₄ Pe₄

(Mateo 8:14-15; Marcos 1:29-31)

³⁸ A₂ca₂o₃'ín₃ Jesús guá'₅ sinagoga jaun₂, ca₂ñó₃ ja₁quió'₄ Si₂mu₅₄.
Ja₁jaun₂ jme₁rē₂quian₅ ma₂chog₅₄ 'éi₂ dso'₅₄ 'i₄ dséi₂ 'ñio₅ lín₃. Jaun₂
ca₂mi₃ dsa₂ ne₅₄ o₄quió'₄ dsa₂ dso'₅₄. ³⁹ Jaun₂ ca₂jme₃quiáin₃ cau₅ quió'₅
dsa₂ dso'₅₄, ca₂jén₂ dso₄ dséi₂. Jaun₂ ca₂o₃'ág₃ dséi₂. Dsi₂jui₅ le₂jaun₂ bá₄
ca₂nau₂ dsa₂ i₂jme₁dso'₅₄, ca₂jme₃ti₃ ne₄ dsa₂ i₂tion'₅₄.

Ca₂jme₃'lión₂ Jesús juin₅ dsa₂ dso'₅₄

(Mateo 8:16-17; Marcos 1:32-34)

⁴⁰ Tē₂le₃ ca₂nei₂ jmig₄ jaun₂, ca₂le₃jín₃ dsa₂ i₂chan₂ dsa₂ dso'₅₄ quián₅
jui₁'e₂ gué₃ dso₄ lín₅, ca₂o₃jio₃ dsa₂ ne₅₄. Jaun₂ qui₂ca₂téin₂ gu₂ le₂jan₂
le₂jan₂ dsa₂ dso'₅₄, ca₂jme₃'lió₂. ⁴¹ Juin₅ bá₄ jme₂dsí₂ je₂na'₅₄
qui₂ca₂'uúin'₂ quió'₅ dsa₂, qui₂guió'₅ juá'₂:

—i'Ne₂ líng'₅ Ja₁ñi'₅₄ Diú₄!

La₁ Jesús ně₃, ca₂jí₂ bá₄, tsá₃ ca₂cuē₃ jmig₄ jua'₅₄ a₂juá'₂ gué₄, ia₁ a₂ñi₅
rē₂ bá₄ je₂na'₅₄ a₂lín₅ 'éi₂ I₂rē₂'ín₁ quián₅ Diú₄.

Ca₂ton₃ Jesús jág₁ 'uē₃ Galilea

(Marcos 1:35-39)

⁴² Jme₁jnia₃ jaun₂, ca₂o₃'ín₃ Jesús ñó₃ caun₂ ja₁lé₄ co₂'ñiog₅. La₁
ca₂le₃jín₃ dsa₂ ca₂i₁nioi₁₂ ca₂'nau'₂. Jaun₂ ně₃ jme₁ca₂dsáu'₂, jme₁jnéi₂
jui₅ tsá₃ jme₁cuē₂₃ jmig₄ dsáin'₃. ⁴³ Jaun₂ ca₂juá'₂ Jesús:

—Ca₂tín₂ jniá₂ qui₂i₁'é₃ jág₁ jui₁lia'₂ ja₁gon₂ Diú₄, le₂tan₅₄ juig₂
ja₁siá'₂, ia₁ ta₁ ně₅ chen₄ bá₄ jniá₂ guio₃.

⁴⁴ Jaun₂ le₂nē₅ bá₄ ca₂ñi₃ Jesús ca₂'é₂ jág₁ le₂con₂ guá'₅ sinagogas
a₂te₁'i₁ ja₁tén₄ Judea.^x

^w34 o₃, “i₂chan₂ Nazaret.”

^x44 A₂lín₅₄ chog₅₄ si₂ juá'₂: “Galilea.”

Ca₂jmo₃ Jesús ca₂jon₃ dsa₂ ju₄
(Mateo 4:18-22; Marcos 1:16-20)

5 ¹ Ca₂lë₃ co₂ráun₂ jme₁'en₅₄ Jesús chei₅₄ Jmi₁ñí₄ Genesaret.^y
 Të₃jë₄ jaun₂ ca₂ñi₂ ju_{in}₅ lín₃ dsa₂, ca₂lia₂' co₂'liog₂' bá₄ tioin₅₄,
 ia₁ 'nio₃ nag₃ jág₁ quió₅ Diú₄. ² Jaun₂ ca₂jág₃ Jesús tin₃ tsi₁mu₅ a₂le₁jë₁,
 le₁'ág₄ chei₅₄ jmi_g₂, ia₁ dsa₂ i₂tsán₂' ju₄ jme₁ma₂sióin₃ i₂ráng₃ 'má₅
 quió₅. ³ Jaun₂ ca₂'í₃ Jesús caun₂ tsi₁mu₅ jaun₂, a₂lë₅ quió₅ Si₂mu₅₄.
 Jaun₂ ca₂mi₃ a₂jio_g₃ 'éi₂ ca₂juig₄ gué₄ le₃ne₄ jmi_g₂. Jaun₂ ca₂guá₂ 'ñi₃
 tsi₁mu₅, jaun₂ ja₁jaun₂ ca₂jme₃lióg₃ ca₂jme₃tiin₂₃ dsa₂. ⁴ Jme₁ca₂dsan₃
 cuë₂₃ jág₁, ca₂tsí₃ Si₂mu₅₄:

—Jñiog₅₄ mu₅ quiáng₂' le₃ja₁jí₂' gué₄. Ja₁në₅ tiong₂ 'má₅ quiáng₂',
 jaun₂ lén₂' 'nia₂' ju₄.

⁵ Jaun₂ ca₂ñag₃ Si₂mu₅₄:

—Të₅, la₂ tio₅₄' bá₄ jnia₅₄' ta₁jma₃ nei₅ ca₂néi₃, tsá₃ 'ein₂ já₂' ma₂lag₅
 jnia₅₄; la₁ i₁tion₃ caun₂ ia₁ a₂juá₂' 'ne₂.

⁶ Jme₁ca₂jmo₃ le₂jaun₂, ca₂lia₂' ju_{in}₅ lín₃ ju₄ i₃ton₅₄' jnia₅₄ mei₂' tsá₃
 ca₂gag₂ bá₄ 'má₅ quió₅ tioin₅₄. ⁷ Jaun₂ ca₂bí₂ gu₂ ca₂té₃ riin₅₄
 i₂jme₁tion₅₄ tsi₁mu₅ caun₂, ia₁jaun₂ ja₃lén₂ jme₃'o₅₄. Jme₁o₃lén₂ 'éi₂ né₃,
 ca₂jme₃cain₂' ta₁tin₃ tsi₁mu₅, jnia₅₄ mei₂' tsá₃ ca₂i₃guein₅₄ bá₄ tioin₅₄.

⁸ Jme₁ca₂jág₃ Si₂mu₅₄ në₅, ca₂ñó₃ ca₂chi₃jné₃ ne₄ Jesús, ca₂juá₂:

—Jnia₅₄ cau₅ quió₃, Te₁gui₅₄, ia₁ dsa₂ cha₂ dsáu₁ bá₄ jniá₂.

⁹ Ia₁ dsi₂gó₃ dsí₅ Si₂mu₅₄ quian₅₄ riin₅₄, ia₁ a₂ñí₄ lë₃ 'ñio₅ ju_{in}₅ ju₄
 i₂ca₂join₃. ¹⁰ Ján₃ bá₄ le₂jaun₂ Jacobo quian₅₄ Juan₅₄ i₂lín₅ ja₁ñi₅₄
 Zebedeo, ia₁ co₂dsia₅ jme₁i₂noi₅₄ quian₅₄ Si₂mu₅₄ tsáin₂' ju₄. La₁ Jesús
 né₃ ca₂juá₂' ca₂tsí₃ Si₂mu₅₄:

—Tsá₃ jmo₂ gang₃'. Ia₁ tē₂le₃ ne₄ jui₅ ja₁dsau₅₄ në₅, ñí₁ jmag₅₄ dsa₂
 mi₂güí_g₃ jui₁lia₂' jmag₂' ju₄.

¹¹ Jme₁ma₂në₂jñióg₃ tsi₁mu₅ quió₅ le₃ja₁quein₂ chei₅₄ jmi_g₂, ja₁jaun₂
 ca₂dsia₃ jë₂, ca₂i₃lén₂ bá₄ quian₅₄ 'éi₂.

Ca₂jme₃'lión₂ Jesús jan₂ dsa₂ i₂lín₅ 'mé₅ 'iog₅
(Mateo 8:1-4; Marcos 1:40-45)

¹² Co₂ráun₂ jme₁'en₅₄ Jesús caun₂ juig₂, jaun₂ ca₂dsióg₃ jan₂ dsa₂ dso₅₄
 i₂lín₅ 'mé₅ 'iog₅, ta₁jain₂. Jme₁ca₂jñin₂ Jesús, ca₂tóin₂ tē₂rë₃'éin₂ 'uë₃,
 ca₂mi₃ tion₅₄-jan₃, ca₂juá₂:

—Te₁gui₅₄, chi₂jua₂' 'niog₂', jnia₅₄ lia₂' 'ne₂ bá₄ qui₅₄ jmi_g₄ chi₅₄
 dso₄ a₂lín_g₅.

¹³ Jaun₂ ca₂néi₃ gu₂, ca₂ní₃ quió₅ dsa₂ dso₅₄, ca₂juá₂:

—'Nio₃ jniá₂. Jmo₅₄ bá₄ le₁jín_g₃.

^y1 Ján₃ bá₄ chei₂ "Jmi₁ñí₄ Galilea."

Dsi₂jui₅ jme₁ca₂juá'₂ jaun₂, ca₂jñia'₃ 'mé'₅ 'iog₅ a₂jme₁lín₄.¹⁴ Jaun₂ ca₂jmo₃ Jesús 'éi'₃ a₂tsá₃ 'ein₂ tsí'₃ 'i₁jan₂. Jñia'₅₄ lia'₂ ca₂juá'₂:

—La₁ gua₂ o₂jme₁jñia₅ ne₄ jme₂dsa₂, o₄quió'₄ a₂ma₂le₁jíng'₃, o₂jmo₄ o₂jen'₅₄ ne₄ Diú₄ con'₂ lé₅ 'Éi'₃ quió'₅ Moisés,^z co₂'nió'₄ a₂jang'₅₄ jág₁ dsau₅ jin₄ dsa₂.

¹⁵ La₁ të₂le₃ lé₅ gué₄ ca₂i₃'ag₅₄ bá₄ jág₁ ca₂le₂con₂ a₂'in₅ dsa₂ Jesús. Jaun₂ i₂juin₅ lin₃ dsa₂ i₂jme₁të₁ja₂lén₂ ñi'₂ ja₂néi₃ jág₁, i₂'nio₃ 'lión₂ né₃ 'e₂ caun₂ jmi₁uig₅ chain₂.¹⁶ La₁ jme₁dsi₂uñi₃ bá₄ 'ni'₂ juig₂ ja₁con'₂ 'ñiog₅, chi₃lén'₂ Diú₄.

Ca₂jme₃'lión₂ Jesús jan₂ dsa₂ 'lian'₂

(Mateo 9:1-8; Marcos 2:1-12)

¹⁷ Ca₂lë₃ co₂ráun₂ jme₁'en₅₄ Jesús jme₂tiin₂₃ dsa₂. Le₂con₂ jaun₂, jme₁tián'₄ i₂lin₅₄ dsa₂ fariseos, të₅juá'₅ né₃, i₂ja₂lén₂ le₂con₂ 'uë₃ Galilea, Judea, juig₂ Jerusalén né₃. Ia₁ jui₅bí₂ quió'₅ Te₁gui'₅₄ bá₄ jme₁'io₅ Jesús, a₂jme₂'lión₂ dsa₂.¹⁸ Të₃jë₄ jaun₂, ca₂dsi₃lén₂ dsa₂ le₁jñia₂₃ jan₂ dsa₂ 'lian'₂, dsín₂ ne₄ tsi₁jein₁. Jme₁'no'₂ jui₅ dsi₃toin'₅₄ dsi₂néi₂, jme₁dsi₃quio₂₃ ne₄ Jesús.¹⁹ Ia₁ tsá₃ ca₂dsó'₂ 'a₂ lia'₂ dsi₃toin'₅₄, ia₁ a₂ñí₄ lë₃ juin₅ dsa₂ tion'₅₄, jaun₂ ca₂uig₂ le₃co'₅₄ tsi₁'né₅. Jaun₂ ca₂niá₃ jë₄ gua'₅₄ lag₁, jaun₂ ca₂sió₂ lia'₂ jma₃quian'₅₄ tsi₁jein₁, dsi₂jo₂ jaun₂, ne₄ Jesús.²⁰ Jme₁ca₂jág₃ Jesús a₂'én₂ dsa₂ 'éi₂ 'ñio₅ lin₃, jaun₂ ca₂juá'₂:

—'Ne₂ dsa₂, ma₂rë₂'én₄ bá₄ dsáu'₂.

²¹ Jaun₂ né₃ ca₂jme₃lióg₃ të₅juá'₅ quian'₅₄ dsa₂ fariseos né₃ ca₂jñia₅ dsí₅: “¿I₂'ein₂ bá₄ në₅ jmái'₂ mi'₅₄ Diú₄ a₂juá'₂ le₂në₅? 'I₁jan₂ tsá₃ 'ein₂ lé₂ le₃'én₂ dsáu₁ dsa₂, jñia'₅₄ lia'₂ Diú₄ bá₄.”²² La₁ a₂lí₄ rë₂ bá₄ Jesús 'e₂ a₂qui₂dsi₂jñia₅ dsí₅ dsa₂ 'éi₂, jaun₂ ca₂juá'₂:

—¿'E₂ bá₄ lë₃ dsi₂jñiog₅ 'au'₂ 'nia'₂ le₂në₅?²³ ¿'E₂ a₂'ua₁ gué₄ ta₁, a₂juá'₄ jniá₂ juig₅₄ dsa₂ la₂: “Ma₂rë₂'én₄ dsáu'₂”, o₃ a₂juig₅₄ 'e₂ jniá₂: “Nau₂, ñi₄”?

²⁴ Ia₁ dse₃ jaun₂. La₂ jmo₅₄ jniá₂ ia₁jaun₂ le₃ñi'₅₄ 'nia'₂ a₂'io₅ bí₂ 'éi'₃ Jaun₅ dsa₂ mi₂güig₃ ne₄ gua'₅₄ 'uë₃ a₂qui₃'éin₂ dsáu₁ dsa₂.

Jaun₂ gué₄ ca₂tsí'₃ dsa₂ 'lian'₂:

—'Ne₂ juig₂ jniá₂, nau₂, quion₂ tsi₁jein₁ quiáng'₂, guan'₂.

²⁵ Dsi₂jui₅ jaun₂ të₃ jág₅ ca₂le₃jín₃, ca₂nau₂ ca₂cáun₃ tsi₁jein₁ quió'₅ ca₂ñái'₃ jme₂juin'₂ Diú₄.²⁶ Jaun₂ ca₂i₃gó'₃ dsí₅ ca₂le₃jín₃, ca₂jme₃juin'₂ Diú₄ né₃. Jaun₂ të₃jë₄ dsi₂gó'₃ dsí₅ jaun₂, qui₂ca₂tsí'₃ riin'₅₄:

—Jmig₄ në₃ ca₂të₂ ne₄ jniog₄ a₂dsi₂gó'₃ dsí₅.

^z14 'Í₂ Levítico 14.

Ca₂tě'₃ Jesús Leví

(Mateo 9:9-13; Marcos 2:13-17)

²⁷ Cang₂ jaun₂ ca₂o₃'lín₃ táng₃. Ja₁ńó₄ jaun₂, ca₂jín₂ jan₂ i₂chen₂ Leví i₂cán₂ 'lia'₅₄ a₂ca₂tín₂ dsi₂tan₅₄, guá₅ ja₁ dsi₂qui₅ dsa₂ 'lia'₅₄. Jaun₂ ca₂juá'₂ Jesús:

—Nia₅ chi₁co'₅₄ quió₃.

²⁸ Ja₁jaun₂ ca₂dsia₃ jě₂, ca₂nau₂ ńó₃ quiong'₅₄.

²⁹ Ca₂i₁jmo₅₄ Leví caun₂ má₃ pa₁ dsi₂nei₂ quió'₅ o₄quió'₄ Jesús, jaun₂ ca₂ńi'₂ juin₅ dsa₂ i₂cán₂ 'lia'₅₄ riin'₅₄. Juin₅ bá₄ dsa₂ sián'₂ ně₃ qui₂ca₂gué'₃ quiaín'₅₄. ³⁰ La₁ dsa₂ fariseos quian'₅₄ tě₅juá'₅ quiaín₅, chi₂ca₂'iin₃ dsa₂ i₂ma₂quian'₅₄ Jesús, ca₂juá'₂:

—Ď'E₂ lě₃ qui₂qué'₂ qui₂'ág'₂ 'nia'₂ co₂dsia₅ quian'₅₄ dsa₂ i₂cán₂ 'lia'₅₄ ně₅, dsa₂ i₂le₁cán'₄ dso₄ ně₃?

³¹ Jaun₂ ca₂ńag₃ Jesús:

—Ma₁ tsá₃ tě₅mí₅ 'nió'₅ quió'₅ dsa₂ i₂le₁'ág₄ dse₃ dsí₅; dsa₂ i₂le₁dso'₅₄ bá₄ 'nió'₅ quió'₅. ³² Tsá₃ ta₁ jaun₂ guio₃ jniá₂ a₂tě₄ dsa₂ dsen₃; a₂tě₄ dsa₂ i₂le₁cán'₄ dso₄ bá₄ jniá₂ guio₃, ia₁jaun₂ dsi₁quén'₅ dsí₅.

Ca₂ńí'₃ dsa₂ Jesús jui₁lia'₂ a₂jme₂'in₅₄ dsa₂

(Mateo 9:14-17; Marcos 2:18-22)

³³ Jaun₂ dsa₂ 'éi₂ ně₃ ca₂tsí'₃ Jesús:

—Ď'A₂ guě'₂ lia'₂ i₂gú'₃ jme₂'in₅₄ dsa₂ i₂quian'₅₄ Juan₅₄, jě₂ qui₂tsí'₅ Diú₄, le₂jaun₂ bá₄ dsa₂ quiaín₅ fariseos ně₃, la₁ dsa₂ quiang'₂, guě'₅ 'ín'₂ bá₄?

³⁴ Jaun₂ ca₂jéin'₃ Jesús jág₁:

—Ď'Lé₂ le₃chi₁quian'₄ 'nia'₂ jmig₄ jme₃'in₅₄ jui₁lia'₂ dsa₂ i₂té₄ ja₁jen'₂ gu₂ dsa₂, chi₂jua'₂ jaun₂ bá₄ guá₅ guě'₂ dsa₂ ńe'₂ i₂jen'₂ gu₂? ³⁵ La₁ já₅ jmig₄ jě₁ma₂ńia'₃ dsa₂ ńe'₂ 'éi₂; jmig₄ jaun₂ guě'₄ ma₂lé₂ jme₃'in₅₄.

³⁶ Ján₃ bá₄ ca₂juá'₂ Jesús jág₁ jáng'₅ léi₄ la₂:

—Ma₁ tsá₃ 'ein₂ dsa₂ tióng₅ 'nau₅₄ 'mí'₂ 'mí₂ tsi₁'mí'₂ gui'₅₄. Ia₁ ně₁jua'₂ ca₂jmo₃ le₂jaun₂, a₂ńia'₅₄ guéi₃ bá₄ caun₂ caun₂, ton'₂ tsá₃ ma₃rě₂ quín₅ tsi₁'mí'₂ gui'₅₄ quian'₅₄ 'nau₅₄ 'mí₂. ³⁷ Ján₃ guě'₂ tsá₃ tia'₂ dsa₂ vino 'mí₂ nī₁lau₂ gui'₅₄, ia₁ ně₁jua'₂ ca₂jmo₃ dsa₂ le₂jaun₂, a₂ne'₂ bá₄ nī₁lau₂ gui'₅₄ quian'₅₄ dsió'₁ vino 'mí₂; téin₃ bá₄ vino, ton'₂ dsi₃'én₂ nī₁lau₂ gui'₅₄ ně₃. ³⁸ Jaun₂ lě₃, lau₂ 'mí₂ bá₄ 'nió'₅ tia'₃ dsa₂ vino 'mí₂, ia₁jaun₂ rě₂ lé₂ 'í₁ le₃tín₃. ³⁹ Ján₃ bá₄ le₂jaun₂ jui₁lia'₂ i₂ma₂'in'₅ vino gui'₅₄ a₂ma₂ron₂, tsá₃ jiá₃ dsí₅ 'ín'₂ vino 'mí₂ a₂tě₂ca₂jlen'₃. “Ia₁ tió'₅ a₂gui'₅₄” bá₄ juá'₂.

Guén₂ dsa₂ quián₅ Jesús míg₂ trigo caun₂ jmig₄ sa₅₄
(Mateo 12:1-8; Marcos 2:23-28)

6 ¹ Caun₂ jmig₄ sa₅₄, ca₂ñi₅ Jesús caun₂ ja₁nau₂ ja₁jnia₄ trigo. Jaun₂ ca₂gág₃ dsa₂ i₂quian₅₄ mí₂ trigo, qui₂ca₂guén₂ ca₂gué₃. ² Jaun₂ jme₁ca₂jág₂ i₂lin₅₄ dsa₂ fariseos, jaun₂ ca₂juá₂:

—¿E₂ lë₃ jmo₂ 'nia₂ a₂tsá₃ 'i₄ 'éi₃ jmo₃ dsa₂ jme₁jmig₄ sa₅₄?

Jaun₂ ca₂ñag₃ Jesús:

³ —¿Tsa₁ ma₂'í₂ 'nia₂ ja₁juá₂ a₂ca₂jmo₃ David quian₅₄ riin₅₄ jme₁ca₂tá₂ i₁cón₅? ⁴ Ca₂'í₃ dsi₂néi₂ quió₅ Diú₄ ca₂can₃ i₁ñí₄ jñi₅ a₂'i₄ 'éi₃ a₂gué₃ jmá₃ jme₂dsa₂. Ca₂gué₃, ca₂cué₃ riin₅₄ i₂jme₁quian₅₄ né₃.

⁵ Ca₂juá₂ Jesús ján₃:

—Jaun₅ dsa₂ mi₂güí₃ bá₄ i₂quian₅ 'éi₃ ne₄ quió₅ jmig₄ sa₅₄.

Dsa₂ i₂rë₂já₃ caun₂ gu₂
(Mateo 12:9-14; Marcos 3:1-6)

⁶ Co₂ráun₂ táng₃ caun₂ jmig₄ sa₅₄ ca₂lë₃, ca₂'í₃ Jesús guá₅ sinagoga, ca₂jme₃tiin₂₃ dsa₂. Jë₄ jaun₂ jme₁'en₅₄ jan₂ dsa₂ i₂rë₂já₃ gu₂ ne₁.

⁷ Ca₂tiog₃ dsa₂ fariseos quian₅₄ tē₅juá₅ chi₂jua₂ jme₃'lióin₂ 'éi₂ tē₃ jmig₄ sa₅₄, ia₁ jme₁'no₂ jui₅ 'a₂ lia₂ jmo₃ dsáu₁ 'éi₂. ⁸ La₁ a₂ñi₅ rë₂ bá₄ Jesús 'e₂ a₂dsi₂jio₅ dsí₅ dsa₂ 'éi₂ tióin₂, jaun₂ ca₂tsí₃ dsa₂ i₂rë₂já₃ gu₂:

—Nau₂, ñia₅ dsi₂jo₂ la₂.

Ca₂nau₂ bá₄ dsa₂ 'éi₂ ca₂ñó₃. ⁹ Jaun₂ ca₂tsí₃ Jesús dsa₂ i₂tióin₂ jág₅:

—La₂ ñag₄ jniá₂ caun₂ 'nia₂: ¿E₂ 'i₄ 'éi₃ jmo₃ dsa₂ jui₁lia₂ jme₁jmig₄ sa₅₄? ¿A₁dse₃, o₃ a₂'lig₅₄ 'e₂? ¿A₂lióin₂ dsa₂ mi₂güí₃ riin₅₄, o₃ a₂ñag₃ 'e₂?

¹⁰ Jaun₂ ca₂jñin₂ ca₂le₃jín₃ dsa₂ i₂tióin₂ le₃lág₃ quió₅, jaun₂ ca₂tsí₃ dsa₂ dso₅₄:

—Nei₅₄ gog₂.

Jaun₂ ca₂néi₃. Dsi₂jui₅ jaun₂ bá₄ ca₂lág₃ gu₂. ¹¹ La₁ ca₂rë₃'né₃ bá₄ dsa₂ jain₂ jain₂ tióin₅₄, ca₂jme₃lióg₃ ca₂tsí₃ riin₅₄ 'e₂ jmái₂ Jesús.

Ca₂quión₂ Jesús guia₃-tín₂ dsa₂ i₂chein₃ 'a₂ gué₃ já₄ chei₃
(Mateo 10:1-4; Marcos 3:13-19)

¹² Ca₂lë₃ tē₃jë₄ jmig₄ jaun₂, ca₂ñó₃ Jesús jui₅ caun₂ má₂ a₂chi₂i₁lein₄ Diú₄. Tē₁jma₃nei₅ bá₄ ca₂ñi₅ chi₂léin₂ Diú₄. ¹³ Jme₁jnia₃ táng₃ jaun₂, ca₂té₃ dsa₂ i₂quian₅₄, jaun₂ ca₂quión₂ guia₃-tín₂ 'éi₂. I₂'éi₂ né₃ ca₂quian₃, i₂chen₄ quiáin₅.^a ¹⁴ Le₂la₂ jme₁chein₂: Si₂mu₅₄ i₂ca₂quian₃ Pe₄; Dré₄ rin₅₄ Si₂mu₅₄; Jacobob quian₅₄ Juan₅₄ né₃; Fe₂li₄, Bartolomé,

¹⁵ Tē₅₄, To₁má₄, Jacobo^b i₂lín₅ ja₁ñi₅₄ Alfeo; Si₂mu₅₄ i₂lín₅ cananista.^c

^a13 griego: apóstolous (dsa₂ i₂chen₄).

^b14,15,16 o₃, Santiago.

¹⁶ Judas rin'₅₄ Jacobo; quian'₅₄ Judas Iscariote^d i₂ca₂dsióg₃ ca₂'nii₃ Jesús cang₂.

Jme₂tin₅ Jesús juin₅ lin₃ dsa₂
(Mateo 4:23-25)

¹⁷ Jme₁ca₂sióin₃ má'₂ jaun₂, quiaín'₅₄ 'éi₂, jaun₂ ca₂nau₂ caun₂ ja₁lé₄ ja₁jo₂. Ja₁jaun₂ né₃ jme₁ma₂le₁ñi'₂ juin₅ lin₃ dsa₂ i₂chan₂ ta₁caun₂ 'uë₃ Judea, i₂ja₂lén₂ Jerusalén, ca₂le₃jé₃ juig₂ te₁'i₁ le₂tan₅₄ chei'₅₄ jmi₁ñí'₄ ja₁nio₅ juig₂ Tiro quian'₅₄ Sidón né₃, ¹⁸ ia₁ 'nio₃ dsa₂ nag₃ jág₁ quió'₅ Jesús, ton'₂ ia₁ 'nio₃ 'lióin₂ 'e₂ caun₂ dso₄ niog₅ lín₅. Le₂jaun₂ guë'₂ dsa₂ i₂chan₂ uig₅ co₂jmóg'₂ jme₂dsí₂ 'lin'₅₄, ja₁jaun₂ qui₂ca₂'lóin₂ bá₄ ján₃.

¹⁹ Qui₂ca₂'náu'₃ jui₅ a₂níi'₃ quió'₅ Jesús, ia₁ jme₁'io₅ 'éi₂ bí₂ a₂jme₁jme₂'lióin₂ ca₂le₃jín₃.

Jui₁lia'₂ a₂dse₃, quian'₅₄ a₂tsá₃ dse₃ lia'₂ chan₂ dsa₂
(Mateo 5:1-12)

²⁰ Jaun₂ ca₂jíin₂ ca₂le₃jín₃ i₂ma₂quiaín'₅₄, jaun₂ ca₂juá'₂:
—'E₂ gué₄ dsen'₃ 'nia'₂ dsa₂ i₂chang'₂ njëg'₂ le₃ne₄ Diú₄, ia₁ 'nia'₂ bá₄ ca₂tíng'₂ ja₁goin₂.

²¹ 'E₂ gué₄ dsen'₃ 'nia'₂ i₂chang'₂ 'ong'₅₄ rë₂né₃, ia₁ 'ág'₄ bá₄ 'au'₂.
Dsen'₃ 'nia'₂ i₂qui'₂-o₅ jmi₄g₄ ně₃, ia₁ 'nág'₄ bá₄ 'nia'₂.

²² 'E₂ gué₄ dsen'₃ 'nia'₂ jë₁ma₂ca₂jme₃'iog₅₄ dsa₂, a₂'uág'₂, jë₁ma₂té₂ rë₁të₃'o'₂, quiong₃ dsa₂ a₂'lìng'₅₄ o₄quió'₄ Jaun₅ dsa₂ mi₂güí₃.

²³ 'Jmo₄ 'nia'₂ 'io'₂ 'nio₅ lín₃, quian₂ 'nia'₂ o₂'nió₃ 'au'₂ jë₁ma₂té₂ jmi₄g₄ jaun₂, ia₁ le₂në₅ bá₄ guéi'₁ 'nia'₂ juë'₂ 'liang'₅₄ guei'₅₄ i₂juí₃. Ia₁ le₂në₅ bá₄ ma₂jmo₃ dsa₂ can'₅₄ quiáin₅ ca₃ma₂líg'₂ ma₂jmái'₂ dsa₂ i₂jme₁'é₂ jág₁ quián₅ Diú₄.

²⁴ 'La₁ 'e₂ gué₄ juí₃'g'₂ 'nia'₂ dsa₂ cha₂ cu₄, ia₁ ma₂gue'₅₄ bá₄ 'nia'₂ liang'₅₄.

²⁵ 'E₂ gué₄ juí₃'g'₂ 'nia'₂ i₂chang'₂ qui₂le₁'ág'₃ 'au'₂, ia₁ já₅ jmi₄g₄ jë₁le₃chang'₂ 'ong'₅₄. 'E₂ gué₄ juí₃'g'₂ 'nia'₂ i₂chan₂ co₂'nág₂ jmi₄g₄ ně₃, ia₁ já₅ bá₄ jmi₄g₄ jë₁tóng'₁ 'lia'₂ 'au'₂ qui'₁-áu'₂.

²⁶ 'Juí₃'g'₂ bá₄ 'nia'₂ jë₁ma₂té₂ rë₁qui₃'ag₃ dsa₂ dse₃, ia₁ le₂në₅ bá₄ ca₂jmo₃ dsa₂ can'₅₄ quiáin₅, ca₂'iin₃ dse₃ dsa₂ jui₁gan₂ i₂jme₁'é₂ jág₁ ma₂líg'₂.

^c15 griego: Celotes, co₂'nió'₄ dsa₂ i₂nau₂ quen₅; jan₂ i₂'nio₃ táun₂ 'uë₃ 'éi'₃ quió'₅ Roma.

Jma₃quén₅ ca₂quioin₃ le₃on₃ Si₂mu₅₄ 'éi₂, ia₁ 'nág₄ lë₃ mei'₂ tsá₃ ca₂ne₅₄ a₂chein₂.

^d16 o₃, Judas i₂chan₂ Cariot; o₃ Judas i₂të₂jín₁.

A₂jme₃'nio₃ dsa₂ jui₁lia' ₂ dsa₂ i₂'iog₅₄

(Mateo 5:38-48; 7:12)

²⁷ 'La₁ 'nia' ₂ dsa₂ i₂nag₅, juá' ₅ jniá' ₂: Jme₁'nió' ₄ 'nia' ₂ dsa₂ i₂'iog₅₄, jmo₄ a₂dse₃ ja₁con₂ dsa₂ i₂ja₂uin₅₄ dsí₅ jág₂. ²⁸ Caun₂ dse₃ bá₄ qui' 'íng' ₄ i₂'ag₅ 'lig' ₅₄; chi₁len' ₅₄ 'nia' ₂ Diú₄ o₄quió' ₄ i₂lë₁co₂jmóg' ₂. ²⁹ Chi₂jua' ₂ 'ein₂ ca₂jnaú₃ ca₂ton₂ rë₂jog' ₂, jein' ₅₄ le₃ca₂ton₂ táng₃ o₁jnaú₄; chi₂jua' ₂ 'ein₂ ca₂jniá' ₂ 'mi' ₂ dsio₂ quiáng' ₂, le₂jio₅ tsíng' ₂ a₂qui' ₅₄ cuë' ₅₄ ján₃, o₁quion₂. ³⁰ Jui₁'ein₂ gué' ₃ mi₅ 'e₂ mi₂₃, cuë' ₅₄; chi₂jua' ₂ 'e₂ caun₂ a₂jniá' ₂ quiáng' ₂, tsá₃ ma₃mag' ₅₄. ³¹ Jui₁lia' ₂ a₂'niog' ₂ 'nia' ₂ jmo₃ dsa₂ ja₁cong' ₂, le₂jaun₂ jmo₄ 'nia' ₂ ja₁coin₂.

³² 'Ia₁ nē₁jua' ₂ 'nióg' ₃ jmá' ₃ lia' ₂ dsa₂ i₂'nio₃ 'nia' ₂ guiong' ₅₄, 'e₂ ti₁'mag' ₄ ca₂tíng' ₂ nē₁jua' ₂ le₂jaun₂? Ia₁ ján₃ bá₄ le₂nē₅ jmo₅ jui₁lia' ₂ dsa₂ i₂'no₅ dso₄. ³³ Ia₁ chi₂jua' ₂ jmo' ₂ 'nia' ₂ dse₃ jmá' ₃ lia' ₂ ne₄ dsa₂ i₂jmo₅ dse₃ ja₁cong' ₂, 'e₂ ti₁'mag' ₄ ca₂tíng' ₂ nē₁jua' ₂ le₂jaun₂? Ia₁ le₂nē₅ bá₄ tion' ₅₄ dsa₂ i₂'no₅ dso₄ ján₃. ³⁴ Nē₁jua' ₂ qui₂dsi' ₂ 'nia' ₂ jmá' ₃ lia' ₂ le₃quió' ₅ i₂lín' ₂ 'nia' ₂ le₃qui' ₅₄ jmig₄ jéin' ₃ quiáng' ₂, 'e₂ ti₁'mag' ₄ ca₂tíng' ₂ nē₁jua' ₂ le₂jaun₂? Ia₁ le₂nē₅ bá₄ tion' ₅₄ gué' ₂ dsa₂ i₂'no₅ dso₄ ján₃, qui₂dsi' ₂ quió' ₅ riin' ₅₄ jain₂ jain₂, ia₁jaun₂ qui₃gue₃ quió' ₅ riin' ₅₄. ³⁵ La₁ 'nia' ₂ né₃, jme₁'nió' ₄ i₂'iog₅₄, jmo₄ a₂dse₃ ja₁coin₂; dsí₄ 'nia' ₂ quió' ₅, tsá₃ jmo₄ 'nia' ₂ jua' ₅₄ a₂ñí₄ 'i₅ 'au' ₂ a₂jaun₂. Jaun₂ le₂nē₅ bá₄ gué' ₁ 'nia' ₂ jué' ₂ 'liang' ₅₄, ton' ₂ léng' ₂ chi' ₂-guein₂ quián₅ Diú₄ i₂guá₅ guei' ₅₄. Ia₁ i₂'ua₁ dsí₅ 'éi₂ ján₃ ja₁con₂ dsa₂ 'lín' ₅₄, i₂jniá' ₅₄ ti₁'mag' ₄ tsá₃ cuë₂₃. ³⁶ Jui₁len' ₅₄ 'nia' ₂ dsa₂ 'éi₂ dsí₅, jui₁lia' ₂ 'éi₂ dsí₅ Diú₄ Néi' ₅.

Tsá₃ lë₁caun₂ 'nia' ₂ 'í₁ quió' ₅ ríng' ₂

(Mateo 7:1-5)

³⁷ 'Tsá₃ lë₁caun₂ 'nia' ₂ 'í₁ ja₁con₂ ríng' ₂, jaun₂ tsá₃ con₂ Diú₄ 'í₁ ja₁con' ₂ 'nia' ₂ guiong' ₅₄. Tsá₃ 'lián' ₅ 'nia' ₂ ríng' ₂ jaun₂ tsá₃ 'liog' ₃ Diú₄ guion' ₅₄ 'nia' ₂ ján₃. 'Én₃ 'nia' ₂ dsáu₁ ríng' ₂, jaun₂ bá₄ 'én₂ Diú₄ dsáu' ₂ 'nia' ₂ guiong' ₅₄. ³⁸ Qui₂jme₁'on₁ 'nia' ₂ ríng' ₂, jaun₂ bá₄ jme₃'o₅₄ Diú₄ 'nia' ₂, cuë₃ caun₂ 'éi' ₃ tí₅, a₂tó' ₅ tiá₂, a₂qui₂rë₂'niá' ₄ rë₂ lín₃, ca₂lia' ₂ tsá₃ ma₃to' ₂ ja₁'éi' ₄ jmo₃, tó' ₃ tē₂jmu₂ quián' ₂ 'nia' ₂. Ia₁ 'éi' ₃ jaun₂ bá₄ to' ₂ Diú₄ jui₁lia' ₂ lë₅ 'éi' ₃ a₂dsián' ₅ 'nia' ₂ ríng' ₂ guiong' ₅₄.

³⁹ Jaun₂ ca₂cuë₃ Jesús jág₁ jáng' ₅ léi₄ la₂:

—'Lé₂ le₃jniá₃ dsa₂ ten₄ jan₂ dsa₂ ten₄ riin' ₅₄ a₂'ë₃ jui₅? 'Tsa₁ tsi₃séin' ₂ jua' ₅₄ jui₁lia' ₂ caun₂ siá₅? ⁴⁰ 'I₁jan₂ jui₁lia' ₂ i₂'i₅ si₂ tsá₃ lín₅ jua' ₅₄ a₂juiin' ₂ gué' ₄ con' ₂ gué' ₄ tē₅ quiáin₅; ca₂lia' ₂ ca₂dsó' ₃ si₂ quió' ₅, jaun₂ gué' ₄ lé₂ le₃dsióg₄ léin₂ con' ₂ lín₅ tē₅ quiáin₅.

⁴¹ 'A₂ bá₄ lia' ₂ jniá' ₄ 'ne₂ jme₁qui₅ pí' ₁ a₂'i₄ jme₁ne₁ ríng' ₂, ton' ₂ tsá₃ leng' ₅₄ a₂'i₄ ni₁'ma₂ chá₅ jme₁ne' ₄ 'niag' ₂? ⁴² 'A₂ bá₄ lia' ₂ tiá₂ 'au' ₂ juig' ₅₄ ríng' ₂: "Rin' ₅₄ jniog₄, cuë₄ jmig₄ o₁dsi₁₂ jme₁qui₅ pí' ₁ a₂'i₄ jme₁ne' ₄?"

i'Ne₂ dsa₂ i₂l₂jmo₅-dsáu₅ o₁ne₁! Dsi₄ de'₂ jñiá₅ ni'₁ma₂ chá₅ a₂i₄
jme₁ne'₄ 'ñiag'₂, jaun₂ gué₄ le₃jag'₅₄ rē₂ dsí'₁ qui₅ pí'₁ a₂i₄ jme₁ne₁ ríng'₂.

Tē₂le₃ 'a₂ lia'₂ lé₅ mīg₂ a₂'ag₅ bá₄ ni'₁ma₂, jáng'₅ léi₄
(Mateo 7:17-20; 12:34-35)

⁴³ 'Tsá₃ cha₂ ni'₁ma₂ dse₃ jua'₅₄ a₂lé₂ le₃'ag₃ mīg₂ 'lig'₅₄; ján₃ guē'₂
le₂jaun₂ tsá₃ cha₂ ni'₁ma₂ 'lig'₅₄ jua'₅₄ lé₂ le₃'ag₃ mīg₂ dse₃. ⁴⁴ Le₂caun₂
le₂caun₂ bá₄ ni'₁ma₂ jau'₂ 'í₁ tē₂le₃ 'a₂ lia'₂ lé₅ mīg₂ a₂'ag₅; ma₁ tsá₃ quín₅
dsa₂ mīg₂ higos jui₁lia'₂ ni'₁ma₂ taun₅ chei₅₄, on₃ guē'₂ lé₂ le₃cág'₃ dsa₂
mīg₂ uvas jui₁lia'₂ chi₁uín₃ taun₅. ⁴⁵ Ján₃ bá₄ le₂nē₅ dsa₂ né₃. Jui₁lia'₂
dsa₂ dsen₃, lia'₂ con'₂ lé₅ a₂dse₃ a₂ma₂rē₂'ma₄ tē₂dsí₅, jmo₂₃ a₂dse₃; dsa₂
i₂'lín'₅₄ né₃, lia'₂ con'₂ lé₅ a₂'lig'₅₄ a₂ma₂rē₂'ma₄ tē₂dsí₅, jmo₂₃ a₂'lig'₅₄. Ia₁
lia'₂ con'₂ lé₅ a₂'lióng₂ ñag₅₄ cha₂ tē₂dsí₅ dsa₂, a₂jaun₂ bá₄ 'uē₂ mi₂'o₅₄.

Tín₃ né₃ 'uig₅₄ cha₂
(Mateo 7:24-27)

⁴⁶ '¿E₂ bá₄ lē₃ tē'₅ 'nia'₂ jñiá₂, “Te₁gui'₅₄, Te₁gui'₅₄”, ton'₂ tsá₃ jmo'₂
guē'₂ 'nia'₂ a₂juá'₅? ⁴⁷ Le₂jan₂ le₂jan₂ i₂tē₁ja₂lén₂ ne₃, i₂ja₂néi₃ jág₁ quió₃,
ton'₂ ne'₅₄ né₃, la₂ 'ín₄ 'a₂ lia'₂ lín₅: ⁴⁸ lín₅ jui₁lia'₂ jan₂ dsa₂ i₂ca₂jmo₃'₃
'né₅, ca₂guéi₃ 'ei₄ de'₂ jñiá₅ ca₂lia'₂ ca₂tē₂ ne₄ ni'₁lau₂. Ne₄ jaun₂
ca₂jme₃lió₃ 'uig₅₄ 'ia'₂. Jme₁ca₂juē'₂ jmig₂, ca₂dság'₃ jmig₂ tiá₂ 'ei₅ dso'₂
tsi₁'né₅ jaun₂. La₁ ca₂lia'₂ jñia'₅₄ tsá₃ ca₂'ñiá'₂, ia₁ rē₂ jme₁lé₄. ⁴⁹ La₁
jui₁lia'₂ i₂nag₅ jág₁ quió₃, ton'₂ tsá₃ nei'₅₄ guē'₂ né₃, lín₅ jui₁lia'₂ lín₅ dsa₂
i₂ca₂chi'₃ 'ne₄ jñia'₅₄ dsí₂ ne₄ 'uē₃ bá₄, tsá₃ 'uig₅₄ 'ia'₂ ca₂jmo₃.
Jme₁ca₂dság'₃ tiá₂ 'ei₅ jmig₂ dso'₂ tsi₁'né₅ jaun₂, ca₂qui'₃ bá₄, co₂nei'₅₄
ca₂'en₃.

Ca₂jme₃'lión₂ Jesús jan₂ dsa₂ mozo quián₅ juig₅₄ 'lió₂ romano
(Mateo 8:5-13)

7 ¹ Jme₁ca₂dsan₃ cuē₂₃ jág₁ le₂nē₅, ca₂le₃jín₃ bá₄ dsa₂ qui₂ca₂nág₂,
jaun₂ ca₂ñó₃ jui₅ juig₂ Capernaum. ² Ja₁jaun₂ jme₁guá₄ jan₂ juig₅₄
'lió₂ romano i₂jme₁'ñio₅ jan₂ dsa₂ i₂jme₁jme₂ti₃ ne₅₄, i₂jme₁'nioi₃ lín₃.
'Éi₂ né₃ jme₁dso'₅₄ jme₁ma₂rē₂quian₂₃ jóin₂. ³ Jme₁ca₂rē₃ñi₅ juig₅₄ 'lió₂
a₂'lín₅ dsa₂ Jesús, jaun₂ ca₂chein₃ jan₂-on₃ dsa₂ can'₅₄ quián₅ dsa₂ judíos
a₂i₃lén₂ a₂i₁mi₂ ne₄ Jesús a₂jíá₃ jme₃'lióin₂ dsa₂ mozo quián₅.

⁴ Jme₁dsi₃lén₂ ja₁'en₅₄ Jesús, ca₂mi₃ tion₅₄-jan₃, ca₂juá'₂:

—Ca₂tín₂ bá₄ gui'₅₄ juig₅₄ 'lió₂ 'éi₂ a₂jme₁'oin'₄, ⁵ ia₁ 'ñio₅ lín₃ bá₄
'nioi₃ dsa₂ juig₂ go₄ jniog₄. Ia₁ 'éi₂ bá₄ ca₂jmo₃ 'éi'₃ a₂ca₂lág₃ guá'₅
sinagoga quián₂ jnia'₅₄.

⁶ Jaun₂ ca₂ñó₃ bá₄ guē'₂ Jesús quian'₅₄ 'éi₂. La₁ jme₁ma₂ja₂quian₃
dsi₁lén₂ dsi₂néi₂ jme₁ca₂chen₃ táng₃ gui'₅₄ juig₅₄ 'lió₂ jan₂-on₃ a₂mei₅₄
quian₅, a₂quian₅ jág₁ a₂juá'₂:

—Te₁gui'₅₄, tsá₃ cán'₁ ta₁ jua'₅₄ a₂gog'₅₄ tē₂ ja₁quió'₃, ia₁ tsá₃ ca₂tíng₂ jua'₅₄ a₂o₁'ú'₃ dsi₂néi'₂ quió'₃. ⁷ 'Uig₅₄ jaun₂ i₂jio₅ dsi₃, ĩ₂'ein₂ bá₄ jniá'₂ jua'₅₄ nei₅₄ 'ñió'₃ tē₂ ja₁cong'₂? La₁ tió'₅ jua'₅₄ ca₂jon₄ bá₄ jág₁ quiáng'₂ tē₂nē₅, ia₁jaun₂ jnia₃ dso'₅₄ mozo quiáng₃. ⁸ Ia₁ le₂nē₅ bá₄ jniá'₂ 'ñió'₃ chéng'₅ jme₂ti₅₄ ne₄ juig₃, ján₃ bá₄ niog₅ gu₃ 'lióg₂ i₂te₁neg'₄. Nē₁jua'₂ ca₂juíg₂ jniá'₂, “Gua₂ jó'₄”, ja₁jaun₂ dsó₃ bá₄; nē₁jua'₂ ca₂juíg₂ “Ñia₅ ja₁lá₃”, jiá₃ bá₄. Ján₃ guē'₂ le₂jaun₂ nē₁ca₂juíg₂ “O₂jmo₄ a₂la₂ a₂ó'₃”, a₂jaun₂ dsi₃jmo₂ bá₄.

⁹ Jme₁ca₂nág₂ Jesús jág₁ nē₅, ca₂i₃gó'₃ dsí₅ o₄quió'₄ dsa₂ 'éi₂, jaun₂ ca₂jéin'₃ ca₂jín₂ dsa₂ i₂quiain'₅₄, jaun₂ ca₂juá'₂:

—Tē₃dsón'₂ bá₄, ca₂lia'₂ 'i₁jan₂ dsa₂ chan₂ Israel tsá₃ ma₂ca₂dsán'₂ jniá'₂ i₂'én₂ lia'₂ 'én₂ dsa₂ nē₅.

¹⁰ Jme₁ca₂dsi₃len₃ dsa₂ i₂chen₄ 'éi₂ dsi₂néi'₂, ma₂ca₂'lón₂ bá₄ dsa₂ mozo i₂jme₁dso'₅₄.

Ca₂jme₃jen'₅₄ Jesús ja₁ñi'₅₄ jan₂ 'io₅₄ 'nág₂

¹¹ Cang₂ jaun₂ ca₂ñó'₃ táng₃ Jesús caun₂ juig₂ ja₁chei₂ Nain, jaun₂ ca₂jme₃quiain'₅₄ chi'₂ dsi₂guia₃-tín₂ quiáin₅, i₃léin₂ quian'₅₄ juin₅ gué'₄ dsa₂ sián'₂ né₃. ¹² Jme₁ja₂quián₃ dsióg₄ ja₁dsi₂ton'₅₄ dsa₂ o₄'né₄ juig₂, ca₂jág₃ ca₂'uin₂ dsa₂ i₃'óin₃ jan₂ 'lag₄, i₂jan₂ tan₅₄ 'éi₂ ja₁ñi'₅₄ jan₂ 'io₅₄ 'nág₂. Juin₅ lín₃ bá₄ dsa₂ juig₂ i₂jme₁quiong'₅₄ i₃'o₃. ¹³ Ca₂tá'₂ ñéi₂ dsí₅ Te₁gui'₅₄ jme₁ca₂jág₂, jaun₂ ca₂juá'₂:

—Tsá₃ 'au₂.

¹⁴ Jaun₂ ca₂jme₃quiáin₃ ca₂níi'₃ tsi₁gu₅. Ca₂jnia₃ bá₄ guē'₂ dsa₂ i₂jme₁le₁te₂, jaun₂ ca₂juá'₂ Jesús ca₂tsí'₃ 'lag₄:

—i'Ne₂ juíg₂ jniá'₂ chi'₂, nau₂!

¹⁵ Jaun₂ né₃ ca₂guá'₂ 'lag₄, ca₂jme₃lióg₃ ca₂dsia₃ jág₁, jaun₂ ca₂jáng'₂ Jesús ne₄ chog₅₄. ¹⁶ Jme₁ca₂té'₂ ne₄ dsa₂ a₂ca₂lě₃ jaun₂, ca₂i₃gó'₃ dsí₅ ca₂le₃jín₃, jaun₂ ca₂jme₃juin'₂ Diú₄, ca₂juá'₂:

—Ma₂ca₂rě₃jniá'₂ jan₂ dsa₂ juin'₂ i₂'é₂ jág₁ quián₅ Diú₄ jě₄ quián₂ jniog₄.

Juá'₂ né₃:

—Ma₂guan₅ Diú₄ a₂jme₃'oin₅₄ dsa₂ juig₂ quiáin₅.

¹⁷ Le₂con₂ ja₁tén₄ 'uě₃ Judea, le₂con₂ ma₂quián₅ jaun₂ né₃, qui₂ca₂rě₃ñi₅ dsa₂ a₂ca₂jmo₃ Jesús jaun₂.

Dsa₂ i₂ca₂chen₃ Juan₅₄ i₂chon₅ dsa₂ jmig₂

(Mateo 11:2-19)

¹⁸ Ca₂rě₃ñi₅ Juan₅₄ ca₂le₃jě₃ a₂jaun₂, ia₁ ca₂dsia₃ dsa₂ i₂jme₁quiain'₅₄. Jaun₂ ca₂té'₃ on₃ dsa₂ 'éi₂, ¹⁹ jaun₂ ca₂chei₃ ne₄ Te₁gui'₅₄ a₂dsi₃ñag₅₄ chi₂jua'₂ tē₃dsón'₂ lín₅ dsa₂ i₂lě₅ jág₁ jiá₃, o₃ jñiai₃ i₂sián'₂ 'e₂. ²⁰ Jaun₂ dsa₂ 'éi₂ né₃, ca₂jme₃quiáin₃ con₂ Jesús jaun₂ ca₂juá'₂:

—Juan₅₄ i₂chon₅ dsa₂ jmi₂g₂ nē₂chei₃ jnia'₅₄ a₂ṇag₄ 'ne₂ chi₂jua'₂
tē₃dsón'₂ líng'₅ i₂lē₅ jág₁ jiá'₃, ĩ₀₃ ṇia₄ jnia'₅₄ i₂sián'₂ 'e₂?

²¹ Tē₃jē₄ jaun₂, ca₂jme₃'lión₂ Jesús juin₅ lín₃ dsa₂ i₂jme₁le₁dso'₅₄,
ca₂le₃jē₃ ne₅₄ jmi₁uig₅ a₂jme₁le₁quian₅ dsa₂; lia'₂ jme₂dsí₂ 'lín'₅₄ nē₃
qui₂ca₂'uúin'₂; qui₂ca₂jmo₃g'₃ jme₁ne₁ dsa₂ i₂jme₁ten₄. ²² Jaun₂ gué₄
ca₂jéin'₃ jág₁ quió'₅ 'éi₂, ca₂juá'₂:

—O₂nó'₅ 'nia'₂ o₂dsia₄ o₂chei'₅₄ Juan₅₄ 'e₂ ca₂tē₂ ne'₅₄, 'e₂
a₂qui₂nē₂nei'₂ nē₃. Qui₂jág₅ jui₁lia'₂ dsa₂ ten₄; tē₁i₂nio₄ táng₃ dsa₂ i₂tsá₃
lé₂ jme₁i₂nio₄; tē₂tsin'₅₄ le₁jín₃ i₂jme₁lín₄ 'mé'₅ 'iog₅; qui₂nag₅ táng₃ dsa₂
i₂jme₁guin₄ nē₃; le₂jaun₂ gué'₂ 'lag₄ nē₃ qui₂jein'₅₄ táng₃; ja₁con₂ dsa₂
dsi₂ṇé₂ dsi₂'ag₅ jág₁ dse₃ a₂lión₂ dsa₂. ²³ 'E₂ gué₄ dsen₃ dsa₂ i₂tsá₃ 'ag₅
caun₂-tín₃ dsí₅ o₄quió₃ jniá₂.

²⁴ Jme₁ma₂i₂len₃ dsa₂ i₂ca₂chen₃ Juan₅₄ 'éi₂, jaun₂ ca₂jme₃lióg₃ Jesús
ca₂tsí'₃ dsa₂ a₂'iin₂₃ Juan₅₄, ca₂juá'₂:

—¿'E₂ ca₂i₁jag'₄ 'nia'₂ lia'₂ con'₂ i₁nóg'₄ 'uē₃ quein₂ co₂'ṇiog₅ jaun₂?
¿O₃ bá₄ ca₂jag'₅₄ 'nia'₂ ca₂'nau₂ ni₁'ma₂ ta₅ a₂lē₁qui₂bí₂ dsí₂ ja₁jaun₂?
²⁵ Chi₂jua'₂ on₃ jaun₂, ¿'e₂ gué'₂ ca₂i₁jag'₄ 'nia'₂? ¿O₃ bá₄ ca₂jing'₅₄ jan₂
dsa₂ i₂qui'₂ tsin'₅₄ jlá'₁ 'e₂? La₁ on₃ le₂jaun₂. Ia₁ ṇi'₅₄ bá₄ 'nia'₂, ca₂le₃jín₃
dsa₂ i₂tē₁i₂nio₄ jlán'₁ i₂qui₂cué'₅ o₂'ṇió₃ o₂ṇia₃ dsi₅, i₂tion'₅₄ jui₁lia'₂
dsi₂néi₂ quió'₅ rag₅₄ bá₄ i₂le₂'éi₂. ²⁶ Jaun₂ nē₃, ¿'e₂ gué'₂ ca₂i₁jag'₄ 'nia'₂?
¿O₃ bá₄ jan₂ dsa₂ i₂'é₂ jág₁ quián₅ Diú₄ 'e₂ ca₂jín'₅₄ 'nia'₂? Dsón'₂ bá₄
jaun₂. Jan₂ i₂lín₅ i₂juin'₂ gué₄ lia'₂ con'₂ gué₄ jan₂ i₂'é₂ jág₁ quián₅ Diú₄
bá₄ ca₂i₁jín'₄ 'nia'₂, juá'₅ jniá₂. ²⁷ Juan₅₄ bá₄ 'éi₂ i₂'in₅ Si₂ quió'₅ Diú₄
ja₁juá'₂:

Tsing₅₄ jan₂ dsa₂ quiáng₃ ne₄ jui₅ quiáng'₂, jón₃,

a₂dsi₃can₅ jág₁, jmo₃ co₂ṇia₅₄ jui₅.^e

²⁸ Juá'₅ jniá₂ juíg₂ 'nia'₂, ca₂lia'₂ 'i₁jan₂ dsa₂ tsá₃ ma₂ca₂rē₃chán₃
i₂juin'₂ gué₄ lia'₂ con'₂ gué₄ Juan₅₄. La₁, i₂lín₅ i₂me'₂ gué₄ ja₁gon₂ Diú₄,
i₂'éi₂ lín₅ i₂juin'₂ gué₄ lia'₂ con'₂ gué₄ 'éi₂.

²⁹ (Ca₂le₃jín₃ dsa₂ i₂ca₂nág₂, lia'₂ dsa₂ i₂cán₂ 'lia'₅₄ nē₃, jme₁ca₂ṇói₂
jmi₂g₂ ca₂cho₃ Juan₅₄, le₂nē₅ bá₄ ca₂jme₃jniai₂₃, Diú₄ bá₄ i₂lín₅ i₂qui₂dsi₅
'éi'₃ tí₅. ³⁰ La₁ dsa₂ fariseos quian'₅₄ tē₃juá'₅ nē₃, tsá₃ ca₂gue₃ cho₃ Juan₅₄
jmi₂g₂; le₂nē₅ bá₄ a₂ca₂rē₃jniái₂ ján₃ a₂tsá₃ ji'₅₄ a₂jme₁'nio₃ Diú₄ jmo₃
quiong'₅₄.)

³¹ —¿'A₂ lia'₂ le₃jua'₅₄ lín₅ dsa₂ i₂chan₂ jmi₂g₄ nē₃? ¿'E₂ bá₄ quian'₅₄
le₃quíng₄ lín₅? ³² Lín₅ jui₁lia'₂ lín₅ i₂bē'₅₄ i₂tón'₅ qui₂guió'₅ jmái'₂ riin'₅₄
jē₄ 'ma'₅₄, juá'₂:

Nē₂jéi₄ jnia'₅₄ te₁fi₁ o₄quián'₂ 'nia'₂,

la₁ tsá₃ nē₂dsián'₃ 'nia'₂;

ján₃ gué'₂ nē₂jmo₁ jnia'₅₄ son₅₄ quió'₅ 'lag₄

la₁ tsá₃ ca₂tá'₂ gué'₂ 'lia'₂ 'au'₂ 'nia'₂.

^e27 Malaquías 3:1.

³³ 'Ia₁ ca₂guan₃ Juan₅₄ i₂chon₅ dsa₂ jmi₂g₂, i₂tsá₃ jme₁gué'₅ i₁ñí'₄, on₃ gué'₂ vino jme₁'ín'₂ né₃, ca₂'iin'₅₄ 'nia'₂ a₂'ein₅₄ jme₂dsí₂ je₂na'₅₄.

³⁴ Ca₂guan₃ gué'₂ táng₃ Jaun₅ dsa₂ mi₂güí₃ i₂tin₂ gué'₅, 'ín'₂ né₃; la₁ 'nia'₂ juá'₂ 'ín'₅ a₂lín₅ jlé₂ 'í₅, má₄ jmí₃g₃ né₃, a₂lín₅ a₂mei₅₄ quián₅ dsa₂ cha₂ dsáu₁, quian'₅₄ dsa₂ i₂cán₂ 'lia'₅₄ quián₅ dsi₂tan₅₄ né₃. ³⁵ Rē₂jniá₂ bá₄ a₂ñí₄ lē₃ ñí'₂ dsí₅ Diú₄, a₂tiin₂, tē₂le₃ quian'₅₄ 'a₂ lia'₂ lé₅ jmo₅ chi'₂-guein₂ quián₅.

'En₅₄ Jesús dsi₂néi₂ quió'₅ Si₂mu₅₄ dsa₂ i₂lín₅ fariseo

³⁶ Jaun₂ ca₂tē₃ jan₂ dsa₂ fariseo ca₂tē'₃ Jesús a₂i₁gué'₂ dsi₂néi₂ quió'₅. Ca₂'í₃ bá₄ gué'₂ Jesús dsi₂néi₂ quió'₅ dsa₂ fariseo 'éi₂ jme₁dsióg₃, jaun₂ ca₂guá₂ ne₄ mesa. ³⁷ Tē₃jē₄ jaun₂, ca₂dsióg₃ jan₂ 'io₅₄ i₂'no₅ dso₄ i₂jme₁ñi₅ juig₂ jaun₂, ia₁ jme₁ca₂rē₃ñi₅ a₂'en₅₄ Jesús gué'₅ dsi₂néi₂ quió'₅ dsa₂ fariseo 'éi₂. Jaun₂ ca₂dsióg₃ quian₅ caun₂ nī₁tsí₅ pí'₁ jlá'₁ a₂lé₅ quian'₅₄ alabastro, a₂'a₄ no'₅₄ mi₂juig₂. ³⁸ Ca₂guá₂ 'o₂₃ cau₅ ja₁tióng₂ tag₄ Jesús, ca₂jme₃lióg₃ 'ág₂ jmi₂g₂ 'ei₅ jme₁ne₁₂ co'₅₄ tag₄ 'éi₂. Jaun₂ ca₂jme₃quéin₃ táng₃ quian'₅₄ jñi₂ dsi₅₄, jaun₂ ca₂chen'₃, jaun₂ ca₂tsáng₂ no'₅₄ mi₂juig₂. ³⁹ Jme₁ca₂jág₃ dsa₂ fariseo i₂quió'₅ dsi₂néi₂, ca₂i₃jio₅ dsí₅: “Jua'₅₄ mei'₂ gué'₃ tē₃dsón'₂ dsa₂ nē₅ lín₅ jan₂ i₂'é₂ jág₁ quián₅ Diú₄, jme₁le₃lí'₄ 'a₂ lia'₂ lín₅ dsa₂ i₂ní'₅ quió'₅. Ia₁ jan₂ 'io₅₄ i₂'no₅ dso₄ bá₄ nē₅.” ⁴⁰ Jaun₂ ca₂juá'₂ Jesús ca₂tsí'₃ 'éi₂:

—Si₂mu₅₄, cha₂ caun₂ jág₁ a₂'nio₃ juig₅₄ 'ne₂.

—Jua'₅₄ 'ne₂, Tē₅ —ca₂ñag₃.

⁴¹ Jaun₂ ca₂juá'₂:

—On₃ dsa₂ jme₁le₁rín₃ cu₄ quió'₅ jan₂ dsa₂ i₂tin₂ jme₁dsi₂ cu₄. Jan₂ jme₁rín₂ ca₂jau₅₄ mei₅ 'éi'₃ cu₄ denarios, jan₂ gué'₂ jme₁rín₂ tē₂láu₃-guiá₃.

⁴² Ca₂'én₂ bá₄ gué'₂ dsa₂ juig₅₄ cu₄ dsáu₁ jē₁le₃oin₃ le₂jaun₂, ia₁ tsá₃ gué'₂ qui'₅₄ jmi₂g₄ jáng'₃. Jaun₂ tsá₃ ma₃tion₅₄ ca₂mág₃ cú₁. Jaun₂ né₃, 'éi₂ i₂on₃ 'éi₂ i₂'nioi₃ gué'₄?

⁴³ Ca₂ñag₃ táng₃ Si₂mu₅₄:

—Dsa₂ i₂jme₁rín₂ gué'₄ 'lióng₂, lín₂ jniá₂.

—Dsau₅ bá₄ le₂nē₅ —ca₂ñag₃ Jesús.

⁴⁴ Jaun₂ ca₂jín₂ táng₃ 'io₅₄, ca₂tsí'₃ táng₃ Si₂mu₅₄:

—¿Jing'₄ dsa₂ mí₂ la₂? Jme₁nē₂'ú₃ dsi₂néi₂ quiáng'₂, tsá₃ jmi₂g₂ nē₂cué'₅₄ a₂jñí₃ tag₃; la₁ 'io₅₄ la₂ né₃ ma₂nē₂rang₃ tag₃ quian'₅₄ jmi₂g₂ 'ei₅ jme₁ne₁₂, ton'₂ ma₂nē₂chí₃ táng₃ quian'₅₄ jñi₂ dsi₅₄. ⁴⁵ Ján₃ bá₄ le₂jaun₂, tsá₃ nē₂chen'₅₄ quió₃ jme₁guang₁₂. 'Io₅₄ la₂ gué'₂ né₃, ca₂lia'₂ tsá₃ 'na₂ bá₄ caun₂ chen'₂ tag₃. ⁴⁶ Tsá₃ no'₅₄ ma₂nē₂'ág'₂ jua'₅₄ a₂ma₂nē₂tsáng'₃ dsi₃; la₁ 'io₅₄ la₂ gué'₂ né₃, ma₂nē₂'ág₂ no'₅₄ mi₂juig₂ tag₃. ⁴⁷ 'Uig₅₄ nē₅ né₃ juá'₅ jniá₂ ia₁ a₂ñí₄ lē₃ 'lióng₂ dso₄ jme₁rē₂cáin'₄, la₁ ma₂rē₂én₄, a₂jaun₂ bá₄ lē₃ ñí₄ lē₃ cuē₂₃ léi₄ a₂'nio₃. La₁ jui₁lia'₂ dsa₂ i₂ca₂juig₄ bá₄ dsáu₁ rē₂én₄, me'₂ bá₄ cuē₂₃ léi₄ a₂'nio₃.

⁴⁸ Jaun₂ gué'₄ ca₂juá'₂ ca₂tsí'₃ 'io₅₄:

—Ca₂le₃jě₃ bá₄ dsáu'₂ ma₂rě₂'én₄.
⁴⁹ Ca₂le₃jín₃ guě₄ dsa₂ sián'₂ i₂jme₁tián'₄ ne₄ mesa quiaín'₅₄, ca₂dsia₃ tsí'₅ riín'₅₄:
 —İ₂'ein₂ bá₄ nē₅, ca₂tě₂ dsáu₁ dsa₂ qui₂'éin₂?
⁵⁰ La₁ Jesús nē₃, ca₂tsí'₃ dsa₂ mí₂ 'éi₂:
 —Ia₁ a₂'éng'₂, ma₂ca₂lóng'₂ nē₃. Guan'₂ tei₄ quiáng'₂.

Dsa₂ mí₂ i₂jme₁i₂nio₄ jme₂'on₅₄ Jesús

8 ¹ Cang₂ jaun₂, ca₂i₁ñi₂ Jesús le₂tan₅₄ juig₂ ca'₅₄, le₂tan₅₄ juig₂ pí'₁ nē₃, qui₂i₁jme₁tiín₂₃ dsa₂ jág₁ dse₃ jui₁lia'₂ ja₁gon₂ Diú₄. Jme₁quiaín'₅₄ bá₄ chi'₂ dsi₂guia₃-tín₂. ² Ján₃ guě'₂ jme₁quiaín'₅₄ dsa₂ mí₂ i₂ma₂ca₂'uín'₂ jme₂dsí₂ 'lín'₅₄ quió'₅, i₂ma₂ca₂jme₃'lióin₂ dso₄ a₂jme₁lín₄ nē₃. Jín₄ 'éi₂ jme₁ñi₅ jan₂ i₂chen₂ María i₂tě'₂ Magdalena,^f i₂ma₂'uín'₂ Jesús guion₃ je₂na'₅₄ tē₂dsí₅; ³ ján₃ bá₄ jme₁ñi₅ i₂chen₂ Juana i₂lín₅ dsa₂ mí₂ quián₅ Cuza, dsa₂ i₂nio₅ ne₄ 'e₂ a₂cha₂ quió'₅ Herodes; ján₃ bá₄ jme₁ñi₅ i₂chen₂ Susana; i₂juín₅ bá₄ i₂sián'₂ guě₄ i₂jme₁i₂nio₄ quiong'₅₄, jme₁jme₂'o₅₄ quian'₅₄ 'e₂ a₂cha₂ quió'₅.

Jág₁ jáng'₅ léi₄ jui₁lia'₂ dsa₂ i₂séi₂ mīg₂ jon₂

(Mateo 13:1-9; Marcos 4:1-9)

⁴ 'Lióng₂ juig₂ ja₁jme₁tón'₅ dsa₂ jui₅ dsi₂lén₂ dsi₂jiín₅₄ Jesús. Jē₁ma₂le₁ñi'₂ dsa₂ juín₅ nē₃, jaun₂ ca₂dsia₃ jág₁ jáng'₅ léi₄ la₂, ca₂juá'₂:
⁵ —Jan₂ dsa₂ ca₂ñe₄ ja₁nau₂ ca₂i₁séi₄ mīg₂ jon₂. Jme₁ma₂'ein₅₄ séi₂ nē₃, a₂lín₅₄ mīg₂ i₂ga'₅₄ le₂'i₄ jui₅ qui₂ca₂tsó'₃ dsa₂; i₁tan₅ guě'₂ nē₃ ca₂guě'₃ ca₂dsio₄. ⁶ Ca₂dsio₄ guě'₂ nē₃ ca₂i₃to'₅₄ jē₄ ni₁cang₁; jme₁ca₂'lia₂, ca₂rě₃quén₃ bá₄ ia₁ tsá₃ gua'₅₄ cha₂ jua'₅₄ a₂güí'₂. ⁷ Ca₂dsio₄ guě'₂ ca₂séi'₂ jē₄ ni₁taun₅. La₁ ni₁taun₅ bá₄ tiá₂ ca₂jo₃ jme₁ca₂'ia₂. ⁸ La₁ ca₂dsio₄ guě'₂ nē₃ ca₂tín₂ ja₁dse₃ gua'₅₄; a₂jaun₂ ca₂i₃cón₃, ca₂rau₂ dse₃ lín₃, caun₂ 'ñiá₂-láu₂ mīg₂ lia'₂ ca₂mīg₂ jon₂ a₂ca₂séi₂.
 Jme₁ma₂lě₅ jme₂tag₂₃ le₂nē₅, ca₂juá'₂ tiá₂:
 —Chi₂jua'₂ 'ein₂ 'nia'₂ dsi₅₄ rě₂gua₄, nei₂ 'nia'₂ rě₂.

Ta₁ quí'₅ jág₁ a₂jáng'₅ léi₄

(Mateo 13:10-17; Marcos 4:10-12)

⁹ Jaun₂ ca₂ñag₃ chi'₂ dsi₂guia₃-tín₂ 'e₂ bá₄ jein₅ jág₁ a₂cuě₂₃ jaun₂. Jaun₂ ca₂juá'₂ Jesús:
¹⁰ —Diú₄ bá₄ jmo₅ a₂rě₂ñi'₂ 'au'₂ 'nia'₂ jág₁ a₂rě₂'ma₄ quió'₅, 'a₂ lia'₂ lě₅ ja₁goin₂. La₁ dsa₂ sián'₂ nē₃, juí'₂ jniá₂ tē₂le₃ quian'₅₄ jág₁ jáng'₅ léi₄, ia₁jaun₂:

^f 2 o₃, “i₂chan₂ Magdala.”

I₂ně₂jág₃, la₁ tsá₃ le₃lí'₄ 'e₂ ně₂jág₃;
 i₂ně₂néi₂ ně₃, la₁ tsá₃ le₃lí'₄ 'e₂ ně₂néi₂,
 on₃ guě'₂ le₃ŋí'₂.⁸

Juá'₂ Jesús 'e₂ jág₁ dsau₅ jein₅ jág₁ jui₁lia'₂ dsa₂ i₂séi₂ mǐg₂ jon₂
 (Mateo 13:18-23; Marcos 4:13-20)

¹¹ 'A₂la₂ bá₄ jein₅ jág₁ a₂jáng'₅ léi₄: A₂lé₅ co₂'nió'₄ mǐg₂ jon₂, jág₁ dse₃ quió'₅ bá₄ Diú₄ jaun₂. ¹² Jui₁lia'₂ ca₂dsio₄ mǐg₂ jon₂ a₂i₃ga'₅₄ le₂'i₄ jui₅ guě'₂ ně₃, le₂jaun₂ lín₅ jui₁lia'₂ ca₂dsion₄ dsa₂ i₂nag₅ jág₁ dse₃; la₁ i₂sě₃dsen₃ guě'₂ ně₃, ja₂ŋiá'₃ jág₁ dse₃ jme₁ma₂'i₄ dsí₅, ia₁jaun₂ tsá₃ ma₃le₃'éin₂ jua'₅₄ a₂lióin₂. ¹³ Co₂'nió'₄ mǐg₂ jon₂ a₂i₃to'₅₄ jě₄ ni₁cang₁ guě'₂ ně₃, co₂'nió'₄ lín₅ jui₁lia'₂ dsa₂ i₂guen₅ 'ŋio₂ dsí₅ jág₁ dse₃ jě₁ma₂ca₂nág₂. La₁ cang₂ jaun₂ tsá₃ tiá₂ tióin₂; lín₅ ně₂jag₄ bá₄ a₂tsá₃ jmú₄ cha₂ jui₅ jme₂dsí₂ quió'₅. Co₂'na₂ bá₄ rě₂'éin₂, ia₁ jě₁ma₂ca₂i₃ŋí'₂ 'e₂ caun₂ jui₅bí₂ a₂caun₂ táu₂, dsí₂lein₅ táng₃ le₃ca'₃, tí₂ jág₁. ¹⁴ Co₂'nió'₄ jon₂ a₂ca₂séi'₂ jě₄ ni₁taun₅ guě'₂ ně₃, co₂'nió'₄ lín₅ jui₁lia'₂ dsa₂ i₂nag₅ jág₁, la₁ tě₂le₃ ne₄ jui₅ ja₁i₂léin₂ jaun₂, tě₂ ca₂jui_g₄ bá₄ jme₂gain₂₃ dsí₅ a₂jo₅ bí₂ a₂quian₅ o₂me'₅₄ dsí₅, a₂ja₂ dsí₅ le₃cha₂ cu₄ 'lióng₂, a₂'nio₃ cué'₅ o₂'ŋiό₃ o₂ŋia₃ dsí₅; i₂ně₅ ně₃ lín₅ co₂'nió'₄ mǐg₂ a₂tsá₃ ma₃lé₂ rón₃. ¹⁵ La₁ ca₂dsio₄ mǐg₂ jon₂ a₂ca₂séi'₂ ja₁dse₃ gua'₅₄, co₂'nió'₄ lín₅ jui₁lia'₂ dsa₂ i₂dse₃ dsí₅ i₂caun₂ ne'₅₄, tsán'₂ tiá₂ jág₁ a₂nag₂₃, caun₂ juin'₂ bá₄ dsí₅, 'lióng₂ a₂dse₃ rě₂jniá₂ a₂jmo₂₃ chain₂.

Jág₁ jáng'₅ léi₄ jui₁lia'₂ ni₁tsí₅ chi₁guí'₂ si₂
 (Marcos 4:21-25)

¹⁶ 'I₁jan₂ dsa₂ tsá₃ guí'₅ si₂ caun₂ ni₁tsí₅, jua'₅₄ a₂jlě₂ o₃ a₂chi'₂ né'₃ tsi₁cama 'e₂. A₂'ag₅ guei'₅₄ bá₄ dsa₂ si₂, ia₁jaun₂ jniá₂ quió'₅ i₂dsi₂ton'₅₄. ¹⁷ Ján₃ bá₄ le₂jaun₂, 'i₁caun₂ a₂rě₂'ma₄ jlě₅ cha₂ jua'₅₄ a₂lín₂ dsa₂ a₂tsá₃ le₃jniá₂; tion₅₄ bá₄ rě₂jniá₂. Ján₃ guě'₂ le₂jaun₂ 'i₁caun₂ jág₁ tsá₃ cha₂ jua'₅₄ lín₂ dsa₂ a₂tsá₃ 'ein₂ le₃ŋi₅; tion₅₄ bá₄ rě₂ŋi₅ dsa₂. ¹⁸ 'Quion₂ de'₂ 'nia'₂ 'í₁ rě₂ jaun₂, 'a₂lia'₂ lé₅ nag'₂, ia₁ jui₁lia'₂ i₂ma₂ŋí'₂, Diú₄ bá₄ jmo₃ a₂le₃ŋí'₂ guě'₄. La₁ jui₁lia'₂ i₂tsá₃ 'nio₃ le₃ŋí'₂ guě'₂ ně₃, ca₂tě₂ a₂jme₁ma₂ŋí'₂, lín₂, ŋia'₃.

Chi'₂ rin'₅₄ Jesús, quian'₅₄ chog₅₄
 (Mateo 12:46-50; Marcos 3:31-35)

¹⁹ Jaun₂ ca₂dsi₃lén₂ chi'₂ rin'₅₄ Jesús quian'₅₄ chog₅₄, jme₁'nio₃ jme₁ŋí₃ ca₂tě₂ ja₁'en₅₄ 'éi₂, la₁ tsá₃ lé₂, ia₁ juin₅ lín₃ dsa₂ tion'₅₄. ²⁰ Jaun₂ jan₂ dsa₂ sián'₂ bá₄ ca₂ŋag₃ jág₁ ca₂juá'₂:

—Chog'₂ quian'₅₄ chi'₂ ríng'₂ ně₅ tióin₂ ca₁'né₄, 'nio₃ jín₂ 'ne₂.

²¹ Jaun₂ ca₂ŋag₃:

⁸10 Isaías 6:9.

—Dsa₂ i₂na₅g₅ já₁g₁ quió'₅ Diú₄, ton'₂ jme₂ti₃, 'éi₂ bá₄ lín₅ cha₃, ríng'₃ né₃.

Ca₂jmo₃ Jesús ca₂'ág₂ tei₄ jmi₁ñí'₄, ca₂jñia'₃ dsí₂ né₃

(Mateo 8:23-27; Marcos 4:35-41)

²² Co₂ráun₂ ca₂'í₃ Jesús caun₂ tsi₁mu₅, jaun₂ ca₂tsí'₃ chi'₂ dsi₂guia₃-tín₂ quiáin₅:

—Ma₃dsau₅₄ quióng₄ le₃ca₂taun₂.

Jaun₂ ca₂i₃lén₂ bá₄. ²³ Të₁lia'₂ tioen'₅₄ 'ain₂₃ jmi₁ñí'₄, la₁ 'éi₂ né₃ ca₂güiin₂ bá₄. Të₃jë₄ jaun₂ ca₂'ág₂ dsí₂ tiá₂ lín₃ ne₄ jmi₂g₂. Ca₂rë₃lióg₃ i₃'a₄ jmi₂g₂ 'ñiό'₃ tsi₁mu₅, ca₂lia'₂ ma₂lé₂ dsi₃guein'₅₄ bá₄, go'₂ lín₃ tioen'₅₄.

²⁴ Jaun₂ ca₂i₁ñei₂₃ Jesús, ca₂juá'₂:

—iTë₅! iTë₅! iDsi₃'éin₂ jniog₄!

Jaun₂ ca₂nau₂ bá₄ guë'₂ Jesús ca₂të₂ ca₂jéin₂ dsí₂, a₂jná'₅ jmi₂g₂ né₃. Dsi₂jui₅ le₂jaun₂ bá₄ ca₂të₁tsi'₅₄ táng₃ tei₄. ²⁵ Jaun₂ tsí'₅ chi'₂ dsi₂guia₃-tín₂:

—¿A₂ ñó₅ a₂'én'₂ 'nia'₂?

Ca₂lia'₂ lë₁quian₅ jué'₅ lín₃ bá₄ tioen'₅₄ dsi₂gó'₃ dsí₅, dsia₂₃ tsí'₅ riin'₅₄:

—¿Ein₂ bá₄ lín₅ dsa₂ në₅, tiin₂ jmo₃ 'éi'₃ tsí'₅ të₂ dsí₂, jmi₂g₂ né₃, ne'₅₄ a₂juá'₂?

Dsa₂ chan₂ Gerasa i₂tion'₅₄ jme₂dsí₂ 'lín'₅₄

(Mateo 8:28-34; Marcos 5:1-20)

²⁶ Jaun₂ guë'₄ ca₂dsi₃lén₂ 'uë₃ Gerasa^h a₂ron₅ le₃'ño'₅₄ jmi₂g₂ ja₁ron₅ 'uë₃ Galilea. ²⁷ Jme₁ca₂o₂'ín₃ Jesús a₂të₁tsiin'₅₄ 'uë₃, jaun₂ ca₂jme₃quián₃ jan₂ dsa₂ juig₂ jaun₂ cau₅ quió'₅. Dsa₂ 'éi₂ né₃, líg'₂ bá₄ qui₂ca₂jo₃ jme₂dsí₂ je₂na'₅₄. Líg'₂ bá₄ ñi₂₃ tsá₃ ma₃tsin'₅₄ quí'₅, on₃ guë'₂ ma₃jua'₅₄ a₂guá₅ dsi₂néi₂; tau₂ 'ño₅ quió'₅ 'lag₄ bá₄ jme₁ma₂guá₅. ²⁸ Jme₁ca₂jíin₂ Jesús, jaun₂ ca₂guió'₃ co₂mi'₅₄, ca₂chi₃jnë₃ ne₄ 'éi₂, ca₂juá'₂ tiá₂ lín₃:

—¿E₂ bá₄ lë₃ ñe'₃ i₃tiáng'₃ jë₄ quián'₂ jniá₂, 'ne₂ Jesús Ja₁ñi'₅₄ Diú₄ i₂guá₅ guei'₅₄ lín₃? Mi₂₃ jniá₂ ne'₅₄, tsá₃ cuë₂ uig₅.

²⁹ Ca₂juá'₂ le₂në₅ ia₁ jme₁ma₂në₂jmo₃ Jesús 'éi'₃ a₂o₃'in₅ jme₂dsí₂ 'lín'₅₄ quió'₅. 'Lióng₂ ráun₂ bá₄ le₂jñiá₅ jme₁ma₂ca₂jñau'₃ i₂'lín'₅₄. Jaun₂ o₁jñia'₅₄ ma₂qui₂ma₂'néi₂ dsa₂ mi₂gu₂ mi₂tag₅₄ quian'₅₄ ñí₁ cadenas ia₁jaun₂ lé₂ 'í₁, la₁ ca₂le₃jë₃ bá₄ jme₁gág₅. Jme₁'liog'₂ je₂na'₅₄ a₂jme₁dsi₂ñí₃ uíng₂ gua'₅₄ quein₂ ja₁co₂'ñiog₅.

³⁰ Jaun₂ ca₂ñag₃ Jesús:

—¿A₂ bá₄ lia'₂ cheng'₂?

Jaun₂ ca₂ñag₃:

—Juin₅ⁱ bá₄ cheng₂.

^h26 A₂lin₅₄ chog₅₄ si₂ juá'₂: “Gadara”; a₂siá'₂ guë'₂ né₃, juá'₂: “Gergesa”; ján₃ bá₄ le₂në₅ 37.

ⁱ30 griego: legión.

Le₂ně₅ ca₂juá'₂ chein₂ ia₁ a₂juin₅ je₂na'₅₄ i₂jme₁tion'₅₄ quió'₅.
³¹ Jaun₂ jme₂dsí'₂ 'éi₂ ně₃ qui₂ca₂mi₃ tion'₅₄ ne₄ Jesús ia₁jaun₂ tsá₃
 guiog'₃ 'éi₂ ca₂tě₂ ja₁ca₂jein₃ chi₁dsio'₅₄. ³² Jaun₂ jme₁tion'₅₄ juin₅ i₁ñí₅
 caun₂ dsi₂con'₂. Jaun₂ ca₂mi₃ jme₂dsí'₂ a₂cuě₃ Jesús jmig₄ a₂dsi₃toin'₅₄
 quió'₅ i₁ñí₅. Jaun₂ ca₂cuě₃ bá₄ guě'₂ Jesús jmig₄. ³³ Jaun₂ qui₂ca₂'uin₂ bá₄
 je₂na'₅₄ quió'₅ dsa₂ 'éi₂; ca₂i₃lén₂ i₃toin'₅₄ quió'₅ i₁ñí₅. Ca₂le₃jín₃ i₁ñí₅ 'éi₂
 ně₃ ca₂i₁nioi₁₂ co₂'ei₅ 'lig'₅₄, qui₂ca₂sein'₃ tsag₂ siá₅ ca₂séin'₂ tě₂
 dsi₂jmig₂. Ja₁jaun₂ ca₂dsain₃ ca₂'in'₃ jmig₂.
³⁴ Jme₁ca₂tě₂ ne₄ dsa₂ i₂jme₁jmo₅ 'í₁ i₁ñí₅ 'e₂ ca₂lě₃, ca₂i₃lein₃ ca₂cuing₃
 ca₂i₁dsia₂ jě₄ juig₂, ja₁nau₂ ně₃. ³⁵ Jaun₂ ca₂i₁len₅₄ dsa₂ juig₂ i₁jag₅₄
 a₂ca₂lě₃ ja₁jaun₂. Jme₁ca₂dsi₃lén₂ ja₁'en₅₄ Jesús, ca₂jín₂ dsa₂ i₂ma₂'uin₂
 je₂na'₅₄ tě₂dsí₅. Jaun₂ ma₂guá₅ con₂ Jesús ma₂qui'₂ tsin'₅₄, ma₂'en₅₄ bá₄
 dsí₅. Jaun₂ ca₂i₃gó'₃ dsí₅ dsa₂ jme₁ca₂jág₂. ³⁶ Dsa₂ i₂ca₂tě₂ ne₄ a₂ca₂lě₃
 jaun₂, ca₂dsia₃ ca₂tsí'₃ táng₃ i₂ca₂dsi₃lén₂ 'éi₂ 'a₂ lia'₂ ca₂'lón₂ dsa₂
 i₂jme₁tion'₅₄ je₂na'₅₄ tě₂dsí₅. ³⁷ Jaun₂ ně₃, ca₂le₃jín₃ bá₄ dsa₂ chan₂
 le₃lág'₃ juig₂ 'uě₃ Gerasa ca₂tsí'₃ Jesús a₂o₃'iin₅ ja₁jaun₂, ia₁ 'ñio₅ lin₃
 tě₂tsí'₅₄ go₂'i₃ tion'₅₄ dsa₂. Jaun₂ ca₂ñá'₃ bá₄ 'éi₂ ca₂'í₃ táng₃ tsi₁mu₅.
³⁸ Dsa₂ i₂ca₂'uin₂ jme₂dsí'₂ je₂na'₅₄ quió'₅ ně₃, jme₁mi₂₃ ne₄ Jesús
 a₂jme₁dsó₃ quiong'₅₄. La₁ 'éi₂ ně₃ ca₂jmo₃ 'éi'₃ a₂ñia₃ bá₄, ca₂juá'₂:
³⁹ —Guan'₂ bá₄ quiáng'₂, o₂dsia₄ ca₂le₃jě₃ 'e₂ ně₂jmo₃ Diú₄ ja₁cong'₂.
 Ca₂ñá'₃ bá₄ guě'₂ dsa₂ 'éi₂ quió'₅, ca₂i₁dsia₂ le₂tan₅₄ jě₄ juig₂ 'e₂
 ca₂jmo₃ Jesús quiong'₅₄.

Ja₁míg₄ Jairo, quian'₅₄ 'io₅₄ i₂ca₂ní'₃ tsin'₅₄ Jesús

(Mateo 9:18-26; Marcos 5:21-43)

⁴⁰ Jme₁ca₂dsián'₃ táng₃ Jesús le₃'ño'₅₄ jmig₂, qui₂ca₂guei₃ dsa₂ a₂'ñio₂
 dsí₅, ia₁ ca₂le₃jín₃ bá₄ jme₁ma₂le₁jñiog₂₃ tioen'₅₄. ⁴¹ Tě₃jě₄ jaun₂,
 ca₂dsióg₃ jan₂ dsa₂ i₂chen₂ Jairo, i₂nio₅ gu₂ guá'₅ sinagoga. Dsa₂ 'éi₂ ně₃
 ca₂chi₃jné₃ ne₄ Jesús jme₁dsióg₃, ca₂mi₃ tion'₅₄-jan₃ ia₁jaun₂ dsó₃
 ja₁quió'₄. ⁴² Ia₁ jme₁chan₂ jan₂ tan₅₄ ja₁míg₄, i₂jme₁ma₂'en₅₄ con'₂ guia₃-
 tín₂ ñi₂, i₂jme₁ma₂i₁jón₂. Jme₁ma₂'en₅₄ Jesús jui₅ ñó₃ ja₁quió'₄ 'éi₂, juin₅
 lin₃ dsa₂ i₂i₃lén₂ quiong'₅₄, lia'₂ qui₂rě₂quín'₅ bá₄ Jesús ñó₃.
⁴³ Jě₄ jaun₂, ñó₃ jan₂ dsa₂ mí₂ i₂dso'₅₄ ma₂guia₃-tín₂ ñi₂ a₂tiin₂,^j la₁
 ca₂lia'₂ 'i₁jan₂ tsá₃ 'ein₂ ma₂ca₂tió'₃ jme₃'lió₂.
⁴⁴ 'Io₅₄ 'éi₂ ně₃ ca₂jme₃quiáin₃ tě₂le₃ chi₁co'₅₄ quió'₅ Jesús. Jaun₂
 ca₂ní'₃ chei'₅₄ tsin'₅₄ 'éi₂. Co₂tan₅₄ dsi₂jui₅ le₂jaun₂ bá₄ ca₂quion₂ jmi₂
 'ain₅₄.
⁴⁵ Jaun₂ ca₂juá'₂ Jesús:
 —'Ein₂ ně₂ní'₃ quió'₃?
 Ca₂le₃jín₃ bá₄ dsa₂ ñag₂₃ juá'₂ tsá₃ ñi₅.

^j43 A₂lin₅₄ chog₅₄ si₂ juá'₂ ján₃: “Jme₁ma₂'éin₂ ca₂le₃jě₃ cu₄ a₂jme₁cha₂ quió'₅ quian'₅₄
 tě₅mí₅.”

Jaun₂ ca₂juá'₂ Pe₄:^k
 —Të₅, jág'₂ bá₄ 'ne₂ chi₁quí'₅ co₂'liog'₂ dsa₂ ca₂taun₂ ca₂taun₂ ja₂náu₅.
⁴⁶ La₁ caun₂ ca₂juá'₂ bá₄ Jesús:
 —Chan₂ i₂ně₂ní'₃ quió'₃, ia₁ ca₂rě₃léi'₄ jniá'₂ o₂'ág₃ bí₂ quió'₃.
⁴⁷ 'Io₅₄ ně₃, jme₁ca₂rě₃lí'₄ a₂tsá₃ ma₃lé₂ jua'₅₄ a₂'mai₃, já₃ jlein₂₃,
 ca₂chi₃jné₃ ne₄ 'éi₂. Të₃ jág₅ ca₂le₃jín₃ dsa₂ ca₂juá'₂ lia'₂ tí₅ jág₁ 'e₂ 'uig₅₄
 ca₂ní'₃ quió'₅ 'éi₂, ton'₂ ca₂jáng'₃ jág₁ dsau₅ a₂ca₂'lóin₂ dsi₂jui₅ le₂jaun₂.
⁴⁸ Jaun₂ ca₂juá'₂ Jesús:
 —Jón₃, ne₄ ia₁ a₂'éng'₂, ca₂'lóng'₂ bá₄. Guan'₂ tei₄ quiáng'₂.
⁴⁹ Të₃jě₄ juá'₂ jág₁ jaun₂ jme₁ca₂dsióg₃ jan₂ dsa₂ i₂chen₄ dsi₂néi₂ quió'₅
 i₂nio₅ gu₂ guá'₅, ca₂juá'₂:
 —Ma₂jon₅ bá₄ chi'₂ quiáng'₂. 'A₃ ma₃cuě'₂ ta₁ Të₅.
⁵⁰ La₁ ca₂nág₂ bá₄ Jesús, jaun₂ ca₂juá'₂:
 —Tsá₃ lě₁jmo₂ 'lia'₂ 'au'₂. Jñia'₅₄ con'₂ 'én₃ bá₄, jaun₂ ně₃ jag'₅₄ i₂'lón₂
 bá₄ chi'₂ quiáng'₂.
⁵¹ Jme₁ca₂dsióg₃ dsi₂néi₂, tsá₃ ca₂cuě'₃ jmig₄ jua'₅₄ dsi₃ton'₅₄ 'i₁jan₂
 i₂sián'₂, jñia'₅₄ lia'₂ Pe₄, Juan₅₄, Jacobo'₂ ně₃, quian'₅₄ jmá'₃ chog₅₄-jmei₂
 chi'₂ 'éi₂ bá₄ i₃ton'₅₄. ⁵² Jaun₂ qui'₂-o₅ bá₄ dsa₂ qui'₂ dsí₅ lín₃ tioen'₅₄,
 o₄quió'₄ chi'₂. Jaun₂ ca₂juá'₂ Jesús:
 —Tsá₃ 'au₂ 'nia'₂; on₃jua'₅₄ i₂rě₂jon₅₄ ně₅. Jñia'₅₄ lia'₂ a₂rě₂güín₃ bá₄.
⁵³ La₁ jñia'₅₄ ca₂ñí₂ bá₄ 'éi₂ tioen'₅₄, ia₁ ñi₅ rě₂ bá₄ a₂jme₁ma₂rě₂jon₅₄
 dsón'₂ bá₄ chi'₂.
⁵⁴ Jaun₂ ca₂tíin₂ gu₂ chi'₂ 'éi₂, ca₂juá'₂ tiá'₂:
 —iJón₃, nau₂!
⁵⁵ Ca₂gú'₃ táng₃ jme₂dsí₂ quió'₅; dsi₂jui₅ jaun₂ bá₄ ca₂nau₂. Jaun₂
 ca₂jmo₃ Jesús 'éi'₃ a₂cuě'₃ dsa₂ a₂guě'₃. ⁵⁶ Jaun₂ dsi₂gó'₃ dsí₅ 'ñio₅ lín₃
 chog₅₄-jmei₂. La₁ Jesús ně₃ ca₂juá'₂ a₂tsá₃ 'ein₂ tsí'₃ 'i₁jan₂ a₂ca₂lě₃ jaun₂.

Ca₂chen₃ Jesús chi'₂ dsi₂guia₃-tín₂

(Mateo 10:5-15; Marcos 6:7-13)

9 ¹ Ca₂ñí'₂ Jesús chi'₂ dsi₂guia₃-tín₂ quiáin₅ ca₂cuě'₃ jui₅bí₂ a₂'io₃ 'éi'₃
 ne₄ quió'₅ ca₂le₃jín₃ jme₂dsí₂ je₂na'₅₄, a₂lé₂ qui₂jme₃'lióin₂ dsa₂
 jui₁'e₂ guě'₃ dso₄ niog₅ lín₅. ² Ca₂chei₃ a₂dsi₃'é₃ jág₁ jui₁lia'₂ ja₁gon₂ Diú₄,
 a₂dsi₃jme₁'lióin₅₄ dsa₂ i₂le₁dso'₅₄. ³ Jaun₂ ca₂juá'₂:
 —Tsá₃ 'e₂ cán'₁ 'nia'₂ 'i₁caun₂ le₂'i₄ jui₅, on₃ guě'₂ 'ma₂'i₅₄, on₃ guě'₂
 tsi₁na'₅₄ on₃ guě'₂ i₁ñí'₄, on₃ guě'₂ cu₄, on₃ guě'₂ tsín'₂ 'nia'₂ siá'₂ cán'₁.
⁴ Le₂caun₂ dsi₂néi₂ ja₁dsi₁nó'₅ 'nia'₂, ja₁jaun₂ jan'₄ 'nia'₂ ca₂lia'₂ ca₂tě₂
 jmig₄ a₂o₁nog'₄ táng₃. ⁵ Le₂caun₂ juig₂ ja₁tsá₃ guei₅ dsa₂, co₂dsia₅ 'uín'₂
 'nia'₂ juig₂ jaun₂, séi'₃ 'nia'₂ 'liog₂ tag'₅₄, a₂jmó'₂ léi₄ a₂tsá₃ ma₃'e₂ 'uín'₄
 'nia'₂ quiain'₅₄.

^k45 A₂lin₅₄ chog₅₄ si₂ juá'₂ ján₃: "Pe₄ quiaín'₅₄ riín'₅₄."

^l51 o₃, Santiago.

⁶ Jaun₂ qui₂ca₂'uin₂ bá₄ chi'₂ dsi₂guia₃-tín₂, ca₂i₃lén₂ le₂tan₅₄ juig₂ i₁'é₄ jág₁ dse₃, i₁jme₁'lioin₂₃ dsa₂ né₃.

Ca₂jon₃ Juan₅₄ i₂chon₅ dsa₂ jmig₂

(Mateo 14:1-12; Marcos 6:14-29)

⁷ Jaun₂ ca₂rë₃ñi₅ Rag₅₄^m Herodes ca₂le₃jé₃ 'e₂ niog₅ lé₂. La₁ tsá₃ caun₂ a₂i₃jio₅ dsí₅, ia₁ dsia₅ i₂lin₅₄, Juan₅₄ bá₄ 'éi₂ ñi₅ a₂ma₂ca₂jein'₅₄ táng₃.

⁸ I₂lin₅₄ guë'₂ dsia₅ a₂ma₂ca₂jme₃jnia₅ Elías; i₂sián'₂ guë'₂ dsia₅ a₂ma₂ca₂jein'₅₄ táng₃ jan₂ i₂jme₁'é₂ jág₁ quián₅ Diú₄ ma₂líg'₂. ⁹ La₁ Rag₅₄ Herodes 'ñiog₅ guë'₂ né₃ juá'₂:

—Jua'₂ jniá₂ 'ñió₃ ca₂jmo₃ 'éi'₃ a₂ca₂quí'₃ dsa₂ dsi₂lag₄ 'éi₂. ¿'Ein₂ guë'₂ nē₅, tsá₃ caun₂ jág₁ guion₁₂ a₂jmo₂₃?

Jaun₂ Herodes né₃ jme₁'no'₂ jui₅ a₂jme₃jein'₂.

Ca₂jme₃tan₅₄ Jesús 'ñiá₂ mei₅ dsa₂

(Mateo 14:13-21; Marcos 6:30-44; Juan 6:1-14)

¹⁰ Jme₁ca₂o₃len₃ dsa₂ i₂chen₄ quiáin₅ 'éi₂, jaun₂ ca₂dsia₃ ca₂tsí'₃ Jesús 'e₂ niog₅ ca₂jmo₃ ja₁i₁lein₅₄. Jaun₂ ca₂jio₃ Jesús a₂i₃lén₂ con'₂ guioin₅₄ caun₂ juig₂ ja₁chei₂ Betsaida. ¹¹ La₁ tion₅₄ bá₄ ca₂i₃lén₂ dsa₂ sián'₂ jme₁ca₂rë₃ñi₅; ca₂guei₃ bá₄ guë'₂ Jesús qui₂ca₂jme₃tag₂₃ jág₁ jui₁lia'₂ ja₁gon₂ Diú₄ ca₂jme₃'lióin₂ dsa₂ i₂jme₁le₁dso'₅₄ né₃.

¹² Të₂le₃ ca₂'láu₂ jmig₄ jaun₂, ca₂o₃lén₂ chi'₂ dsi₂guia₃-tín₂ ca₂tsí'₃ Jesús:

—'Ei'₂ jág₁ dsa₂, ia₁jaun₂ dsi₃lein₅ dsi₃'nióg₂ a₂gué'₃, jui₁dsi₂'nio'₂ ja₁jñia₃ le₂con₂ juig₂ pí'₁ ma₂quián₅ nē₅, ia₁ tsá₃ 'e₂ cha₂ ja₁lá₃.

¹³ La₁ Jesús guë'₂ né₃ ca₂juá'₂:

—Cuë'₅₄ 'nia'₂ dsa₂ a₂gué'₃.

Jaun₂ ca₂ñag₃ 'éi₂ táng₃:

—Tsá₃ 'e₂ cha₂ jua'₅₄ a₂le₃cue₅₄ jnia'₅₄ dsa₂, jñia'₅₄ lia'₂ 'ñiá₂ i₁ñí'₄ bá₄ 'i₄; quian'₅₄ on₃ i₁ju₁, jñia'₅₄ lia'₂ nē₁jua'₂ dsi₁liá₄ má₃ con'₂ tín'₂ gué'₃ ca₂le₃jín₃.

¹⁴ Con'₂ 'ñiá₂ mei₅ dsa₂ 'éi₂ jme₁lé₂, jmá'₃ dsa₂ ñe'₂.

Jaun₂ ca₂juá'₂ Jesús ca₂tsí'₃ chi'₂ dsi₂guia₃-tín₂ quiáin₅:

—Chei'₅₄ 'nia'₂ dsa₂ jui₁tiaín'₄ jui₁jmo₁₂ jma₃të₂lón₃-guián₂ lia'₂ co₂niói'₃.

¹⁵ Jaun₂ ca₂jmo₃ bá₄ guë'₂ 'éi₂ 'éi'₃ a₂tian'₃ dsa₂. ¹⁶ Jaun₂ ca₂tín₂ Jesús ta₁'ñiá₂ i₁ñí'₄, le₃on₃ i₁ju₁ né₃. Ca₂chóg'₃ ne₅₄ jui₅guei'₅₄ i₂juíg₃, ca₂jme₃jñiói₃ a₂jaun₂. Jaun₂ gué₄ ca₂'niai₃, ca₂cué'₃ chi'₂ dsi₂guia₃-tín₂. 'Éi₂ guë'₂ né₃ ca₂dsiói'₃ jin₄ dsa₂. ¹⁷ Ca₂le₃jín₃ bá₄ ca₂gué'₃ ca₂lia'₂ ca₂'ág'₃ dsí₅. Jme₁ca₂lë₃ jaun₂, guia₃-tín₂ tsi₁mí'₂ tá₁ ca₂cág'₃ dsa₂ jmá'₃ 'nau₅₄ a₂ca₂chóng₃.

^{m7} griego: tetrarca (i₂gon₂ jmo₅ 'éi'₃ 'uë₃ Galilea).

Ca₂juá'₂ Pe₄ lia'₂ tí₅ jág₁ a₂lín₅ Jesús I₂rë'₂ín₁ quián₅ Diú₄

(Mateo 16:13-19; Marcos 8:27-29)

¹⁸ Co₂ráun₂ 'en₅₄ Jesús 'ñiog₅ chi₂léin'₂ Diú₄, i₂jme₁quaiain'₅₄ bá₄ chi'₂ dsi₂guia₃-tín₂, jaun₂ ca₂ñag₃ Jesús:

—¿'E₂ 'ag₅ dsa₂ jniá'₂? ¿'Ein₂ lín₅ jniá'₂, dsia₅ dsa₂?

¹⁹ Jaun₂ ca₂ñag₃ chi'₂ dsi₂guia₃-tín₂:

—I₂lín₅₄ dsa₂ dsia₅ a₂lín'₅ Juan₅₄ i₂chon₅ dsa₂ jmig₂; i₂lín₅₄ guë'₂ dsia₅ a₂lín'₅ Elías; i₂lín₅₄ guë'₂ dsia₅ táng₃ a₂lín'₅ i₂sián'₂ i₂jme₁'é₂ jág₁ quián₅ Diú₄, a₂ca₂jein'₅₄ táng₃.

²⁰ Jaun₂ ca₂ñag₃ Jesús:

—¿'Nia'₂ guë'₂ né₃? ¿'E₂ guë'₂ juá'₂ 'nia'₂ 'ein₂ lín₅ jniá'₂?

Jaun₂ ca₂ñag₃ Pe₄:

—'Ne₂ lín'₅ I₂rë'₂ín₁ quián₅ Diú₄.

'É₂ Jesús jág₁ a₂jóin₂

(Mateo 16:20-28; Marcos 8:30-9:1)

²¹ Jaun₂ ca₂juá'₂ Jesús a₂jmo₃ tei₄, a₂tsá₃ 'ein₂ tsí'₃ jág₁ jaun₂. ²² Jaun₂ ca₂juá'₂ né₃:

—Co₂në₅ 'en₅₄ 'éi'₃ Jaun₅ dsa₂ mi₂güí'₃ a₂dsi₃ñí'₂ uig₅ 'ñio₅ lín₃; jme₃'iog₅₄ dsi₂gui'₅₄ can'₅₄, lia'₂ juig₅₄ jme₂dsa₂, tē₅juá'₅ né₃. Quin'₃ dsa₂ jág₁ a₂jñag'₃, la₁ jein'₅₄ bá₄ táng₃ a₂'ni₅ jmig₄ jaun₂.

²³ Jaun₂ ca₂tsí'₃ ca₂le₃jín₃:

—Në₁jua'₂ chan₂ i₂'nio₃ jiá'₃ chi₁co'₅₄ quió₃, co₂dsia₅ jui₁dsi₂'én₂ dsí₅ 'ñiog₅, jui₁'ei₅₄ bá₄ caun₂ dsí₅ ca₂le₃jé₃ jmig₄ o₁jñia'₅₄ ca₂joiñ₃,ⁿ jui₁jia₂ chi₁co'₅₄ quió₃. ²⁴ Ia₁ jui₁lia'₂ dsa₂ i₂'nio₃ le₃chan₂ dse₃ mi₂güí'₃ la₂, dsi₃'én₂ quió₅; la₁ jui₁lia'₂ dsa₂ i₂quí'₃ dsí₅ jui₁dsi₂ñí'₂ 'e₂ dsi₃ñí'₂ o₄quió₃ jniá'₂, lí'₂, tñín'₄ bá₄. ²⁵ Ia₁ ¿'e₂ bá₄ ta₁ jmo₃ a₂lí'₄ dsa₂ ca₂le₃jé₃ a₂cha₂ ne₄ gua'₅₄ 'uë₃ la₂, në₁jua'₂ dsi₃'éin₂ bá₄ guë'₂? ²⁶ Ia₁ në₁'ein₂ gui'₅₄ jén'₅ o₄quió₃ jniá'₂ quian'₅₄ o₄quió'₄ jág₁ quió₃, ján₃ bá₄ le₂jaun₂ le₃gui'₅₄ Jaun₅ dsa₂ mi₂güí'₃ 'ag₃ jē₁ma₂tē₂ rē₁jñioí'₂ ma₂lín₅ Rag₅₄ jlán'₁ jui₁lia'₂ jlán'₁ Jmei₂, quian'₅₄ ángeles jñio₅ quiáin₅. ²⁷ A₂dsi₂jó'₃ juí'₂ jniá'₂ 'nia'₂, chan₂ bá₄ 'nia'₂ i₂lín₅₄ i₂tióñ₂ jē₄ la₂, i₂tsá₃ dsián₃ ca₂lia'₂ ca₂tē₂ ne₅₄ bí₂ 'éi'₃ quió₅ Diú₄.

Ca₂rë₃tsín₃ Jesús lia'₂ jniái₂

(Mateo 17:1-8; Marcos 9:2-8)

²⁸ Con'₂ jñia₃ jmig₄ cang₂ a₂ca₂juá'₂ Jesús le₂në₅, ca₂ñó₃ jui₅ má'₂ i₁chi₂i₁lein'₄ Diú₄, jme₁quaiain'₅₄ Pe₄, Jacobo, Juan₅₄ né₃. ²⁹ Tē₃jē₄ chi₂léin'₂ Diú₄, ca₂rë₃tsín₃ lia'₂ jniái₂. Tsin'₅₄ né₃ ca₂rë₃tsín₃ ca₂jñia₃ tiog₂ jau₂, ca₂lia'₂ tág₅ 'ñio₅ lín₃. ³⁰ Tē₃jē₄ jaun₂, ca₂jñia₃ on₃ dsa₂, dsia₂₃

ⁿ23 lit. “jui₁quian₅₄ cróg₄ quió₅ ca₂le₃jé₃ jmig₄.”

jág₁ quian'₅₄ Jesús. Moisés quian'₅₄ Elías bá₄ 'éi₂. ³¹ Ca₂lia'₂ co₂tág₅ co₂'né'₅ bá₄ ca₂jniai₃, tióin₂ dsia₂₃ a₂niog₅ lé₂, 'mú₃ a₂gue₃ jë₄ juig₂ Jerusalén, a₂le₃ti₃ 'éi'₃ a₂'ein₅₄. ³² Të₃ ma₃i₁güín₃ 'ñio₅ lin₃ bá₄ Pe₄ quiaín'₅₄ riín'₅₄, ca₂jme₃jnio₅₄ ne₅₄ ca₂jíin₂ Jesús jniái₂ co₂tág₅ quian'₅₄ dsa₂ on₃ i₂quiaín'₅₄. ³³ Jme₁ma₂i₂uín₃ dsa₂ 'éi₂ cau₅ quió'₅, jaun₂ ca₂juá'₂ Pe₄ ca₂tsí'₃ Jesús:

—Të₅, i'e₂ gué₄ dse₃ lia'₂ tio'₅₄ jniog₄ ja₁lá₃! Në₃ o₁jmó₁ 'ni₅ tsi₁'io₅ láu₃: caun₂ quiáng'₂, caun₂ quió'₅ Moisés, caun₂ guè'₂ quió'₅ Elías në₃.

La₁ a₂lë₁ca₂juá'₂ bá₄ Pe₄, on₃jua'₅₄ jaun₂ lí'₄ a₂të₂'i₂₃ le₂jaun₂.

³⁴ Të₃ dsia₂₃ jág₁ le₂jaun₂, jme₁gua₃ jnei₅ ca₂jliin₃, jaun₂ gué₄ ca₂ja₃gó'₃ tióin'₅₄ jme₁ca₂i₃'én₂ 'éi₂ jë₄ jnei₅. ³⁵ Jë₄ jnei₅ jaun₂ ca₂né'₂ jág₁, ca₂juá'₂:

—I₂la₂ bá₄ jón₃ I₂rë₂'ín₁ quiáng₃. Nei₂ 'nia'₂ jág₁ quió'₅.

³⁶ Jme₁ma₂në₂néi₂ jág₁ jaun₂, jua'₂ 'ñiog₅ bá₄ Jesús ma₂chéin'₅ jme₁ca₂jág₃. La₁ jmig₄ jaun₂, tei₄ bá₄ ca₂jmo₃ tsá₃ 'ein₂ ca₂tsí'₃ 'i₁jan₂ a₂ca₂të₂ ne₅₄ jaun₂.

Ca₂jme₃'lión₂ Jesús jan₂ chi'₂ i₂jme₁'en₅₄ jme₂dsí₂ 'lin'₅₄

(Mateo 17:14-21; Marcos 9:14-29)

³⁷ Jme₁jnia₃, ca₂sióin₃ táng₃ má'₂ jaun₂, con'₂ guè'₂ juín₅ lin₃ dsa₂ ca₂jme₃jein'₂. ³⁸ Të₃ jin₄ dsa₂ jaun₂, ca₂juá'₂ tiá₂ jan₂ dsa₂ ca₂tsí'₃ Jesús:

—Të₅, jmo₄ dse₃ 'au'₂, jin₄ co₂nio₄ chi'₂ quiáng₃, i₂jan₂ la₂ bá₄ la₂ quiáng₃ chan₂. ³⁹ Jme₂dsí₂ 'lin'₅₄ bá₄ i₂co₂jmóg'₂ guió'₅ co₂tiá₂ jén'₅ dso₄ 'ei₂, qui₂'uè'₅ jan₅ mi₂'o₅₄. I₂'lin'₅₄ në₃, jmóg'₂, ca₂lia'₂ jaun₂ gué₄ téi₂ ca₂lia'₂ ma₂jén'₃ uig₅ 'ñio₅ lin₃. ⁴⁰ Jme₁ma₂në₂juíg₂ chi'₂ dsi₂guia₃-tín₂ quiáng'₂ a₂jme₁dsei₂₃, la₁ tsá₃ ca₂tió'₃.

⁴¹ Jaun₂ ca₂juá'₂ Jesús:

—i'En₁ jmá'₃ 'nia'₂ dsa₂ chan₂ jmig₄ në₃ tsá₃ 'e₂ 'éng'₂! ¿Je₂liá'₂ jmig₄ jmá'₃ 'nió'₅ jmo₅₄ tió'₅ dsi₃ jin'₄ 'nia'₂? Nï₅₄ chi'₂ quiáng'₂ le₃la₂.

⁴² La₁ jme₁ma₂ñó₅ chi'₂ le₃ne₄ Jesús, i₃'íin₃ táng₃ ca₂tón₂ jme₂dsí₂ je₂na'₅₄ qui₂ca₂ba₂lág'₂. La₁ dsi₂juí₅ le₂jaun₂ ca₂jí₂ Jesús ca₂jéin₂ i₂'lin'₅₄, ca₂jme₃'lióin₂ chi'₂. Jaun₂ ca₂jáng'₂ ne₄ jmei₂.

⁴³ A₂jaun₂ në₃, ca₂i₃gó'₃ dsí₅ ca₂le₃jín₃ 'a₂ lia'₂ juín'₂ Diú₄.

Ca₂'é₂ táng₃ Jesús jág₁ a₂jóin₂

(Mateo 17:22-23; Marcos 9:30-32)

Të₃ tion'₅₄ dsa₂ dsi₂gó'₃ dsí₅ a₂jmo₅ Jesús, jaun₂ ca₂juá'₂ ca₂tsí'₃ dsa₂ guia₃-tín₂ quiáin₅:

⁴⁴ —Rë₂ nei₂ 'nia'₂ jág₁ quió₃ la₂: ñi'₅₄ ta₁ ja₁dsau₅₄ në₅, jáng'₂ dsa₂ quió'₅ Jaun₅ dsa₂ mi₂güíg₃ o₄gú₃ dsa₂.

⁴⁵ La₁ jág₁ jaun₂ në₃, tsá₃ ca₂ñí'₂ dsí₅ chi'₂ dsi₂guia₃-tín₂, ia₁ tsá₃ jme₁ma₂'i₄ 'éi'₃ a₂le₃ñí'₂. Jaun₂ tsá₃ ca₂tiá₂ dsí₅ a₂ñí'₃ Jesús 'e₂ 'nio₃ juá'₂ quian'₅₄ jág₁ jaun₂.

¿'Ein₂ lín₅ i₂dsen₅₄ gué₄?
(Mateo 18:1-5; Marcos 9:33-37)

⁴⁶ Jaun₂ ca₂tsín₂ chi'₂ dsi₂guia₃-tín₂ con'₂ guioin₅₄, ne₄ jui₁lia'₂ 'ein₂ i₂lén₂ i₂dsen₅₄ gué₄ jë₄ quió'₅. ⁴⁷ La₁ jme₁ca₂rë₃lí'₄ Jesús 'e₂ a₂dsia₂₃, jaun₂ ca₂cain₃ jan₂ guein₂ ca₂dsiog₃ cau₅ quió'₅. ⁴⁸ Jaun₂ ca₂juá'₂:

—Jui₁lia'₂ dsa₂ i₂guen₅ guein₂ la₂ o₄quió₃ jniá₂, guei₂₃ jniá₂; jui₁lia'₂ dsa₂ i₂guei₅ jniá₂, ján₃ guë'₂ guein₂₃ i₂ca₂chei₃. Ia₁ jui₁lia'₂ i₂jmo₅ me'₂ gué₄ jë₄ ca₂le₃jín'₃ 'nia'₂, i₂'éi₂ bá₄ i₂lín₅ i₂dsen₅₄ gué₄.

I₂tsá₃ 'iog₅₄ jniog₄, i₂quian'₅₄ jniog₄ bá₄ 'éi₂
(Marcos 9:38-40)

⁴⁹ Jaun₂ né₃ ca₂juá'₂ Juan₅₄:

—Të₅, ma₂jín₄ jnia'₅₄ jan₂ dsa₂ 'uín'₂ jme₂dsí₂ je₂na'₅₄ quian'₅₄ bí₂ 'éi'₃ a₂'ó'₅ 'ne₂. Tsá₃ ma₃ca₂cuë₅₄ jnia'₅₄ jmig₄, ia₁ tsá₃ guë'₂ ñi₂₃ quian'₅₄ jniog₄.

⁵⁰ La₁ Jesús né₃ ca₂juá'₂:

—Tsá₃ jmó'₂ 'nia'₂ le₂jaun₂ a₂jñig'₅₄. Ia₁ jui₁lia'₂ dsa₂ i₂tsá₃ 'iog₅₄, të₂le₃ quían₂ jniog₄ bá₄ tión₂ i₂le₂'éi₂.

I₃jen₅₄ Jacobo quian'₅₄ Juan₅₄ ca₂jí₂ Jesús

⁵¹ Jme₁ma₂ja₂quián₃ të₅₄ jmig₄ a₂dsán'₃ táng₃ Jesús guei'₅₄ i₂juíg₃, ca₂'ág₂ caun₂ dsí₅ ca₂'í₃ jui₅ a₂dsióg₄ Jerusalén. ⁵² Ca₂chein₃ dsa₂ i₃lén₂ ne₄ jui₅ i₃jmó₂ co₂jñia₅₄ ja₁jñia₃ caun₂ juig₂ pí'₁ niog₅ 'uë₃ Samaria. ⁵³ La₁ tsá₃ ca₂guen₃ dsa₂ Jesús ja₁jaun₂, ia₁ ca₂rë₃lí'₄ a₂'ein₅₄ jui₅ ñó₅ jui₅ Jerusalén bá₄. ⁵⁴ Jaun₂ né₃, jme₁ca₂rë₃ñi₅ Jacobo quian'₅₄ Juan₅₄ a₂tsá₃ guei₅ dsa₂, jaun₂ ca₂juá'₂:

—Te₁gui'₅₄, ¿tsa₁ dse₃ jmó₁ jniog₄ 'éi'₃ a₂sió₃ si₂ guei'₅₄ i₂juíg₃ ia₁jaun₂ 'én₂ juig₂ la₂?^o

⁵⁵ Jaun₂ ca₂jén'₃ Jesús ca₂jí₂.^p

⁵⁶ Jaun₂ ca₂i₃lén₂ bá₄ táng₃ juig₂ siá'₂.

Dsa₂ i₂jme₁'nio₃ jme₃quian'₅₄ Jesús
(Mateo 8:19-22)

⁵⁷ Ja₁i₃lén₂ jaun₂, ca₂juá'₂ jan₂ dsa₂:

—Te₁gui'₅₄, 'nio₃ jniá₂ jme₁quion₁ 'ne₂ le₂con₂ ja₁gog'₅₄.

⁵⁸ Jaun₂ ca₂ñag₃ táng₃ Jesús:

—Jui₁lia'₂ i₁güi₅, i₂'io₅ to₄ bá₄ 'éi₂; ján₃ bá₄ le₂jaun₂ jui₁lia'₂ i₁tan₅ i₂i₂nio₄ guei'₅₄, tio'₅₄ tsag₄ bá₄ 'éi₂ ján₃. La₁ Jaun₅ dsa₂ mi₂güig₃ né₃ tsá₃ ja₁cha₂ quió'₅, jua'₅₄ ja₁lé₂ le₃jñia₃.

^o54 A₂lin₅₄ chog₅₄ si₂ juá'₂ ján₃: “jui₁lia'₂ ca₂jmo₃ Elías.”

^p55 A₂lin₅₄ chog₅₄ si₂ juá'₂ ján₃: “ca₂juá'₂: —Tsá₃ len'₅₄ 'nia'₂ guiong'₅₄ 'ein₂ jme₂dsí₂ ca₂jo₃ 'nia'₂. Ia₁ tsá₃ ta₁ jaun₅ já₅ Jaun₅ dsa₂ mi₂güig₃ a₂'éin₂ dsa₂, të₂le₃ a₂lió₂ bá₄.”

- ⁵⁹ Jaun₂ ca₂tsí'₃ i₂sián'₂:
 —Nia₅ quian'₅₄ jniá'₂.
 La₁ ca₂ɲag₃ 'éi'₂:
 —Te₁gui'₅₄,^q jui₁i₁ 'óng₃ de'₂ ɲe'₃.
⁶⁰ Jaun₂ ca₂ɲag₃ táng₃ Jesús:
 —Jui₁dsi'₂ón₃ 'lag₄, 'lag₄ riin'₅₄. La₁ 'ne₂, juí₂ jniá'₂, gua₂ o₂ 'é'₃ jág₁
 jui₁lia'₂ 'a₂ lia'₂ lé₅ ja₁gon₂ Diú₄.
⁶¹ Jaun₂ ca₂juá'₂ táng₃ jan₂:
 —Te₁gui'₅₄, 'nio₃ jniá'₂ nei₅₄ quian'₅₄ 'ne₂, la₁ jui₁i₁ 'éi'₃ de'₂ jág₁
 i₂chan₂ quió'₃.
⁶² La₁ Jesús ně₃ ca₂juá'₂:
 —Dsa₂ i₂ma₂ně₂ 'éi'₂ caun₂ dsí'₅ a₂jme₃quiong'₅₄, ně₁jua'₂ ca₂'ág₂ caun₂-
 tin₃ dsí'₅, lín₅ lia'₂ lín₅ jan₂ i₂jme₂lióg₃ quiá'₂ 'uě₃, jéin'₅ le₃ca'₃. Tsá₃ ta₁
 tén₄ dsa₂ i₂le₂ 'éi'₂ le₃ja₁gon₂ Diú₄.

Chen₅ Jesús 'nag'₂ ne₂guión₂ rě₂dsí'₂ guian₃ dsa₂

- 10** ¹ Cang₂ jaun₂ ca₂quión'₂ Te₁gui'₅₄ 'nag'₂ ne₂guión₂ rě₂dsí'₂
 guian₃ (70) dsa₂ sián'₂.^r Jaun₂ qui₂ca₂chein₃ jma₃on₃ jma₃on₃
 'éi'₂ i₃lén₂ ne₄ jui₅ quió'₅, ca₂le₃jě₃ juig₂ ja₁'ein₅₄ jui₅ dsióg₄.
² Ca₂tsí'₃ 'éi'₂:
 —Juin₅ lín₃ bá₄ dsa₂ 'nio₃ gue₃ jág₁ quió'₅ Diú₄; lé₅ ně₂jag₄ bá₄ 'lióng₂
 lín₃ a₂ca₂rau₂, la₁ dsa₂ i₂jmo₃ ta₁ bá₄ tsá₃ juin₅ chan₂. Jaun₂ lě₃, mi₄ 'nia'₂
 chei'₅₄ Juig₅₄ ja₁nau₂ jui₁chein₁₂ dsa₂ i₂jmo₃ ta₁ cág'₃. ³ Jag₄ 'nia'₂ jaun₂,
 'nia'₂ tsín₂ jniá'₂ o₁nóg'₅ líng'₅ co₂'nió'₄ guein₂ já'₂ cha'₂ jin₄ dsig₂ náu₂.
⁴ Tsá₃ tsi₁na'₅₄ cán'₁ 'nia'₂, on₃ guě'₂ lau₂ tó'₅ cu₄, on₃ guě'₂ lau₂ ton₅
 tag'₄ 'nia'₂ siá'₂ cán'₁. Tsá₃ jme₁'ag'₄ 'nia'₂ le₂'i₄ jui₅ jua'₅₄ a₂dsiá'₁ 'nia'₂
 jág₁ uě'₂ quian'₅₄ dsa₂. ⁵ Jě₁ma₂tě₂ rě₁tón'₂ 'nia'₂ dsi₂néi'₂ quió'₅ dsa₂
 ja₁jan'₄, cuin₅₄ de'₂ 'nia'₂ dsa₂ Diú₄ juig'₅₄ le₂la₂: “Jui₁'ei₅ bá₄ tei₄ tion'₄
 'nia'₂ dsi₂néi'₂ la₂.” ⁶ Chi₂jua'₂ dsa₂ i₂quió'₅ dsi₂néi'₂ jaun₂ 'ua₁ bá₄ dsí'₅,
 tě₃'niá'₄ bá₄ jág₁ a₂'ei₅ tei₄ quián'₂ 'nia'₂ ja₁coin₂. La₁ ně₁jua'₂ tsá₃
 le₂jaun₂, tě₃'niá'₄ bá₄ táng₃ ja₁con'₂ 'nia'₂ guiong'₅₄ jág₁ a₂'ei₅ tei₄ jaun₂.
⁷ Caun₂ bá₄ ja₁o₁ɲia'₄ 'nia'₂, qué'₂, 'én'₂ 'nia'₂ 'e₂ caun₂ a₂nio₅ cuě'₅
 dsa₂; ia₁ a₂co₂jaun₂ ca₂tín₂ bá₄ dsa₂ 'liain'₅₄ ta₁ quió'₅. Jaun₂ tsá₃ i₁nio'₄
 'nia'₂ le₂'í₁ 'né₅. ⁸ Jě₁ma₂dsi₃nóg'₅ le₂caun₂ juig₂ ja₁guei₅ dsa₂, qué'₂ 'nia'₂
 jui₁'e₂ guě'₃ a₂cuě'₅ dsa₂. ⁹ Jme₁'lion₅₄ 'nia'₂ dsa₂ dso'₅₄ i₂chan₂ ja₁jaun₂,
 chei'₅₄: “Ma₂ja₂quián₃ bí₂ 'éi'₂ quió'₅ Diú₄ ja₁con'₂ 'nia'₂.” ¹⁰ La₁ ně₁jua'₂
 ca₂dsi₃nó'₅ 'nia'₂ caun₂ juig₂ ja₁tsá₃ guei₅ dsa₂, 'uin'₂ 'nia'₂ jě₄ calles,
 chei'₅₄: ¹¹ “Le₂jio₅ 'liog₂ te₁'i₁ go'₄ 'nia'₂, a₂qui₂ca₂quen'₂ tag₄ jnia'₅₄, la₂
 séi'₄ jnia'₅₄, a₂jmo₁ léi₄ tsá₃ ma₃'e₂ 'uag₄ jnia'₅₄ quian'₅₄ 'nia'₂. La₁ dsá₂
 'au'₂ 'nia'₂ jmo₄, ma₂ja₂quián₃ bí₂ 'éi'₃ quió'₅ Diú₄ ja₁cong'₂.” ¹² Juá'₅

^q59 A₂lin₅₄ chog₅₄ si₂ tsá₃ chi₁ton₅ jág₁ “Te₁gui'₅₄.”

^r1 A₂lin₅₄ chog₅₄ si₂ chi₁ton₅ “'nag'₂ ne₂guión₂ rě₂dsí'₂ guia₃-tín₂ (72) dsa₂ sián'₂.”

jniá₂ juíg₂ 'nia'₂, 'ñio₅ lín₃ gué₄ uig₅ a₂'é₂ Diú₄ jmi₄ jaun₂ ja₁con₂ dsa₂ 'éi₂, lia'₂ con'₂ gué₄ dsa₂ juíg₂ Sodoma.

Juig₂ ja₁tsá₃ ne'₅₄ dsa₂
(Mateo 11:20-24)

¹³ 'i'E₂ gué₄ juíg₂ 'nia'₂ dsa₂ juig₂ Corazín! 'i'E₂ gué₄ juíg₂ 'nia'₂ dsa₂ juig₂ Betsaida! Ia₁ jua'₅₄ mei'₂ gué₃ ca₂le₃jín₃ dsa₂ chan₂ Tiro quian'₅₄ Sidón ca₂té₂ ne₅₄ jui₁lia'₂ jui₅bí₂ jué'₂ a₂niog₅ lé₂ jë₄ quián'₂ 'nia'₂ jmi₄ në₃, líg'₂ bá₄ tsá₃ ma₂quí'₂ 'mi'₂ taun₅ jme₁tiain'₃ jë₄ jua₂ në₃, jme₁jmo₃ léi₄ a₂ca₂dsi₃quén'₅ dsí₅. ¹⁴ La₁ jë₁ma₂té₂ rë₁qui₃dsi₅ Diú₄ 'éi'₃, 'ñio₅ lín₃ gué₄ 'ñio₅ uig₅ guéi'₁ 'nia'₂ con'₂ gué₄ uig₅ a₂ca₂gue₃ dsa₂ i₂chan₂ Tiro quian'₅₄ Sidón. ¹⁵ 'Ne₂ gué'₂ juig₂ Capernaum, ɬa₁rong'₂ ñei₅ të₂ guei'₅₄ i₂juíg₃, líng'₂? 'En₁ bá₄ 'ne₂ sióng'₃ ca₂té₂ ja₁ca₂tín₂ 'lag₄.^s
¹⁶ 'Dsa₂ i₂nag₅ jág₁ quián'₂ 'nia'₂, jág₁ quió₃ jniá₂ bá₄ nag₂₃. Dsa₂ i₂tsá₃ guen₅ 'nia'₂, jniá₂ bá₄ a₂tsá₃ guei₂₃. I₂tsá₃ guei₅ jniá₂, ján₃ bá₄ le₂jaun₂ tsá₃ guein₂₃ i₂ca₂chei₃ jniá₂.

Ca₂dsi₃len₃ táng₃ i₂'nag'₂ ne₂guión₂ rë₂dsí₂ guian₃

¹⁷ Ca₂o₃len₃ táng₃ 'io'₂ jén'₅ ta₁'nag'₂ ne₂guión₂ rë₂dsí₂ guian₃ (70)^t dsa₂ 'éi₂, jaun₂ dsia₂₃, juá'₂:

—Te₁gui'₅₄, ca₂lia'₂ jiog₅ je₂na'₅₄ bá₄ nag₅ gau₂ jág₁ quián₂ jnia'₅₄ jë₁ma₂ca₂'ín₂ jnia'₅₄ 'ne₂.

¹⁸ Jaun₂ ca₂ñag₃ Jesús:

—Ján₅. Ma₁ jág₅ bá₄ jniá₂ jme₁ca₂tán'₂ Satanás guei'₅₄ i₂juíg₃ lia'₂ ja₁ta'₂ caun₂ si₁ñí'₃.^u ¹⁹ 'Éi'₃ jaun₂ bá₄ ma₂cué₃ jniá₂ 'nia'₂ a₂'ó'₅ 'nia'₂ bí₂ 'éi'₃ a₂lé₂ le₃qui₁tsong'₅₄ dsi₂mi'₂, i₁'né₅ në₃, a₂tiang'₃ ne₄ ca₂le₃jë₃ jui₅bí₂ a₂gu₂dsí₂ i₂'io'₅₄, ca₂lia'₂ jñia'₅₄ tsá₃ 'e₂ jén'₄ 'nia'₂ guiong'₅₄. ²⁰ La₁ tsá₃ jmo₂ 'nia'₂ 'io'₂ ia₁ a₂nag₅ gau₂ jme₂dsí₂ 'lín'₅₄ jág₁ quián'₂ 'nia'₂. A₂jaun₂ bá₄ jmo₄ 'nia'₂ 'io'₂ ia₁ a₂ma₂le₁tong'₂ ne₄ si₂ guei'₅₄ i₂juíg₃.

Jmei₂ quian'₅₄ Ja₁ñi'₅₄
(Mateo 11:25-27; 13:16-17)

²¹ Hora jaun₂, ca₂jmo₃ Jme₂dsí₂ Jñi₅ a₂'io'₂ jén'₅ lín₃ Jesús, jaun₂ ca₂juá'₂:

—Jme₂juín'₁ jniá₂ 'ne₂, Tia₅₄, Juig₅₄ guei'₅₄ i₂juíg₃, gua'₅₄ 'uë₃ në₃, ia₁ ma₂ca₂'ma'₅₄ a₂në₅ ja₁con₂ dsa₂ i₂ñí₄ tín₂ si₂, i₂ñí'₂ dsí₅ në₃, a₂ma₂ca₂jme₁jniag'₂ le₃ja₁con₂ dsa₂ i₂lín₅ lia'₂ lín₅ guein₂ i₂tsá₃ 'e₂ cuí'₅. Dsón'₂ bá₄ jaun₂, Tia₅₄ quiáng₃, ia₁ le₂në₅ 'ñio₂ 'au'₂.

^s15 griego: hades, co₂'nió'₄ a₂juá'₂, ja₁quió'₄ 'lag₄.

^t17 A₂lín₅₄ chog₅₄ si₂ chi₁ton₅ “ta₁'nag'₂ ne₂guión₂ rë₂dsí₂ guia₃-tín₂ (72).”

^u18 'Nio'₂ ja₁ton₅ Isaías 14:12-15; Apocalipsis 9:1; 12:9.

²² Jaun₂ ca₂jén'₃ Jesús, ca₂juá'₂:^v

—Ñe'₃ jniá₂ ma₂dsia₃ o₄gu₃ ca₂le₃jé₃. Jaun₂ 'i₁jan₂ tsá₃ 'ein₂ cuin₅ 'ein₂ 'éi₂ i₂lín₅ Ja₁ñi'₅₄ jñia'₅₄ lia'₂ 'ñiog₅ bá₄ Jmei₂. Ján₃ guè'₂ le₂jaun₂, 'i₁jan₂ tsá₃ 'ein₂ cuin₅ 'ein₂ 'éi₂ lín₅ Jmei₂, jñia'₅₄ lia'₂ Ja₁ñi'₅₄ bá₄ i₂cuig₅, jaun₂ jme₂jñiog₂₃ ne₄ dsa₂ i₂'ñio₂ dsí₅ Ja₁ñi'₅₄ jme₂jñiog₂₃.

²³ Jaun₂ ca₂jéin'₃, ca₂tsí'₃ jmá'₃ chi'₂ dsi₂guia₃-tín₂ guioin₅₄:

—'E₂ gué'₄ dsen₃ dsa₂ i₂të₅ ne₄ jui₁lia'₂ a₂nio₅ jág'₂ 'nia'₂, ²⁴ ia₁ a₂dsi₂jó'₃ juá'₅ jniá₂, juin₅ rag₅₄ ma₂líg'₂, lia'₂ dsa₂ i₂jme₁'é₂ jág₁ quián₅ Diú₄ né₃, jme₁'ín₅ dsí₅ jme₁të₃ ne₅₄ jui₁lia'₂ a₂nio₅ të₅ ne₅₄ 'nia'₂ rë₂né₃, la₁ tsá₃ ca₂jág₃. Ján₃ bá₄ jme₁'ín₅ dsí₅ nag₃ jui₁lia'₂ a₂nio₅ nag'₂ 'nia'₂ jmig₄ në₃, la₁ tsá₃ ca₂nág₂.

Jág₁ jáng'₅ léi₄: a₂dse₃ ca₂jmo₃ jan₂ dsa₂ chan₂ Samaria

²⁵ Co₂ráun₂ ca₂nau₂ jan₂ të₅juá'₅, a₂jñia'₅₄ con'₂ cáun₂ táu₂ bá₄ ca₂ñag₃:

—Të₅, 'e₂ 'nió'₅ jmo₅₄ jniá₂, ia₁jaun₂ tñg₅₄ ja₁le₃chang₂ co₂tan₅₄?

²⁶ Jaun₂ ca₂ñag₃ Jesús:

—'E₂ 'éi'₃ tio'₅₄ ne₄ Si₂ guè'₂? 'A₂ lia'₂ ñí'₂ 'au'₂ a₂'i'₂?

²⁷ Jaun₂ ca₂ñag₃ táng₃ të₅juá'₅ 'éi₂:

—“Jme₁'nió₄ Te₁gui'₅₄ Diú₄ quiáng'₂ ca₂le₃jé₃ 'au'₂, ca₂le₃jé₃ jme₂dsí₂, ca₂le₃jé₃ jui₅bí₂, quian'₅₄ ca₂le₃jé₃ a₂ñí'₂ dsei'₂ né₃;”^w ján₃ guè'₂ le₂jaun₂ jme₁'nióg'₄ dsa₂ mi₂güí₃ ríng'₂ jui₁lia'₂ 'nióg'₃ 'ñiag'₂.”^x

²⁸ Jaun₂ ca₂ñag₃ táng₃ Jesús:

—Dse₃ lin₃ bá₄ në₂ñag'₅₄. Nē₁jua'₂ ca₂jmo'₅₄ le₂nē₅, léng'₂ bá₄ ja₁le₃chang'₂ co₂tan₅₄.

²⁹ La₁ të₅ 'éi₂ jme₁'nio₃ chein'₃ dse₃, jaun₂ ca₂tsí'₃ Jesús:

—'Ein₂ 'éi₂ dsa₂ mi₂güí₃ ríng'₃?

³⁰ Jaun₂ ca₂ñag₃ Jesús ma₂të₂chan'₂ jág₁ jaun₂, ca₂juá'₂:

—Jan₂ dsa₂ jme₁'en₅₄ jui₅ o₂'ín₃ Jerusalén ca₂sióin₃ a₂dsióg₄ juig₂ Jericó. Dsa₂ 'ang₂ bá₄ ca₂jo₃ ca₂chei'₃ lín₃, ca₂cuè₃ dsa₂ 'ñio₅ lín₃ jñia'₅₄ mei'₂ tsá₃ ca₂ñag₃. Jaun₂ gué'₄ ca₂i₃lein₅. ³¹ Jë₂ lia'₂ jui₅ jaun₂ 'en₅₄ jui₅ já₅ jan₂ jme₂dsa₂. La₁ con'₂ ca₂quíá₂ cau₅ bá₄ ca₂ñi₅ jme₁ca₂jág₂. ³² Ján₃ bá₄ ca₂jág₃ táng₃ jan₂ dsa₂ i₂lín₅ tsi₁jon₂ Leví, con'₂ ca₂quíá₂ cau₅ bá₄ ján₃, ca₂ñi₅. ³³ La₁ jan₂ dsa₂ i₂chan₂ Samaria 'ein₅₄ jui₅, ca₂dsióg₃ ja₁ron₅ dsa₂ dso'₅₄, ca₂tá'₂ ñéi₂ dsí₅ jme₁ca₂jág₂. ³⁴ Jaun₂ ca₂jme₃quíáin₃ cau₅ quió'₅, ca₂'ág₂ aceite quian'₅₄ vino ja₁rë₂cuí'₃, ca₂lio₃. Jaun₂ ca₂tág₃ co₁lag₁ bú'₄ quiáin₅, ca₂jio₃ caun₂ 'né₅ ja₁jñia₅ dsa₂. Ja₁jaun₂ ca₂jmo₃ 'í₁.

³⁵ Jme₁jñia₃ jaun₂, ca₂dsi₂ tñ₃ cu₄ 'ua'₂ ca₂cué'₃ dsa₂ juig₅₄ dsi₂néi₂, ca₂juá'₂: “Jmo₄ co₂nio₄ 'í₁ dsa₂ në₅. Nē₁jua'₂ 'e₂ ca₂'éng'₃ gué'₄ quiáng'₂,

^v22 A₂lin₅₄ chog₅₄ si₂ tsá₃ chi₁ton₅ “jaun₂ ca₂jén'₃ Jesús, ca₂juá'₂.”

^w27 Deuteronomio 6:5.

^x27 Levítico 19:18.

la₂ bá₄ jáng'₄ jë₁ma₂guióng'₃.” Nē₃ nē₃ jaun₂.³⁶ ɛ'Ein₂ dsa₂ i₂ún₂ 'éi₂
línɡ'₂ ca₂jmo₃ dsí₅ a₂lín₅ dsa₂ mi₂güíɡ₃ rín'₅₄ dsa₂ i₂ca₂jma'₂ dsa₂ 'ang₂?

³⁷ Jaun₂ ca₂ɲag₃ táng₃ të₅juá'₅:

—I₂ca₂tá'₂ ɲéi₂ dsí₅ dsa₂ 'éi₂.

Jaun₂ ca₂ɲag₃ táng₃ Jesús:

—Guan'₂, le₂nē₅ jmo₄ 'ne₂ ján₃.

Ca₂dsióg₃ Jesús dsi₂néi₂ quió'₅ Marta quian'₅₄ María

³⁸ Con'₂ tioin'₅₄ jui₅, ca₂'í₃ Jesús caun₂ juíɡ₂ pí'₁. Ja₁jaun₂ ca₂guei₃ jan₂
dsa₂ mí₂ i₂chen₂ Marta dsi₂néi₂ quió'₅.³⁹ 'Éi₂ nē₃ jme₁chan₂ jan₂ riin'₅₄
i₂chen₂ María. 'Éi₂ nē₃ tei₄ bá₄ ca₂guá₂ cau₅ mi₂tag₄ Te₁gui'₅₄, nag₂₃ jáɡ₁
a₂juá'₂ 'éi₂.⁴⁰ Marta guë'₂ nē₃ 'ein₅₄ tsá₃ rë₂jün₅₄ jmo₂₃ ta₁ a₂cha₂
dsi₂néi₂, jaun₂ guain₃ o₃chi'₅₄ Jesús, ca₂juá'₂:

—Te₁gui'₅₄, ɛtsa₁ dsan₂ 'au'₂ a₂tsá₃ 'e₂ jme₂'o₅₄ 'io₅₄ ríng'₃? 'Ñió₃ bá₄
'eng₅₄ tsá₃ rë₂jüŋ₅₄ jme₂ti₅₄. Chei'₅₄ jui₁jme₂'o₅₄.

⁴¹ Jaun₂ ca₂ɲag₃ Te₁gui'₅₄:

—Marta, Marta, jáɡ₅ bá₄ jniá₂ 'ɲio₅ tsá₃ rë₂jüŋ₅₄ 'eng'₅₄ dsan₂ 'au'₂
'líong₂ ta₁ a₂jmo'₂.⁴² La₁ caun₂ bá₄ a₂dsen₅₄ guë'₄ a₂ca₂tín₂ dsa₂ nag₃.
María ríng'₂ nē₃, nē₂quió'₃ a₂dse₃ guë'₄, jaun₂ 'i₁jan₂ tsá₃ 'ein₂ le₃jniá'₂
a₂ma₂nē₂quió'₃.

Jme₂tag₅ Jesús 'a₂ lia'₂ chi₃lén'₂ dsa₂ Diú₄

(Mateo 6:9-15; 7:7-11)

11 ¹ Co₂ráun₂ jme₁'en₅₄ Jesús chi₂lén'₂ Diú₄. Jme₁ca₂lë₃ jaun₂,
ca₂juá'₂ chi'₂ dsi₂guia₃-tín₂ quiáin₅:

—Te₁gui'₅₄, jme₁tag₅ 'a₂ lia'₂ chi₂lén'₄ jnia'₅₄ Diú₄, jui₁lia'₂ ca₂jme₃tag₅
Juan₅₄ ca₂jme₃tiin₂₃ dsa₂ quiáin₅.

² Jaun₂ ca₂juá'₂:

—Le₂la₂ jua'₅₄ 'nia'₂ jë₁ma₂të₂ rë₁chi₁leng'₄ Diú₄:

Tia₅₄, 'ne₂ i₂ɲéi'₂ guei'₅₄ i₂juíɡ₃^y

jui₁jme₂gó'₃ dsa₂ a₂rë₂jnió₄ a₂cheng'₂.

Jui₁le₅₄ bá₄ 'éi'₃ quiáng'₂,

jui₁le₅₄ bá₄ a₂'ɲio₂ 'au'₂ 'ne₂, ne₄ gua'₅₄ 'uë₃,

jui₁lia'₂ lë₂ guei'₅₄ i₂juíɡ₃.^z

³ Cuë'₄ a₂'nió'₅ que₅₄ jnia'₅₄ jmig₄ nē₃.

⁴ 'Én₃ dsáu₁ jnia'₅₄,

jui₁lia'₂ 'én₅ jnia'₅₄ dsáu₁ rín'₅₄.

'A₃ cuë'₂ jmig₄ jiá₃ jui₅bí₂ a₂cáun₂ táu₂,

të₂le₃ lio₄ bá₄ o₄gú₃ i₂së₃dsen₃.^a

^y2 A₂lín₅₄ chog₅₄ si₂ tsá₃ chi₁ton₅ “'ne₂ i₂ɲéi'₂ guei'₅₄ i₂juíɡ₃.”

^z2 A₂lín₅₄ chog₅₄ si₂ tsá₃ chi₁ton₅ “jui₁le₅₄ bá₄ 'éi'₃ quiáng'₂, jui₁le₅₄ bá₄ a₂'ɲio₂ 'au'₂ 'ne₂ ne₄
gua'₅₄ 'uë₃, jui₁lia'₂ lë₅ guei'₅₄ i₂juíɡ₃.”

⁵ Ca₂juá'₂ Jesús né'₃:

—Jua'₅₄ mei'₂ gué'₃ le₃jua'₅₄, chan₂ jan₂ 'nia'₂ i₂dsióg₄ a₂'uë'₂ quió'₅ a₂mei₅₄ quián₅, tē'₂, juá'₂: “Jmo₄ dse₃ 'au'₂ rin'₅₄ jniog₄, dsi₄ 'ni₅ i₁ñí'₄.

⁶ Ia₁ lia'₂ guan₅ quió'₃ jan₂ a₂mei₅₄ quiáng₃ 'ein₅₄ jui₅; ia₁ tsá₃ 'e₂ cha₂ 'i₁caun₂ quió'₃ a₂le₃cué'₄.” ⁷ Dsa₂ dsi₂néi₂ né'₃ lé₂ le₃pag₃ tē'₃ rē₂quai₂₃:

“Tsá₃ cué'₂ o₂me'₅₄ dsi₅, ia₁ ma₂chi₁jnág₅ o₄'né₄ quió'₃; chi'₂-guein₂ quiáng₃ né'₃ ma₂tián'₅ le₁güín₃. Jaun₂ tsá₃ lé₂ no₅₄ jua'₅₄ cué'₅₄ a₂mi'₂.”

⁸ Jaun₂ juá'₅ jniá'₂, tion₅₄ bá₄ náu₃ cué'₃ ca₂le₃jé'₃ 'e₂ a₂mi₅ 'éi₂, on₃jua'₅₄ jmo₃ ia₁ lé₅ a₂mei₅₄, tē'₂le₃ 'uig₅₄ ia₁ a₂ñí'₄ lē₃ tion₅₄ mi₃ bá₄. ⁹ Jaun₂ le₂nē₅ bá₄ juíg₂ jniá'₂ 'nia'₂: Mi₄ 'nia'₂, jaun₂ ñeg'₂ bá₄; 'niai'₂ 'nia'₂, jaun₂ dsiain'₂; quein₄ 'nia'₂ o₄'né₄ té₃, jaun₂ niá'₂. ¹⁰ Ia₁ jui₁lia'₂ i₂mi₅ 'e₂ mi₅, gue₂₃. Le₂jaun₂ jui₁lia'₂ i₂'no'₂ 'e₂ 'no'₂, dso'₂ bá₄. Le₂jaun₂ gué'₂ quió'₅ jui₁lia'₂ i₂tē'₂, niá'₂ bá₄ o₄'né₄.

¹¹ 'O₃ bá₄ chan₂ i₂lin₅₄ 'nia'₂ jmo₅, jē₁ma₂ca₂mi₃ guein₂ quiáng'₂ i₁ñí'₄, ¿cué'₂ 'nia'₂ ca₂míg₂ ni₁cang₁? O₃ nē₁jua'₂ ca₂mi₃ jan₂ i₁ju₁, ¿cuín'₅ 'nia'₂ jan₂ dsi₂mi'₂? ¹² O₃ jē₁ma₂ca₂mi₃ ca₂míg₂ mi₂jlag₂, ¿o₃ bá₄ cuín'₅ jan₂ i₁'né₅ 'e₂? ¹³ Chi₂jua'₂ 'nia'₂ dsa₂ mi₂güí'₃ i₂'nau'₂ dso₄ chang'₂, ting'₂ cué'₂ bá₄ chi'₂-guein₂ quiáng'₂ a₂dse₃, i'ē₂ gué'₄ bá₄ Néi'₅ 'nia'₂ i₂guá₅ guei'₅₄ cuín₃ Jme₂dsí₂ Jnió₅ quián₅ quió'₅ ca₂le₃jín₃ i₂mi₅!

Juá'₂ dsa₂ a₂'io₅ Jesús jui₅bí₂ quió'₅ Be'elzebú

(Mateo 12:22-30; Marcos 3:19-27)

¹⁴ Co₂ráun₂ táng₃ jme₁'en₅₄ Jesús dsein₂₃ jan₂ jme₂dsí₂ je₂na'₅₄ i₂jmo₅ a₂tsá₃ lé₂ dsia₃ dsa₂ jág₁. Jme₁ca₂o₃ín₃ je₂na'₅₄ quió'₅ dsa₂, jaun₂ gué'₄ ca₂dsia₃ táng₃ dsa₂ 'éi₂ jág₁. Jaun₂ ca₂i₃gó'₃ dsí₅ dsa₂ tioin'₅₄. ¹⁵ La₁ i₂lin₅₄ gué'₂ ca₂dsia₃ 'iin₂₃ Jesús:

—Qui'₅₄ i₂nē₅ jmi₄ 'uín'₂ je₂na'₅₄ quian'₅₄ jui₅bí₂ quió'₅ Be'elzebú, i₂lín₅ juig₅₄ je₂na'₅₄.

¹⁶ I₂lin₅₄ gué'₂ né'₃, a₂jnia'₅₄ con'₂ cáun₂ táu₂ bá₄ jme₁mi₂₃ a₂jme₁jmo₃ Jesús a₂sió₃ caun₂ léi₄ guei'₅₄ i₂juíg₃. ¹⁷ La₁ a₂ñi₅ rē₂ bá₄ Jesús 'a₂ lia'₂ dsi₂jio₅ dsí₅ dsa₂ 'éi₂. Jaun₂ lē₃ ca₂juá'₂:

—Jui₁lia'₂ caun₂ juig₂ nación, tioin'₅₄ mi'₅₄ guioin₅₄, tioin'₅₄ le₁dsoin'₅₄, dsi₃'én₂ bá₄ juig₂ jaun₂. Le₂jaun₂ gué'₂ jui₁lia'₂ caun₂ dsi₂néi₂ tion'₅₄ dsa₂ le₁dsoin'₅₄ tsá₃ caun₂ jág₁ 'ei₅, ján₃ bá₄ dsi₃'én₂ dsi₂néi₂ jaun₂. ¹⁸ Le₂nē₅ bá₄ ján₃, nē₁jua'₂ ca₂lē₃ le₁dso'₅₄ jui₅bí₂ quió'₅ i₂sē₃dsen₃, ¿'a₂ gué'₂ lia'₂ lé₂ le₃qui'₅₄ gué'₄ jmi₄ jio₃ ne₄ta₁ quió'₅? Juá'₅ jniá'₂ le₂nē₅ ia₁ juá'₂ 'nia'₂, quian'₅₄ bí₂ quió'₅ Be'elzebú bá₄ a₂'uin'₄ jniá'₂ je₂na'₅₄. ¹⁹ La₁ chi₂jua'₂ le₂jaun₂ 'uiin'₄ jniá'₂ quian'₅₄ bí₂ quió'₅ Be'elzebú, ¿'ein₂ gué'₂ quió'₅ bí₂ quian₅ i₂quian'₅₄ 'nia'₂ a₂lé₂ le₃'uág'₂ ján₃? Jaun₂ jui₁lia'₂ lé₅ jmo₅ dsa₂ 'éi₂ bá₄ jíóg'₂ 'í₁ a₂tsá₃ tí₅ jág₁ quián'₂ 'nia'₂. ²⁰ La₁ chi₂jua'₂ jaun₂ quian'₅₄ jui₅bí₂ a₂tin₂ Díú₄ lon₄ jniá'₂ dsa₂ o₄gú₃ je₂na'₅₄,

^a4 A₂lin₅₄ chog₅₄ si₂ tsá₃ chi₁ton₅ “tē'₂le₃ lio₄ bá₄ o₄gú₃ i₂sē₃dsen₃.”

jaun₂ le₂ně₅ bá₄ jau'₂ jág₁ dsau₅ a₂ma₂gua₅ bí₂ 'éi'₃ quió'₅ Diú₄ ja₁con'₂ 'nia'₂.

²¹ 'Jui₁lia'₂ jan₂ dsa₂ 'uan'₂ chain₂ rě₂jáin₁, 'io₂₃ ca₂le₃jě₃ a₂'nió'₅ quió'₅ jmo₃ 'nei₂, jaun₂ lě₅ 'í₁ ca₂le₃jě₃ 'e₂ tio'₅₄ dsi₂néi₂. ²² La₁ ně₁ca₂já₃ jan₂ i₂'uan'₂ guě₄ lia'₂ con'₂ guě₄ 'ŋiog₅ 'éi₂, ně₁ca₂jo₃ ně₃, i₂'éi₂ guě₄ ně₃ jñiá'₂ ca₂le₃jě₃ a₂ŋí₄ lě₃ bein'₂ jmo₂₃ a₂'uain'₂. Jaun₂ jmo₂₃ dsióg₂ ca₂le₃jě₃ a₂ca₂lí'₃.

²³ 'Jui₁lia'₂ dsa₂ i₂tsá₃ chén'₅ le₃quió₃ jniá₂, i₂'iog₅₄ bá₄ 'éi₂. Jui₁lia'₂ i₂tsá₃ cág'₅ co₂lě₅ quian'₅₄ jniá₂, jñiá'₅₄ jmo₅ tsi₁rě₂ja₅₄.

Jme₂dsí₂ 'lin'₅₄ i₂dsián'₅ táng₃

(Mateo 12:43-45)

²⁴ 'Jui₁lia'₂ jan₂ jme₂dsí₂ 'lin'₅₄ i₂o₂'in₅ quió'₅ dsa₂, dsi₂ŋí₃ le₂tan₅₄ ja₁quein₂ dsi₂'nio'₂ ja₁jñiá₃. Ně₁jua'₂ tsá₃ dso'₂ ja₁'í₂ ně₃, 'no'₂ dsí₅: "Nég'₄ táng₃ dsi₂néi₂ quió₃ ja₁o₂'íng₃." ²⁵ Jě₁ma₂dsiáin'₃, jein'₂ táng₃ dsa₂ 'éi₂ ma₂lín₅ co₂'nió'₄ bá₄ caun₂ dsi₂néi₂ a₂chí'₅ rě₂, rě₂'ia'₅₄, rě₂lag₄ ně₃. ²⁶ Jaun₂ dsó₅ táng₃ dsi₂quiáin₂ guě₄ guion₃ jme₂dsí₂ i₂'lin'₅₄ guě₄ lia'₂ 'ŋiog₅, jaun₂ dsi₂tiain'₂ ca₂le₃jín₃ tě₂dsí₅ dsa₂ 'éi₂. Jaun₂ dsa₂ 'éi₂ ně₃ 'ŋio₅ lín₃ guě₄ le₃'lín'₅₄ dsióg₄ lia'₂ con'₂ guě₄ jme₁lín₄ le₂jñiá₅.^b

'A₂ lia'₂ 'nió'₅ jmo₃ dsa₂ ia₁jaun₂ le₃chain₂ dse₃

²⁷ Tě₃ 'en₅₄ Jesús dsia₂₃ le₂ně₅, ca₂juá'₂ tiá₂ jan₂ dsa₂ mí₂ tě₃jín₄ dsa₂: —i'E₂ guě₄ dsen₃ dsa₂ mí₂ i₂ca₂caun₃ 'ne₂, i₂ca₂'éin'₃ dsi'₅₄ quió'₅!

²⁸ Jaun₂ ca₂ŋag₃:

—iTě₂le₃ ja₂lín₃ guě₄ dsen₃ dsa₂ i₂nag₅ 'e₂ juá'₂ Diú₄, ton'₂ jme₂ti₃!

Léi₄ a₂lín₅ Jonás

(Mateo 12:38-42; Marcos 8:12)

²⁹ Caun₂ qui₂ŋi'₂ bá₄ dsa₂ ja₁chén'₄ Jesús, jaun₂ 'éi₂ ně₃ ca₂jme₃lióg₃ ca₂juá'₂:

—'Ŋio₅ lín₃ ma₂'lín'₅₄ dsa₂ rě₂ně₃, mi₂₃ a₂jmo₅₄ jniá₂ léi₄ juě'₂. La₁ tsá₃ ma₂'e₂ léi₄ jua'₅₄ a₂jmo₄ guě₄ jniá₂, jñiá'₅₄ lia'₂ caun₂ léi₄ a₂ca₂lě₃ quian'₅₄ Jonás bá₄. ³⁰ Ia₁ le₂ně₅ jui₁lia'₂ Jonás ca₂lín₃ caun₂ léi₄ tě₂le₃ ja₁con₂ dsa₂ i₂jme₁chan₂ Nínive jmig₄ jaun₂, le₂ně₅ bá₄ ján₃, Jaun₅ dsa₂ mi₂güí₃ lén₂ caun₂ léi₄ a₂jáng'₃ jág₁ dsau₅ ja₁con₂ dsa₂ i₂chan₂ jmig₄ ně₃. ³¹ Jě₁ma₂tě₂ rě₁qui₃dsi₅ Diú₄ 'éi'₃, náu₃ 'io₅₄ rag₅₄ i₂jme₁chan₂ tě₂le₃ sur, jein'₅₄ quian'₅₄ dsa₂ ŋe'₂ i₂chan₂ jmig₄ ně₃. 'A₂ lia'₂ niog₅ ca₂jmo₃ 'éi₂, jióg'₂ 'í₁ a₂rě₂cán'₄ dsa₂. Ia₁ 'io₅₄ 'éi₂ ca₂'í₃ jui₅ ca₂já₃ uíng₂ lín₃ guain₃ ca₂o₃néi₃ jág₁ ca'₅₄, ca₂o₃dso₅₄ dsí₅ 'a₂ lia'₂ niog₅ dsi₄ Salomón. La₁ ně₃ ně₃, la₂ chén'₅ jan₂ i₂juin'₂ guě₄ lia'₂ Salomón. ³² Ján₃ bá₄ náu₃ i₂jme₁chan₂ Nínive, jein'₅₄ quian'₅₄ dsa₂ ŋe'₂ i₂chan₂ jmig₄ ně₃, jě₁ma₂tě₂

^b26 'Nio'₂ ja₁ton₅ 2 Pedro 2:20.

rë₁qui₃dsi₅ Diú₄ 'éi'₃. 'A₂ lia'₂ niog₅ ca₂jmo₃ 'éi'₂ ma₂líg'₂ jióg'₂ 'í'₁
a₂rë₂cán'₄ dsa₂ jmig₄ në₃. Ia₁ 'éi'₂ ca₂jme₃tsín₃ dsí₅ jme₁ca₂'ë₂ Jonás jág₁
quíó'₅ Diú₄. La₁ në₃ në₃, la₂ chén'₅ jan₂ i₂juín'₂ gué₄ lia'₂ Jonás.

Dsa₂ i₂lín₅ lia'₂ lé₅ caun₂ si₂
(Mateo 5:15; 6:22-23)

³³ 'I₁jan₂ dsa₂ tsá₃ guí'₅ caun₂ si₂ ni₁tsí₅ jua'₅₄ chí'₃ ja₁chi₁quion'₅₄.^c
A₂'ag₅ guei'₅₄ bá₄ dsa₂ si₂, ia₁jaun₂ jág₃ dsa₂ i₂dsi₃ton'₅₄ dsi₂néi₂.
³⁴ Jme₁ne₁ dsa₂ lé₅ co₂'nió'₄ caun₂ ni₁tsí₅ a₂guí'₂ si₂ quió'₅ ni₁ni₁ dsa₂.
Chi₂jua'₂ dse₃ jme₁ne'₄, ta₁jang'₂ bá₄ tág₅ si₂ quiáng'₂. La₁ në₁jua'₂ tsá₃
dse₃, ta₁jang'₂ bá₄ chéng'₅ qui₁né'₃. ³⁵ Të₃ni'₅₄ 'nia'₂ jaun₂, ia₁ con'₂ tsá₃
nó₅ në₁jua'₂ si₂ quiáng'₂ tsá₃ jniá₂. ³⁶ Chi₂jua'₂ ta₁jang'₂ tág₅ bá₄ si₂
quiáng'₂, tsá₃ qui₁né'₃ lé₅. Jniág'₂ bá₄ lia'₂ ja₁jniá₂ tág₅ caun₂ si₂.

Jme₂caun'₂ Jesús quió'₅ dsa₂ fariseos quian'₅₄ të₅juá'₅
(Mateo 23:1-36; Marcos 12:38-40; Lucas 20:45-47)

³⁷ Jme₁ca₂dsan₃ cuë₂₃ jág₁, ca₂tág₃ jan₂ dsa₂ fariseo a₂i₃gué'₃ quiong'₅₄.
Jme₁ca₂dsióg₃ dsi₂néi₂ ca₂guá₂. ³⁸ Dsa₂ fariseo 'éi'₂ në₃, i₃gó'₃ dsí₅ ia₁ tsá₃
ca₂jme₃ti₃ Jesús con'₂ lé₅ tag₄ a₂chí'₅, a₂rang₃ gu₂ né'₃ a₂gué'₃. ³⁹ La₁
Te₁gui'₅₄ në₃, ca₂juá'₂:

—'Nia'₂ dsa₂ fariseos líng'₅ lia'₂ lé₅ ni₁vaso, ni₁uín₅, a₂jnia'₅₄ le₁jé₃
jmá'₃ le₃co'₅₄, la₁ të₂le₃ jui₅ jme₂dsí₂ quiáng'₂, qui₂rë₂can'₂ ca₂le₃jé₃
a₂'lig'₅₄ a₂jmo'₂: tsá₃ mag'₂ 'au'₂ 'nia'₂ ma₂qui₂ma₂'ang'₂ quió'₅ dsa₂.
⁴⁰ 'E₂ bá₄ tsá₃ ní'₂ 'au'₂ 'nia'₂! ¿On₁jua'₅₄ i₂ca₂jmo₃ le₃co'₅₄, ca₂jmo₃
le₃'nió'₂ ján₃? ⁴¹ Ja₂lín₃ gué₄ dsióg₅ jen'₅₄ de'₂ 'nia'₂ a₂te₁'i₁ quiáng'₂,
jaun₂ gué₄ lé₂ le₃të₃tsín'₅₄ 'nia'₂ le₁jíng'₃ le₃ja₁con₂ Diú₄.

⁴² 'i'E₂ gué₄ juíg'₂ 'nia'₂ dsa₂ fariseos! Ia₁ a₂jme₂tí'₁ 'nia'₂ jmo'₂, cuë'₂
Diú₄ caun₂ qui'₅₄ a₂guia₃ a₂'i₄ 'éi'₃ cuë'₅₄, ca₂lia'₂ ca₂le₃jé₃ ne₅₄ ma₁'au₂
a₂lé₂ ma₂juig₂ má₃ bá₄ jáng'₄ 'nia'₂. La₁ con'₂ ma₂ni'₅₄ bá₄ 'nia'₂ jui₅ dse₃
të₃dsón'₂ ja₁'nio₂ dsí₅ Diú₄, ja₁jme₁jme₁'nió'₄ 'nia'₂ Diú₄: a₂në₅ bá₄
a₂dsen₅₄ gué₄ a₂ca₂tín'₂ 'nia'₂ jmó'₂, la₁ on₃jua'₅₄ a₂tsá₃ ma₃jme₁ti'₄ 'nia'₂
'éi'₃.

⁴³ 'iJuíg'₂ 'nia'₂ dsa₂ fariseos! Ia₁ 'nio₅ lín₃ të₅ 'au'₂ a₂tiáng'₄ jláng'₁
ja₁dsen₅₄ gué₄ jui₁lia'₂ dsi₂néi₂ guá'₅ sinagogas. Ján₃ bá₄ të₅ 'au'₂ 'nia'₂
qui₃cuag₃ dsa₂ Diú₄ jui₁lia'₂ jë₄ 'ma'₅₄ a₂jme₂go₃ dsa₂ 'nio₅ lín₃.

⁴⁴ 'i'E₂ gué₄ juíg'₂ 'nia'₂! Ia₁ líng'₅ jui₁lia'₂ lé₅ tau₂ 'nio₅ a₂tsá₃ léi₄
cha₂. Dsa₂ në₃ qui₂nií₅ ne₄, të₃ tsá₃ ni₅."

⁴⁵ Jaun₂ ca₂ngag₃ jan₂ të₅juá'₅:

—Të₅, a₂juá'₂ 'ne₂ në₅, a₂të₂'ó'₁ jnia'₅₄ bá₄ 'ne₂.

^c33 A₂lín₅₄ chog₅₄ si₂ juá'₂ ján₃: "on₃ gué'₂ né'₃ tsi₁gu₅."

^d44 A₂lín₅₄ chog₅₄ si₂ chi₁ton₅ ján₃: "'nia'₂ të₅juá'₅, 'nia'₂ dsa₂ fariseos në₃ a₂lë₁jmo'₂ góg'₂
a₂o₁ne₁."

⁴⁶ Jaun₂ ca₂ŋag₃ Jesús:

—iJuíg'₂ 'nia'₂ të₅juá'₅! Ia₁ quian'₄ 'nia'₂ lio₅₄ guei₂ i₂sián'₂, la₁ guion'₅₄ 'nia'₂ në₃, ca₂lia'₂ jñia'₅₄ gog'₂ tsá₃ 'niog'₂ tí'₄.

⁴⁷ 'iJuíg'₂ 'nia'₂! Ia₁ qui₂chog'₂ 'nia'₂ ni₁'ia'₂ jlá'₁ quió'₅ 'lag₄ i₂jme₁'é₂ jág₁ quió'₅ Diú₄, ton'₂ dsa₂ can'₅₄ quián'₂ 'nia'₂ guiong'₅₄ qui₂ca₂jme₃dsiog₂₃. ⁴⁸ Jaun₂ në₃, lia'₂ lé₅jmo'₂ 'nia'₂, cuë'₂ léi₄ co₂'nió'₄ caun₂ bá₄ 'ei₅ jág₁ 'nia'₂ quian'₅₄ dsa₂ can'₅₄ quiáng'₂. Ia₁ dsa₂ can'₅₄ ca₂jme₃dsiog₂₃; 'nia'₂ guë'₂ ma₂ja₂nióg'₅ chog'₂ ni₁'ia'₂.

⁴⁹ 'Jaun₂ lë₃ Diú₄, ia₁ a₂tñin₂ a₂ma₂ñi₅ bá₄ a₂lé₂, ca₂juá'₂: “Qui₁tsing₅₄ dsa₂ i₂dsi₃can₅ i₂dsi₃'é₃ jág₁ quió'₃. I₂lin₅₄ 'éi₂ jme₃dsian₅ dsa₂; i₂lin₅₄ guë'₂ qui₃'ein₃.” ⁵⁰ Jaun₂ në₃ ca₂të₂ dsa₂ chan₂ jmig₄ në₃ bá₄ rë₂cán'₄ 'mú₃ quió'₅ ca₂le₃jín₃ dsa₂ i₂'é₂ jág₁ i₂ma₂dsan₃ ca₂le₃ ca₂nio₃ mi₂güig₃. ⁵¹ Ca₂lia'₂ con'₂ jme₁ca₂jon₃ Abel, ca₂të₂ jmig₄ i₁ca₂jon₃ Zacarías i₂ca₂jñi'₃ dsa₂ jë₄ ja₁lé₄ ne₄chei₂ quian'₅₄ ja₁jñió₅, dsa₂ chan₂ jmig₄ në₃ bá₄, juá'₅ jniá₂, qui₃ 'mú₃ quió'₅ ca₂le₃jín₃ dsa₂ i₂ma₂dsan₃ 'éi₂.

⁵² 'i'E₂ guë'₄ juíg'₂ 'nia'₂ të₅juá'₅! Ia₁ 'nia'₂ bá₄ ma₂rë₂'móg'₄ jág₁ quió'₅ Diú₄ a₂lé₅ co₂'nió'₄ ñi₁ llave quió'₅ o₄'né₄ ja₁jme₁le₃tin₂, le₃ñi'₂ dsa₂. On₃ guë'₂ guion'₅₄ 'nia'₂ tóng'₄, on₃ guë'₂ cuë'₂ 'nia'₂ jmig₄ dsi₃ton'₅₄ i₂'nio₃ tón'₃.

⁵³ Jme₁ca₂dsan₃ juá'₂ Jesús le₂në₅, ca₂rë₃'né₃ 'lig'₅₄ dsa₂ fariseos, të₅juá'₅ në₃. Jaun₂ ca₂jme₃lióg₃ jmóg'₂ mi'₅₄, tsá₃ caun₂ a₂qui₂ca₂ŋag₃, a₂jme₁jmo₂₃ tion₅₄ lia'₂ jme₁jéin'₃ 'éi₂ jág₁. ⁵⁴ Ia₁ jme₁'nio₃ jo₅₄ jua'₅₄ ca₂jon₄ bá₄ jág₁ 'lia'₂ jme₁'ñiá₃ 'éi₂.

Ca₂jme₃tag₅ Jesús a₂tsá₃ jmo₃ dsa₂ a₂jñia'₅₄ con'₂ dse₃ le₁ág₄ o₁ne₁

12 ¹ Të₃jë₄ jaun₂, të₂le₃ mei₅ bá₄ dsa₂ i₂ca₂ñi'₂, ca₂lia'₂ qui₂co₂'liain'₂ riin'₅₄. Jaun₂ Jesús në₃ jñiá₅ de'₂ dsa₂ i₂quaiain'₅₄ bá₄ ca₂tsí'₃:

—Të₃ñi'₅₄ 'nia'₂ quian'₅₄ jui₅ lia'₂ lé₅ quian₅ dsa₂ fariseos^e co₂'nió'₄ i₂lë₁jmo₅-dsáu₅ o₁ne₁. ² Ia₁ 'i₁caun₂ a₂rë₂'ma₄ jua'₅₄ lín₂ dsa₂ a₂tsá₃ le₃jniá₂, tion₅₄ bá₄ rë₂jniá₂; ján₃ bá₄ tsá₃ cha₂ 'i₁caun₂ a₂rë₂jlë₅ jua'₅₄ lín₂ dsa₂ a₂tsá₃ 'ein₂ le₃ñi₅, tion₅₄ bá₄ rë₃ñi₅ dsa₂. ³ Jaun₂ në₃, ca₂le₃jë₃ 'e₂ a₂dsia₅ dsa₂ jë₄ qui₁'né₃, jiá₃ bá₄ le₃ja₁jniá₂ si₂. Le₂jaun₂ jui₁lia'₂ jág₁ a₂dsia₅ dsa₂ jë₄ të₃co'₅₄ a₂qui₂le₁jnág₅ 'né₅, a₂dsi₃'ag₅ bá₄ jaun₂.^f

I₂'ein₂ ca₂tín₂ dsa₂ jme₃gain₃

(Mateo 10:28-31)

⁴ 'Nia'₂ a₂mei₅₄ quiáng₃, juíg₂ jniá₂ 'nia'₂, tsá₃ jmo₂ 'nia'₂ gang'₃ i₂jme₂dsian₅ ni₁ñi₅, ia₁ tsá₃ ma₃a₂siá'₂ jua'₅₄ a₂'io₂₃ guë'₄ bí₂ jmo₃. ⁵ Jaun₂ la₂ juá'₅ jniá₂ 'ein₂ dsón'₂ i₂ca₂tín'₂ 'nia'₂ jme₁gang'₃; i₂'éi₂ bá₄ jme₁gan'₃

^e1lit. “levadura quió'₅ dsa₂ fariseos.”

^f3 lit. “a₂táun₂ dsa₂ jág₁ tióin₂ guei'₅₄ 'né₅ bá₄ a₂jaun₂.”

'nia'₂ jmo₄ i₂io₅ bí₂, jme₃dsiog₂₃, ton'₂ 'io₂₃ bí₂ 'liog'₃ ja₁ 'lig'₅₄ ján₃.
⁶ 'Tsa₁ 'ni₅ dsa₂ 'ñiá₂ i₁tan₅ tei₄ quian'₅₄ tñ₃ ñi₁ guéin₂? La₁ 'i₁jan₂ 'éi₂
 tsá₃ dsi₂'én₂ dsí₅ Diú₄. ⁷ Jag₄ 'nia'₂ jaun₂, 'ñio₅ lín₃ gué₄ dsan₂ dsí₅ Diú₄
 'nia'₂, le₂jio₅ jñi₂ dsei'₂ 'nia'₂, ma₂ñi₅ bá₄ Diú₄ je₂liá'₂ mi'₂ tí₅. Jaun₂ tsá₃
 jmo₂ 'nia'₂ gang'₃, ia₁ 'ñio₅ gué₄ quen'₄ 'nia'₂ lia'₂ con'₂ gué₄ juin₅ i₁tan₅.

Dsa₂ i₂jme₂jnia₅ cuiin₂₃ Jesús

(Matt 10:32-33; 12:32; 10:19-20)

⁸ 'Juá'₅ jniá₂, ca₂le₃jín₃ i₂jme₂jnia₅ ja₁con₂ dsa₂ mi₂güí₃ a₂cuig₂₃ jniá₂,
 ján₃ bá₄ le₂jaun₂ Jaun₅ dsa₂ mi₂güí₃ 'ag₃ jme₃jniog₂₃ a₂cuig₂₃ ja₁con₂
 ca₂le₃jín₃ ángeles quián₅ Diú₄. ⁹ La₁ jui₁lia'₂ i₂tsá₃ 'ag₅ a₂cuig₂₃ jniá₂
 ja₁con₂ dsa₂ mi₂güí₃, ján₃ bá₄ le₂jaun₂ tsá₃ 'íin₄ jniá₂ a₂cuíin₅ ja₁con₂
 ángeles quián₅ Diú₄. ¹⁰ Ia₁ jui₁'ein₂ gué₃ i₂'in₅ 'lig'₅₄ Jaun₅ dsa₂ mi₂güí₃,
 cha₂ bá₄ o₂'én₂ dso₄ quió'₅. La₁ jui₁lia'₂ i₂juá'₂ 'lig'₅₄ 'íin₂₃ Jme₂dsí₂ Jñi₅,
 tsá₃ ma₃o₂'én₂ dso₄ cha₂. ¹¹ Jë₁ma₂ca₂jñia₃ dsa₂ 'nia'₂ ne₄ dsi₂tan₅₄ quián₅
 guá'₅, o₃ jë₁ma₂ca₂jio₃ ne₄ i₂con₂ 'í₁, ne₄ dsa₂ i₂qui₂dsi₅ 'éi'₃ né₃, tsá₃
 jmó'₂ 'nia'₂ 'i₅ 'au'₂ jua'₅₄ tsá₃ ñi'₅₄ 'a₂ lia'₂ ñag'₅₄, 'o₃ 'e₂ juig'₅₄. ¹² Ia₁
 'ñiog₅ bá₄ Jme₂dsí₂ Jñi₅ jme₃tag₂₃ 'e₂ a₂ca₂tín'₂ 'nia'₂ ñag'₅₄,
 jë₁ma₂ca₂të₂ hora jaun₂.

Go'₂ në₁ 'ein₂ ca₂dsia₃ le₁má'₂ 'ñio₅ lín₃ jmo₃ dsí₅ jmá'₃ quió'₅ 'ñiog₅

¹³ Jan₂ dsa₂ i₂jme₁'en₅₄ jë₄ jaun₂ né₃, ca₂tsí'₃ Jesús:

—Të₅, chei'₅₄ co₂nio₄ dsó₂ ríng'₃ jui₁cuë₁₂ con'₂ a₂ca₂tíng₂ a₂cha₂
 quió'₅ 'lag₄ ñe'₃.

¹⁴ Jaun₂ ca₂ñag₃ Jesús:

—'Ne₂ dsa₂, 'ein₂ ca₂dsiog₃ jniá₂ a₂lín₅ jan₂ i₂dsi₅' 'e₂ a₂ca₂tín'₂
 'nia'₂?

¹⁵ Ján₃ bá₄ ca₂juá'₂:

—Të₃ñi'₅₄ 'nia'₂ tsá₃ i₂jmo₂ jua'₅₄ a₂ñi₄ lë₃ 'ín₅ 'au'₂ a₂le₃cha₂ quiáng'₂.
 Ia₁ on₃jua'₅₄ jmá'₃ a₂ñi₄ cha₂ quió'₅ dsa₂ le₃chain₂.

¹⁶ Jaun₂ ca₂tsí'₃ táng₃ dsa₂ jág₁ jáng'₅ léi₄ la₂:

—Jme₁chan₂ jan₂ dsa₂ i₂jme₁cha₂ cu₄ 'ñio₅ lín₃. 'Lióng₂ lín₃ jme₁rau₂
 quió'₅. ¹⁷ Jaun₂ ca₂i₃jio₅ dsí₅: “'E₂ bá₄ jmo₅₄ jniá₂ né₃? Tsá₃ ma₃cha₂
 ja₁tó'₄ a₂ca₂rau₂ quió₃.” ¹⁸ Jaun₂ ca₂i₃jio₅ dsí₅: “Le₂la₂ jmo₅₄. Quí'₄
 tsi₁ 'io₅ a₂tióng₂ në₅, jaun₂ jmo₅₄ a₂ca'₅₄ gué₄. Jaun₂ ja₁jaun₂ tó'₄ trigo,
 quian'₅₄ ca₂le₃jé₃ gué₄ a₂cha₂ quió₃. ¹⁹ Jaun₂ gué₄ 'náu'₄ dsi₃: 'Lióng₂
 ma₂niog₅ le₁má'₂, ma₂len₅ 'lióng₂ ñi₂; ma₂lé₂ jan₅₄, gua₅₄ tei₄, gué'₅₄,
 gui'₅₄, cué₄ o₂'ñi₃ o₂jñia₃ dsi₃.” La₁ Diú₄ né₃ ca₂juá'₂ ca₂tsí'₃ dsa₂ 'éi₂:
²⁰ “'E₂ gué₄ con'₅₄ 'ne₂ lín₅! Jua'₂ a₂'uë₂ në₃ mág₄ jniá₂ 'mú₃ quiáng'₂.
 Ca₂le₃jé₃ a₂ma₂dsia'₅₄ 'ne₂ rë₂, 'ein₂ bá₄ quió'₅ lé₂?” ²¹ Le₂në₅ dsi₂ñi₂
 jui₁lia'₂ dsa₂ i₂dsia₅ le₁má'₂ jmá'₃ quió'₅ 'ñiog₅, la₁ të₂tsiin'₅₄ lín₃
 le₃ja₁con₂ Diú₄.

I₂jmo₅ 'í₁ bá₄ Diú₄ chi'₂-guein₂ quiáin₅

(Mateo 6:25-34)

²² Jme₁ca₂dsan₃ jaun₂, ca₂tsí'₃ táng₃ chi'₂ dsi₂guia₃-tín₂ quiáin₅:
 —Juíg₂ jniá₂ 'nia'₂, tsá₃ jmo₂ 'nia'₂ jua'₅₄ a₂ñí₄ dsan₂ 'au'₂ 'e₂ a₂quë'₅₄
 të₁lia'₂ chang'₂, on₃ guë'₂ o₄quió'₄ nì₁ñí'₁, jua'₅₄ dsan₂ 'au'₂ 'e₂ qui'₅₄.
²³ Ia₁ jme₂dsí₂ bá₄ a₂quen₅ gué₄ lia'₂ con'₂ gué₄ má₃. Ján₃ guë'₂ le₂jaun₂
 nì₁ñí'₁ bá₄ dsa₂ a₂quen₅ gué₄ lia'₂ con'₂ gué₄ 'mì'₂. ²⁴ Ní₂ de'₂ 'nia'₂
 jui₁lia'₂ i₁qui₂lia'₂. Tsá₃ 'e₂ jne₂₃, on₃ guë'₂ 'e₂ cha₂ a₂le₃rau₂ quió'₅, on₃
 guë'₂ 'io₅ chí'₅ quió'₅. Diú₄ bá₄ i₂jme₂tau₅₄. iJaun₂ 'ñio₅ lín₃ gué₄ bá₄
 quen'₄ 'nia'₂ lia'₂ con'₂ gué₄ i₁tan₅ 'éi₂! ²⁵ ¿I₂'ein₂ 'nia'₂ i₂lé₂ le₃jmo₃
 le₃chain₂ gué₄ ué₂,⁸ ne₄ ia₁ a₂ñí₄ lë₃ 'i₅ 'au'₂ 'nia'₂ chang'₂? ²⁶ Chi₂jua'₂
 tsá₃ quin'₅₄ 'nia'₂ jmig₄ quian'₅₄ a₂ca₂juig₄ nē₅, ¿'e₂ guë'₂ lë₃ ñí₄ dsan₂
 'au'₂ 'nia'₂ quian'₅₄ a₂siá'₂? ²⁷ Ní₂ de'₂ 'nia'₂ ján₃ 'a₂ lia'₂ qui₂dsi₂cón₃ lí₁.
 Tsá₃ tsi₁ñí₅ lé₂ tsé'₃, on₃ guë'₂ lé₂ ta₃. Jaun₂ juíg₂ jniá₂ 'nia'₂, ca₂lia'₂
 jñia'₅₄ Rag₅₄ Salomón, quian'₅₄ ca₂le₃jé₃ a₂jlá'₁ a₂jme₁cha₂ quió'₅, tsá₃
 ca₂rë₃jláin'₁ bá₄ gué₄ jui₁lia'₂ jlá'₁ lí₁. ²⁸ Chi₂jua'₂ le₂nē₅ chí'₅ Diú₄ jlá'₁
 nau₂ a₂cha₂ 'ña₁, a₂jñia'₅₄ jniá₂ jlá'₁ ca₂tiá₂ co₂lág₂, ia₁ jui₁la₂ 'ióg₃ dsí'₂
 dsa₂, 'ë₂ gué₄ bá₄ 'nia'₂, dsa₂ i₂'én₂ ca₂juig₄, jmo₃ bá₄ Diú₄ 'í₁. ²⁹ Jaun₂
 juá'₅ jniá₂, tsá₃ i₁niog'₄ jua'₅₄ a₂ñí₄ dsan₂ 'au'₂ 'e₂ quë'₅₄ 'ag'₅₄. Tsá₃ can₂
 'nia'₂ o₂i₁ dsi₅ quian'₅₄ a₂jaun₂, ³⁰ ia₁ jmá'₃ a₂nē₅ bá₄ a₂ñí₄ lë₃ 'nio'₃
 dsi₂nau₂. Ia₁ i₂ñi₅ bá₄ Néi'₅ a₂'nió'₅ ca₂le₃jé₃ a₂nē₅ quián'₂ 'nia'₂. ³¹ La₁
 'nio'₂ de'₂ jñiá₅ 'nia'₂ ja₁goin₂, jaun₂ ca₂le₃jé₃ a₂nē₅ të₁ja₃lé₂ a₂ma₂ñag₅₄
 cuë₃.

A₂quen₅ lín₃ a₂cha₂ quió'₅ dsa₂ guei'₅₄ i₂juíg₃

(Mateo 6:19-21)

³² 'Nia'₂ já'₂ cha'₂ quiáng₃, tsá₃ lë₁jmo₂ 'nia'₂ gang'₃, o₁jñia'₅₄ la₂ tsá₃
 juín'₅ 'nia'₂, la₁ 'ñio₂ dsí₅ Néi'₅ cuë₃ ja₁goin₂. ³³ 'Nag₄ 'nia'₂ a₂cha₂
 quiáng'₂; jme₂'on₅₄ i₂te₂ñé₂. Jñia'₅₄ lia'₂ le₂nē₅ bá₄ dsióg₄, të₃ron₅₄
 të₂'mì'₂ a₂tsá₃ ton₅ jmig₄ le₃'áu₂ quián'₂ 'nia'₂; caun₂ a₂quen₅ lín₃ 'ó'₄
 'nia'₂ quiáng'₂ guei'₅₄ i₂juíg₃ a₂tsá₃ ton₅ jmig₄ dsiá₃, ja₁tsá₃ líg'₂ jmig₄
 dsióg₄ 'ang₂, on₃ guë'₂ i₁tsan'₅₄ lé₂ le₃'én₂. ³⁴ Ia₁ jui₁lia'₂ ja₁rë₂'mú'₄ 'nia'₂
 quiáng'₂, ja₁jaun₂ bá₄ 'i₄ 'au'₂.

'Nió'₅ bá₄ a₂chan₂ dsa₂ rë₂jáin₁

³⁵ 'Rë₂ján'₁ 'nia'₂ chang'₂, le₁lín₄, le₁guí'₂ si₂ tsí₅ quiáng'₂. ³⁶ Jui₁len'₅₄
 'nia'₂ nē₂jag₄ bá₄ dsa₂ i₂chi₁jñia₅ guan'₂ juig₅₄ ñó₃ ja₁niog₅ jmig₄.
 Rë₂ján'₁ 'nia'₂ chang'₂, ia₁jaun₂ lé₂ le₃na'₅₄ 'nia'₂ dsi₂jui₅ jë₁ma₂të₂
 rë₁guáin'₃ quein₃ o₄'né₄. ³⁷ 'E₂ gué₄ dsen₃ dsa₂ i₂le₁ne₅₄ jë₁ma₂ca₂guán'₃
 juig₅₄. A₂dsi₂jó₃ juá'₅ jniá₂, 'ñiog₅ bá₄ 'éi₂ dsiog₃ ne₄ mesa, ton'₂ quí'₃

⁸25 o₃, "I₂'ein₂ 'nia'₂ i₂lé₂ le₃jmo₃ a₂dsi₃cóin₃ gué₄ caun₂ lë₂."

'mi'₂ a₂jme₂ti₃ njág₃ má₃.³⁸ 'E₂ gué₄ dsen₃ dsa₂ i₂tion'₅₄ le₁ne₅₄
 jë₁ma₂ca₂jo₃ juig₅₄ o₁jnia'₅₄ la₂ ca₂guáin'₃ a₂'uë₂ dsi₃nei₅, o₃ ma₂ca₂ñí₂
 dsi₃nei₅ 'e₂.³⁹ La₁ jui₁le₂ñi'₅₄ 'nia'₂ a₂la₂ ján₃, jua'₅₄ mei'₂ gué₃ ñi₅ dsa₂
 quió'₅ dsi₂néi₂ 'e₂ hora jiá₃ dsa₂ 'ang₂, guá₃ rë₂nei₅₄, jmo₂₃ 'í₁, tsá₃ cuë₃
 jmig₄ 'í₂ dsa₂ 'éi₂, 'ang₃.⁴⁰ Le₂në₅ bá₄ 'nia'₂ ján₃, rë₂jáng'₁ chang'₂, ia₁
 con'₂ tsá₃ 'ein₂ lín₂ bá₄, tē₃tsin'₅₄ Jaun₅ dsa₂ mi₂güí₃.

Jui₁lia'₂ dsa₂ i₂tsá₃ rë₂ti'₅₄ ta₁ quió'₅
 (Mateo 24:45-51)

⁴¹ Jaun₂ né₃ ca₂ñag₃ Pe₄:
 —Te₁gui'₅₄, ¿a₁në₂chei'₅₄ jmá'₃ jnia'₅₄ jág₁ jáng'₅ léi₄ në₅, o₃
 a₂në₂chei'₅₄ ca₂le₃jín₃ 'e₂?
⁴² Jaun₂ ca₂juá'₂ Te₁gui'₅₄:
 —¿I₂'ein₂ 'éi₂, lín'₂ 'nia'₂, lín₅ dsa₂ dsen₃ i₂rë₂ti'₅₄, niog₅ dsi₄,
 i₂ca₂dsiog₃ juig₅₄ nio₃ ne₅₄ jmo₃ ta₁ dsi₂néi₂, a₂ag'₃ ñi₁'₃ dsa₂ hora
 ca₂tín₂?⁴³ 'E₂ gué₄ dsen₃ dsa₂ i₂niog₅ ne₄, i₂jo₅ juig₅₄ jme₂ti₃ bá₄ ta₁
 quió'₅, i₁guain'₂.⁴⁴ A₂dsi₂jó'₃ juá'₅ jniá₂, dsiog₃ juig₅₄ a₂nio₃ ne₅₄ ca₂le₃jë₃
 a₂cha₂ quió'₅.⁴⁵ La₁ në₁jua'₂ lín₂ dsa₂ i₂niog₅ ne₄ 'éi₂, le₃'ag₄ bá₄ guan'₂
 juig₅₄, chi₂jua'₂ ca₂jme₃lióg₃ ca₂jmái'₂ uig₅ dsa₂ ñe'₂, dsa₂ mí₂ né₃
 i₂jme₂ti₃ ta₁, ton'₂ 'ñiog₅ guë'₂ ca₂'í₃ gué'₅, 'ín'₂, ca₂rë₃'ein₅ bá₄ 'ñiog₅,
⁴⁶ la₁ con'₂ tsá₃ ján₅, con'₂ caun₂ hora a₂tsá₃ ñi₅ bá₄ guan'₂ juig₅₄; uig₅
 gau₂ 'ñio₅ lín₃ bá₄ cuë₃ 'éi₂, co₂jaun₂ bá₄ uig₅ gue₃ con'₂ lë₅ tìn₃ dsa₂
 i₂tsá₃ 'én₂.
⁴⁷ 'Jui₁lia'₂ dsa₂ i₂ñi₅ 'e₂ 'nio₃ juig₅₄, la₁ tsá₃ 'e₂ co₂jnia₅₄ jmo₂₃, on₃
 guë'₂ jme₂ti₃ a₂juá'₂ 'éi₂, cán₂ uig₅ dsi₃bain₅₄ ca₂lia'₂ ton₅ 'mi₅ 'lióng₂ lín₃
 ni₁ñi₁₂.⁴⁸ La₁ jui₁lia'₂ i₂tsá₃ 'e₂ ca₂rë₃ñi₅ ton'₂ jmo₅-dsáu₅ cosa a₂ca₂tín₂
 gue₃ uig₅, tsá₃ lín₅₄ 'lióng₂ 'mi₅ cán₂. Jui₁lia'₂ dsa₂ i₂'lióng₂ tē₂no₄ gu₂
 a₂ca₂tín₂ jme₃ti₃, ján₃ bá₄ 'lióng₂ a₂mág₃ juig₅₄. Ján₃ guë'₂ le₂jaun₂
 jui₁lia'₂ i₂ma₂dsia₅ dsa₂ 'lióng₂ ne₅₄, 'lióng₂ gué₄ a₂chi₃quióng₂ dsa₂ jmig₄
 jáng'₃.

Jesús bá₄ 'uin₄ a₂lé₂ le₁dson'₅₄ dsa₂
 (Mateo 10:34-36)

⁴⁹ 'A₂i₃'ing₅₄ si₂ mi₂güí₃ la₂ bá₄ jniá₂ guio₃. i'E₂ gué₄ 'ín₅ dsi₃, jua'₅₄
 ma₂cau₂ bá₄ co₂ñei'₅₄ tē₂në₃!⁵⁰ La₁ tion₅₄ niog₅ tiáng₄ jui₅ ja₁dsi₃ñí₂
 mi'₅₄ 'ñio₅ lín₃. Jaun₂, i'e₂ gué₄ 'ñio₅ o₂i₁ dsi₅ chang₂, ca₂lia'₂ ca₂rë₃ti₃ ta₁
 a₂guio₃!⁵¹ ¿Lín'₂ 'nia'₂ a₂guio₃ jniá₂ i₃'ei₃ tei₄ mi₂güí₃ la₂? On₃jua'₅₄
 le₂jaun₂. A₂i₃jmo₃ le₁dson'₅₄ dsa₂ bá₄ jniá₂ guio₃.⁵² Ia₁ tē₂le₃ ne₄ jui₅
 ja₁dsau₅₄ në₅, jui₁lia'₂ caun₂ dsi₂néi₂ ja₁lé₂ 'ñiá₂ dsa₂, lé₂ le₁dson'₅₄,⁵³ ún₂
 jme₃'ñiai₅₄ on₃; i₂on₃ jme₃'ñiai₅₄ i₂ún₂ táng₃; jui₁lia'₂ jmei₂ dsa₂ tóin'₃
 mi'₅₄ quian'₅₄ ja₁ñi'₅₄, ja₁ñi'₅₄ guë'₂ 'í₂ mi'₅₄ quian'₅₄ jmei₂; jui₁lia'₂
 chog₅₄ tóin'₃ mi'₅₄ quian'₅₄ ja₁míg₄, ja₁míg₄ guë'₂ 'í₂ mi'₅₄ quian'₅₄

chog₅₄. Jui₁lia'₂ i₂lín₅ ma₂chog₅₄ dsa₂, tóin'₃ mi'₅₄ quian'₅₄ lo₅₄, jui₁lia'₂ mi₂lo₅₄ 'í₂ mi'₅₄ quian'₅₄ ma₂chog₅₄.

Jui₁lia'₂ jme₁cha₂ léi₄ guei'₅₄

(Mateo 16:1-4; Marcos 8:11-13)

⁵⁴ Ján₃ bá₄ ca₂tsí'₃ dsa₂:

—Jme₁caún'₂ 'nia'₂ 'í₁ guei'₅₄ jme₁tsau₂ jnei₅ le₃ja₁rin₂ 'iog₂, jag'₄ 'nia'₂, jiá₃ jmí₅, dsón'₂ bá₄ le₂jaun₂ lě₂. ⁵⁵ Jaun₂ jme₁ja₂ dsí₂ tē₂le₃ sur, jag'₄ 'nia'₂ dséi₃ 'iog₂ nē₃. Jaun₂ dsón'₂ bá₄ le₂jaun₂ lě₂ ján₃. ⁵⁶ 'Nia'₂ dsa₂ i₂jnia'₅₄ dse₃ le₁'ág₄ o₁ne₁! Nj'₅₄ 'nia'₂ 'a₂lia'₂ jua'₅₄ 'e₂niog₅ tē₅ ne'₅₄ 'nia'₂ guei'₅₄, quian'₅₄ 'e₂lě₂ ne₄ gua'₅₄ 'uē₃. 'A₂ bá₄lia'₂ tsá₃ tīn'₂ 'nia'₂ caun'₅₄ 'í₁ léi₄ a₂ma₂cha₂ rē₂nē₃?

Jme₁jen'₂ jág₁ quian'₅₄ dsa₂ i₂'iog₅₄

(Mateo 5:25-26)

⁵⁷ 'é₂E₂ lē₃ tsá₃ cáun'₂ 'nia'₂ 'í₁ jē₄ quiáng'₂ guiong'₅₄ a₂dsi₂ten₅₄ jmó'₂? ⁵⁸ Jē₁ma₂'eng'₅₄ jui₅ dsióg'₄ ne₄ dsi₂tan₅₄ quian'₅₄ dsa₂ i₂'nag₅, jme₁jen'₂ 'nia'₂ jág₁ le₂'i₄ jui₅ jme₁dsian₅ mi'₅₄ a₂chang'₂ quian'₅₄. Ia₁ con'₂ tsá₃ ŋó₅ nē₁jua'₂ ca₂tsag'₂ tē₃ne₄ dsi₂tan₅₄ i₂qui₂dsi₅ 'éi'₃. 'Éi₂ nē₃ jáng'₃ ne₄ 'lióg₂; 'lióg₂ gué₄ nē₃ to'₂ né₃ 'má₃. ⁵⁹ Juá'₅ jniá₂, o₁líg'₂ tsá₃ o₃'ing'₂ ja₁jaun₂ ca₂lia'₂ ca₂qui'₅₄ jē₁ca₂tó'₂ ŋí₁ guéin₂ a₂ring'₂.

A₂quen₅ lín₃ bá₄ a₂dsi₂quén'₅ dsí₅ dsa₂

13 ¹ Jmíg₄ jaun₂ i₂lín₅₄ dsa₂ i₂jme₁tion'₅₄ gué₄ ca₂dsia₃ ca₂tsí'₃ Jesús 'a₂lia'₂ ca₂jme₃dsian₅ Pilato i₂lín₅₄ dsa₂ chan₂ Galilea. Ca₂cóin'₂ jmi₄ dsa₂ 'éi₂ quian'₅₄ jmi₄ já'₂ i₂ca₂jme₃dsian₅ dsa₂ i₂jéin'₂ ne₄ Diú₄.

² Jaun₂ ca₂juá'₂ Jesús nē₃:

—'Lín'₂ 'nia'₂ nē₃, dsa₂ chan₂ Galilea 'éi₂ ca₂i₃ŋí₂ le₂jaun₂ ia₁ 'lióng₂ gué₄ dso₄ jme₁le₁cáin'₄ lia'₂ con'₂ gué₄ dsa₂ go₅₄? ³ Juá'₅ jniá₂, on₃jua'₅₄ le₂jaun₂; ia₁ le₂nē₅ bá₄ 'nia'₂ ján₃, nē₁jua'₂ tsá₃ ca₂dsi₃quén'₅ 'au'₂, dsiáng'₃ ján₃. ⁴ 'On₃ bá₄ lín'₂ 'nia'₂, 'ŋio₅ lín₃ gué₄ jme₁le₁cán'₄ dso₄ dsa₂ i₂guia₃-jniá₂ i₂ca₂dsan₃ 'éi₂, lia'₂ con'₂ ca₂qui'₃ nī₁'ia'₂ ŋei₅ ja₁chei₂ Siloé, lia'₂ con'₂ gué₄ ca₂le₃jín₃ i₂tián'₅ Jerusalén? ⁵ Juá'₅ jniá₂, on₃jua'₅₄ le₂jaun₂; ia₁ ján₃ bá₄ le₂nē₅ 'nia'₂, nē₁jua'₂ tsá₃ ca₂dsi₃quén'₅ 'au'₂, dsiáng'₃ bá₄ ján₃.

Jág₁ jáng'₅ léi₄ quió'₅ nī₁'ma₂ higuera a₂tsá₃ mīg₂ 'ag₅

⁶ Jaun₂ ca₂juá'₂ táng₃ Jesús jág₁ jáng'₅ léi₄ la₂:

—Jan₂ dsa₂ jme₁jnia₄ caun₂ 'ma₂ a₂'ag₅ mīg₂ higo ja₁nau₂ quió'₅, jaun₂ ca₂i₁jag₅₄ chi₂jua'₂ ma₂le₁'ág₄ mīg₂. Tsá₃ mīg₂ cha₂ guē'₂ nē₃, jme₁dsióg₃.

⁷ Jaun₂ ca₂tsí'₃ dsa₂ i₂jmo₅ 'í₁ ja₁nau₂ jaun₂: “Ma₂'ni₅ ŋi₂ guio₂₃ i₂jág₃ nī₁'ma₂ nē₅ chi₂jua'₂ le₁'ág₄ mīg₂, la₁ caun₂ tsá₃ mīg₂ cha₂ bá₄lia'₂

co₂ráun₂ guio₅₄. Qui'₅₄ co₂nei'₅₄. Tsá₃ ta₁ jmo₃ jñia'₅₄ jme₂dsiá₃ 'o'₅₄ 'uë₃ bá₄.”⁸ La₁ dsa₂ i₂jmo₅ 'í₁ ja₁nau₂ 'éi₂ né₃ ca₂ñag₃: “Te₁gui'₅₄, cuë₄ jmi₄g₄ o₁dsi₅₄ gué₄ caun₂ ñi₂ la₂; jmo₅₄ dse₃ le₃lág'₃, tó'₄ 'mi₄g₄ já'₂ né₃,⁹ o₁ne₄ chi₂jua'₂ 'ag₃ mí₂g₂ ñi₂ caun₂. Nē₁jua'₂ tsá₃ 'e₂ mí₂g₂ cha₂ i₁jáun₃, jaun₂ gué₄ uín'₂.”

Ca₂jme₃'lión₂ Jesús jan₂ 'io₅₄ i₂jme₁quin'₅₄ mi₂ca'₅₄ caun₂ jmi₄g₄ sa₅₄

¹⁰ Caun₂ sa₅₄, jme₁'en₅₄ Jesús jme₂tiin₂₃ dsa₂ dsi₂néi₂ guá'₅ sinagoga.

¹¹ Ja₁jaun₂ jme₁'en₅₄ jan₂ 'io₅₄ i₂ma₂guia₃-jñiá₂ ñi₂ dso'₅₄. Ca₂jmo₂g'₂ jme₂dsi₂ 'lin'₅₄ rē₂guen'₂ mi₂ca'₅₄, jme₁ñi₂₃ tsá₃ lé₂ néi'₃ rē₂.

¹² Jme₁ca₂jág₂ Jesús, jaun₂ ca₂tē₃, jaun₂ ca₂juá'₂:

—'Io₅₄, ma₂ca₂'lóng'₂ bá₄ dso₄ a₂jme₁lín₄'.

¹³ Jaun₂ ca₂tēi₂ gu₂. Dsi₂jui₅ le₂jaun₂ bá₄ ca₂néi'₃ mi₂ca'₅₄ 'io₅₄, jaun₂ ca₂jme₃juin'₂ Diú₄.

¹⁴ La₁ dsa₂ i₂niog₅ ne₄ guá'₅ sinagoga, ca₂rē₃'néi₃ quian'₅₄ Jesús ia₁ ca₂jme₃'lión₂ dsa₂ 'éi₂ tē₃ jmi₄g₄ sa₅₄. Jaun₂ ca₂tsí'₃ dsa₂ i₂tion'₅₄:

—Jñéi₂ jmi₄g₄ bá₄ ca₂tín₂ dsa₂ jmo₃ ta₁; jui₁ja₂lén₂ 'ein₂ 'nio₃ 'lión₂ jē₄ semana, on₃jua'₅₄ rē'₂ jme₁sa₅₄.

¹⁵ Jaun₂ ca₂ñag₃ Te₁gui'₅₄ ca₂tsí'₃ 'éi₂:

—i'Nia'₂ dsa₂ i₂jñia'₅₄ dse₃ le₁'ág₄ o₁ne₁! ¿Tsa₁ 'ein₂ 'nia'₂ chén'₂ ca₁jui₅ o₃ bú'₄ quián₅ jua'₅₄ tsá₃ dsi₃jio₃ dsi₃'ein'₅₄ jmi₄g₂ o₁jñia'₅₄ lé₅ sa₅₄?¹⁶ Ia₁ dsa₂ mí₂ la₂, i₂lín₅ jan₂ tsi₁jon₂ Abraham; i₂sē₃dsen₃ jme₁ma₂'nei'₂ ma₂guia₃-jñiá₂ ñi₂. Jaun₂ né₃, ¿tsa₁ ca₂tín₂ chein'₂ ján₃ jñia'₅₄ tē₃ jmi₄g₄ sa₅₄?

¹⁷ Jme₁ca₂juá'₂ Jesús le₂nē₅, ca₂rē₃gui'₅₄ bá₄, ca₂le₃jín₃ con'₂ dsa₂ i₂'iog₅₄. La₁ 'io'₂ jén'₅ tē₅ dsí₅ bá₄ dsa₂ i₂tion'₅₄, ca₂le₃jé₃ a₂jlá'₁ jmo₅ 'éi₂.

Jág₁ jáng'₅ léi₄ jui₁lia'₂ mí₂g₂ jon₂ quió'₅ ni₁'ma₂ mostaza

(Mateo 13:31-32; Marcos 4:30-32)

¹⁸ Ca₂juá'₂ né₃:

—¿'A₂ lia'₂ le₃juá'₄ lé₅ ja₁gon₂ Diú₄? ¿'E₂ quian'₅₄ lé₂ le₃quí₄g₄?¹⁹ Lé₅ jui₁lia'₂ mí₂g₂ jon₂ ni₁'ma₂ mostaza^h a₂ca₂jne₃ jan₂ dsa₂ ja₁nau₂ quió'₅. Jaun₂ ca₂i₃cón₃ ca₂dsióg₃ ca₂lē₃ caun₂ ni₁'ma₂ pa₁; i₁tan₅ né₃ ca₂tó'₂ tsag₅₄ gu₂ nei'₅₄ jaun₂.

^h19 mostaza: On₃jua'₅₄ mi₁jáng'₅ a₂cuí'₅ dsa₂ go₄ jniog₄; caun₂ ni₁'ma₂ dsón'₂ bá₄ jaun₂ a₂chei₂ Brassica nigra.

Jág₁ jáng'₅ léi₄ jui₁lia'₂ 'a₂ lia'₂ ron'₂ i₁ŋí'₄

(Mateo 13:33)

²⁰ Ca₂juá'₂ Jesús le₂la₂ ján₃:

—¿E₂ quian'₅₄ lé₂ le₃quíng'₄ lě₅ ja₁gon₂ Diú₄? ²¹ Lé₅ jui₁lia'₂ lě₅
levadura a₂co₂güín'₂ jan₂ 'io₅₄ jě₄ 'ni₅ tio'₅₄ 'ma₂ⁱ ti₁can₁ i₁ŋí'₄. Quian'₅₄
co₁séin'₄ levadura bá₄ guion'₂ ca₂le₃jě₃ ti₁can₁.

Jág₁ jáng'₅ léi₄ quió'₅ o₄'né₄ dsag₂

(Mateo 7:13-14, 21-23)

²² Lia'₂ con'₂ ma₂'ein₅₄ jui₅ a₂dsióg₄ Jerusalén, qui₂ca₂i₁jme₁tiin₂₃ gué₄
dsa₂ le₂tan₅₄ juig₂ te₁'i₁ ja₁ca₂ŋi₅.

²³ Jaun₂ ca₂ŋag₃ jan₂ dsa₂:

—Te₁gui'₅₄, ¿me'₂ bá₄ dsa₂ i₂tín'₅?

Jaun₂ ca₂ŋag₃:

²⁴ —Quen'₂ 'nia'₂ bí₂ tióng'₂ jui₅ o₄'né₄ dsag₂; ia₁ juá'₅ jniá₂, juin₅
i₂'nio₃ tón'₃, la₁ tsá₃ le₃qui'₅₄ jmig₄. ²⁵ Ia₁ con'₂ tsá₃ ŋó₅ jě₁ma₂tě₂ rě₁náu₃
juig₅₄ dsi₂néi₂, jnéi₃ o₄'né₄, 'nia'₂ ně₃ i₂tě₃tsing'₅₄ le₃ca₁'né₄, jme₁lióg'₄
to'₅₄ mi'₅₄ tě₄: “iTe₁gui'₅₄! Nia₄ o₄'né₄, tió'₄ jnia'₅₄.” ²⁶ Éi₂ ně₃ ŋag₃: “Tsá₃
cuín₅ jniá₂ 'nia'₂; tsá₃ guion₅₄ a₂já'₄ ja₂nó'₅ 'nia'₂.” ²⁶ Jaun₂ gué₄
jme₁lióg'₄ 'nia'₂ jua'₅₄: “Jnia'₅₄ bá₄ la₂ i₂ma₂que₅₄ ma₂'ne'₅₄ co₂lě₅
quian'₅₄ 'ne₂; jua'₂ 'ne₂ bá₄ guě'₂ ca₂jme₁tag'₂ jnia'₅₄ jin₄ juin₅ dsa₂.”

²⁷ Jaun₂ dsa₂ juig₅₄ dsi₂néi₂ ně₃, ŋag₃: “Ma₂ně₂juá'₃ jniá₂ tsá₃ guion₅₄
i₂'ein₂ 'nia'₂. Cau₅ jŋia'₃ 'nia'₂ ca₂le₃jíng'₃ i₂jmo₅ dsó'₅ a₂'lig'₅₄.”

²⁸ Ja₁jaun₂ qui₂o₁'o'₄ o₁quíng'₃ 'nia'₂ jan'₅₄, jě₁ma₂tě₂ rě₁jíng'₅₄ Abraham,
Isaac, Jacob, quian'₅₄ ca₂le₃jín₃ guě₄ dsa₂ i₂jme₁'ě₂ jág₁ quián₅ Diú₄,
tíoin'₅₄ ja₁gon₂ Diú₄, la₁ 'nia'₂ guě'₂ ně₃, dsi₃gang'₅₄ uíng₂. ²⁹ Ia₁
qui₂ja₃len₅ i₂chan₂ ca₂taun₂ ca₂taun₂ mi₂güíng₃ ja₃tiain'₂ guě'₃ co₂dsia₅
ja₁gon₂ Diú₄. ³⁰ La₁ lé₂, chan₂ i₂lin₅₄ i₂tión₂ le₃jě₁ca₂tó'₂, tě₃tsiin'₅₄ le₃ne₄
jui₅; i₂tión₂ le₃ne₄ jui₅ rě₂ně₃ guě'₂ ně₃, tě₃tsiin'₅₄ le₃jě₁ca₂tó'₂.

Ca₂'o₃ Jesús o₄quió'₄ dsa₂ juig₂ Jerusalén

(Mateo 23:37-39)

³¹ Hora jaun₂ dé₄ dsi₃lén₂ i₂lin₅₄ dsa₂ fariseos, ca₂juá'₂:

—Co₂ŋei'₅₄ dse₃ jú₅ ja₁lá₃, quian₂ jui₅ quiáng'₂, ia₁ 'nio₃ Herodes
jŋag'₃.

³² Jaun₂ ca₂ŋag₃ táng₃ Jesús:

—O₂nó'₅ 'nia'₂, o₂chei'₅₄ dsi₂ma₂jág₂' 'éi₂: “Ŋí₂, la₂ bá₄ 'ú₄, ně₃, 'ióg₃
ně₃; ně₃ bá₄ guě'₄ 'uিং'₅₄ jme₂dsí₂ je₂na'₅₄ quió'₅ dsa₂, ně₃ guě'₄
qui₂jme₁'liong₅₄ dsa₂. 'Ióg₃ caun₂ guě'₄ 'ŋia₅ quió₃.” ³³ A₂caun₂ jmo₅₄ bá₄

ⁱ21 griego: sata, (caun₂ tio'₅₄ 'éi'₃ 'ma₂ jaun₂ 'éi'₄ con'₂ 22 litros.)

^j32 lit. “dsi₂güíng₃”, co₂'nió'₄ le₃jua'₅₄, dsa₂ i₂'io₅ mai₅₄.

jniá₂ ta₁ a₂ca₂tíng₂ jmo₅₄ tē₁lia'₂ chang₂, ia₁ tsá₃ lé₂ le₃jón₂ jan₂ dsa₂ i₂'é₂
 jág₁ quián₅ Diú₄ uíng₂ ja₁lé₄ juig₂ Jerusalén. ³⁴ i'Nia'₂ dsa₂ juig₂
 Jerusalén! i'Nia'₂ dsa₂ juig₂ Jerusalén, 'nia'₂ i₂jme₂dsiáng'₁ dsa₂ i₂'é₂ jág₁
 quián₅ Diú₄, 'nia'₂ i₂qui₂jnag'₅₄ cang₄ dsa₂ i₂chen₅ Diú₄ jin'₄ 'nia'₂!
 i'Lióng₂ ráun₂ jme₁'ín₅ dsi₃ jme₁chi₁liang'₂ chi'₂-guein₂ juig₂ la₂ quiáng'₂,
 jui₁lia'₂ jmo₅ i₁tsín'₃ a₂chi₂lain'₂ guein₂ quián₅ to'₂ né₃ tsi₁rē₂cu₅, la₁
 guion'₅₄ 'nia'₂ tsá₃ ca₂gue'₅₄! ³⁵ Ní₂ né₃, tē₃tsi'₅₄ chi₁güig'₂ dsi₂né₂
 quiáng'₂. Juá'₅ jniá₂, o₁líg'₂ tsá₃ ma₃jag'₅₄ jniá₂, ca₂lia'₂ ca₂tē₂ jmig₄
 ja₁jua'₅₄ 'nia'₂: “Jui₁le₂jñi₃o₃ i₂nē₅ i₂já₅ o₄qui₄o'₄ Te₁gui'₅₄.”

Ca₂jme₃'lión₂ Jesús jan₂ dsa₂ i₂jme₁guion₂

14 ¹ Co₂ráun₂ guē'₂ ca₂lē₃ táng₃ caun₂ jmig₄ sa₅₄ a₂ca₂ñó₃ Jesús
 i₃guē'₃ ja₁qui₄o'₄ jan₂ dsa₂ dsen₅₄ quián₅ dsa₂ fariseos; i₂lin₅₄
 guē'₂ dsa₂ fariseos sián'₂ a₂jñia'₅₄ tiog₂₃ bá₄ tioin'₅₄.

² Ja₁jaun₂ jme₁'en₅₄ jan₂ dsa₂ dso'₅₄ i₂guion₂.

³ Jaun₂ ca₂ñag₃ Jesús ca₂tsí'₃ tē₅juá'₅ quian'₅₄ dsa₂ fariseos, ca₂juá'₂:
 —¿I₄ 'éi'₃, o₃ tsá₃ 'i₄ 'éi'₃ jme₃'lión₂ dsa₂ dsa₂ dso'₅₄ jme₁jmig₄ sa₅₄?

⁴ La₁ tei₄ bá₄ i₃lén₂, tsá₃ 'e₂ ñi₅ ñag₃. Jaun₂ ca₂jñai'₃ dsa₂ dso'₅₄,
 ca₂jme₃'lió₂. Jaun₂ ca₂dsióg'₂ quió'₅.

⁵ Jaun₂ ca₂juá'₂ ca₂tsí'₃ 'éi₂:

—¿I₂'ein₂ 'nia'₂, tsá₃ dsi₃dsen₅ dsi₂jui₅ chi'₂ quián₅,^k o₃ jan₂ ca₁jui₅ 'e₂
 nē₁jua'₂ ca₂táin'₂ né₃ táu₃ jñia'₅₄ tē₃ jmig₄ sa₅₄?

⁶ La₁ tsá₃ ca₂tió'₃ ñag₃ jág₁ nē₅.

Tsá₃ dsióg₅ jua'₅₄ quió'₃ dsa₂ 'ma₂si₅₄ ja₁dsen₅₄ gué₄

⁷ Jme₁ca₂tē₂ ne₄ Jesús 'a₂ lia'₂ quió'₅ dsa₂ i₂té₄ jmá'₃ lia'₂ ja₁dsen₅₄
 gué₄ ja₁tiaín'₂, jaun₂ ca₂cuē₃ jág₁ a₂jáng'₅ léi₄ la₂:

⁸ —Nē₁jua'₂ 'ein₂ tē₂ ja₁niog₅ jmig₄ jen'₂ gu₂ dsa₂, tsá₃ ne'₅₄ jui₁lia'₂
 ja₁dsen₅₄, ia₁ con'₂ tsá₃ ñó₅ nē₁jua'₂ ca₂dsióg₃ jan₂ i₂dsen₅₄ gué₄ lia'₂ 'ne₂.

⁹ Ia₁ ¿'e₂ bá₄ lé₂ nē₁jua'₂ dsa₂ i₂nē₂té₂ le₂on'₃ 'nia'₂ juá'₂: “I₂la₂ cuē'₅₄
 ja₁ñéi'₂”? Jaun₂ tē₃ ma₂gueng'₅₄ bá₄ gog'₅₄ o₁né₂ tē₂ jē₁ca₂tó'₂. ¹⁰ La₁
 juá'₅ jniá₂, chi₂jua'₂ líg'₂ nē₁'ein₂ ca₂tē₃, tē₂le₃ jē₁ca₂tó'₂ bá₄ ne'₅₄,
 ia₁jaun₂ dsa₂ i₂nē₂té₂ lé₂ le₃juá'₂: “A₂mei₅₄ quiáng₃, ja₁dsen₅₄ gué₄ la₂
 i₂nē₂.” Jaun₂ le₂nē₅ bá₄ jme₃juag'₂ dsa₂ i₂qué'₂ quiang'₅₄. ¹¹ Ia₁ jui₁lia'₂
 dsa₂ i₂jme₂can'₅₄ guion₅₄, sióin₃ tē₂le₃ jē₁ca₂tó'₂; dsa₂ i₂jmo₅ me'₂ guē'₂
 né₃, roin'₂ guei'₅₄.

¹² Jaun₂ ca₂tsí'₃ ján₃, dsa₂ i₂ca₂tē₃ 'éi₂:

—Jē₁ma₂tē₂ rē₁'niog'₂ jmó'₂ caun₂ má₃ a₂ñig'₅₄ dsa₂, tsá₃ tē'₅₄ jui₁lia'₂
 dsa₂ a₂mei₅₄ quiáng'₂, on₃ guē'₂ jui₁lia'₂ i₂lín₅ o₁ríng'₂, on₃ guē'₂ jui₁lia'₂
 i₂cha₂ cu₄ tián'₅ cau₅ quiáng'₂ né₃. Ia₁ con'₂ tsá₃ ñó₅, dsa₂ le₂'éi₂, lé₂
 le₃tē₂, a₂jéin'₃ táng₃ quiáng'₂. ¹³ Jaun₂ né₃, nē₁jua'₂ 'niog'₂ jmó'₂ caun₂

^k 5 Cha₂ a₂lin₅₄ chog₅₄ si₂ a₂juá'₂: “dsi₃dsen₅ bú₄ quián₅.”

jmig₄, te'₂ jmá'₃ lia'₂ dsa₂ te₂ñé₂, dsa₂ 'lian'₂, dsa₂ ten₄, dsa₂ guian'₅₄ né₃.
¹⁴ Jaun₂ le₂nē₅ bá₄ le₃chang'₂ dse₃. Ia₁ dsa₂ 'éi₂ né₃, tsá₃ qui'₅₄ jmig₄
 le₃jéin'₃ quiáng'₂, la₁ i₁jaun₃ bá₄ títg'₄ quiáng'₂, i₁jen'₅₄ ca₂le₃jín₃ dsa₂
 dsen₃.

Jág₁ jáng'₅ léi₄ jui₁lia'₂ dsa₂ i₂té₄ ja₁nio₅ jmig₄
 (Mateo 22:1-10)

¹⁵ Jan₂ dsa₂ i₂jme₁guá₄ cau₅ i₂ca₂nág₂ jág₁ nē₅, ca₂tsí'₃ Jesús:
 —'E₂ gué₄ dsen₃ i₂tian'₃ gué₃^l ja₁gon₂ Diú₄.
¹⁶ Jaun₂ ca₂juá'₂ Jesús:
 —Jme₁chan₂ jan₂ dsa₂ i₂ca₂cuē₃ caun₂ má₃ pa₁, jaun₂ ca₂té'₃ juin₅
 dsa₂. ¹⁷ Jme₁ca₂té'₂ hora a₂nio₃ jmig₄ né₃, ca₂chein₃ dsa₂ i₂jme₂ti₃ ta₁
 ne₅₄, i₁chi'₄ dsa₂ i₂ma₂lé₅ jág₁ dsi₁lén₂: “I₂nó'₅ 'nia'₂, ia₁ ma₂lé₅ co₂jnia₅₄
 ca₂le₃jé₃.” ¹⁸ La₁ ca₂le₃jín₃ bá₄ ca₂juá'₂ tsá₃ jiin₅₄. I₂le₂'uig₅₄ ca₂ñag₃:
 “Caun₂ 'uē₃ lia'₂ nē₂lá₂; ja₁jaun₂ nei₅₄ i₁jág₃. 'Én₃ dso₄ quió₃ tsá₃ lé₂
 nei₅₄.” ¹⁹ I₂sián'₂ guē'₂ táng₃ ca₂juá'₂: “Níá₂ dsán'₃ ca₁jui₅ i₂quia'₂ 'uē₃
 i₂tē₂ca₂láng₂, i₂'éi₂ nei₅₄ i₁quión₃ 'Í₁ chi₂jua'₂ ma₂tén₅ jmo₃ ta₁. 'Én₃ dso₄
 quió₃ tsá₃ lé₂ nei₅₄.” ²⁰ I₂sián'₂ guē'₂ ca₂juá'₂ táng₃: “Gu₃ lia'₂ nē₂jeng'₅₄;
 jaun₂ lé₃, tsá₃ lé₂ nei₅₄.” ²¹ Jaun₂ jme₁dsián'₃ mozo 'éi₂ ca₂jmóg'₃ jág₁ ne₄
 juig₅₄, jaun₂ ca₂rē₃'né₃ bá₄ juig₅₄. Jaun₂ ca₂juá'₂ tsí'₅ táng₃ mozo 'éi₂:
 “Co₂chi'₅₄ o₂ñi₄ jē₄ calles, le₂tan₅₄ ja₁le₁ñi'₂ dsa₂ juin₅ jē₄ juig₂,
 qui₂o₂quian₅ dsa₂ te₂ñé₂, dsa₂ 'lian'₂, i₂guian'₅₄, i₂ten₄ né₃.”
²² Jme₁co₂lág₂ jaun₂, ca₂juá'₂ dsa₂ mozo 'éi₂: “Gui'₅₄, ma₂nē₂jmo₃ con'₂
 lé₅ nē₂jua'₅₄. Jo₂ bá₄ gué₄ dsi₂néi₂.” ²³ Jaun₂ ca₂juá'₂ táng₃ juig₅₄: “Gua₂
 táng₃ jē₄ calles le₂tan₅₄ ja₁lé₄ o₄jui₅, o₂quian₅ tion₅₄ dsa₂ i₂jeng'₂, jaun₂
 can'₂ dsi₂néi₂ quió₃. ²⁴ Ia₁ le₂nē₅ bá₄ juá'₅ jniá₂, 'i₁jan₂ i₂jme₁lé₄ jág₁
 ca₂té₃ le₂'uig₅₄ 'éi₂, tsá₃ quein'₃ jē₄ jmig₄ quió₃.”

'Nio₅ bá₄ 'ua'₂ ta₁ a₂jme₃quian'₅₄ dsa₂ Te₁gui'₅₄
 (Mateo 10:37-38)

²⁵ Juin₅ lin₃ dsa₂ i₂jme₁ma₂quian'₅₄ Jesús. Jaun₂ ca₂jéin'₃ ca₂juá'₂:
²⁶ —Chi₂jua'₂ 'ein₂ 'ei₅ dsí₅ jme₃quiong'₅₄ jniá₂, nē₁jua'₂ tsá₃ ca₂tén'₃
 dsí₅ téin₂ jmei₂, chog₅₄, dsa₂ mí₂ quiáin₅, chi'₂-guein₂ quiáin₅, ca₂le₃jín₃
 gué₄ o₁riin'₅₄ né₃; nē₁jua'₂ tsá₃ ca₂tén'₃ dsí₅ le₂jio₅ jme₂dsí₂ quió₅ né₃,
 tsá₃ lé₂ le₃léin₂ dsa₂ quiáng₃. ²⁷ Jua'₅₄ 'ein₂ tsá₃ ca₂tén'₃ dsí₅ gue₃ 'mú₃,^m
 jiá₃ chi₁co'₅₄ quió₅, tsá₃ lé₂ le₃léin₂ dsa₂ quiáng₃. ²⁸ Jua'₅₄ mei'₂ gué₃
 chan₂ jan'₂ 'nia'₂ i₂'nio₃ chi'₃ caun₂ ni₁'ia'₂ ñei₅, ñon₁ jniá₅ de'₂ con₂ 'Í₁
 chi₂jua'₂ ma₂len₅ cu₄ quió₅ ca₂lia'₂ a₂'ió₄ a₂jaun₂? ²⁹ Ia₁ nē₁jua'₂ tsá₃
 le₂jaun₂, jme₃lióg₃ 'uig₅₄ 'ia'₂, tsá₃ tió₅ guē'₂ jme₃'ió₃, ca₂le₃jín₃ dsa₂
 i₂jág₃ a₂jaun₂, a₂lē₁co₂jmóg'₂ co₃ñág₂ bá₄. ³⁰ Dsia₃: “Dsa₂ nē₅ con'₂ jnia'₅₄

^l15 lit. “gué₃ i₁ñí'₄.”

^m27 lit. “tsá₃ cán₂ cróg₄ quió₅.”

ca₂jme₃lióg₃ 'uig₅₄, la₁ tsá₃ guë'₂ qui'₅₄ jmig₄ jme₃'iό'₃.”³¹ O₃ jui₁lia'₂ jan₂ rag₅₄ guë'₂, i₂jmo₃ 'nei₂ quian'₅₄ jan₂ rag₅₄ sián'₂, ɬsa₁ jniá₅ de'₂ guá₃ con₂ 'í₁ chi₂jua'₂ tiό'₅ quian'₅₄ guian₃ mei₅ 'lióg₂ quiáin₅, dsi₃quín'₂ quian'₅₄ guión₂ mei₅?³² Chi₂jua'₂ ma₂lí'₄, tsá₃ tiό'₅ né₃, tē₁lia'₂ uíng₂ gué₄ já₅ rag₅₄ jan₂, chein₃ dsa₂ i₂quian₅ jág₁ a₂mi₂₃ dsian₅ co₂nei'₅₄ mi'₅₄.³³ Le₂nē₅ bá₄ chi₂'ein₂ 'nia'₂ i₂tsá₃ ca₂tén'₃ dsí₅ tí₂ ca₂le₃jé₃ a₂cha₂ quió'₅, tsá₃ lé₂ le₃lén₂ dsa₂ quiáng₃.

Jág₁ jáng'₅ léi₄ jui₁lia'₂ 'a₂ lia'₂ lé₅ tsi₁ni₁
(Mateo 5:13; Marcos 9:50)

³⁴ '(Jui₁lia'₂ dsa₂ i₂quian'₅₄ jniá₂ lín₅ jui₁lia'₂ lé₅ tsi₁ni₁.) A₂dse₃ bá₄ tsi₁ni₁ tē₁lia'₂ ni'₅₄. La₁ nē₁jua'₂ ca₂'en₃ ni'₅₄ né₃, ɬ'a₂ bá₄ lia'₂ lé₂ le₃lei₂ táng₃?³⁵ Tsá₃ ma₃'e₂ ta₁ tí₄, on₃ guë'₂ lé₂ le₃lé₂ gua'₅₄, on₃ guë'₂ ma₂tí₅ ta₁ jua'₅₄ a₂le₃lé₂ ca₂bē'₅₄ 'o'₅₄. Jnia'₅₄ lia'₂ a₂dsi₃ga'₅₄ uíng₂ bá₄. I₂dsi₅₄ gua₄, rē₂ jui₁nei₅₄.

Jág₁ jáng'₅ léi₄ jui₁lia'₂ jan₂ já'₂ cha'₂ i₂ca₂i₃cón'₅
(Mateo 18:10-14)

15 ¹ Ca₂le₃jín₃ dsa₂ i₂cán₂ 'lia'₅₄ quián₅ dsi₂tan₅₄, quian'₅₄ gué₄ dsa₂ i₂le₁cán'₄ dso₄ sián'₂, ca₂o₃lén₂ ja₁'en₅₄ Jesús, a₂o₃néi₃.

² Uig₅₄ jaun₂, dsa₂ fariseos quian'₅₄ tē₅juá'₅ ca₂chi₂ca₂'iin₃ Jesús.

Ca₂juá'₂:

—Dsa₂ nē₅ qui₂guein₂₃ bá₄ dsa₂ i₂le₁cán'₄ dso₄, gué'₅ co₂lē₅ quiong'₅₄.

³ Jaun₂ lē₃ ca₂juá'₂ Jesús jág₁ jáng'₅ léi₄ la₂:

⁴ —ɬI₂'ein₂ 'nia'₂, jui₁lia'₂ i₂'nio₅ caun₂ 'niá₂-lón₂ já'₂ cha'₂, nē₁jua'₂ ca₂i₃cón'₅ jan₂, tsa₁ ja₁co₂'niog₅ jaun₂ toin'₂ i₂quéin'₂ ne₂guión₂ rē₂dsí₂ guia₃-né₂ (99) con'₂ i₂te₂, dsó₃ táng₃ dsi₂jui₅, dsi₂'niai'₂ i₂jan₂ i₂i₃cón'₅ 'éi₂, 'nau'₂ ca₂lia'₂ ca₂dsáu'₂?⁵ Jē₁ma₂ca₂dsáu'₂ né₃, tē₂ jui₅ co₁dsi₁₂, jóin'₅ táng₃ 'io'₂ jén'₅.⁶ Jē₁ma₂dsiáin'₃ dsi₂néi₂ né₃, nií'₂ ca₂le₃jín₃ a₂mei₅₄ quiáin₅, quian'₅₄ gué₄ dsa₂ i₂tián'₅ cau₅ quió'₅. Jaun₂ juá'₂: “Nē₃ o₁tió'₄, jmó₁ 'io'₂ quian'₅₄ jniá₂, ia₁ dsán'₅ bá₄ já'₂ cha'₂ i₂jme₁ma₂i₂cón'₅ quiáng₃.”⁷ Juá'₅ jniá₂, 'nio₅ lín₃ gué₄ bá₄ cha₂ o₂'nió₃ dsi₅ guei'₅₄ i₂juíg₃ o₄quió'₄ jan₂ dsa₂ i₂rē₂cán'₄ dso₄, i₂dsi₂quén'₅ dsí₅, lia'₂ con'₂ gué₄ o₄quió'₄ i₂quéin'₂ ne₂guión₂ rē₂dsí₂ guia₃-né₂ (99) dsa₂ “dsen₃” i₂tsá₃ 'e₂ 'nió'₅ jme₃tsín₃ dsí₅.

Jág₁ jáng'₅ léi₄ jui₁lia'₂ caun₂ cu₄ 'ua'₂ a₂i₃có'₅

⁸ 'O₃ jui₁lia'₂ jan₂ dsa₂ mí₂ i₂'io₅ guia₃ cu₄ 'ua'₂,ⁿ nē₁jua'₂ ca₂i₃có'₅ caun₂, ɬsa₁ téi₂ si₂, 'iá'₂ dse₃ lín₃ dsi₂néi₂, 'no'₂ ca₂lia'₂ ca₂dsó'₂?

⁹ Jē₁ma₂ca₂dsó'₂ né₃, jmo₂₃ 'io'₂, nií'₂ 'io₅₄ a₂mei₅₄ quiáin₅, i₂tián'₅ cau₅ quió'₅ né₃, jaun₂ juá'₂: “Nē₃ o₁jmó₁ 'io'₂ quian'₅₄ jniá₂, ia₁ dsó'₅ bá₄ cu₄

ⁿ8 griego: dracma (co₂'nió'₄ 'lian'₅₄ dsa₂ co₂jmi₄ ta₁).

a₂jme₁ma₂i₂'ág₃ quió₃.¹⁰ Jaun₂ le₂në₅ bá₄ juí₂jniá₂ 'nia'₂, chan₂ o₂'ñio₃ o₂jñia₃ dsi₅ ángeles quián₅ Diú₄ o₄quió'₄ jan₂ dsa₂ i₂rë₂cán'₄ dso₄, i₂ma₂ca₂dsi₃quén'₅ dsí₅.

Jág₁ jáng'₅ léi₄ jui₁lia'₂ jan₂ dsó₂ i₂ca₂dsián'₃ táng₃ quió'₅ jmei₂

¹¹ Ca₂juá'₂ Jesús ján₃:

—Jan₂ dsa₂ jme₁chan₂ on₃ ja₁ñi'₅₄.¹² I₂lín₅ i₂me'₂ gué₄ ca₂tsí'₃ jmei₂: “Tia₅₄, cuë₄ ca₂dsio₄ cu₄ quiáng'₂ con'₂ ca₂tíng₂.” Jaun₂ jmei₂ në₃ ca₂dsi₃'₃ 'e₂ a₂cha₂ quió'₅, jma₃quén₅ ca₂cué'₃ chi'₂ quiáin₅ con'₂ ca₂tín₂.¹³ Mei'₂ bá₄ cang₂ jaun₂, dsó₂ i₂me'₂ gué₄ qui₂ca₂'nag₃ a₂jme₁ma₂lé₅ quió'₅. Quian'₅₄ cu₄ jaun₂ ca₂'í₃ jui₅ i₁ñi₂ uíng₂ caun₂ 'uë₃ siá'₂. Ja₁jaun₂ ca₂i₁'éin₄ jë₂ cu₄ quió'₅, tsá₃ 'en₅₄ dsí₅ ca₂rë₃cháin₃.¹⁴ Jme₁ma₂dsó'₃ jë₂ cu₄ në₃, 'ñio₅ lín₃ ca₂rë₃'ín₃ a₂gué'₃ dsa₂ juí₂ jaun₂. 'Eí₂ në₃ ma₂ñi₂₃ 'oin₅₄.¹⁵ Jaun₂ ñó₃ i₃'nióg₂ ta₁ a₂jmo₃ quió'₅ dsa₂ juí₂ jaun₂. Jaun₂ dsa₂ 'éi₂ në₃ ca₂chei₃ ja₁nau₂ quió'₅ a₂ñi₁'₃ i₁ñí₅.¹⁶ Jë₁ma₂té₂ rë₁gué'₃ i₁ñí₅, ca₂lia'₂ ma₂le₃gué'₃ 'ñiog₅ cuá'₁ tsi₁rë₂jnei₂ a₂gué'₅ já'₂, la₁ 'i₁jan₂ tsá₃ 'ein₂ ca₂cuë₃ a₂gué'₅.¹⁷ Jaun₂ ca₂i₃jñia₅ dsí₅: “i₁Të₁lia'₂ juín₅ mozos i₂'ñio₅ ñe'₃, cha₂ qui₂rë₂tsón₂ a₂gué'₅, jniá₂ në₃ ja₁lá₃ jñíg'₅ dsi₃ 'ong₅₄!¹⁸ 'Ag₅₄ caun₂ dsi₃, nég'₄ táng₃ dsi₂néi₂ quió'₅ ñe'₃. Juí₂₅₄ le₂la₂: Tia₅₄ quiáng₃, 'e₂ gué₄ juë'₂ dso₄ ca₂'no₃ ne₄ Diú₄ quian'₅₄ ja₁cong'₂; ¹⁹ jñia'₅₄ tsá₃ ma₃ca₂tíng₂ a₂té'₄ jniá₂ jón₃. La₁ jag₄ jniá₂ lia'₂ ja₁jíng'₅₄ jan₂ dsa₂ i₂tion₄ quiáng'₂ bá₄.²⁰ Jaun₂ ca₂nau₂ ca₂'í₃ jui₅ jón₃ táng₃ quió'₅ jmei₂. La₁ uíng₂ bá₄ gué₄ jón₅, jme₁ca₂jág₂ jmei₂. Ca₂tá'₂ ñéi₂ dsí₅, ca₂ñó₃ co₂chi'₅₄, ca₂cág'₃ cu₅ ca₂chen'₃ quió'₅ 'io₂ jén'₅.²¹ Jaun₂ gué₄ ca₂juá'₂ ja₁ñi'₅₄: “Tia₅₄ quiáng₃, 'e₂ gué₄ juë'₂ dso₄ ca₂'no₃ ne₄ Diú₄ quian'₅₄ ja₁cong'₂; jñia'₅₄ tsá₃ ma₃ca₂tíng₂ a₂té'₄ jniá₂ jón₃.”²² La₁ jmei₂ në₃, ca₂tsí'₃ dsa₂ i₂jme₂ti₃ ta₁ tion'₅₄ quiáin₅: “i₁Ma₂në₃ co₂chi'₅₄! O₂dsi₄ 'mí'₂ a₂lé₅ a₂dse₃ gué₄, queng'₅₄ chi'₂ quiáng₃; caun₂ guë'₂ anillo tio'₂ chi₁gú₃. Co₂dsán'₃ guë'₂ ni₁lau₂ to'₅₄ 'nia'₂ tag₅₄; ²³ Jaun₂ o₁te'₄ 'nia'₂ ca₁jui₅ i₂ma₂'on'₅₄ chén'₅, jaun₂ jñí'₄ 'nia'₂. iJaun₂ que₅₄, tió'₄ jmó₁ 'io'₂!²⁴ Ia₁ chi'₂ në₅ quiáng₃, në₂jag₄ i₂jme₁ma₂jon₅ bá₄ në₅, la₁ chain₂ bá₄; jme₁ca₂i₃cóin'₅, la₁ ma₂dsáin'₅ bá₄.” Jaun₂ ca₂jme₃lióg₃ jmíg₄ tioin'₅₄.²⁵ “Të₁lia'₂ jaun₂, chi'₂ ja₁ñi'₅₄ i₂lín₅ i₂juín'₂ gué₄, jme₁'ein₅₄ ja₁nau₂. Jme₁ma₂ja₂quián₃ guain'₂ dsi₂néi₂, ca₂nág₂ i₁niog₅ son₅₄ i₁dsan₅ dsa₂.²⁶ Jaun₂ ca₂té'₃ jan₂ dsó₂ ca₂ñag₃ 'e₂ niog₅ lé₂.²⁷ Jaun₂ juá'₂ 'éi₂: “Dsó₂ ríng'₂ bá₄ guán'₅, jaun₂ ñéi'₅ në₃ në₂jmo₃ 'éi'₃ në₂jñi'₃ dsa₂ ca₁jui₅ i₂jme₁chén'₄ 'on'₅₄, ia₁ guáin'₅, dsein₃ bá₄, tsá₃ 'e₂ lín₅.”²⁸ La₁ ca₂rë₃'né₃ bá₄ riin'₅₄ i₂juín'₂ 'éi₂. Tsá₃ 'nio₃ 'í₂ dsi₂néi₂; jaun₂ ca₂o₃'ín₃ jmei₂, ca₂juá'₂ jág₁ 'ua₁.²⁹ La₁ 'éi₂ në₃ ca₂ñag₃ ca₂tsí'₃ jmei₂: “Ca₂le₃jé₃ ñi₂ ma₂guio₃ gua₅₄ jme₃tí₂ ta₁ ne'₅₄, tsá₃ líg'₂ jua'₅₄ ma₂jmo₃ tsá₃ nag₅₄

²¹ A₂lin₅₄ chog₅₄ si₂ chi₁ton₅ le₂la₂ ján₃: “La₁ jag₄ jniá₂ lia'₂ ja₁jíng'₅₄ jan₂ dsa₂ i₂tion₄ quiáng'₂ bá₄.”

ja₁cong'₂. Ca₂lia'₂ jñia'₅₄ jan₂ chein₂ lau₂ bá₄ tsá₃ ma₂cuag'₅₄ jniá'₂ jua'₅₄ jmo₅₄ jmig₄ quian'₅₄ a₂mei₅₄ quiáng₃.³⁰ Nē₃ gué₄ ting'₂ jmó'₂ jmig₄ ia₁ guán'₅ ja₁ñí'₄ nē₅, i₂lē₁qui₂i₁ 'én₄ cu₄ quiáng'₂, qui₂i₁ñi₂ lia'₂ lé₂ dsí₅ quian'₅₄ 'io₅₄ ga₂. Nē₃ né₃, jmig₄ jmo'₂ o₄quió'₄, jñíg'₅ ca₁jui₅ i₂'on'₅₄ gué₄ jme₁chén'₄.³¹ Jaun₂ ca₂ñag₃ jmei₂: “Jón₃, ma₁ co₂tan₅₄ bá₄ néi'₂ 'ne₂ quian'₅₄ jniá'₂; a₂quián'₂ 'ne₂ bá₄ ca₂le₃jé₃ a₂cha₂ quió₃.³² La₁ nē₃ né₃ co₂nē₅ ca₂tág₂ jmó₁ jmig₄, quián₁ o₂'ñió₃ dsí₅, ia₁ guán'₅ ríng'₂, nē₂jag₄ i₂jme₁ma₂jon₅, la₁ nē₃ ma₂chain₂ bá₄ táng₃; jme₁ca₂i₃cóin'₅, la₁ ma₂dsáin'₅ bá₄.”

Jág₁ jáng'₅ léi₄ jui₁lia'₂ jan₂ dsa₂ i₂tsá₃ ca₂rē₃ti'₅₄

16¹ Ca₂juá'₂ Jesús ján₃ ca₂tsí'₃ dsa₂ i₂quiain'₅₄:

—Jme₁chan₂ jan₂ dsa₂ cha₂ cu₄ jme₁'ñioi₂₃ jan₂ dsa₂ i₂nio₅ gu₂ dsi₂néi₂ quió'₅; la₁ ca₂i₁dsia₂ jan₂ dso₄, ia₁ juá'₂ a₂lē₁jme₁qui₂'én₂ 'éi₂ a₂cha₂ quió'₅ jui₅₄.² Jaun₂ ca₂tē₃ jui₅₄ ca₂juá'₂: “¿I₂'e₂ bá₄ jág₁ nē₅ nag₂₃ quián'₂ 'ne₂? Jang'₅₄ cuentas quiáng'₂, ta₁ a₂lín₅, ia₁ ja₁lá₃ jñia'₃ ta₁ a₂nio₅ gog'₂.³ Jaun₂ dsa₂ 'éi₂ né₃ ca₂'náu'₃ dsí₅: “¿'E₂ bá₄ jmo₅₄ jniá'₂? Jñiá'₂ jui₃ ta₁ quió₃. Tsá₃ bēng₂ jua'₅₄ jmo₅₄ ta₁ ja₁nau₂, ján₃ gué'₂ gui'₄ jniá'₂ jua'₅₄ a₂lē₁mi₁₂ jme₃'o₅₄ dsa₂.⁴ Ma₂guion₄ 'a₂ lia'₂ jmo₅₄ ia₁jaun₂ guei₃ dsa₂ sián'₂ dsi₂néi₂ quió'₅ jē₁ma₂tē₁tsing'₅₄ tsá₃ ta₁ cha₂ jmo₅₄.⁵ Jaun₂ ca₂tē₃ tē₃ qui₂ján₃ dsa₂ i₂jme₁le₁rín₃ quió'₅ jui₅₄. I₂le₂'uig₅₄ ca₂tsí'₃: “¿Je₂liá'₂ ríng'₂ quió'₅ gui'₅₄?⁶ Jaun₂ ca₂juá'₂ 'éi₂: “Caun₂ 'ñiá₂-láu₂ ba₂rig₅₄^p no'₅₄.⁷ Jaun₂ juá'₂: “La₂ ron₅ si₂ ja₁ton₅ con'₂ a₂ríng'₂. Né₂, ma₂nē₃ jmo₄ táng₃ caun₂ a₂siá'₂, tió'₃ jñia'₅₄ tē₂láu₃-guiá'₂ bá₄ taun'₅₄ a₂le₃ríng'₂.⁷ Jaun₂ ca₂tsí'₃ táng₃ jan₂ i₂sián'₂: “'Ne₂ gué'₂, ¿je₂liá'₂ ríng'₂?⁷ Jaun₂ juá'₂: “Caun₂ mei₅ 'ma₂ cuig₂.^q Jaun₂ ca₂ñag₃: “Jón'₅ si₂ ja₁ton₅ a₂ríng'₂; jmo₄ táng₃ caun₂ a₂siá'₂ tió'₃ quéin'₂ co₂ne₂guióg₂ bá₄ taun'₅₄.⁸ Jui₅₄ né₃, rē₂ bá₄ ca₂'iin₃ dsa₂ i₂tsá₃ ca₂rē₃ti'₅₄ 'éi₂, ia₁ 'ñioi₅₄ ca₂jmo₃. Ia₁ ja₂lín₃ gué₄ bá₄ 'ñio₅₄ jui₁lia'₂ dsa₂ mi₂güí₃ jmig₄ nē₃, lia'₂ con'₂ gué₄ chī'₂-guein₂ i₂i₂nio₄ ja₁jñiá'₂ si₂.⁹ Jaun₂ jui₂g₂ jniá'₂ 'nia'₂, 'nio'₂ 'nia'₂ jui₅ 'a₂ lia'₂ léng'₂ a₂mei₅₄ quian'₅₄ cu₄ cha₂ mi₂güí₃ 'lig'₅₄ la₂, ia₁jaun₂ jē₁ma₂ca₂dsa₃ cu₄, chan₂ bá₄ i₂le₃guéi'₂ 'nia'₂ ja₁o₁tiáng'₂ dse₃ co₂tan₅₄.¹⁰ Jui₁lia'₂ i₂rē₂ti'₅₄ rē₂ quian'₅₄ ca₂jui₄ a₂tē₂no₄ gu₂, ján₃ bá₄ le₂jaun₂ rē₂ti'₅₄ quian'₅₄ 'lióng₂. Le₂jaun₂ gué'₂ jui₁lia'₂ dsa₂ i₂tsá₃ rē₂ti'₅₄ quian'₅₄ ca₂jui₄, ján₃ bá₄ le₂jaun₂ tsá₃ rē₂ti'₅₄ quian'₅₄ 'lióng₂.¹¹ Jaun₂ né₃, nē₁jua'₂ tsá₃ rē₂ten'₅₄ 'nia'₂ quian'₅₄ cu₄ cha₂ mi₂güí₃ 'lig'₅₄ la₂, ¿ein₂ bá₄ i₂lé₂ le₃ág₃ caun₂ dsí₅ ja₁con'₂ 'nia'₂ quian'₅₄ a₂lé₅ a₂quen₅ tē₃dsón'₂?¹² Nē₁jua'₂ tsá₃ rē₂ten'₅₄ 'nia'₂ quian'₅₄ a₂lé₅ quió'₅ dsa₂ sián'₂, ¿ein₂ bá₄ dsia₃ gog'₂ 'nia'₂ jui₁lia'₂ a₂ca₂tín'₂ 'nia'₂ guiong'₅₄?¹³ I₁jan₂ dsa₂ i₂ma₂'lian'₅₄ tsá₃ lé₂ le₃jme₃ti₃

^p6 lit. “caun₂ 'ñiá₂-láu₂ batous”, (caun₂ 'éi'₃ a₂jme₁'io₅ dsa₂, a₂'a₄ con'₂ 37 litros le₂caun₂).

^q7 lit. “caun₂ 'ñiá₂-láu₂ korous mīg₂ trigo”, (caun₂ 'éi'₃ a₂'éi₄ con'₂ guia₃ 'ma₂ le₂caun₂).

ta₁ ne₄ on₃ juig₅₄. Ia₁ jme₃ 'ŋiai₅₄ jan₂, jan₂ guë'₂ jme₃ 'nioi₃; o₃ jme₂ gain₃ jan₂, jan₂ guë'₂ tsá₃ jui₅ toin'₂. Tsá₃ 'ein₂ 'nia'₂ lé₂ le₃ jme₃ ti₃ lia'₂ ne₄ Diú₄, lia'₂ ne₄ Cu₄ né₃.

¹⁴ Dsa₂ fariseos né₃, jme₁ tioen'₅₄ 'nag₂₃ jë₂ jág₁ në₅. Jaun₂ jñia'₅₄ ca₂ ŋág₂ 'nei₂ bá₄ jme₁ ca₂ nág₂, ia₁ lín₅ dsa₂ i₂ ŋí₄ dsi₅₄ cu₄.

¹⁵ Jaun₂ ca₂ juá'₂ Jesús:

—'Nia'₂ jmo'₂ a₂ dseng'₃ tē₃ ne₄ dsa₂, la₁ cuí'₅ bá₄ Diú₄ dse₃ 'a₂ lia'₂ lé₅ 'au'₂ 'nia'₂. Ia₁ jui₁ lia'₂ i₂ jmo₅ dsí₅ a₂ ŋí₄ lē₃ dsein₅₄ 'ŋio₅ quein₅, a₂ jaun₂ 'io'₅₄ Diú₄.

'Éi'₃ Juá'₅, quian'₅₄ ja₁ gon₂ Diú₄

¹⁶ 'Jme₁ ron₅ 'Éi'₃ Juá'₅, quian'₅₄ Si₂ quió'₅ dsa₂ i₂ jme₁ 'é₂ jág₁ quián₅ Diú₄, ca₂ lia'₂ ca₂ tē₂ jmi₄ a₂ jme₁ chan₂ Juan₅₄. Ca₂ le₃ jaun₂ qui₂ dsi₂ 'ag₅ jág₁ jui₁ lia'₂ ja₁ gon₂ Diú₄; ma₂ ja₂ lén₂ ca₂ le₃ jín₃ dsa₂ qui₂ quín'₅ bí₂ a₂ tóin'₃. ¹⁷ Tsá₃ gué'₄ 'e₂ ta₁ quian₅ a₂ dsi₃ ŋí₂ dsi₁ guei'₅₄ quian'₅₄ gua'₅₄ 'uē₃, lia'₂ con'₂ gué'₄ dsi₃ 'én₂ caun₂ léi₄ pí₁ a₂ le₁ ton₅ 'Éi'₃, jua'₅₄ a₂ tsá₃ le₃ ti₃.

Jme₂ tag₅ Jesús 'a₂ lia'₂ lé₅ jui₁ lia'₂ a₂ tén₂ dsa₂ dsi₂ i₂ gu₂

(Mateo 19:1-12; Marcos 10:1-12)

¹⁸ 'Nē₁ jua'₂ jan₂ dsa₂ ŋe'₂ ca₂ tén₂ dsa₂ mí₂ quián₅, a₂ jéin'₂ táng₃ gu₂ quian'₅₄ i₂ sián'₂, 'no₂₃ dso₄. Ján₃ guë'₂ le₂ jaun₂ nē₁ jua'₂ dsa₂ ŋe'₂ ca₂ cain₃ dsa₂ mí₂ i₂ ma₂ téi₂ dsi₂ i₂ gu₂, ján₃ bá₄ co₂ jaun₂ 'no₂₃ dso₄ ján₃.

Jan₂ dsa₂ cha₂ cu₄, quian'₅₄ Lázaro

¹⁹ 'Jme₁ chan₂ jan₂ dsa₂ cha₂ cu₄ i₂ jme₁ quí'₅ jmá'₃ tsin'₅₄ jlá'₁, quian'₅₄ 'mí'₂ 'ui'₃ a₂ chein'₅₄ ta₁ jain₂, né₃. Le₂ 'o₃ jmi₄ bá₄ jme₁ cué'₅ o₂ 'ŋi₃ o₂ jñia₃ dsi₅, jme₁ jmo₂₃ jmi₄ jlá'₁. ²⁰ Jme₁ chan₂ táng₃ jan₂ dsa₂ te₂ ŋé₂ i₂ jme₁ chen₂ Lázaro, ^r i₂ dso'₅₄ jme₁ qui₂ rē₂ can'₂ 'mé'₅ nī₁ ŋi₁₂. Jme₁ dsi₂ dsiog₃ dsa₂ o₄ 'né₄ quió'₅ dsa₂ cha₂ cu₄. ²¹ Dsa₂ te₂ ŋé₂ 'éi₂ né₃ jme₁ 'nio₃ jme₃ tain'₅₄ quian'₅₄ a₂ tsi₂ séi'₂ ne₄ mesa. Ca₂ tē₂ dsi₂ ji'₅₄ jme₁ ja₂ lén₂ ja₂ 'lí'₃ ne₄ 'mé'₅ quió'₅. ²² Cang₂ jaun₂ ca₂ jon₃ bá₄ dsa₂ dsi₂ ŋé₂ 'éi₂, ca₂ tág₃ ángeles ja₁ con₂ Abraham. Cang₂, ca₂ jon₃ bá₄ dsa₂ cha₂ cu₄ 'éi₂ ján₃. Ca₂ 'ó₂ bá₄ dsa₂ né₃. ²³ Jme₁ ma₂ 'ein₅₄ ŋág₅ uig₅ ja₁ dsi₂ len₅ 'lag₄, ^s ca₂ chóg'₃ ne₅₄ ca₂ jín₂ uíng₂ Abraham quian'₅₄ Lázaro cau₅ quió'₅. ²⁴ Jaun₂ ca₂ guió'₃ co₂ mi'₅₄ ca₂ juá'₂: “Tia₅₄ Abraham, dsia₄ ŋéi₂ 'au'₂ jniá₂, chen₅ Lázaro në₅ jui₁ tia₅₄ chi₁ gú₃ né'₃ jmíg₃, jui₁ jia₂ jme₃ güig'₂ le₁ tsi'₃. Ia₁ 'ŋio₅ lin₃ uig₅ ŋag₅₄ 'eng₅₄ jë₄ si₂ la₂.” ²⁵ Jaun₂ ca₂ ŋag₃ Abraham: “Jón₃, dsá₂ 'au'₂ jmo₄, ca₂ gue'₅₄ bá₄ 'ne₂ a₂ dse₃ tē₁ lia'₂ ca₂ rē₃ cháng'₃. Lázaro la₂ né₃, tsá₃ 'e₂ dse₃ ca₂ rē₃ cháin₃. Jaun₂ rē₂ né₃ né₃ gue₂₃ lián'₂

^r20 Lia'₂ chen₂ Lázaro jein₅ jág₁, dsa₂ i₂ jme₂ 'o₅₄ Diú₄.

^s23 griego: hades, co₂ 'nió'₄ a₂ juá'₂, ja₁ quió'₄ 'lag₄.

chain₂ dse₃ ja₁lá₃. 'Ne₂ guè'₂ ma₂ṇag'₅₄ uig₅ ja₁ně₅.²⁶ Ton'₂ ji'₅₄ ṇei₅ lín₃ lé₅ jě₄ quián₂ jniog₄, jaun₂ tsá₃ 'ein₂ lé₂ le₃ṇí₃ tē₂le₃ ně₅, on₃ guè'₂ i₂tion'₅₄ ja₁ně₅ lé₂ ṇí₃ le₃la₂.²⁷ Jaun₂ ca₂ṇag₃ táng₃: "Mi₅ jniá₂ ne'₅₄ jaun₂, tia₅₄, a₂dsiang'₅₄ i₂ně₅ dsi₃con₅₄ jág₁ dsau₅ dsi₂néi₂ quió'₅ ṇe'₃,²⁸ ia₁ 'ṇiá₂ chi'₂ ríng'₃ i₂chan₂ gué₄, ia₁jaun₂ tsá₃ ja₃ṇag₅₄ uig₅ ja₁lá₃."²⁹ Jaun₂ ca₂ṇag₃ táng₃ Abraham: "I₂ma₂rón'₅ si₂ bá₄ ó₃ ca₂quiog₂ Moisés quian'₅₄ dsa₂ i₂jme₁'é₂ jág₁. iJui₁tion'₅₄ jui₅ a₂juá'₂ 'éi₂!"³⁰ Jaun₂ ca₂ṇag₃ táng₃: "Jan₂'ón₄, tia₅₄ Abraham, ia₁ ně₁ca₂dsián'₂ jan₂ 'lag₄ dsi₁con₃ jág₁, dsi₃quén'₅ bá₄ dsí₅."³¹ La₁ ca₂ṇag₃ táng₃ 'éi₂: "Chi₂jua'₂ tsá₃ nag₅ gau₂ a₂juá'₂ Moisés, quian'₅₄ dsa₂ i₂jme₁'é₂ jág₁ quián₅ Diú₄ né₃, ján₃ bá₄ le₂jaun₂ tsá₃ 'e₂ gau₂ nag₃ o₁jñia'₅₄ la₂ ca₂jen'₅₄ jan₂ 'lag₄ dsi₁con₃ jág₁."

A₂go'₂ ně₁jua'₂ 'ein₂ ca₂tian'₃ dso₄
(Mateo 18:6-7, 21-22; Marcos 9:42)

17¹ Ca₂juá'₂ Jesús ca₂tsí'₃ dsa₂ i₂quiain'₅₄:
—Tion₅₄ niog₅ le₃cha₂ bá₄ a₂jmo₃ a₂qui₃nió₃ dsa₂. iLa₁ 'e₂ gué₄ juíg₂ jui₁lia'₂ dsa₂ i₂'uin₄ a₂dsi₂gan'₅₄ riin'₅₄!² Ja₂lín₃ gué₄ dse₃ jua'₅₄ tón₂ dsa₂ ne₄ jmi₁ṇí'₄ chi₁quein₅ ni₁to₂ dsi₂lag₅₄, lia'₂ con'₂ gué₄ jmo₃ tián'₃ dso₄ jan₂ dsa₂ dsi₂ṇé₂ la₂.³ Tē₃ṇi'₅₄ 'nia'₂ jaun₂.
'Chi₂jua'₂ 'ein₂ ríng'₂ jmóg'₂ mi'₅₄, jéin₃. Ně₁jua'₂ ca₂jme₃tsín₃ dsí₅, 'én₃ dsáu₁.⁴ O₁jñia'₅₄ guio₃ ráun₂ ně₂jmóg'₂ mi'₅₄ co₂jmi₃g₄, ně₁jua'₂ guio₃ ráun₂ ca₂já₃ ne'₅₄, juá'₂: "Tsá₃ ma₃jmo₅₄", 'én₃ dsáu₁.

Bí₂ a₂'io₅ a₂'én₂ dsa₂

⁵ Ca₂juá'₂ chi'₂ dsi₂guia₃-tín₂ ca₂tsí'₃ Te₁gui'₅₄:
—Jmo₄ jui₁le₂ 'éin₂ gué₄ jnia'₅₄.
⁶ Jaun₂ ca₂ṇag₃ táng₃ Te₁gui'₅₄:
—Tsá₃ a₂nag₅₄ jñia'₅₄ con'₂ tí₅ ca₂míg₂ mi₂jon₂ quió'₅ ni₁'ma₂ mostaza^t bá₄ 'én₂ 'nia'₂, lé₂ le₃juig'₅₄ ni₁'ma₂ sicómoro^u chí₅ ně₅, "Jñiag'₃ ja₁ně₅, o₂nau₂ ne₄ jmi₁ṇí'₄", le₂jaun₂ dsón'₂ lé₂ bá₄.

'A₂ ca₂tín₂ jmo₃ dsa₂ i₂jme₂ti₃

⁷ 'Jua'₅₄ mei'₂ gué₃ jan'₂ 'nia'₂ chan₂ jan₂ dsa₂ i₂jmo₅ ta₁ ja₁nau₂ quió'₅, o₃ jmo₂₃ 'í₂ já'₂ cha'₂ 'e₂, jua'₅₄ mei'₂ gué₃ ma₂guáin'₅ ja₁nau₂, ¿o₃ bá₄ juig'₂ 'nia'₂: "ṇi₅₄ i₂né₂ jaun₂ quē'₅₄?"⁸ Ma₁ tsá₃ le₂jaun₂. ¿O₃ juig'₂ le₂la₂ 'e₂: "jmo₄ co₂jñia₅₄ a₂guē'₅₄, jmo₄ co₂jñia₅₄ quiáng'₂, jaun₂ ṇag'₅₄ dsiá'₁ quió₃. Ca₂lia'₂ jě₁ma₂ca₂lē₃ guē'₂, gui'₂ né₃, jaun₂ gué₄ quē'₅₄, 'ag'₅₄ 'ne₂?"⁹ ¿Cué'₅ ti₁'mag'₄ dsa₂ 'éi₂ ia₁ jme₃ti₃ con'₂ lé₅ a₂tē₁néi'₂? Jan₂'ón₄.¹⁰ Le₂ně₅ bá₄ 'nia'₂ ján₃, jě₁ma₂ca₂lē₃ jmo'₂ ca₂le₃jě₃ a₂juá'₂ Diú₄, ca₂tín'₂

^t6 mostaza: On₃jua'₅₄ mi₁jáng'₅ a₂cuí'₅ dsa₂ go₄ jniog₄; caun₂ ni₁'ma₂ dsón'₂ jaun₂ a₂té'₂ tē₅sí₃ Brassica nigra.

^u6 sicómoro: mei'₂ tsá₃ ni₁'ma₂ Ficus sycomorus. 'Nio'₂ ja₁ton₅ Amós 7:14.

'nia'₂ jua'₅₄: “Tsá₃ 'e₂ ta₁ téi₄ jnia'₅₄ ja₁ cong'₂, ia₁ tsá₃ 'e₂ ηag₅₄ jua'₅₄ nē₂jmó₁ jnia'₅₄, jnia'₅₄ con'₂ a₂ca₂tág₂ jnia'₅₄ jmó₁ bá₄ nē₂jmó₁.”

Ca₂jme₃'lión₂ Jesús guian₃ dsa₂ i₂jme₁lín₄ 'mé'₅ 'iog₅

¹¹ Con'₂ siá'₂, ca₂'í₃ táng₃ Jesús jui₅ a₂dsióg₄ Jerusalén, qui₂ca₂ηi₅ le₂tan₅₄ 'uë₃ Samaria quian'₅₄ Galilea.

¹² Jme₁ca₂dsióg₃ caun₂ juig₂ bē'₅₄, ca₂jme₃jein'₂ guian₃ dsa₂ i₂le₁dso'₅₄ lín₅ 'mé'₅ 'iog₅, la₁ uíng₂ bá₄ ca₂nau₂ ja₁chén'₄ Jesús. ¹³ Ca₂juá'₂ tiá₂: —iJesús, Tē₅, dsia₄ ηéi₂ 'au'₂ jnia'₅₄!

¹⁴ Jme₁ca₂jág₂ Jesús, ca₂juá'₂:

—O₂nó'₅ 'nia'₂ o₂jme₁nia₅ ne₄ jme₂dsa₂.

Jē₄ i₂lén₂ jaun₂ bá₄, ca₂jnia₃ 'mé'₅ a₂jme₁lín₄.

¹⁵ Jaun₂ né₃ jan₂ 'éi₂, jme₁ca₂rē₃lí'₄ ca₂jnia₃ dso'₅₄, ca₂jéin'₃ táng₃ ne₅₄, jme₂juin'₂ Diú₄ co₂mi'₅₄.

¹⁶ Ca₂tóin₂ 'uë₃ cau₅ mi₂tag₄ Jesús, cuë₂₃ ti₁'mag'₄. Jan₂ dsa₂ chan₂ Samaria bá₄ 'éi₂.

¹⁷ Jaun₂ ca₂juá'₂ Jesús:

—¿On₁jua'₅₄ guian₃ lé₂ i₂ca₂'lón₂? ¿Na₅ guë'₂ i₂ηi₃ 'éi₂? ¹⁸ ¿Jan₂ dsi₂nau₂ la₂ bá₄ i₂jón'₅ jme₂juin'₂ Diú₄?

¹⁹ Jaun₂ ca₂tsí'₃ dsa₂ 'éi₂:

—Nau₂, guan'₂ quiáng'₂. Ca₂'lóng'₂ ia₁ 'éng'₂ bá₄.

'A₂ lia'₂ lé₂ i₁guá₂ 'éi'₃ quió'₅ Diú₄

(Mateo 24:23-28, 36-41)

²⁰ Jaun₂ ca₂ηag₃ dsa₂ fariseos ca₂ηí'₃ Jesús líg'₂ guá₂ jmig₄ a₂le₃gon₂ Diú₄. Jaun₂ ca₂ηag₃ 'éi₂:

—On₃jua'₅₄ a₂cha₂ léi₄ a₂rē₂jniá₂ guá₂ 'éi'₃ quió'₅ Diú₄. ²¹ Jaun₂ tsá₃ 'ein₂ lé₂ le₃juá'₂, jua'₅₄ “ηí₂ ja₁lá₃ já₅”, o₃ “jó₄ já₅.” Ia₁ a₂ma₂'i₄ bá₄ 'éi'₃ quió'₅ Diú₄ jin'₄ 'nia'₂.

²² Jaun₂ ca₂tsí'₃ táng₃ chi'₂ dsi₂guia₃-tín₂:

—Já₅ jmig₄ ja₁lé₂ 'au'₂ 'nia'₂ 'niog'₂ jag'₅₄ jmig₄ a₂le₃gon₂ Jaun₅ dsa₂ mi₂güí₃, la₁ tsá₃ jaun₂ tē₅₄ ne'₅₄ 'nia'₂. ²³ Ia₁ já₅ jmig₄ i₁tsí'₃ dsa₂ 'nia'₂: “ηí₂ ja₁lá₃ já₅”, o₃ “jó₄ já₅.” La₁ tsá₃ o₁nó'₅ 'nia'₂, on₃ guë'₂ jui₁le₂'én'₂ 'nia'₂ quió'₅ i₂juá'₂ le₂nē₅. ²⁴ Ia₁ jui₁lia'₂ tē₂tsi'₅₄ si₁ηí'₃ ca₂taun₂ ca₂taun₂ guei'₅₄ mi₂güí₃, le₂jaun₂ bá₄ lé₂ jē₁ma₂tē₂ rē₁tē₃tsin'₅₄ Jaun₅ dsa₂ mi₂güí₃. ²⁵ La₁ jniá₅ de'₂ ca₂tín₂ ηág₃ uig₅ 'ηio₅ lín₃, jme₃'iog₅₄ dsa₂ chan₂ jmig₄ nē₃. ²⁶ Ia₁ jui₁lia'₂ ca₂lē₃ jmig₄ lia'₂ con'₂ jme₁chan₂ Noé, le₂jaun₂ bá₄ lé₂ táng₃ jmig₄ quió'₅ Jaun₅ dsa₂ mi₂güí₃. ²⁷ Ia₁ jme₁tion'₅₄ dsa₂ 'éi₂ jmig₄ jaun₂ qui₂gué'₅, qui₂'ín'₂ né₃, jme₁qui₂jéin'₂ gu₂, qui₂cuin₂₃ chi'₂ quiáin₅ a₂jéin'₂ gu₂, ca₂lia'₂ jme₁ca₂dsióg₃ jmig₄ i₁ca₂'í₃ Noé 'ηió'₃ ni₁barco, a₂ca₂can'₂ rē'₂ jmig₂ ta₁caun₂ mi₂güí₃, ca₂i₃'én₂ ca₂le₃jín₃. ²⁸ Le₂nē₅ bá₄ ca₂lē₃ já₃ jmig₄ quió'₅ Lot. Jme₁tion'₅₄ dsa₂ qui₂gué'₅, qui₂'ín'₂, i₂tion'₅₄ qui₂lá₅, qui₂'nag₂₃, qui₂jne₂₃ 'e₂ qui₂jne₂₃,

qui₂jmóg'₅ 'ne₄ né₃.²⁹ La₁ jme₁ca₂dsióg₃ jmig₄ a₂o₂'ín₃ Lot juig₂ Sodoma,
a₂ca₂tang₂ rē'₂ si₂, ca₂séi'₂ ni₁cang₁ azufre le₁guí'₂ si₂ guei'₅₄, ca₂i₃'én₂
táng₃ ca₂le₃jín₃.³⁰ Le₂jaun₂ bá₄ lé₂ táng₃ jmig₄ i₁jme₃jnia₅ Jaun₅ dsa₂
mi₂güig₃.³¹ Jmig₄ jaun₂, chi₂jua'₂ 'ein₂ 'en₅₄ co'₅₄ 'ne₄, jui₁te₁'i₁ bá₄ 'e₂
te₁'i₁ dsi₂néi₂ quió'₅, tsá₃ o₁sióin₄ jua'₅₄ a₂'uē'₃ a₂jaun₂. Ján₃ bá₄ le₂jaun₂
jui₁lia'₂ i₂'en₅₄ ja₁nau₂, tsá₃ ma₃o₁jñioi'₅₄ jua'₅₄ a₂ja₃quián₂ 'e₂ ja₃quián₂
a₂cha₂ quió'₅.³² Dsá₂ 'au'₂ 'nia'₂ jmo₄ 'e₂ ca₂i₃ñí₂ 'io₅₄ quián₅ Lot.³³ Ia₁
jui₁lia'₂ dsa₂ i₂'nio₃ le₃chan₂ dse₃, dsi₃'én₂ quió'₅; la₁ jui₁lia'₂ dsa₂
i₂dsi₃'én₂ quió'₅, le₃chain₂ bá₄ dse₃.

³⁴ 'Juá'₅ jniá₂, 'uē₂ jaun₂, on₃ dsa₂ i₂tián'₅ caun₂ tsi₁cama; jan₂
i₂dsi₃lén₃, jan₂ guē'₂ i₂tē₃'ñiá₄.³⁵ Ján₃ guē'₂ le₂jaun₂, on₃ dsa₂ mí₂
i₂tion'₅₄ éi'₅ co₂lē₅; jan₂ i₂dsi₃lén₃, jan₂ guē'₂ i₂tē₃'ñiá₄.^v

³⁷ Jaun₂ ca₂ñag₃ dsa₂:

—¿A₂já'₄ bá₄ lé₂ a₂nē₅, Te₁gui'₅₄?

Jaun₂ ca₂ñag₃ táng₃ 'éi₂:

—Jui₁lia'₂ ja₁ron₅ ni₁ñi₁ 'lag₄, ja₁jaun₂ ñi'₂ i₁tú₃ tsin'₅₄.

Jág₁ jáng'₅ léi₄ jui₁lia'₂ jan₂ 'io₅₄ 'nág₂ quian'₅₄ jan₂ jué₄

18 ¹ Ca₂juá'₂ Jesús caun₂ jág₁ a₂jáng'₅ léi₄, a₂ca₂jme₃tiin₂₃ dsa₂
a₂ca₂tiin₂ chilén'₂ Diú₄ tián₂, tsá₃ o₁'ú'₄ dsí₅.

² Ca₂juá'₂ le₂la₂:

—Caun₂ juig₂ jme₁guá₄ jan₂ jué₄ i₂tsá₃ Diú₄ gan₃, on₃ guē'₂ dsan₂ dsí₅
dsa₂ mi₂güig₃ né₃.³ Ján₃ bá₄ juig₂ jaun₂ jme₁chan₂ jan₂ 'io₅₄ 'nág₂
i₂jme₁ja₂ i₂gú'₃ ja₃jiin₅₄ jué₄ 'éi₂, jme₁ja₂jua'₅₄: “Jme₁rē₂ jág₁ quió₃,
qui₂dsi₅ 'éi'₃ quió'₅ dsa₂ i₂jmóg'₂ jniá₂.”⁴ Uē₂ bá₄ tsá₃ jui₅ tón'₂ 'éi₂ jua'₅₄
jme₃rē₃. La₁ cang₂ bá₄ ca₂i₃jnia₅ dsí₅: “O₁jñia'₅₄ la₂ tsá₃ Diú₄ gáng₅, on₃
guē'₂ dsa₂ mi₂güig₃ dsan₂ dsi₃ né₃,⁵ la₁ia₁ 'uig₅₄ a₂ñí₄ lē₃ cuē₅ o₂me'₅₄
dsi₃ 'io₅₄ 'nág₂ nē₅, qui₁dsi₅ jniá₂ co₂ñei'₅₄ 'éi'₃ o₄quió'₄, con'₂ tsá₃ ñó₅
nē₁jua'₂ caun₂ le₂nē₅ ñi₃, jmo₃ dsi₃mé'₂ dsi₃.”

⁶ Jaun₂ ca₂juá'₂ Te₁gui'₅₄:

—Ñí₂ rē₂ a₂juá'₂ jué₄ 'lin'₅₄ 'éi₂.⁷ ¿Tsa₁ lín'₂ 'nia'₂, jme₃rē₃ bá₄ Diú₄ 'e₂
a₂mi₅ dsa₂ i₂rē₂quion'₅₄ quián₅ i₂qui'₂-'áu'₂ ca₂nei₂ ca₂jnia₃? ¿Tsa₁ lín'₂
'nia'₂ caun₂ juin'₂ dsí₅ bá₄ quiong'₅₄?⁸ Juí₂ jniá₂ 'nia'₂, dsi₂jui₅ bá₄
qui₃dsi₅ Diú₄ 'éi'₃ o₄quió'₄ i₂mi₅. La₁, jē₁ma₂tē₂ rē₁guan'₂ Jaun₅ dsa₂
mi₂güig₃, ¿dsiain'₂ bá₄ gué₄ dsa₂ 'én₂ ne₄ gua'₅₄ 'uē₃?

Jág₁ jáng'₅ léi₄ jui₁lia'₂ on₃ dsa₂: jan₂ dsa₂ fariseo,

jan₂ guē'₂ dsa₂ i₂mi₅ 'lia'₅₄ a₂ca₂tín₂ dsi₂tan₅₄

⁹ Ca₂juá'₂ Jesús caun₂ jág₁ jáng'₅ léi₄ a₂ca₂tín₂ con'₂ i₂lín₂ lín₅ dsa₂
dsen₃, tsá₃ dsáu₅ dsí₅ riin'₅₄ sián'₂. Ca₂juá'₂:

^v35 Chog₅₄ si₂ a₂gui'₅₄ gué₄, tsá₃ chi₁ton₅ versículo 36 a₂juá'₂: “On₃ dsa₂ ñe'₂ i₂tion'₅₄ jmo₅
ta₁ ja₁nau₂; jan₂ i₂dsi₃lén₃, i₂jan₂ guē'₂ i₂tē₃'ñiá₄.”

¹⁰ —On₃ dsa₂ ca₂i₃lén₂ guá'₅ templo i₁chi₂i₁lein'₄ Diú₄. Jan₂ 'éi₂ jme₁lín₄ fariseo, jan₂ guè'₂ i₂jme₁lín₄ ta₁ i₂mi₅ 'lia'₅₄ a₂ca₂tín₂ dsi₂tan₅₄.

¹¹ Dsa₂ fariseo né₃, të₃ chéin'₅ bá₄ chi₂lí'₂ con'₂ 'ñiog₅, ca₂juá'₂ le₂la₂: “Cué'₅ jniá'₂ ti₁'mag'₄, 'ne₂ Diú₄ quiáng₃, ia₁ tsá₃ líng₅ jui₁lia'₂ lín₅ i₂lín₅₄: i₂qui₂'ang₅, i₂tsá₃ dse₃ jmo₅ ja₁con₂ rin'₅₄, i₂nió'₅ jág₁ quian'₅₄ dsa₂ i₂tsá₃ lín₅ dsi₂i₂gu₂, ca₂lia'₂ jñia'₅₄ lia'₂ lín₅ dsa₂ i₂mi₅ 'lia'₅₄ në₅, tsá₃ líng₅.

¹² Jme₂'ing₅₄ né₃ tin₃ ráun₂ lia'₂ caun₂ semana, ton'₂ cué'₅ bá₄ jniá'₂ caun₂ qui'₅₄ a₂guia₃ quió₃, jë₂ con'₂ a₂lág₂.” ¹³ La₁ dsa₂ i₂mi₅ 'lia'₅₄ 'éi₂ guè'₂ né₃, uíng₂ bá₄ chéin'₅, ca₂lia'₂ jñia'₅₄ ne₅₄ bá₄ tsá₃ tiá₂ dsí₅ chóg'₃ guei'₅₄. Jñia'₅₄ con'₂ qui₂quein₂₃ le₁dsí₅ bá₄ chéin'₅, juá'₂: “Diú₄ quiáng₃, dsia₄ ñéi₂ 'au'₂ jniá'₂ ia₁ rë₂cáng'₄ dso₄.” ¹⁴ Jaun₂ juíg₂ jniá'₂ 'nia'₂, dsa₂ i₂mi₅ 'lia'₅₄, 'éi₂ bá₄ tiá₂ rë₂ të₁tsin'₅₄ ne₄ Diú₄ ñái'₅ quió'₅, lia'₂ con'₂ gué'₄ i₂jan₂. Ia₁ ca₂le₃jín₃ i₂jme₂can'₅₄ guion₅₄, sióin₃; la₁ i₂jmo₅ me'₂ guè'₂ në₃, roin'₂ guei'₅₄.

Ca₂jme₃gon'₅₄ Jesús chi'₂-guein₂

(Mateo 19:13-15; Marcos 10:13-16)

¹⁵ Co₂ráun₂ guè'₂, qui₂ca₂o₃jñia₃ dsa₂ guein₂ quiáin₅ ne₄ Jesús, ia₁jaun₂ qui₃téi₂ gu₂. La₁ ca₂jí₂ bá₄ chi'₂ dsi₂guia₃-tín₂ jme₁ca₂jág₂.

¹⁶ Jaun₂ ca₂té'₃ Jesús guein₂, jaun₂ ca₂tsí'₃ chi'₂ dsi₂guia₃-tín₂:

—Cué'₄ 'nia'₂ jmi₈g₄ ja₃lén₂ chi'₂-guein₂ ja₁cong₂; tsá₃ lë₁jñii'₅₄ jui₅. Ia₁ jui₁lia'₂ i₂le₂në₅ bá₄ guè'₂ i₂tin₃ ja₁gon₂ Diú₄. ¹⁷ A₂dsi₂jó'₃ juíg₂ jniá'₂ 'nia'₂, dsa₂ i₂tsá₃ gue₅ ja₁gon₂ Diú₄ jui₁lia'₂ gue₅ jan₂ i₂bë'₅₄, o₁líg'₂ jmi₈g₄ tsá₃ 'í₂ ja₁jaun₂.

Jan₂ dsó₂ chi'₂ i₂cha₂ cu₄ ca₂dsia₃ jág₁ quian'₅₄ Jesús

(Mateo 19:16-30; Marcos 10:17-31)

¹⁸ Jan₂ i₂lín₅ dsa₂ dsen₅₄ ca₂ñí'₃ Jesús:

—Të₅ dsen₃, ÷'e₂ bá₄ 'nió'₅ jmo₅₄ jniá'₂ ia₁jaun₂ tìng₅₄ ja₁le₃chang₂ co₂tan₅₄?

¹⁹ Jaun₂ ca₂ñag₃ Jesús:

—÷'E₂ lë₃ quiong'₅₄ jniá'₂ a₂dseng₃? 'I₁jan₂ i₂dsen₃ tsá₃ chan₂, jñia'₅₄ lia'₂ jan₂ Diú₄ bá₄. ²⁰ Tìng'₂ bá₄ 'Éi'₃ Juá'₅: “Tsá₃ nióg'₄ jág₁ quian'₅₄ dsa₂ i₂tsá₃ lín₅ dsi₂i₂gog'₂; tsá₃ jñíg'₄ dsa₂ mi₂güíng₃ ríng'₂; tsá₃ 'áng'₁; tsá₃ jmó'₂ dsáu₁ ríng'₂ quian'₅₄ jág₁ të₂jág₁; jme₁gang'₃ chog'₂-ñéi'₅.”

²¹ Ca₂ñag₃ 'éi₂:

—Lia'₂ con'₂ bin'₅₄ bá₄ jniá'₂ ma₂guio₃ jme₂tí₁ ca₂le₃jé₃ 'éi'₃ në₅.

²² Jme₁ca₂nág₂ Jesús a₂në₅, jaun₂ ca₂juá'₂:

—'Nió'₅ bá₄ gué'₄ caun₂ quiáng'₂; 'nag₄ ca₂le₃jé₃ a₂cha₂ quiáng'₂. Jaun₂ dsio'₅₄ quió'₅ dsa₂ te₂ñé₂. Jaun₂ gué'₄ le₃cha₂ 'líóng₂ quiáng'₂ guei'₅₄ i₂juíg₃. Jaun₂ ñia₅ chi₁co'₅₄ quió₃ o₁ló₄.

²³ La₁ jme₁ca₂nág₂ dsa₂ 'éi₂ jág₁ në₅, ca₂tá'₂ 'lia'₂ dsí₅ 'ñio₅ lín₃, ia₁ 'ñio₅ lín₃ jme₁cha₂ cu₄.

- ²⁴ Jme₁ca₂jág₂ Jesús, ca₂juá'₂.^w
 —i'E₂ gué₄ quian₅ ta₁ a₂tón'₃ dsa₂ cha₂ cu₄ ja₁gon₂ Diú₄! ²⁵ Ja₂lin₃ gué₄ tsá₃ ta₁ quian₅ a₂lé₂ le₃ñi₅ jan₂ camello jui₅ tau₂ mi₂cu₄, lia'₂ con'₂ gué₄ jan₂ dsa₂ cha₂ cu₄ ñi₅ 'í₂ ja₁gon₂ Diú₄.
²⁶ Jme₁ca₂nág₂ dsa₂ i₂tión₂ jë₄ jaun₂, ca₂juá'₂:
 —¿I₂'ein₂ bá₄ gué'₂ i₂tín'₄ jaun₂?
²⁷ Jaun₂ ca₂juá'₂ táng₃:
 —Ca₂le₃jé₃ a₂tsá₃ qui'₅₄ jmi₄g dsa₂ mi₂güí₃g jmo₃, Diú₄ lé₂ le₃jmo₃.
²⁸ Jaun₂ ca₂juá'₂ Pe₄:
 —Te₁gui'₅₄, ma₁ jnia'₅₄ ma₂ca₂tí₄ ca₂le₃jé₃ a₂jme₁cha₂ quián₂, a₂ma₂ja₂náu₅ 'én₅ 'ne₂.
²⁹ Jaun₂ ca₂ñag₃ táng₃:
 —A₂dsi₂jó'₃ juí₂g jniá'₂ 'nia'₂, 'i₁jan₂ tsá₃ jua'₅₄ a₂lë₁táun₂ 'ne₄, téin₂ chog₅₄-jmei₂, o₁riin'₅₄, dsa₂ mí₂, chi'₂-guein₂ quiáin₅ né₃, o₄quió'₄ ja₁gon₂ Diú₄, ³⁰ jua'₅₄ tsá₃ gue₃ tson₂ gué₄ ne₄ gua'₅₄ 'uë₃ la₂, ton'₂ le₃chain₂ dse₃ co₂tan₅₄ mi₂güí₃g caun₂.

Con'₂ siá'₂ táng₃ ca₂'é₂ Jesús jág₁ a₂jóin₂
 (Mateo 20:17-19; Marcos 10:32-34)

- ³¹ Jaun₂ ca₂té'₃ Jesús cau₅ jmá'₃ lia'₂ chi'₂ dsi₂guia₃-tín₂ quiáin₅, jaun₂ ca₂juá'₂:
 —Në₃ gué₄ né₃ ca₂té₂ jmi₄g a₂dsau₅₄ juí₂g Jerusalén, ja₁niog₅ le₃ti₃ ca₂le₃jé₃ con'₂ lé₅ ca₂tó'₂ dsa₂ i₂'é₂ jág₁ quián₅ Diú₄ ne₄ si₂, a₂'iin₂₃ Jaun₅ dsa₂ mi₂güí₃g. ³² Jáng'₂ dsa₂ o₄gú₃ dsi₂nau₂, ja₁lë₁co₃jmóg'₂ dsa₂, qui₃të₃'o'₂ dsa₂, a₂qui₃'ñéi₂ dsa₂ né₃. ³³ Jaun₂ jë₁ma₂ca₂lë₃ bóg₂, jaun₂ gué₄ jñag'₃. La₁ jë₁ma₂ca₂té₂ 'ni₅ jmi₄g, jein'₅₄ bá₄ táng₃.
³⁴ La₁ 'éi₂ né₃, tsá₃ 'e₂ ca₂ñí'₂ 'i₁caun₂ jág₁ në₅, ia₁ lé₅ jág₁ a₂rë₂'ma₄ bá₄ gué₄ ja₁coin₂, tsá₃ jein₅ dsí₅ 'e₂ jaun₂.

Ca₂jme₃'lión₂ Jesús jan₂ dsa₂ ten₄ juí₂g Jericó
 (Mateo 20:29-34; Marcos 10:46-52)

- ³⁵ Con'₂ jme₁ma₂ja₂quián₃ dsióg₄ Jesús juí₂g Jericó, jme₁guá₄ jan₂ dsa₂ ten₄ cau₅ jui₅, mi₂₃ a₂jme₃'o₅₄ dsa₂ cu₄.
³⁶ Jme₁ca₂nág₂ a₂qui₂ca₂ñi₅ juin₅ dsa₂, jaun₂ ca₂ñag₃ 'e₂ niog₅ lé₂.
³⁷ Jaun₂ ca₂juá'₂ dsa₂:
 —Jesús chan₂ Nazaret bá₄ në₅ já₅.
³⁸ Jaun₂ 'éi₂ né₃ ca₂juá'₂ tiá₂ ca₂tsí'₃ Jesús:
 —iJesús, tsi₁jon₂ David, dsia₄ ñéi₂ 'au'₂ jniá'₂!
³⁹ Ca₂jí₂ bá₄ dsa₂ i₂ja₂lén₂ ne₄ jui₅ ia₁jaun₂ jmo₃ tei₄, la₁ të₂le₃ lé₅ gué₄ qui₂ca₂'áu'₂ bá₄ 'ein₅₄, ca₂juá'₂:
 —i'Ne₂ tsi₁jon₂ David, dsia₄ ñéi₂ 'au'₂ jniá'₂!

^w24 A₂lin₅₄ chog₅ si₂ juá'₂: “jme₁ca₂jág₃ Jesús chén'₅ dsa₂ 'éi₂ 'lia'₂ dsí₅, ca₂juá'₂:”

⁴⁰ Ca₂nau₂ Jesús, jaun₂ ca₂jmo₃ 'éi'₃ a₂dsi₃quión₂ dsa₂. Jme₁ca₂dsióg₃ cau₅ quió'₅, jaun₂ ca₂ɲag₃ Jesús:

⁴¹ —¿'E₂ 'niog'₂ jmo₅₄ jniá₂ quiáng'₂?

Jaun₂ ca₂juá'₂:

—Te₁gui'₅₄, a₂jnia₅₄ jme₁ne₃ bá₄ jniá₂ 'nio₃.

⁴² Jaun₂ ca₂juá'₂ Jesús:

—iGue₄, jui₁jnia₅₄ quiáng'₂! Ma₂ca₂'lóng'₂ bá₄, ia₁ 'éng'₂.

⁴³ Dsi₂jui₅ jaun₂ bá₄ ca₂jnia₃ mi₂ne₅₄. Jaun₂ ca₂ɲó₃ chi₁co'₅₄ quió'₅, jme₂juin'₂ Diú₄. Ca₂le₃jín₃ bá₄ dsa₂ i₂ca₂té₂ ne₄ a₂ca₂lē₃ jaun₂ ca₂jme₃juin'₂ Diú₄ ján₃.

Jesús quian'₅₄ Zaqueo

19 ¹ Ca₂'í₃ Jesús juig₂ Jericó. Jaun₂ jme₁ma₂ɲó₅ jë₄ juig₂, ² ja₁jaun₂ jme₁chan₂ jan₂ dsa₂ cha₂ cu₄ i₂chen₂ Zaqueo, i₂lín₅ dsa₂ juin'₂ quián₅ dsa₂ i₂cán₂ 'lia'₅₄ quián₅ dsi₂tan₅₄.

³ 'Éi₂ në₃, jme₁'no'₂ jui₅ jín₂ 'ein₂ 'éi₂ Jesús. La₁ tsá₃ lé₂, ia₁ a₂ɲí₄ lë₃ juin₅ dsa₂ tion'₅₄. Ia₁ jan₂ dsa₂ 'on'₂ bá₄ 'éi₂.

⁴ Jaun₂ ca₂ɲó₃ co₂chi'₅₄ le₃ne₄ jui₅, ca₂uíg₂ guei'₅₄ caun₂ ni₁'ma₂ sicómoro,^x ia₁ 'nio₃ jín₂ Jesús, ia₁ jui₅ jaun₂ jme₁ɲí₃.

⁵ Jme₁ca₂dsióg₃ Jesús, jaun₂ ca₂jág₃ guei'₅₄, jaun₂ ca₂juá'₂:

—Zaqueo, ma₂në₃ sión₅, ia₁ ja₁quiáng'₂ ca₂tíng₂ i₁ɲia₁₂ në₃.

⁶ Jaun₂ ca₂sióin₃ co₂chi'₅₄, ca₂guei₃ 'io'₂ jén'₅.

⁷ Jme₁ca₂jág₃ dsa₂, jaun₂ ca₂chi₂ca₂'ag₃ ca₂juá'₂:

—Dsi₂néi₂ quió'₅ jan₂ dsa₂ cha₂ dsáu₁ bá₄ ɲó₅ i₂ɲia₅₄.

⁸ Zaqueo në₃, jme₁ca₂nau₂ ne₅₄ jaun₂ ca₂tsí'₃ Te₁gui'₅₄:

—Te₁gui'₅₄, dsio'₄ jniá₂ ca₂dsio₄ a₂cha₂ quió₃, cué₄ dsa₂ te₂ɲé₂. Ján₃ guë'₂ le₂jaun₂ chi₂jua'₂ 'ein₂ quió'₅ ma₂'ang₃ a₂jui₁gang₂, jiin'₅₄ táng₃ jniá₂ quén₂ ráun₂ lë₅ gué₄ co₂jaun₂.

⁹ Jaun₂ ca₂juá'₂ Jesús:

—Jmig₄ në₃ ca₂lón₂ dsa₂ dsi₂néi₂ la₂. Ia₁ ján₃ bá₄ lín₅ tsi₁jon₂ quián₅ Abraham. ¹⁰ Ta₁ në₅ já₅ bá₄ Jaun₅ dsa₂ mi₂güí₃, a₂ja₂'niai'₂ a₂ja₂lioin₅₄ dsa₂ i₂ma₂i₂cón'₅.

Jág₁ jág'₅ léi₄ jui₁lia'₂ guia₃ 'éi'₃ cu₄ 'ua'₂

(Mateo 25:14-30)

¹¹ Të₃ tion'₅₄ dsa₂ nag₂₃ jág₁ jaun₂, jaun₂ ca₂juá'₂ táng₃ caun₂ jág₁ jág'₅ léi₄, ia₁ ma₂quián₅ bá₄ dsióg₄ Jerusalén, ton'₂ ia₁ lín₂ dsa₂ le₃jniá₂ dsi₂jui₅ jaun₂ 'éi'₃ quió'₅ Diú₄. ¹² Jaun₂ në₃ ca₂juá'₂:

—Jme₁chan₂ jan₂ dsa₂ i₂lín₅ tsi₁jon₂ dsa₂ jlán'₁. Ca₂ɲó₃ caun₂ juig₂ uíng₂ ja₁'ag₃ dsa₂ a₂léin₂ rag₅₄, jaun₂ gué₄ ɲiúi'₂ táng₃. ¹³ La₁ né'₃ a₂o₃'iin₅, ca₂té'₃ guian₃ dsa₂ i₂jme₂ti₃ ta₁ ne₅₄. Jaun₂ le₂jan₂ le₂jan₂ 'éi₂

^x4 sicómoro: mei'₂ tsá₃ ni₁'ma₂ Ficus sycomorus. 'Nio'₂ ja₁ton₅ Amós 7:14.

ca₂cué'₃ jma₃cáun₃ cu₄ 'ua'₂ a₂chei₂ mina.^y Jaun₂ ca₂juá'₂: “Jmo₄ 'nia'₂ ta₁ cu₄ në₅ qui₁dsag'₂ 'nia'₂ ca₂lia'₂ ca₂tě₂ jmi₄ i₁guang'₂ táng₃.”¹⁴ La₁ dsa₂ go₅₄ ně₃ ca₂rě₃'iog₅₄, ca₂chein₃ co₂nió'₃ dsa₂ ca₂i₁chi'₄ dsa₂ ja₁jaun₂: “Tsá₃ 'niog₂ jnia'₅₄ jme₃gón₃ i₂ně₅ jě₄ quián₂.”¹⁵ La₁ tion₅₄ bá₄ ca₂lin₃ 'éi₂ rag₅₄. Jme₁ca₂guáin'₃ táng₃ go₅₄, jaun₂ ca₂tě₃ dsa₂ i₂jme₂ti₃ quián₅ i₂ca₂cué'₃ cu₄ 'éi₂, ia₁ 'nio₃ con₂ 'í₁ jma₃je₂liá'₂ tí₅ a₂ma₂tě₁dsi₅₄ quió'₅ le₂jain₂ le₂jain₂.¹⁶ Jaun₂ ca₂dsióg₃ i₂le₂'uig₅₄, ca₂juá'₂: “Gui'₅₄, con'₂ gué₄ guia₃ co₂jaun₂ ma₂tě₁dsi₅₄ cu₄ mina quiáng'₂.”¹⁷ Jaun₂ ca₂tsí'₃ 'éi₂: “E₂ gué₄ dse₃, téng'₅ bá₄ ta₁; ca₂jme₁ti'₄ bá₄ dse₃ quian'₅₄ a₂ca₂juig₄ a₂ca₂dsia₃ jniá₂ gog'₂. Ně₃ ně₃ dsia₄ jniá₂ gog'₂ a₂jmó'₂ 'éi'₃ ne₄ guia₃ juig₂.”¹⁸ Jaun₂ ca₂guan₃ táng₃ i₂ca₂tě₂ on₃, ca₂juá'₂: “Gui'₅₄, 'ñiá₂ gué₄ co₂jaun₂ ma₂tě₁dsi₅₄ cu₄ mina jaun₂ quiáng'₂.”¹⁹ Le₂jaun₂ bá₄ ca₂tsí'₃ i₂'éi₂ ján₃: “Ne₂ gué'₂ jmó'₂ 'éi'₃ ne₄ 'ñiá₂ juig₂.”²⁰ Jaun₂ ca₂já₃ táng₃ jan₂ ca₂juá'₂: “La₂ bá₄ ron₅ cu₄ quiáng'₂, gui'₅₄. Ca₂'ma₃ bá₄ jniá₂ dsí₅ pe₁guí₄.²¹ A₂gán₅ 'ne₂ bá₄ jniá₂, ia₁ guion₅₄ líng'₅ dsa₂ tsau₂ dsí₅, tē₂le₃ dséi₂ mág'₂ quiáng'₂. Ia₁ cáun'₂ ja₁tsá₃ 'e₂ ca₂qui₁dsag'₂ 'ñiag'₂, ton'₂ cag'₅₄ ja₁tsá₃ 'e₂ ca₂jñí'₂.”²² Jaun₂ ca₂ṇag₃ táng₃ 'éi₂: “i'E₂ bá₄ tsá₃ ta₁ téng'₄! Lia'₂ con'₂ lě₅ jág₁ quiáng'₂ qui₁dsi₅ jniá₂ 'éi'₃. Chi₂jua'₂ ma₂ñi'₅₄ líng₅ dsa₂ i₂tsau₂ dsí₅, cáun₄ a₂tsá₃ 'e₂ ca₂qui₁dsag'₂ 'ñióg₃, ton'₂ cag'₅₄ ja₁tsá₃ 'e₂ ca₂jan₃,²³ i'E₂ 'uig₅₄ tsá₃ ca₂i₁tio'₂ banco cu₄ quióg₃ jaun₂ ně₃, ia₁jaun₂ jě₁ma₂guáng'₅ la₂, jme₁guéi'₄ lia'₂ jma₃quian'₅₄ a₂tě₁dsi₅₄?”²⁴ Jaun₂ ca₂tsí'₃ i₂jme₁tióng₂ cau₅: “Jñiá'₃ 'nia'₂ cu₄ mina a₂chan'₂ i₂ně₅. Cué'₅₄ i₂'io₅ guia₃.”²⁵ Jaun₂ ca₂juá'₂ 'éi₂: “Gui'₅₄, ma₁ ma₂'io₅ bá₄ i₂ně₅ guia₃ minas.”²⁶ Jaun₂ ca₂ṇag₃ rag₅₄: “A₂dsi₂jó'₃ juíg₂ jniá₂ 'nia'₂, ca₂le₃jín₃ jui₁lia'₂ i₂ma₂le₁'io₅, ñei₂ gué₄; la₁ i₂tsá₃ 'e₂ qui₁dsag'₂, ca₂tě₂ a₂jme₁ma₂niog₅ gu₂, co₂ñei'₅₄ jñia'₃.²⁷ La₁, jui₁lia'₂ dsa₂ i₂'iog₅₄ i₂tsá₃ 'ñio₂ dsí₅ gua₅₄ jmo₅₄ 'éi'₃ ja₁coin₂, o₂quian₅ 'nia'₂ ja₁lá₃, jaun₂ jme₁dsian'₂ 'nia'₂ ne₃.”

Ca₂dsióg₃ Jesús juig₂ Jerusalén

(Mateo 21:1-11; Marcos 11:1-11; Juan 12:12-19)

²⁸ Jme₁ca₂dsan₃ tsí'₅ dsa₂ le₂ně₅, ca₂'ág₂ táng₃ ne₅₄ jui₅, ca₂uig₂ tso₄ a₂dsióg₄ Jerusalén.

²⁹ Jme₁ma₂ja₂quián₃ dsióg₄ juig₂ Betfagé quian'₅₄ Betania, a₂te₁'i₁ cau₅ má'₂ chei₂ Olivos, ja₁jaun₂ ca₂chein₃ on₃ chi'₂ dsi₂guia₃-tín₂ quian₅.

³⁰ Ca₂juá'₂:

—O₂nó'₅ 'nia'₂ juig₂ niog₅ 'ño'₅₄ ó₃. Jě₁ma₂ca₂dsi₃nóg'₅, dsian'₂ 'nia'₂ jan₂ bú'₄ chéin'₅ rě₂'ñe'₅₄, i₂tsá₃ 'ein₂ ma₂co₁dsag₅₄. Chein'₅₄ 'nia'₂ jaun₂ tē'₅₄ ja₁lá₃.³¹ Nē₁jua'₂ 'ein₂ ca₂ṇag₃ 'e₂ lě₃ tsiin'₅₄, jaun₂ juig'₅₄: “Ia₁ 'niói'₅ quió'₅ Te₁gui'₅₄.”

^y13 mina: co₂'nió'₄ 'lian'₅₄ dsa₂ con'₂ 'ni₅ tsi'₂ ta₁.

- ³² Ca₂i₃lén₂ bá₄ guë'₂ i₂chen₄ 'éi₂ né₃. Ca₂lë₃ rë'₂ lia'₂ con'₂ lé₅ jág₁ jaun₂.
- ³³ Jme₁ma₂tioin'₅₄ chéin'₂ bú'₄, ca₂juá'₂ juig₅₄ já'₂:
—¿E₂ 'uig₅₄ tsin'₅₄ 'nia'₂ bú'₄?
- ³⁴ Jaun₂ ca₂ṇag₃:
—Ia₁ 'niói'₅ quió'₅ Te₁gui'₅₄.
- ³⁵ Jaun₂ ja₂lein₃ bá₄ te₂ ja₁'en₅₄ Jesús. Qui₂ca₂dsia₃ tsi₁'mi'₂ mi₂ca'₄ dsi₂bú'₄, jaun₂ gué'₄ ca₂dsiain₃ Jesús guei'₅₄.
- ³⁶ Le₃ne₄ jui₅ ja₁ṇó₄ Jesús, qui₂ca₂já₃ dsa₂ 'mi'₂ le₂'i₄ jui₅.
- ³⁷ Con'₂ jme₁ma₂ja₂quián₃ jein₅₄ Má'₂ Olivos, ca₂jme₃lióg₃ ca₂le₃jín₃ dsa₂ i₂quiain'₅₄ ca₂tóin'₂ co₂mi'₅₄ jmo₂₃ 'io'₂ jme₂juiin'₂ Diú₄ né₃, o₄quió'₄ ca₂le₃jé₃ jui₅bí₂ a₂ma₂jmo₃ Jesús, a₂qui₂ma₂té₂ ne₅₄.
- ³⁸ Ca₂juá'₂:
—iJui₁le₂juin'₂ bá₄ Rag₅₄ në₅ i₂já₅ o₄quió'₄ Te₁gui'₅₄! iJui₁'ei₅ bá₄ tei₄ guei'₅₄ i₂juíg₃! iJui₁le₂juin'₂ bá₄ Diú₄ le₂tan₅₄ ja₁ṇei₅ né₃!
- ³⁹ I₂lin₅₄ dsa₂ fariseos i₂tion'₅₄ jë₄ jaun₂ ca₂juá'₂:
—Të₅, jén₃ dsa₂ i₂quiang'₅₄.
- ⁴⁰ Jaun₂ ca₂ṇag₃ Jesús:
—Juíg₂ jniá'₂ 'nia'₂, jua'₅₄ mei'₂ gué'₃ dsi₂lén₂ i₂në₅ tei₄, ni₁cang₁ guë'₂ tó'₃ mi'₅₄.
- ⁴¹ Jme₁ma₂ja₂quián₃ dsióg₄ 'ni'₂ juig₂ Jerusalén, ca₂'o₃ o₄quió'₄ dsa₂ juig₂, ⁴² ca₂juá'₂:
—iJui₁lia'₂ bá₄ ṇí'₂ 'au'₂ 'nia'₂ jmig₄ në₃ a₂dse₃ já₅ jin'₄ 'nia'₂ a₂jme₁le₃chang'₂ 'ag₃ tei₄! La₁ rë₂'ma₄ jlë₅ le₃ja₁cong'₂. ⁴³ Ia₁ jiá₃ jmig₄ ja₁tsá₃ ma₃'e₂ ṇí'₅₄ 'nia'₂ jmó'₂. Ia₁ cho₃ dsa₂ i₂'iog₅₄ caun₂ ni₁'ia'₂ le₃lág'₃ quián'₂ 'nia'₂, a₂jë₃li'₅₄, qui₃tio₃ dsa₂ né₃ le₂tan₅₄ ja₁lé₄ o₄jui₅. ⁴⁴ Jnáu'₂ dsa₂ 'uë₃ 'nia'₂, jme₃dsiog₂₃ lia'₂ jma₃quian'₅₄ chi'₂-guein₂ quiáng'₂. 'I₁ca₂míg₂ cang₄ tsá₃ ma₃'e₂ le₁juí₄ lé₂ ja₁lá₃. Ia₁ tsá₃ ca₂rë₃len'₄ 'nia'₂ lia'₂ con'₂ jmig₄ jme₁'nio₃ Diú₄ jme₃gu'₅₄.

Ca₂'uín'₂ Jesús dsa₂ i₂jme₁tion'₅₄ dsia₅ 'ma'₅₄ i₁dsi₅ guá'₅

(Mateo 21:12-17; Marcos 11:15-19; Juan 2:13-22)

- ⁴⁵ Jaun₂ ca₂'í₃ Jesús i₁dsi₅ guá'₅ templo, ca₂jme₃lióg₃ qui₂ca₂'uín'₂ dsa₂ i₂jme₁ma₂tion'₅₄ 'nag₅^z ja₁jaun₂. ⁴⁶ Ca₂juá'₂:
—Ne₄ Si₂ juá'₂: “'Né₅ quió₃ lé₂ ca₂ne₅₄ 'né₅ ja₁chi₂lén'₂ dsa₂ Diú₄.”^a La₁ 'nia'₂ né₃ ma₂jmo'₅₄ në₂jag₄ bá₄ të₂'lau₂ quió'₅ dsa₂ 'ang₂.^b
- ⁴⁷ Ca₂le₃jé₃ jmig₄ bá₄ jme₁jme₂tin₅ Jesús dsa₂ i₁dsi₅ guá'₅. La₁ juig₅₄ jme₂dsa₂ quian'₅₄ të₅juá'₅, dsa₂ can'₅₄ quián₅ juig₂ né₃, caun₂ 'no'₂ jui₅ 'a₂ lia'₂ jṇag₃.

^z45 A₂lin₅₄ chog₅₄ si₂: “i₂jme₁ma₂tion'₅₄ 'nag₅, lá₅ ja₁jaun₂.”

^a46 Isaías 56:7.

^b46 Jeremías 7:11.

⁴⁸ La₁ tsá₃ dso'₂ guë'₂ jui₅ 'a₂ lia'₂ jmo₃, ia₁ ca₂le₃jín₃ bá₄ dsa₂ i₂tion'₅₄, nag₂₃ tei₄ lin₃.

A₂'io₅ Jesús 'éi'₃

(Mateo 21:23-27; Marcos 11:27-33)

20 ¹ Co₂ráun₂ jme₁ma₂'en₅₄ Jesús jme₂tiin₂₃ dsa₂ jág₁ dse₃ i₁dsi₅ guá'₅ templo, jme₁ca₂dsi₃lén₂ juig₅₄ jme₂dsa₂, tē₅juá'₅, quian'₅₄ gui'₅₄ can'₅₄ né₃. ² Ca₂juá'₂:

—Jmo₄ jág₁ 'e₂ ta₁ líng'₅. ¿Ein₂ ca₂cuë₃ bí₂ 'éi'₃ a₂jmo'₂ le₂nē₅?

³ Jaun₂ ca₂ṇag₃ Jesús, ca₂juá'₂:

—Ján₃ bá₄ ṇag₄ jniá₂ caun₂ jág₁ 'nia'₂: ⁴ ¿Ein₂ ca₂chen₃ Juan₅₄ a₂o₃choin₃ dsa₂ jmi₂g₂? ¿Ca₂chei₃ Diú₄, o₃ ca₂chei₃ dsa₂ mi₂güí₃g₃ 'e₂? ṇag₄ de'₂ 'nia'₂ a₂nē₅.

⁵ Jaun₂ ca₂dsia₃ jág₁ guioin₅₄, ca₂juá'₂:

—Nē₁juá'₂ ca₂chei₅₄ jniog₄ i₂chen₄ quián₅ Diú₄ bá₄ 'éi'₂, nē₃ cón'₅ bá₄ juá'₂: “¿'E₂ guë'₂ lē₃ tsá₃ ca₂rē₃'én'₂ 'nia'₂ jág₁ quió'₅?” ⁶ Nē₁juá'₂ ca₂ṇag₄ guë'₂ jniog₄ dsa₂ bá₄ i₂ca₂chen₃ 'éi'₂, nē₃ cón'₅ bá₄ ca₂le₃jín₃ dsa₂ juig₂ qui₃dsag₅ cang₄. Ia₁ 'én₂ dsón'₂ bá₄ dsa₂ juig₂ a₂jme₁lín₄ Juan₅₄ jan₂ i₂'é₂ jág₁ quián₅ Diú₄.

⁷ Jaun₂ ca₂ṇag₃:

—Tsá₃ a₂jaun₂ ne₄ jnia'₅₄.

⁸ Jaun₂ ca₂juá'₂ Jesús:

—Ján₃ bá₄ le₂nē₅ tsá₃ juá'₄ jniá₂ 'ein₂ cuë₅ bí₂ 'éi'₃ a₂jmo₂₃ ca₂le₃jé₃ 'e₂ a₂jmo₂₃.

Jág₁ jáng'₅ léi₄ jui₁lia'₂ co₂nió'₃ dsa₂ 'lín'₅₄ i₂jmó'₂ ta₁ ja₁nau₂

(Mateo 21:33-44; Marcos 12:1-11)

⁹ Jaun₂ ca₂jme₃lióg₃ táng₃ Jesús ca₂tsí'₃ dsa₂ juig₂ caun₂ jág₁ jáng'₅ léi₄ la₂, ca₂juá'₂:

—Jme₁chan₂ jan₂ dsa₂ i₂ca₂jmo₃ caun₂ ja₁nau₂ ca₂chéin'₃ uing₂ míg₂ uvas. Cang₂ jaun₂ ca₂o₃'fin₃ bá₄ ca₂ṇó₃ ué₂ ja₁siá'₂. Gu₂ dsa₂ sián'₂ bá₄ ca₂dsia₃ ja₁nau₂ quió'₅. ¹⁰ Jme₁ca₂tē₂ jein₂ a₂ca₂rau₂ ja₁nau₂, ca₂chein₃ jan₂ dsa₂ i₂jme₂ti₃ quián₅, a₂i₁mag₂₃ con'₂ a₂ca₂tíin₂ ne₄ dsa₂ i₂jmo₅ ta₁ ja₁nau₂ 'éi'₂. La₁ jē₂ bá₄ ca₂cuë₃ tioen'₅₄, ca₂dsióg'₂ lín₃. ¹¹ Jaun₂ dsa₂ juig₅₄ ja₁nau₂, ca₂chein₃ táng₃ jan₂ i₂sián'₂, la₁ le₂jaun₂ bá₄ ca₂jmóg'₂ táng₃: jnia'₅₄ ca₂tē₂ca₂'o'₂ bá₄ ca₂cuë₃ tioen'₅₄, ca₂dsióg'₂ lín₃ táng₃.

¹² Jē₁ca₂tē₂ 'nag'₂, ca₂chein₃ táng₃ jan₂ i₂sián'₂. La₁ ján₃ bá₄ le₂jaun₂ qui₂ca₂jmóg'₂ uig₅, ca₂dsei₂₃ tioen'₅₄.

¹³ Jaun₂ ca₂juá'₂ juig₅₄ ja₁nau₂: “¿'E₂ jmo₅₄ jniá₂ né₃? Chi'₂ quiáng₃ i₂'nióg₃ gué₄ lín₃ tsing₅₄. 'An₁ jme₃gain₃ bá₄ i₂nē₅.” ¹⁴ La₁ jme₁ca₂jág₂ i₂tion'₅₄ jmo₅ ta₁, ca₂quiin'₃ jág₁, ca₂juá'₂: “I₂nē₅ bá₄ tin₃ a₂la₂ cang₂. Nē₃ o₁jñí'₄ jniog₄, ia₁jaun₂ jniog₄ bá₄ lé₂ quián₂.” ¹⁵ Jaun₂ ca₂dsei₂₃ ca₂i₁jñag'₂ 'ni'₂ ja₁nau₂. ¿'E₂ bá₄ jmo₃ dsa₂ i₂quió'₅ ja₁nau₂ né₃, quian'₅₄

dsa₂ 'éi₂? ¹⁶ Guain'₂ jme₃dsiain₂₃ dsa₂ i₂tion'₅₄ ja₁nau₂. O₄gú₃ i₂sián'₂ bá₄ ñág₃ ja₁nau₂ quió'₅.

Jme₁ca₂nág₂ dsa₂ jág₁ në₅, ca₂juá'₂:

—iTsá₃ jui₁le₅₄ le₂në₅!

¹⁷ Jaun₂ ca₂jág₂ Jesús, jaun₂ ca₂juá'₂:

—¿E₂ guè'₂ 'nió'₄ jein₅ jág₁ ja₁juá'₂ ne₄ Si₂?

Ni₁cang₁ a₂tsá₃ ca₂rë₃ji'₅₄ të₅'ia'₂,

ca₂dsióg₃ ca₂lë₃ ni₁cang₁ a₂dsen₅₄ gué₄

të₁ron₅₄ qui'₅₄ 'ia'₂.^c

¹⁸ Ca₂le₃jín₃ i₂tsi₃sén'₂ ne₄ ni₁cang₁ jaun₂ lé₂ le₁juig₁ le₁dsog'₅₄ quió'₅; në₁juá'₂ ni₁cang₁ guè'₂ në₃ ca₂tá'₂ ne₄ quió'₅, lé₂ 'liog₂.

¹⁹ Dsi₂jui₅ jaun₂ jme₁'nio₃ juig₅₄ jme₂dsa₂, të₅juá'₅ në₃, jme₁tsáun'₂, ia₁ ca₂rë₃lí'₄ a₂'in₅ 'éi₂ bá₄ Jesús, a₂ca₂juá'₂ jág₁ jáng'₅ léi₄ jaun₂.^d La₁ dsa₂ juig₂ bá₄ ca₂rë₃gain₃.

Jág₁ jui₁lia'₂ 'lia'₅₄ a₂ca₂tín₂ dsi₂tan₅₄

(Mateo 21:45-46; 22:15-22; Marcos 12:12-17)

²⁰ Cón'₂ ca₂chein₃ dsa₂ i₂jñia'₅₄ con'₂ tiog₅, tsá₃ jme₂li₅₄, jmo₂₃ a₂lín₅ dsa₂ dsen₃, jme₁'no'₂ jui₅ 'a₂ lia'₂ jme₁jo₁₂ jua'₅₄ ca₂jon₄ bá₄ jág₁ 'lia'₂ jme₁'ñiá₃ Jesús. Jaun₂ jme₁dsi₁jáng'₂ ne₄ bí₂ 'éi'₃ a₂'io₅ dsi₄má'₂.²¹ Jaun₂ ca₂ñí'₃ Jesús jág₁ la₂:

—Të₅, ne₄ jnia'₅₄ dsón'₂ bá₄ lia'₂ tí₅ jág₁ jme₂tíng'₁ dsa₂, tsá₃ jua'₅₄ jma₃quén₅ jing'₅₄ dsa₂; jme₂tíng'₁ dsa₂ con'₂ lë₅ jui₅ tí₅ quió'₅ Diú₄.

²² Jua'₅₄: ¿I₄ 'éi'₃ qui₅₄ 'lia'₅₄ quió'₅ dsi₂tan₅₄ César, o₃ tsá₃ qui₅₄ 'e₂?

²³ La₁ ca₂rë₃lí'₄ bá₄ Jesús mai₅₄ quió'₅ dsa₂ 'éi₂. Jaun₂ ca₂ñag₃.^e

²⁴ —È₄ de'₂ 'nia'₂ caun₂ cu₄ 'ua'₂.^f ¿Ein₂ quió'₅ nió'₄ chi₁ton₅? ¿A₂ lia'₂ chein₂ juá'₂ letras tio'₅₄ në₅?

²⁵ —Quió'₅ gui₅₄ emperador César bá₄ —juá'₂ jaun₂ në₃.

Jaun₂ gué₄ ca₂juá'₂ Jesús:

—Jang'₅₄ guè'₂ 'nia'₂ jaun₂ në₃, ne₄ César con'₂ a₂ca₂tín₂ César; ne₄ Diú₄ në₃ jang'₅₄ 'nia'₂ con'₂ a₂ca₂tín₂ Diú₄.

²⁶ Jaun₂ tsá₃ ca₂tió'₃ jua'₅₄ a₂jo₅₄ quian'₅₄ jág₁ të₃jë₄ jág₅ dsa₂ jaun₂. Të₂le₃ ca₂i₃gó'₃ dsí₅ bá₄ jág₁ a₂ca₂jéin'₃ Jesús; tei₄ bá₄ co₂ñei'₅₄ ca₂i₃lén₂.

Ca₂ñag₃ dsa₂ saduceos jui₁lia'₂ a₂jen'₅₄ 'lag₄

(Mateo 22:23-33; Marcos 12:18-27)

²⁷ Jaun₂ ca₂jme₃quián₃ i₂lín₅₄ dsa₂ saduceos, i₂jme₂tag₅ a₂tsá₃ jen'₅₄ 'lag₄, ca₂o₃ñag₅₄:

^c17 Salmo 118:22.

^d19 'Nio'₂ ja₁ton₅ Isaías 5:7.

^e23 A₂lín₅₄ chog₅₄ si₂ chi₁ton₅ ján₃: “¿E₂ lë₃ cáun'₂ táu₂ 'nia'₂ jniá₂?”

^f24 griego: denario.

²⁸ —Të₅, ca₂quiog₂ Moisés si₂ a₂juá'₂, në₁jua'₂ ca₂jon₃ jan₂ dsa₂ ñe'₂ të₃ tsá₃ ca₂can₃ 'io₅₄ quiáin₅ guein₂, tion₅₄ 'nió'₅ jén'₂ gu₂ dsó₂ rin'₅₄ dsa₂ ñe'₂ i₂ca₂jon₃ quian'₅₄ 'io₅₄ 'nág₂ 'éi₂, ia₁jaun₂ guein₂ i₂le₃chan₂ quiáin₅, lé₂ co₂'nió'₄ tsi₁jon₂ 'lag₄ riin'₅₄. ²⁹ Jaun₂ në₃, jme₁chan₂ guion₃ dsa₂ ñe'₂ i₂jme₁lé₄ rin'₅₄. Ca₂jen'₂ gu₂ i₂le₂'uig₅₄, la₁ ca₂join₃ bá₄ të₃ tsá₃ guein₂ ca₂can₃ 'io₅₄ quiáin₅. ³⁰ Jaun₂ ca₂caun₃ táng₃ i₂ca₂té₂ on₃,^g ³¹ le₂jaun₂ bá₄ i₂ca₂té₂ ún₂ në₃, ca₂cain₃ 'io₅₄ 'éi₂. Le₂jaun₂ bá₄ ca₂lë₃ quian'₅₄ ta₁guion₃. Ca₂dsain₃ bá₄; 'i₁jan₂ guein₂ tsá₃ ca₂can₃ 'io₅₄. ³² Jë₁ca₂tó'₂, ca₂jon₃ bá₄ 'io₅₄ ján₃. ³³ Jaun₂ në₃, jmi₄g₄ jë₁ma₂té₂ rë₁jen'₅₄ 'lag₄, é₁ein₂ bá₄ quián₅ lé₂ 'io₅₄ 'éi₂? Ia₁ ta₁guion₃ bá₄ guë'₂ dsa₂ ñe'₂ i₂ca₂guá₂ quian'₅₄.

³⁴ Jaun₂ ca₂ñag₃ Jesús:

—Dsa₂ i₂chan₂ ne₄ gua'₅₄ 'uë₃ jmi₄g₄ në₃, tioen'₅₄ qui₂jéin'₂ gu₂, qui₂jéin'₂ gu₂ chi'₂ quiáin₅ në₃. ³⁵ La₁ i₂ca₂tín₂ tín'₄ ja₁tian'₃ mi₂güí₃g₃ caun₂, i₂tín₅₄ jen'₅₄ ja₁jme₁rë₂'liin₅₄, ja₁jaun₂ gué₄ tsá₃ ma₃'ein₂ jén'₂ gu₂, on₃ gué₄ qui₃jéin'₂ gué₄ gu₂ chi'₂ quiáin₅. ³⁶ Ia₁ tsá₃ ma₂'ein₂ lé₂ dsián₃. Ja₁jaun₂ ma₂léin₂ jui₁lia'₂ lín₅ ángeles, léin₂ jaun₅ Diú₄, ia₁ ma₂ca₂rë₃cháin₃ táng₃. ³⁷ La₁ jui₁lia'₂ a₂jen'₅₄ 'lag₄, ca₂të₂ Moisés ca₂cuë₃ léi₄ jme₁ca₂tó'₂ ne₄ Si₂ a₂ca₂lë₃ quian'₅₄ ni₁'ma₂ taun₅, ja₁juá'₂ 'iin₂₃ Te₁gui'₅₄: “Diú₄ quián₅ Abraham, Diú₄ quián₅ Isaac, Diú₄ quián₅ Jacob.” ³⁸ Jaun₂ në₃ tsá₃ lín₅ Diú₄ quián₅ 'lag₄; Diú₄ quián₅ dsa₂ i₂jén'₃ bá₄ lín₅, ia₁ o₄quió'₄ 'éi₂ bá₄ chan₂ le₃jín₃.

³⁹ Jaun₂ ca₂ñag₃ i₂lín₅₄ të₅juá'₅:

—Të₅, 'ñio₅ jlá'₁ jág₁ quiáng'₂.

⁴⁰ Tsá₃ ma₃ca₂tiá₃ dsí₅ jua'₅₄ a₂ñag₃ gué₄ 'e₂ ñag₃.

é₁Ein₂ tsi₁jon₂ quián₅ lín₅ I₂rë₂'ín₁ quián₅ Diú₄?

(Mateo 22:41-46; Marcos 12:35-37)

⁴¹ Ca₂juá'₂ Jesús ca₂tsí'₃ dsa₂:

—é₁A₂ lia'₂ lé₅ në₃ a₂juá'₂ dsa₂ a₂lín₅ tsi₁jon₂ David I₂rë₂'ín₁ quián₅ Diú₄? ⁴² Jua'₂ 'ñiog₅ bá₄ guë'₂ David ca₂tióng₃ ne₄ si₂ Salmos, ca₂juá'₂:

Ca₂juá'₂ Diú₄ ca₂tsí'₃ Te₁gui'₅₄ quiáng₃:

“Né₂ con₂ jniá₂ të₂le₃ gu₃ ne₁,

⁴³ ca₂lia'₂ ca₂té₂ jmi₄g₄

a₂tón'₄ jniá₂ dsa₂ i₂'iog₅₄ o₄tag'₄.^{”h}

⁴⁴ Chi₂jua'₂ le₂në₅ juá'₂ David të₂ Te₁gui'₅₄, é₁a₂ bá₄ lia'₂ lé₅ jaun₂ a₂juá'₂ lín₅ jaun₅ 'éi₂?

^g30 A₂lín₅₄ chog₅₄ si₂: “ca₂caun₃ táng₃ i₂ca₂té₂ on₃, la₁ ján₃ bá₄ le₂jaun₂ ca₂join₃, tsá₃ guein₂ ca₂can₃ 'io₅₄.”

^h43 Salmo 110:1.

Jme₂caun'₂ Jesús quió'₅ tē₅juá'₅

(Mateo 23:1-36; Marcos 12:38-40; Lucas 11:37-54)

⁴⁵ Tē₃ nag₅ ca₂le₃jín₃ dsa₂ i₂tion'₅₄, ca₂tsí'₃ dsa₂ i₂quian'₅₄ le₂la₂:⁴⁶ —Te₃ñi'₅₄ 'nia'₂ quian'₅₄ tē₅juá'₅, ia₁ 'ñio₅ 'ñio₂ dsí'₅ i₂nioi'₅₄ jláin'₁ le₁qui'₂ tsi'₁mi'₂ chen'₅₄ jang₄; tē₅ dsí'₅ qui₂cuag₃ dsa₂ Diú₄ jui₁lia'₂ jē₄ 'ma'₅₄, jmá'₃ lia'₂ ne₄ 'ma₂si'₅₄ dsen'₅₄ bá₄ 'no'₂ tian'₃ jui₁lia'₂ dsi₂néi₂ guá'₅ sinagogas; le₂jaun₂ bá₄ 'no'₂ ja₁jme₂juag'₂ dsa₂ jui₁lia'₂ ja₁nio₅ jmig₄ né₃. ⁴⁷ Qui₂ñiá'₂ 'ne₄ 'io₅₄ 'nág₂; a₂tsá₃ jme₂li₅₄ jmo₂₃ chi₂léin'₂ Diú₄ ué₂. Tson₂ gué₄ uig₅ 'é₂ Diú₄ quió'₅ i₂le₂nē₅.**Ca₂tó'₂ 'io₅₄ 'nág₂ te₂ñé₂ cu₄ quió'₅**

(Marcos 12:41-44)

21 ¹ Jaun₂ ca₂chóg'₃ Jesús ne₅₄, ca₂jín₂ dsa₂ cha₂ cu₄ i₂dsi₂lén₂ dsi₂tio'₂ cu₄ 'ñió'₃ tsi₁gu₅ ja₁tio'₅₄ ofrendas.² Jaun₂ ca₂jín₂ táng₃ jan₂ 'io₅₄ 'nág₂ te₂ñé₂ ca₂tó'₂ tin₃ ñí₁ guéin₂.ⁱ³ Jaun₂ ca₂juá'₂ Jesús:—A₂dsi₂jó'₃ juíg₂ jniá'₂ 'nia'₂, 'lióng₂ gué₄ nē₂tió'₂ 'io₅₄ 'nág₂ te₂ñé₂ nē₅ lia'₂ con'₂ gué₄ ca₂le₃jín₃ i₂ma₂nē₂tió'₂. ⁴ Ia₁ 'éi₂ né₃, cu₄ a₂ma₂qui₂rē₂tsón₂ bá₄ jaun₂ quió'₅ cuē₂₃; dsa₂ mí₂ nē₅ né₃, nē₂cuē₃ ca₂le₃jé₃ a₂jme₁ron₅ quió'₅ bá₄, 'nió'₄ a₂jme₁lá₃ a₂gué'₃.**A₂dsi₃'én₂ bá₄ guá'₅, jág₁ 'é₂ Jesús**

(Mateo 24:1-2; Marcos 13:1-2)

⁵ I₂lin₅₄ dsa₂ jme₁tióin₂ dsia₂₃ jág₁ a₂ja₂né₂ guá'₅ templo, ia₁ a₂ñí₄ lē₃ jlá'₁ ni₁cang₁ a₂le₁juí₄, ca₂le₃jé₃ gué₄ a₂jlá'₁ tio'₅₄ a₂qui₂ma₂cuē₃ dsa₂ co₂'nió'₄ ofrendas. Jaun₂ ca₂juá'₂ Jesús:⁶ —Ca₂le₃jé₃ a₂jág'₂ 'nia'₂ tióng'₂ nē₅, já₅ caun₂ jmig₄ jē₁dsi₃'én₂, tsá₃ ma₃'e₂ ni₁cang₁ te₂'ñiá₄ jua'₅₄ a₂le₁juí₄ gué₄ lé₂.**Léi₄ a₂le₃cha₂ jmig₄ jē₁ca₂tó'₂**

(Mateo 24:3-28; Marcos 13:3-23)

⁷ Jaun₂ ca₂ñag₃ dsa₂ né₃:—Tē₅, ílíg'₂ jaun₂ lé₂ a₂nē₅? ¿'E₂ bá₄ léi₄ le₃cha₂ jē₁ma₂ja₂quián₃ lé₂ a₂jaun₂?⁸ Jaun₂ ca₂ñag₃:—Jmo₄ 'nia'₄ 'í₁ tsá₃ i₂cuín₅ 'nia'₂ jua'₅₄ a₂jme₃gau₅ dsa₂. Ia₁ i₂juin₅ lin₃ i₂tē₁i₃nio₄ i₂juá'₂ i₂nioi'₅₄ o₄quió₃ jniá'₂, a₂juá'₂ né₃: “Jniá'₂ bá₄ 'éi₂”; juá'₂ ján₃: “Ma₂ja₂quián₃ jmig₄ jaun₂”. La₁ tsá₃ i₂o₂nó'₅ 'nia'₂ chi₁co'₅₄ quió'₅. ⁹ Ia₁ jē₁ma₂ca₂nei'₂ 'nia'₂ 'ei₅ jág₁ a₂nio₃ 'nei₂, tón'₃ dsa₂ mi'₅₄ né₃,ⁱ2 lit. “tin₃ ñí₁ lepta.”

tsá₃ tón'₁ 'nia'₂ go₂'i₃, ia₁ le₂jaun₂ de'₂ jniá₅ ca₂tín₂ lé₂ bá₄, la₁ on₃jua'₅₄ a₂ma₂dsian₅ dsi₂jui₅ jaun₂.

¹⁰ Jaun₂ ca₂tsí'₃ táng₃ dsa₂:

—Qui₃nio₃ 'nei₂ jui₁lia'₂ caun₂ juig₂, qui₂quín'₂ quian'₅₄ juig₂ siá'₂; jme₃'uán'₃ dsa₂ ca₂taun₂ ca₂taun₂. ¹¹ Qui₂dsi₃bi₅₄ 'uë₃ tiá₂, jiá₃ 'on₅₄ dsa₂ ca₂le₂con₂, 'í₂ jmi₁uig₅ né₃; jnia₅₄ gau₂ dsi₁ guei'₅₄, 'lióng₂ léi₄ ca'₅₄ qui₂le₃jniá₂. ¹² La₁ né₃ a₂lé₂ ca₂le₃jé₃ a₂në₅, qui₃tsán'₂ dsa₂ 'nia'₂ qui₂co₃'ein₃ dsa₂. Dsi₁jang'₂ dsa₂ o₄gú₃ dsi₂tan₅₄ quián₅ guá'₅ sinagoga, jaun₂ gué₄ to'₂ né₃ 'má₃. Dsi₁jó₂ ne₄ rag₅₄ ne₄ dsi₄má'₂ né₃ 'uig₅₄ quió₃ jniá₂. ¹³ Ja₁jaun₂ cuin₃ jmig₄ a₂jang'₅₄ 'nia'₂ jág₁ dsau₅ a₂'ág'₄ jniá₂. ¹⁴ 'Éi₂ 'nia'₂ caun₂ 'au'₂, tsá₃ 'náu'₂ 'nia'₂ 'au'₂ tē₃jniá₅ 'a₂ lia'₂ long'₅₄, ¹⁵ ia₁ 'ñi₃ bá₄ jniá₂ cuë₅₄ jág₁ a₂ting'₂ a₂ñi'₅₄ 'nia'₂ 'a₂ lia'₂ ñag'₅₄, ca₂lia'₂ jñia'₅₄ tsá₃ ma₃'e₂ ñi₅ ñag₃ ca₂le₃ján₃ dsa₂ i₂'iog₅₄ 'éi₂. ¹⁶ Ca₂tē₂ chog'₂-ñéi'₅ 'nia'₂ qui₃jáng'₂, ca₂tē₂ chi'₂ ríng'₂, o₁ríng'₂, a₂mei₅₄ quiáng'₂ né₃. I₂lin₅₄ 'nia'₂ jme₃dsiog₅ dsa₂. ¹⁷ Ca₂le₂con₂ bá₄ jme₃'ñia₅₄ dsa₂ 'nia'₂ o₄quió₃ jniá₂. ¹⁸ La₁ tsá₃ can₂ 'nia'₂ o₂i₁ dsi₅, ia₁ ca₂lia'₂ jñia'₅₄ 'i₁ca₂mi'₂ jñi₂ dsei'₂ 'nia'₂ tsá₃ dsi₃'én₂. ¹⁹ Nē₁jua'₂ ca₂nau'₂ 'nia'₂ tiá₂, dsi₁no'₃ 'nia'₂ tín'₄ jme₂dsí₂ quiáng'₂.

²⁰ 'Jē₁ma₂ca₂jag'₅₄ 'nia'₂ ma₂le₁lio₃ 'lióg₂ le₃lág'₃ juig₂ Jerusalén, jaun₂ gué₄ le₃len'₅₄ 'nia'₂ ma₂ja₂quián₃ 'én₂. ²¹ Dsa₂ i₂tián'₅ 'uë₃ Judea jmig₄ jaun₂, jui₁cuíng₁₂ le₃má'₂; i₂tián'₅ jē₄ juig₂ guë'₂ né₃, jui₁'uiin₂; jui₁lia'₂ i₂tion'₅₄ ja₁nau₂ guë'₂, tsá₃ ma₃jui₁ja₂lein₅. ²² Ia₁ lé₂ jmig₄ a₂le₃chan₂ dsa₂ gue₃ jmi₁uig₅ 'ñio₅ lin₃, a₂le₃ti₃ ca₂le₃jé₃ lia'₂ con'₂ lé₅ juá'₂ ne₄ Si₂. ²³ 'Juí₂ jui₁lia'₂ dsa₂ mí₂ i₂le₁quian₅ guein₂, jui₁lia'₂ i₂chan₂ guein₂ bē'₅₄ i₂'ín'₂ dsi'₅₄ quió'₅ né₃, jmig₄ jaun₂! Ia₁ go₂'i₃ 'ñio₅ lin₃ tē₃tsi'₅₄ gua'₅₄ 'uë₃, a₂le₃jniá₂ a₂'ne₂ Diú₄ ne₄ quió'₅ dsa₂ juig₂ la₂; ²⁴ ia₁ dsi₃gan'₅₄ i₂dsián₃ quian'₅₄ ñi₁tág₂; i₂lin₅₄ guë'₂ qui₃tē₂ dsa₂ le₁'ñei'₅₄ ca₂le₂con₂ go₄ dsi₂nau₂. Co₂dsia₅ qui₃tsó'₃ dsi₂nau₂ juig₂ Jerusalén, ca₂lia'₂ ca₂dsin₃ jmig₄ quió'₅ dsi₂nau₂ a₂'i₄ 'éi'₃ tóin'₃ goin₂.

'A₂ lia'₂ lé₂ i₁jñi₃'₂ Jaun₅ dsa₂ mi₂güí₃

(Mateo 24:29-35, 42-44; Marcos 13:24-37)

²⁵ 'Jmig₄ jaun₂ lé₂ léi₄ tē₂le₃ quian'₅₄ 'iog₂, tsi'₂, nei₅ né₃. Ta₁caun₂ gua'₅₄ 'uë₃ tón'₃ dsa₂ tiá'₃ qui'₂ dsi₅, tsá₃ a₂ñi₅ jmo₃, jmi₁ñi'₄ guë'₂ né₃ lé₂ gau₂ qui₃iná'₃. ²⁶ Tón'₃ dsa₂ qui₃nei'₂ a₂le₃gó'₃, 'i₅ dsi₅ ne₄ ca₂le₃jé₃ 'e₂ niog₅ lé₂ mi₂güí₃. Ia₁ ca₂tē₂ jui₅bí₂ a₂cha₂ guei'₅₄ mi₂güí₃ qui₃guian'₃. ²⁷ Jaun₂ gué₄ jín₂ dsa₂ Jaun₅ dsa₂ mi₂güí₃ jiá₃ jē₄ jnei₅ a₂'uain'₂ a₂jláin'₁ 'ñio₅ lin₃. ²⁸ Jē₁ma₂ca₂rē₃lióg₃ lé₂ a₂në₅, quen'₂ 'nia'₂ bí₂, 'a₃ jlian₅₄ 'nia'₂,^j ia₁ ja₃quián₂ jmig₄ a₂lión'₂ 'nia'₂ co₂ñei'₅₄.

²⁹ Jaun₂ ca₂juá'₂ táng₃ caun₂ jág₁ jáng'₅ léi₄ la₂:

^j28 lit. "nau₂ 'nia'₂ chog'₅₄ ne'₅₄."

—Ní₂ 'nia'₂ jui₁lia'₂ lé₂ quian'₅₄ ni₁'ma₂ higuera, jui₁'e₂ gué₃ ni₁'ma₂ siá'₂ né₃; ³⁰ jë₁ma₂ca₂ne'₅₄ mog'₅₄, cáun'₂ 'nia'₂ 'í₂ guiong'₅₄ a₂ja₂quián₃ jein₂ 'iog₂ bá₄ jaun₂. ³¹ Ján₃ bá₄ le₂në₅, jë₁ma₂té₂ ne'₅₄ 'nia'₂ lé₂ ca₂le₃jé₃ a₂në₅, le₃ñi'₅₄ 'nia'₂ a₂ma₂ja₂quián₃ le₃gon₂ Diú₄. ³² A₂dsi₂jó'₃ juá'₅ jniá₂ juí₂'nia'₂, tsá₃ dsi₃ñí₂ tsi₁jon₂ jmi₄g₄ në₃,^k ca₂lia'₂ ca₂lë₃ ca₂le₃jé₃ a₂në₅. ³³ Dsi₃ñí₂ guei'₅₄ mi₂güí₃ quian'₅₄ gua'₅₄ 'uë₃, la₁ já₁g₁ quió₃ né₃, o₁lí₂'tsá₃ dsi₃ñí₂ jua'₅₄ tsá₃ le₃ti₃.

³⁴ 'Të₃ñi'₅₄ 'nia'₂, tsá₃ i₂jme₂cán'₁ táng₃ 'nia'₂ 'au'₂ a₂i₂niog'₅₄ dsing'₅₄ le₁'eng'₅, tsá₃ caun₂ a₂'i₅ 'au'₂ a₂chang'₂ mi₂güí₃ la₂, con'₂ tsá₃ ñó₅ në₁juá'₂ ca₂jo₃ jmi₄g₄ jaun₂ 'nia'₂ co₂tiá₂. ³⁵ Jui₁lia'₂ ja₁ta'₂ caun₂ tsi₁liá₂ bá₄ lé₂ jmi₄g₄ jaun₂ ne₄ quió'₅ ca₂le₃jín₃ dsa₂ i₂tián'₅ ne₄ gua'₅₄ 'uë₃. ³⁶ Jaun₂ chan'₂ 'nia'₂ rë₂jáng'₁, chi₁leng'₄ Diú₄ ca₂le₃jé₃ jmi₄g₄, ia₁jaun₂ bá₄ quin'₅₄ 'nia'₂ jmi₄g₄ líong'₂ ne₄ ca₂le₃jé₃ a₂niog₅ lé₂ në₅, ia₁jaun₂ dsi₁nó₅'të₃tsing'₅₄ ne₄ Jaun₅ dsa₂ mi₂güí₃.

³⁷ Ca₂le₃jé₃ jmi₄g₄ bá₄ jme₁jme₂tag₂₃ i₁dsi₅ guá'₅ templo, jë₁ma₂ca₂nei₂ dsó₅ dsi₂jñia₅₄ má'₂ ja₁chei₂ Olivos.

³⁸ Ca₂le₃jín₃ bá₄ dsa₂ jme₁ja₂lén₂ të₂ o₃'iog₂ i₁dsi₅ guá'₅ a₂ja₂néi₃ já₁g₁ a₂cuë₂₃.

Ca₂jmo₃ dsa₂ já₁g₁ a₂tsáin'₂ Jesús

(Mateo 26:1-5, 14-16; Marcos 14:1-2, 10-11; Juan 11:45-53)

22 ¹ Jme₁ma₂ja₂quián₃ jmi₄g₄ quió'₅ i₁ñí'₄ a₂tsá₃ levadura rë₂jñia₅, a₂chei₂ Jmi₄g₄ Të₂'in₅₄. ² Jaun₂ qui₂ca₂'náu'₃ dsí₅ juig₅₄ jme₂dsa₂, të₅juá'₅ né₃, 'a₂ lia'₂ cuín₃ jmi₄g₄ jñag'₃, ia₁ a₂gain₃ dsa₂ juig₂ bá₄.

³ Jaun₂ ca₂'í₃ Satanás dsí₅ Judas, i₂té'₂ Iscariote, i₂jme₁lín₄ jan₂ dsa₂ i₂guia₃-tín₂.

⁴ Judas 'éi₂ në₃ ca₂ñei₅₄ ca₂i₁jmo₅₄ já₁g₁ quian'₅₄ juig₅₄ jme₂dsa₂, quian'₅₄ i₂lín₅ 'lióg₂ dsen₅₄ quián₅ guá'₅ templo në₃, 'a₂ lia'₂ jáng'₂ jín'₂ Jesús o₄gú₃.

⁵ Jaun₂ 'io'₂ jén'₅ bá₄ dsa₂ 'éi₂, ca₂jmo₃ já₁g₁ a₂cuë₃ cu₄.

⁶ Jaun₂ ca₂cuë₃ Judas já₁g₁ quió'₅. Jaun₂ ca₂'náu'₃ dsí₅ 'a₂ lia'₂ jáu₂ jui₅ a₂jáng'₂ con'₂ jme₁tsá₃ juín₅ dsa₂ ma₃quiain'₅₄.

Má₃ jë₁ca₂tó'₂ quió'₅ Te₁gui'₅₄

(Mateo 26:17-29; Marcos 14:12-25; Juan 13:21-30; 1 Corintios 11:23-26)

⁷ Ca₂té₂ jme₁ca₂té₂ jmi₄g₄ quió'₅ i₁ñí'₄ a₂tsá₃ levadura rë₂jñia₅, con'₂ ca₂tín₂ dsa₂ jme₂dsiain₂₃ guein₂ já'₂ cha'₂ quián₅ Jmi₄g₄ Të₂'in₅₄.

⁸ Jaun₂ ca₂chen₃ Jesús Pe₄ quian'₅₄ Juan₅₄, ca₂juá'₂:

—O₂nó'₅ 'nia'₂ o₂jmo₄ co₂jñia₅₄ má₃ quián₂ jniog₄ a₂que₅₄ Jmi₄g₄ Të₂'in₅₄.

^k32 o₃, "né₃ a₂dsián₃ dsa₂ i₂lín₅ raza la₂."

⁹ Jaun₂ ca₂ŋag₃ 'éi₂:

—¿A₂já₄ 'niog'₂ dsi₁jmó₁ jnia'₅₄ co₂ŋia₅₄?

¹⁰ Jaun₂ ca₂juá'₂:

—Jë₁ma₂dsi₃nó'₅ 'nia'₂ jë₄ juig₂, jme₃jein'₂ jan₂ dsa₂ ŋe'₂ i₂ŋá'₅ quion₂ caun₂ ni₁dsig₁ 'a₄ jmig₂. O₁ 'éin'₃ 'nia'₂ ca₂të₂ dsi₂néi₂ ja₁'í₂. ¹¹ Jaun₂ juig'₅₄ 'nia'₂ dsa₂ juig₅₄ dsi₂néi₂: “Le₂la₂ juá'₂ Të₅ tsí'₅ 'ne₂: ¿Na₂ bá₄ dsi₂néi₂ ja₁guë'₅₄ má₃ quió'₅ Jmig₄ Të₂'in₅₄ quiang'₅₄ chi'₂ dsi₂guia₃-tín₂ quiáng₃?” ¹² Jaun₂ 'ë₃ caun₂ ja₁lë₄ dsi₂néi₂ juë'₂ guei'₅₄ ja₁ma₂lë₅ co₂ŋia₅₄ quió'₅. Ja₁jaun₂ jmo₄ co₂ŋia₅₄.

¹³ Jaun₂ ca₂i₃lén₂ bá₄ 'éi₂ në₃. Ca₂lë₃ rë'₂ lia'₂ con'₂ lë₅ jág₁ jaun₂. Ja₁jaun₂ ca₂jmo₃ má₃ quió'₅ jmig₄.

¹⁴ Jme₁ca₂të₂ hora jaun₂, ca₂guá₂ Jesús ne₄ mesa, quiaín'₅₄ chi'₂ dsi₂guia₃-tín₂ quiáin₅. ¹⁵ Jaun₂ ca₂tsí'₃ 'éi₂:

—iLíg'₂ bá₄ 'ín₅ dsi₃ guë'₅₄ má₃ Jmig₄ Të₂'in₅₄ la₂ quian'₅₄ 'nia'₂, né'₃ a₂dsi₃ŋíg₂ uig₅! ¹⁶ Ia₁ juá'₅ jniá₂ juíg₂ 'nia'₂, tsá₃ ma₃líg'₂ jmig₄ jua'₅₄ guë'₅₄ guë'₄ má₃ le₂la₂ ca₂lia'₂ ca₂të₂ jmig₄ i₁le₃ti₃ ja₁gon₂ Diú₄.

¹⁷ Jaun₂ ca₂tíin₂ copa, ca₂cué'₃ ti₁'mag'₄ Diú₄, jaun₂ ca₂juá'₂:

—Ján'₅ 'nia'₂ a₂la₂; jmo₄ dsió_g₁ jin₄ ríng'₂. ¹⁸ Ia₁ juá'₅ jniá₂, tsá₃ ma₃líg'₂ jmig₄ jua'₅₄ a₂gui'₅₄ guë'₄ jmi'₅₄ míg₂ uvas le₂la₂, ca₂lia'₂ ca₂të₂ jmig₄ i₁le₃ti₃ ja₁gon₂ Diú₄.

¹⁹ Jaun₂ ca₂tíin₂ táng₃ caun₂ i₁ŋí'₄, ca₂cué'₃ ti₁'mag'₄ Diú₄. Jaun₂ ca₂'niai₃ ca₂cué'₃ 'éi₂, ca₂juá'₂:

—Ní₃ bá₄ jniá₂ i₁ŋí'₄ la₂, a₂ma₂rë₂jang'₅₄ o₄quián'₂ 'nia'₂. Jmo₄ 'nia'₂ a₂la₂ a₂dsiog'₂ 'au'₂ jniá₂.^m

²⁰ Ján₃ bá₄ le₂në₅, jme₁ma₂ca₂lë₃ guë'₅ i₁ŋí'₄, ca₂can₃ táng₃ copa, jaun₂ ca₂juá'₂:

—A₂'a₄ copa la₂, lë₅ jág₁ 'mí₂ a₂të₃ron₅₄, a₂li'₅₄ tē₂le₃ quian'₅₄ jmi₃ a₂dsi₃'o₅₄ o₄quián'₂ 'nia'₂.ⁿ

²¹ 'La₁ në₃ në₃, ne₄ mesa la₂ guá₅ quian'₅₄ jniá₂ i₂jáng'₂. ²² Dsón'₂ bá₄ 'en₅₄ jui₅ Jaun₅ dsa₂ mi₂güí_g₃ dsió_g₄ ja₁'ein₅₄ 'éi'₃ dsió_g₄, la₁ i'e₂ guë'₄ juíg₂ dsa₂ i₂jáng'₂!

²³ Jaun₂ ca₂jme₃lió_g₃ tsi₂ca₂jíin₂ quiaín'₅₄ riin'₅₄, 'ein₂ bá₄ 'éi₂ i₂jmo₃ le₂jaun₂.

Ca₂tsíin₂ o₄quió'₄ 'ein₂ i₂lén₂ i₂dsen₅₄ guë'₄

²⁴ Ján₃ bá₄ ca₂lë₃ mi'₅₄ jë₄ quió'₅, ne₄ 'uig₅₄ 'ein₂ 'éi₂ i₂lén₂ i₂dsen₅₄ guë'₄.

²⁵ Jaun₂ ca₂juá'₂ Jesús:

^l14 griego: apóstolous (dsa₂ i₂chen₄).

^m19 A₂lín₅₄ chog₅₄ si₂ tsá₃ chi₁ton₅ “a₂ma₂rë₂jang'₅₄ o₄quián'₂ 'nia'₂. Jmo₄ 'nia'₂ a₂la₂ a₂dsiog'₂ 'au'₂ jniá₂”, on₃ guë'₂ versículo 20.

ⁿ20 'Nio'₂ ja₁ton₅ Éxodo 24:8.

—Ca₂le₃jín₃ rag₅₄ quián₅ dsi₂nau₂, tiain'₂₃ goin₂ jmo₂₃ 'éi'₃ lia'₂ lé₂ dsí₅. Le₂jaun₂ guë'₂ i₂le₁'io₅ 'éi'₃ i₂le₁'ín₁ quiáin₅, 'ag₅ dsa₂ a₂lín₅ dsa₂ i₂jmo₅ a₂dse₃.²⁶ La₁ tsá₃ le₂jaun₂ lé₂ quian'₅₄ 'nia'₂. Jui₁lia'₂ i₂can'₅₄ jë₄ quián'₂ 'nia'₂, jui₁jmo₁₂ mei'₂. Le₂jaun₂ guë'₂ i₂cán₂ ne₄ jui₅, jui₁jmo₁₂ në₂jag₄ bá₄ i₂jme₂ti₃.²⁷ Jaun₂ në₃, 'éin₂ i₂dsen₅₄ guë'₄: i₂guá₅ ne₄ mesa, o₃ i₂dsia₅ má₃ 'e₂? 'éOn₁ i₂guá₅ ne₄ mesa bá₄? La₁ jniá₂ 'eng₅₄ jë₄ quián'₂ 'nia'₂, líng₅ jan₂ i₂jme₂ti₃.²⁸ 'Nia'₂ guë'₂ líng'₅ i₂ma₂ja₂nóg'₅ quiong'₅₄ jniá₂ jë₄ uig₅ a₂qui₂ma₂i₂ng₂.²⁹ 'Uig₅₄ në₅ në₃, dsián₄ jniá₂ 'nia'₂ ja₁o₁tiáng'₂ gong'₂, jui₁lia'₂ ma₂dsiog₃ Ne'₃ jniá₂,³⁰ ia₁jaun₂ o₁qué'₂ o₁'én'₂ 'nia'₂ ne₄ mesa quió₃ ja₁gong₂, ja₁jaun₂ o₁tián'₂ 'nia'₂ ne₄ta₁ a₂qui₁dsi'₂ 'éi'₃ quió'₅ ta₁guia₃-tín₂ nió'₃ tsi₁jon₂ dsa₂ juig₂ Israel.

Ni₅ bá₄ Jesús a₂tsá₃ tion₃ Pe₄ a₂cuig₂₃

(Mateo 26:31-35; Marcos 14:27-31; Juan 13:36-38)

³¹ Ján₃ bá₄ ca₂juá'₂ Te₁gui'₅₄:

—Si₂mu₅₄, Si₂mu₅₄ —ca₂tsí'₃ Pe₄—, i₂së₃dsen₃ ma₂në₂mag₃ 'ñiái'₂ 'nia'₂ lia'₂ ja₁'ñiái'₂ dsa₂ trigo,³² la₁ jniá₂ ma₂në₂mi₃ o₄quián'₂ 'ne₂, ia₁jaun₂ tsá₃ dsiá₃ éi₃ a₂'éng'₂. 'Ne₂ në₃, jë₁ma₂ca₂jéin'₃ táng₃ 'au'₂, cuë'₅₄ bí₂ ríng'₂.

³³ Jaun₂ 'éi₂ në₃ ca₂ngag₃:

—Te₁gui'₅₄, caun₂ bá₄ ma₂'ei₅ dsi₃ i₁'ú₃ né₃ 'má₃ co₂lë₅ quian'₅₄ 'ne₂, o₁ñia'₅₄ 'mú₃ ca₂quín₂.

³⁴ Jaun₂ ca₂ngag₃ Jesús:

—Pe₄, jniá₂ guë'₂ juá'₅, tsá₃ 'o₃ të₁guí₄ dsó₂ në₃, ca₂lia'₂ ma₂në₂jua'₅₄ 'ne₂ 'ni₅ ráun₂ a₂tsá₃ tóng'₄ a₂cuig'₂ jniá₂.

Ma₂ja₂quián₃ hora gue₃ Jesús uig₅

³⁵ Jaun₂ ca₂juá'₂:

—Lia'₂ con'₂ ca₂tsíng₂ 'nia'₂, lia'₂ con'₂ tsá₃ tsi₁na'₅₄ jme₁le₁quian'₄, on₃ guë'₂ të₂lau₂, on₃ guë'₂ ni₁lau₂ ton₅ tag'₅₄ në₃, 'écha₁ a₂ca₂rë₃'nió'₅ quián'₂ 'nia'₂?

'Éi₂ në₃, ca₂ngag₃:

—'I₁caun₂ tsá₃ ca₂rë₃'nió'₅.

³⁶ Jaun₂ ca₂juá'₂ táng₃:

—Në₃ guë'₄ në₃ i₂'io₅ tsi₁na'₅₄, të₂lau₂ në₃ jui₁quian₅₄. I₂tsá₃ 'io₅ ñi₁tág₂ në₃, o₁'nag₁₂ mi₂dsióg₂ quió'₅ ia₁jaun₂ lá₃ ñi₁tág₂.³⁷ Ia₁ juá'₅ jniá₂, tion₅₄ niog₅ le₃ti₃ ja₁con₂ jniá₂ ja₁juá'₂ ne₄ Si₂ le₂la₂: “Nó₃ jë₄ quió'₅ dsa₂ i₂le₁cán'₄ dso₄, ia₁ ca₂jmo₃ dsa₂ dsí₅ në₂jag₄ bá₄ a₂rë₂cáin'₄ dso₄ ján₃.”^o Ia₁ ca₂le₃jé₃ a₂niog₅ juá'₂ ne₄ Si₂ a₂'ag₂₃ jniá₂, tion₅₄ niog₅ le₃ti₃.

³⁸ Jaun₂ ca₂juá'₂ 'éi₂:

—Te₁gui'₅₄, la₂ tiá'₅ tin₃ ñi₁tág₂.

^o37 Isaías 53:12.

Jaun₂ ca₂ŋag₃ táng₃:

—Tió'₅ bá₄ ně₅.

Ca₂chi₂lén'₂ Jesús Diú₄ caun₂ ja₁chei₂ Getsemaní

(Mateo 26:36-46; Marcos 14:32-42)

³⁹ Jaun₂ gué₄ ně₃ o₂'lín₃ ŋó₃ jui₅ Má'₂ Olivos, ia₁ le₂jaun₂ tiin₂ bá₄.
Jaun₂ ca₂i₃lén₂ chi'₂ dsi₂guia₃-tín₂ quiong'₅₄.

⁴⁰ Jme₁ca₂dsióg₃ ja₁jaun₂, jaun₂ ca₂juá'₂:

—Chi₁len'₅₄ 'nia'₂ Diú₄ ia₁jaun₂ tsá₃ jo₅₄ jui₅bí₂ a₂cáun₂ táu₂.

⁴¹ Jaun₂ ca₂ŋó₃ Jesús 'ŋiog₅ úing₂ con'₂ ja₁tág'₅ ca₂míg₂ nī₁cang₁
a₂táun₂ dsa₂. Ja₁jaun₂ ca₂chi₃jnë₃ ca₂chi₃lén'₂ Diú₄.

⁴² Ca₂juá'₂:

—Tia₅₄, ɛtsa₁ cuin₅ jmig₄ ŋiá'₄ uig₅ dsi₃ŋíg₂ la₂? La₁ia₁, jui₁le₅₄ bá₄
a₂'ŋio₂ 'au'₂ 'ne₂, on₃jua'₅₄ con'₂ 'nio₃ jniá'₂.

⁴³ Jaun₂ ca₂jme₃nia₅ jan₂ ángel ne₅₄, i₂ca₂sión₃ jui₅ guei'₅₄ i₂juíg₃,
a₂ca₂cuë₃ bí₂.

⁴⁴ Hora jaun₂ ca₂ŋág₃ uig₅ 'ŋio₅ lín₃, jaun₂ të₂le₃ lě₅ gué₄ ca₂chi₃lén'₂
Diú₄; ca₂tein₃ jme₁dsiog₂ ně₂jag₄ bá₄ jmi₂ qui₂ca₂dsá₂ të₂ 'uë₃.^p

⁴⁵ Jme₁ca₂nau₂ ja₁chi₂lén'₂ Diú₄ jaun₂, guáin'₃ ja₁tián'₄ chi'₂ dsi₂guia₃-
tín₂. La₁ le₁güín₃ bá₄ 'éi₂ tián'₅ ca₂jo₃, 'uig₅₄ ia₁ a₂ŋí₄ lě₃ 'lia'₂ dsí₅.

⁴⁶ Jaun₂ ca₂juá'₂:

—ɛ'E₂ lě₃ le₁güín'₃ 'nia'₂ tiáng'₅? Nau₂, chi₁len'₅₄ 'nia'₂ Diú₄ ia₁jaun₂
tsá₃ jo₃ jui₅bí₂ a₂cáun₂ táu₂.

Ma₂le₁te₂ dsa₂ Jesús

(Mateo 26:47-56; Marcos 14:43-50; Juan 18:2-11)

⁴⁷ Tě₃jě₄ juá'₂ Jesús jaun₂, jme₁ca₂dsi₃lén₂ juin₅ dsa₂. Jaun₂ ca₂dsióg₃
i₂tě'₂ dsa₂ Judas, i₂jme₁lín₄ jan₂ chi'₂ dsi₂guia₃-tín₂, quian₅ ne₄ jui₅.
Jaun₂ ca₂jme₃quiáin₃ con₂ Jesús a₂jme₁chen'₃^q quió'₅.

⁴⁸ La₁ ca₂juá'₂ Jesús:

—Judas, ɛ'e₂? ɛ'Le₁ně₅ bá₄ jing'₅₄ Jaun₅ dsa₂ mi₂güíg₃, a₂chén'₁ quió'₅?

⁴⁹ Jme₁ca₂jág₃ i₂quian'₅₄ Jesús a₂lě₂ jaun₂, ca₂juá'₂:

—Te₁gui'₅₄, ɛ'qui'₅₄ jnia'₅₄ quian'₅₄ ŋi₁tág₂?

⁵⁰ Jan₂ 'éi₂ ně₃ ca₂quí'₃ quió'₅ i₂jme₂ti₃ ta₁ quián₅ jme₂dsa₂ dsen₅₄,
ca₂ŋiá'₂ rě₂gua₅₄ ne₁.

⁵¹ Jaun₂ ca₂juá'₂ Jesús:

—'A₃ ma₃jmai'₅₄.

Jaun₂ ca₂chóng'₃ táng₃ rě₂gua₄ 'éi₂, ca₂jme₃'lió₂.⁵² Jaun₂ ca₂tsí'₃ juig₅₄
jme₂dsa₂, 'i'₅₄ guá'₅, gui'₅₄ can'₅₄ ně₃ i₂dsi₃lén₂ tsáun'₂:

^p43-44 A₂lin₅₄ chog₅₄ si₂ tsá₃ chi₁ton₅ versículos 43 quian'₅₄ 44.

^q47 Jme₁tin₂ quió'₅ dsa₂ judíos a₂chen'₂ jú₅ riin'₅₄ jě₁cuag₃ Diú₄.

—¿'E₂? ¿Jui₁lia'₂ jë₁tsán'₂ dsa₂ 'ang₂ ja₂nóg'₅ qui₂le₁quian'₄ ŋi₁tág₂,
'ma₂ né₃? ⁵³ Líg'₂ bá₄ 'eng₅₄ tián₂ quian'₅₄ 'nia'₂ i₁dsi₅ guá'₅, tsá₃
ma₂chong'₂ 'nia'₂ ja₁jaun₂. La₁ në₃ gué₄, 'au'₂ 'nia'₂ bí₂ tiá₂ 'au'₂ jmó'₂,
në₃ lia'₂ chí'₅ qui₁né'₃.

Tsá₃ tion₅ Pe₄ a₂cuin₂₃ Jesús

(Mateo 26:57-58, 69-75; Marcos 14:53-54, 66-72; Juan 18:12-18, 25-27)

⁵⁴ Jme₁ma₂në₂chóng'₂, ca₂tág₃ jui₅ ja₁quió'₄ jme₂dsa₂ dsen₅₄. La₁ Pe₄
në₃, uíng₂ bá₄ të₂quín₃ ŋó₃ 'ein₂₃.

⁵⁵ Dsa₂ 'éi₂ né₃, ca₂dsia₃ si₂ i₁dsi₅, ca₂tián'₂ le₃lág'₃ cau₅ si₂; jë₄ jaun₂
ca₂guá'₂ Pe₄ ján₃.

⁵⁶ Të₃jë₄ jaun₂, ca₂rë₃lí'₄ jan₂ 'io₅₄ i₂jme₂ti₃ ta₁ ja₁jaun₂, a₂guá'₅ Pe₄
cau₅ si₂. Caun₂ ca₂jág₂ tiá₂, ca₂juá'₂:

—Ján₃ bá₄ jme₁quiain'₅₄ i₂në₅.

⁵⁷ La₁ 'éi₂ né₃, tsá₃ ca₂tioin₃, ca₂juá'₂:

—Tsá₃ 'éi₂ cuín₅ jniá₂, 'ne₂ 'io₅₄.

⁵⁸ Jme₁co₂lág₂ jaun₂, ca₂guan₃ táng₃ jan₂, ca₂jág₂, jaun₂ ca₂juá'₂:

—Jme₁quiain'₅₄ 'ne₂ ján₃, ¿lia'₅₄?

—Jan₂'ón₄. Tsá₃ dsa₂ 'éi₂ jme₁quian'₄ jniá₂, 'ne₂.

⁵⁹ Con'₂ caun₂ hora cang₂ jaun₂, tion₅₄ bá₄ tsá₃ jme₁cán₂ jan₂ jág₁,
ca₂juá'₂:

—Të₃dsón'₂ jan₂ i₂jme₁quiain'₅₄ bá₄ në₅, ia₁ Galilea bá₄ ja₁chain₂.

⁶⁰ Jaun₂ ca₂juá'₂ táng₃ Pe₄:

—Të₃dsón'₂ rë'₂ juá'₅ jniá₂ la₂, ca₂lia'₂ jñia'₅₄ tsá₃ cuíng₅ 'ein₂ 'éi₂ 'ín'₅
'nia'₂.

Të₃jë₄ dsia₂₃ jág₁ jaun₂ jme₁ca₂'o₃ të₁guí₄ dsó₂. ⁶¹ Jaun₂ ca₂jén'₃
Te₁gui'₅₄ ca₂jín₂ Pe₄, ca₂jmo₃ a₂dsiog'₂ dsí₅ 'éi₂ 'e₂ a₂ma₂në₂juá'₂
le₂jñiá₅: “Tsá₃ 'o₃ të₁guí₄ dsó₂ në₃, ca₂lia'₂ ma₂në₂jua'₅₄ 'ne₂ 'ni₅ ráun₂,
a₂tsá₃ tóng'₄ a₂cuig'₂ jniá₂.”

⁶² Jaun₂ ca₂o₃'ín₃ ca₂tá'₂ qui'₂ dsí₅, ca₂'o₃ 'ñio₅ lín₃.^r

A₂lë₁qui₂co₂jmá'₂ dsa₂ Jesús

(Mateo 26:67-68; Marcos 14:65)

⁶³ Dsa₂ i₂niog₅ jmo₅ 'í₁ Jesús né₃, a₂lë₁qui₂co₂jmóg'₂ tioin'₅₄, ca₂cuë₃
né₃.

⁶⁴ Ca₂'néi₂ jme₁ne₁ Jesús, qui₂ca₂quein₃ dsi₂ne₅₄^s jaun₂ ca₂juá'₂:

—iDsi₄ jág₁ 'ein₂ në₂quein₃ quiáng'₂!

⁶⁵ 'Lióng₂ lín₃ bá₄ ca₂juá'₂ tioin'₅₄, a₂të₂'o'₂.

^r62 A₂lín₅₄ chog₅₄ si₂ tsá₃ chí₁ton₅ versículo 62.

^s64 A₂lín₅₄ chog₅₄ si₂ tsá₃ chí₁ton₅ “qui₂ca₂quein₃ dsi₂ne₅₄.”

Ca₂chen'₃ dsa₂ Jesús ne₄ dsi₂tan₅₄ quián₅ guá'₅

(Mateo 26:59-66; Marcos 14:55-64; Juan 18:19-24)

⁶⁶ Jme₁jnia₃ jaun₂, qui₂ca₂ñi'₂ ca₂le₃jín₃ gui'₅₄ can'₅₄ quián₅ dsa₂
judíos, jui₅₄jme₂dsa₂, të₅juá'₅ ně₃. Jme₁ma₂le₁ñi'₂, ca₂dsi₁jnia₃ dsa₂
Jesús ne₅₄. Jaun₂ ca₂ñag₃:

⁶⁷ —¿Dsón'₂ 'ne₂ líng'₅ I₂rë₂'ín₁ quián₅ Diú₄?

Jaun₂ ca₂ñag₃:

—O₁jnia'₅₄ ca₂juá'₃ jniá₂, jniá₂ 'éi₂, a₂dsón'₂ tsá₃ le₃'én'₂ bá₄ 'nia'₂.

⁶⁸ Nē₁jua'₂ ca₂ñag₄ jniá₂ 'e₂ ca₂ñag₅₄ ne'₅₄ 'nia'₂, a₂dsón'₂ on₃jua'₅₄
a₂jaun₂ jein'₅₄ 'nia'₂ jág₁ quió₃.^t ⁶⁹ La₁ ně₃ ně₃, të₂le₃ ne₄ jui₅ja₁ñó₄ ně₅,
guá₃ Jaun₅ dsa₂ mi₂güí₃, të₂le₃ gu₂ ne₁ Diú₄ i₂'uan'₂ gué₄ lín₃.

⁷⁰ Jaun₂ ca₂ñag₃ ca₂le₃jín₃:

—¿Ia₁ 'ne₂ bá₄ líng'₅ Ja₁ñi'₅₄ Diú₄, jaun₂?

—Jniá₂ bá₄ líng₅, jui₁lia'₂ ma₂nē₂jua'₅₄ 'nia'₂ ně₅.

⁷¹ Jaun₂ ca₂juá'₂ tíoín'₅₄:

—¿Ein₂ gué₄ jmá'₃ dsa₂ 'niog₂ jniog₄ jáng'₃ jág₁ dsau₅? Jua'₂ jniog₄
guio₅₄ ma₂nē₂néi₁ jág₁ a₂ma₂nē₂'uē'₃ i₂ně₅ 'ñiog₅ mi₂'o₅₄ chéin'₅.

Ca₂dsián'₃ Jesús ne₄ Pilato

(Mateo 27:1-2, 11-14; Marcos 15:1-5; Juan 18:28-38)

23

¹ Jaun₂ qui₂ca₂nau₂ ca₂le₃jín₃ ca₂jñiai₃ Jesús ne₄ Pilato.

² Ja₁jaun₂ gué₄ ca₂'náu'₃ dsáu₁ Jesús, ca₂juá'₂:

—Ca₂jon₃ jnia'₅₄ dsa₂ la₂ jme₁'ein₅₄ dsia₂₃ mi'₅₄ jin₄ dsa₂ jui₂quián₂
jnia'₅₄. Nē₂₃ toin'₂ dsa₂ jág₁ a₂tsá₃ ma₂'ein₂ qui₃ 'lia'₅₄ a₂ca₂tín₂ César;
a₂jme₂tñin₂₃ dsa₂ juá'₂ a₂lín₅ I₂rë₂'ín₁ quián₅ Diú₄, co₂'nió'₄ a₂lín₅ rag₅₄.

³ Jaun₂ ca₂ñag₃ Pilato:

—¿Dsón'₂ líng'₅ Rag₅₄ quián₅ dsa₂ judíos?

Jaun₂ ca₂ñag₃ Jesús:

—Le₂nē₅ bá₄, jui₁lia'₂ juá'₂ 'ne₂ ně₅.

⁴ Jaun₂ ca₂juá'₂ táng₃ Pilato ca₂tsí'₃ jui₅₄jme₂dsa₂, quian'₅₄ dsa₂ jui₂:

—Tsá₃ 'e₂ dsáu₁ dsa₂ ně₅ dso'₂ jniá₂ 'i₁caun₂.

⁵ La₁ të₂le₃ lé₅ gué₄ co₂mi'₅₄ ca₂tóin'₂, ca₂juá'₂:

—La₁ 'ñio₅ lín₃ dsia₂₃ mi'₅₄ ñi₂₃, jme₂tñin₂₃ dsa₂ ta₁caun₂ 'uē₃ Judea.

Ca₂jme₃lióg₃ Galilea, rē₂nē₃ gué'₂ ma₂ñi₂₃ja₁lá₃ jmo₂₃ le₂jaun₂.

Ca₂dsián'₂ Pilato Jesús ne₄ Herodes

⁶ Jme₁ca₂nág₂ Pilato a₂ně₅, jaun₂ ca₂ñag₃ chi₂jua'₂ 'uē₃ Galilea chan₂
dsa₂ 'éi₂.

^t68 A₂lin₅₄ chog₅₄ si₂ juá'₂ ján₃: “on₃ gué'₂ jaun₂ a₂lo'₅₄ 'nia'₂.”

⁷ Jme₁ca₂rë₃ñi₅ né₃, a₂lín₅ Jesús dsa₂ chan₂ të₂le₃ 'uë₃ ja₁niog₅ gu₂ Herodes, jaun₂ ca₂dsióg₁' ne₄ 'éi₂. Ia₁ jme₁ñi₂₃ juig₂ Jerusalén jmi_g₄ jaun₂.

⁸ 'Io₂ jén₅ bá₄ Rag₅₄ Herodes jme₁ca₂jíin₂ Jesús, ia₁ líg₂ bá₄ 'ín₅ dsí₅ jág₂, ia₁ jme₁ma₂nág₂ bá₄ 'ei₅ jág₁ a₂'ín₅ dsa₂ 'éi₂. Ia₁ jme₁'ín₂ dsí₅ jág₃ 'e₂ caun₂ o₂dsain₂ jmo₃.

⁹ 'Lióng₂ a₂qui₂ca₂ñí₃ Jesús, la₁ tsá₃ ma₃'e₂ ca₂ñag₃ 'éi₂ 'i₁caun₂.

¹⁰ Ja₁jaun₂ jme₁tió₂ñ juig₅₄ jme₂dsa₂ quian₅₄ të₅juá₅ né₃, caun₂ qui₂ca₂'náu₃ tion₅₄ dsáu₁ 'éi₂.

¹¹ Jaun₂ Herodes né₃, quian₅₄ 'lióg₂ quiáin₅, lë₁qui₂ca₂jmo_g'₂ tioen₅₄, ca₂quei₃ 'mi₂ jlá₁, jaun₂ ca₂dsióg₁' bá₄ táng₃ ne₄ Pilato.

¹² Jmig₄ jaun₂ bá₄ ca₂jmo₃ Pilato a₂mei₅₄ quian₅₄ Herodes, ia₁ jme₁le₁ñiai₁₂ riin₅₄ le₂jñiá₅.

Ca₂o₃'ág₃ 'éi₃ a₂jón₂ Jesús

(Mateo 27:15-26; Marcos 15:6-15; Juan 18:39-19:16)

¹³ Jaun₂ ca₂ñí₂ Pilato juig₅₄ jme₂dsa₂, quian₅₄ i₂lín₅ ta₁, quian₅₄ dsa₂ juig₂ né₃. ¹⁴ Jaun₂ ca₂tsí₃ dsa₂:

—O₂jon₅₄ 'nia₂ ne₃ dsa₂ la₂, ia₁ juá₂ 'nia₂ a₂dsia₂₃ mi₅₄ jin₄ dsa₂. Të₃ ne₅₄ 'nia₂ ma₂qui₂në₂ñag₄ jniá₂, tsá₃ 'e₂ dsáu₁ dso₂ jniá₂ 'i₁caun₂, lia₂ con₂ lë₅ dso₄ a₂jme₂cain₅₄ 'nia₂. ¹⁵ On₃ guë₂ Herodes ca₂dsó₂, jaun₂ la₂ bá₄ ca₂dsióg₁' táng₃. Jaun₂ 'i₁caun₂ tsá₃ 'e₂ cha₂ jua₅₄ ca₂tíin₂ gue₃ 'mú₃.

¹⁶ La₁ jmo₅₄ 'éi₃ a₂bóg₂ dsa₂, jaun₂ guë₄ loin₅₄.

¹⁷ Jme₁jmi_g₄ të₂'ín₅₄, jme₁chí₄ tag₄ quió₅ Pilato jme₁lióin₂ jan₂ dsa₂ 'né₅ 'má₃, jme₁chei₂ le₃jin₄ dsa₂.^u

¹⁸ La₁ dsa₂ juig₂ né₃ co₂ñei₅₄ ca₂le₃jíin₃ ca₂tóin₂ co₂mi₅₄ ca₂juá₂:

—iCau₅ jñiá₃ i₂në₅! iBarrabás bá₄ lion₄ quián₂ jnia₅₄!

¹⁹ Barrabás 'éi₂ ca₂to₂ dsa₂ né₃ 'má₃ 'uig₅₄ ia₁ ca₂dsia₃ caun₂ mi₅₄ jë₄ juig₂, ton₂ ia₁ jme₁ma₂jñii₃ dsa₂ né₃.

²⁰ Jme₁'nio₃ bá₄ Pilato jme₁lióin₂ Jesús, jaun₂ jme₁ca₂tsí₃ bá₄ guë₄ dsa₂. ²¹ La₁ të₂le₃ lë₅ guë₄ co₂mi₅₄ ca₂tón₂ bá₄ dsa₂, guió₅ juá₂:

—iTióin₃ cróg₄! iTióin₃ cróg₄!

²² Jë₁ñó₄ 'ni₅ ráun₂ ca₂juá₂ táng₃ Pilato tsí₅ dsa₂:

—¿E₂ guë₂ 'lig₅₄ ma₂jmo₃? Tsá₃ 'e₂ dsáu₁ i₂në₅ dso₂ jniá₂ jua₅₄ a₂ca₂tíin₂ jóin₂. Jmo₅₄ jniá₂ 'éi₃ a₂bóg₂ dsa₂ jaun₂ guë₄ loin₅₄.

²³ La₁ tion₅₄ ca₂mi₃ dsa₂ tioen₅₄ co₂mi₅₄ a₂tion₃ cróg₄. Ca₂lë₃ rë₂ con₂ lë₅ 'ín₅ dsí₅ dsa₂ juig₂ lé₂.

²⁴ Jaun₂ co₂ñei₅₄ me₂ ca₂jmo₃ Pilato 'éi₃ a₂lé₂ con₂ lë₅ mi₅ dsa₂.

²⁵ Jaun₂ ca₂lióin₂ bá₄ dsa₂ i₂jme₁'en₅₄ né₃ 'má₃, i₂jme₁ma₂dsia₃ mi₅₄, i₂ma₂jñi₃ dsa₂ né₃. Jaun₂ ca₂jáng₂ ca₂jíin₂ Jesús o₄gú₃ dsa₂ juig₂ o₁jmo₁₂ quiong₅₄ con₂ 'ín₅ dsí₅ jmo₃.

^u17 A₂lin₅₄ chog₅₄ si₂ tsá₃ chi₁ton₅ versículo 17.

Ca₂tion₃ dsa₂ cróg₄ Jesús

(Mateo 27:32-44; Marcos 15:21-32; Juan 19:17-27)

²⁶ Con'₂ ma₂tioin'₅₄ jui₅ njiai₂₃ Jesús ja₁ dsi₃tion₃ cróg₄, ca₂chi₃quiáin₂ tion₅₄ jan₂ dsa₂ chan₂ 'uë₃ Cirene, i₂chen₂ Si₂mu₅₄, i₂'en₅₄ jui₅ jón'₅ ja₁nau₂, a₂cán₂ cróg₄ dsó₃ le₃chi₁co'₅₄ quió'₅ Jesús.

²⁷ Juin₅ lin₃ bá₄ dsa₂ juig₂ i₃lén₂ 'ein₂₃, dsa₂ mí₂ né₃ i₃lén₂ qui'₂-o₂₃ 'lia'₂ dsí₅ qui'₂-óin'₂ Jesús.

²⁸ Jaun₂ ca₂jén'₃ Jesús, ca₂juá'₂:

—'Nia'₂ dsa₂ mí₂ chan₂ Jerusalén, 'a₃ ma₃'au₂ 'nia'₂ o₄quió₃ jniá'₂. 'O₄ bá₄ 'nia'₂ o₄quiáng'₂ guiong'₅₄, o₄quió'₄ chi'₂-guein₂ quiáng'₂ né₃. ²⁹ Ia₁ já₅ jmig₄ jë₁juá'₂ dsa₂: “'E₂ gué₄ dsen₃ jui₁lia'₂ dsa₂ mí₂ i₂tsá₃ lé₂ cán₂ guein₂; 'e₂ gué₄ dsen₃ jui₁lia'₂ dsa₂ i₂tsá₃ guein₂ ca₂'í₃ tē₂dsí₅, on₃ guē'₂ dsi'₅₄ quió'₅ ca₂guén'₃ guein₂ né₃.” ³⁰ Jmig₄ jaun₂ jme₃lióg₃ dsa₂ tsí'₃ ni₁má'₂: “Lá'₃ ne₄ quián₂ jnia'₅₄”, juá'₂ né₃ tsí'₃ dsi₂con'₂: “'Mog₅₄ jnia'₅₄.” ³¹ Ia₁ chi₂jua'₂ le₂la₂ jmo₅ dsa₂ jmái'₂ i₂tsá₃ ca₂tín₂ gue₃ uig₅, ÷'ë₂ gué₄ bá₄ dsi₃ní₂ i₂ca₂tín₂ dsón'₂?”

³² Ján₃ bá₄ jme₁le₁njai₂₃ gué₄ on₃ dsa₂ i₂le₂cán'₄ dso₄, a₂jme₂dsiog₂₃ co₂lë₅ quian'₅₄ Jesús.

³³ Jme₁ca₂dsi₃lén₂ ja₁té'₂ dsa₂ Dsi₂con'₂ Ni₁mu₅ Mi₂dsi₄ 'Lag₄,^w ja₁jaun₂ ca₂tion₃ cróg₄ quian'₅₄ le₃on₃ dsa₂ 'lin'₅₄ 'éi₂, jan₂ tē₂le₃ gu₂ ne₁, jan₂ guē'₂ tē₂le₃ gu₂ jen₅.

³⁴ [Jaun₂ ca₂juá'₂ Jesús:

—Tia₅₄, 'én₃ dsáu₁, ia₁ tsá₃ nj₅ a₂jmo₂₃.]^x

Jaun₂ ca₂co₃ dsi₂'lióg₂ ca₂tóin'₂ ca₂jmo₃ le₁dso'₅₄ ni₁tsin'₅₄ Jesús.^y

³⁵ Jaun₂ jme₁tión₂ dsa₂ juig₂ cau₅, jág₅. Dsi₂tan₅₄ né₃ jme₁tión₂, qui₂co₂jmóg'₂ burlas, ca₂juá'₂:

—Qui₂ma₂lióin₂ i₂sián'₂; né₃ né₃, jui₁lioin₅₄ 'niog₅ chi₂jua'₂ dsi₂jó'₃ lín₅ I₂rë₂'ín₁ rë₂quion'₅₄ quián₅ Diú₄.

³⁶ Dsi₂'lióg₂ né₃ ca₂jmóg'₂ burlas ca₂jme₃quiáin₃ ca₂jén'₃ vino jen'₂, ³⁷ ca₂juá'₂:

—Chi₂jua'₂ líng'₅ Rag₅₄ quián₅ dsa₂ judíos, lion₄ 'niag'₂.

³⁸ Jaun₂ ca₂tión₃ dsa₂ letras dsi₄ cróg₄ tio'₅₄ 'ni₅ né₃ jág₁ jmei₅: griego, latín, hebreo né₃, co₂'nió'₄ a₂juá'₂: “RAG₅₄ QUIÁN₅ DSA₂ JUDÍOS BÁ₄ LA₂.”

³⁹ Jan₂ i₂rë₂cán'₄ dso₄ i₂jme₁rë₂ton₅ cau₅ quió'₅ ca₂tē₂ca₂'o'₂, ca₂juá'₂:

—÷On₁ 'ne₂ líng'₅ I₂rë₂'ín₁ quián₅ Diú₄? Ma₂né₃ lion₄ 'niag'₂, jaun₂ lo'₅₄ jnia'₅₄ né₃.

^v31 lit. “ia₁ chi₂jua'₂ ni₁'ma₂ rë'₂ co₂jmo₅ dsa₂ le₂në₅, ÷'ë₂ gué₄ bá₄ lé₂ quian'₅₄ ni₁'ma₂ quein₂?”

^w33 ja₁chei₂ “Gólgota” quian'₅₄ arameo; quian'₅₄ latín guē'₂, chei₂ “Calvario.”

^x34 A₂lin₅₄ chog₅₄ si₂ tsá₃ chi₁ton₅ jág₁ në₅.

^y34 'Nio'₂ ja₁ton₅ Salmo 22:18.

- ⁴⁰ La₁ ca₂jí₂ bá₄ riin'₅₄ ca₂juá'₂:
—'En₁ jmá'₃ tsá₃ gan'₃ 'ne₂ Diú'₄? Jua'₂ uig₅ le₂ně₅ bá₄ guei'₂ ján₃.
⁴¹ La₁ jniog₄ a₂ca₂tág₂ dsón'₂ guei'₂ uig₅ la₂, lia'₂ con'₂ lé₅ a₂ma₂jmó₁; la₁ dsa₂ la₂ ně₃, 'i₁caun₂ tsá₃ 'e₂ riin₂.
⁴² Jaun₂ ca₂juá'₂:
—Jesús, jui₁dsiog'₂ bá₄ 'au'₂ jniá₂, jě₁ma₂dsiáng'₃ ja₁gong'₂.
⁴³ Jaun₂ ca₂ṇag₃ Jesús:
—A₂dsi₂jó'₃ juig₂ jniá₂ 'ne₂, jmig₄ ně₃ tě₃tsing'₅₄ quian'₅₄ jniá₂ Ja₁jlá'₁.^z

Ca₂jon₃ Jesús

(Mateo 27:45-56; Marcos 15:33-41; Juan 19:28-30)

- ⁴⁴ Con'₂ dsi₃ní'₃,^a tē₁tsi'₅₄ qui₁né'₃ ta₁caun₂ gua'₅₄ 'uě₃, ca₂lia'₂ ca₂tě₂ hora ṇí₁ 'ni₅^b le₃ca₂'láu₂.
⁴⁵ 'Iog₂ co₂dsia₅ ca₂rě₃liá'₃; tsi₁'mi'₂ cortina a₂jme₁'ei₅ dsi₂néi₂ guá'₅ templo, co₂dsia₅ ca₂chen₃ ca₂lě₃ tin₃ dso'₅₄ jo₂.
⁴⁶ Hora jaun₂, ca₂guió'₃ Jesús, ca₂juá'₂:
—i'Tia₅₄ quiáng₃, o₄gog'₂ 'ne₂ dsia₅₄ jme₂dsí₂ quió₃!
Caun₂ jaun₂ bá₄ a₂ca₂juá'₂ gué₄, co₂tan₅₄ ca₂join₃.
⁴⁷ Jme₁ca₂jág₃ juig₅₄ 'lióg₂ a₂ca₂lě₃ jaun₂, ca₂jme₃juiin'₂ Diú₄, ca₂juá'₂:
—Dsón'₂ bá₄ tsá₃ 'e₂ jme₁rin₂ dsa₂ la₂.
⁴⁸ Ca₂le₃jín₃ bá₄ dsa₂ i₂jme₁tion'₅₄ i₂ca₂jág₃ a₂ca₂lě₃ jaun₂, ca₂i₃lein₃ quein₂₃ dsí₅.^c
⁴⁹ Ca₂le₃jín₃ dsa₂ i₂jme₁cuin₅ Jesús quian'₅₄ dsa₂ mí₂ i₂jme₁ma₂quiong'₅₄ tē₂ Galilea, jme₁tióin₂ uíng₂ jág₅ ca₂le₃jě₃ a₂ně₅.

Ca₂'on₃ Jesús

(Mateo 27:57-61; Marcos 15:42-47; Juan 19:38-42)

- ⁵⁰ La₁ ca₂lě₃ ně₃, jan₂ dsa₂ i₂chen₂ José, i₂jme₁quen'₅₄ lín₅ ta₁ jin₄ dsi₂tan₅₄ quián₅ guá'₅, jme₁lín₄ dsa₂ dsen₃ i₂'ua₁ dsí₅.⁵¹ Sě₄ 'éi₂ ně₃, i₂chan₂ juig₂ Arimatea ja₁tén₄ Judea, tsá₃ ca₂rě₃'ṇi₃ dsí₅ lia'₂ niog₅ ca₂jmo₃ dsi₂tan₅₄ riin'₅₄, ia₁ jme₁chi₁jnia₂₃ le₃gon₂ Diú₄.
⁵² Jaun₂ ca₂ṇei₅₄ ně₃ i₁mi₂ jág₁ ne₄ Pilato a₂dsi₃sioin₅₄ 'lag₄ Jesús cróg₄ a₂dsi₃'ó₃.
⁵³ Jme₁ca₂sió₂, ca₂lio₃ caun₂ 'mi'₂ tióg₃. Jaun₂ ca₂i₁quio₂₃ 'ṇi₃ó'₃ tau₂ 'ṇi₃o₅ a₂jme₁ma₂lé₅ ca₂jmo₃ dsa₂ dsí₅ ni₁'lau₂, ja₁tsá₃ 'ein₂ 'lag₄ ma₂'í₅.
⁵⁴ Ia₁ jmig₄ jaun₂ tion'₅₄ dsa₂ jmo₂₃ co₂jnia₅₄ a₂'nió'₅ quió'₅ jmig₄ sa₅₄ a₂jě₁ca₂jnia₃ jaun₂.

^z43 griego: paradeiso (Paraíso).

^a44 lit. “hora jṇéi₂.” 'Nio'₂ ja₁ton₅ Apéndice B.

^b44 lit. “hora ṇi₃.”

^c48 Co₂'nió'₄ a₂jmo₂₃ léi₄ a₂qui'₂ dsí₅.

⁵⁵ La₁ dsa₂ mí₂ i₂ma₂ja₂lén₂ quian'₅₄ Jesús tē₂ Galilea, ca₂o₃lén₂ ca₂jág₃ 'a₂ lia'₂ ca₂quion₅ dsa₂ 'lag₄ né'₃ táu₂.

⁵⁶ Jme₁ca₂dsi₃lein₃ quió'₅, ca₂jmo₃ co₂ñia₅₄ no'₅₄ mi₂juig₂ quian'₅₄ gué₄ ma₁'au₂ né₃, a₂dsi₃tsiin₅₄ Jesús.

Jme₁ca₂ñia₃ sa₅₄ jaun₂, ca₂tián'₂ ca₂ñia₃ lia'₂ con'₂ lē₅ 'Éi'₃.

Ca₂jen'₅₄ táng₃ Jesús

(Mateo 28:1-10; Marcos 16:1-8; Juan 20:1-10)

24 ¹ Jē₁le₂'uig₅₄ jmi₄g semana, ca₂i₃lén₂ táng₃ dsa₂ mí₂ tē₂ o₃'iog₂ lin₃, i₁jag₅₄ tau₂ 'ñio₅ le₁quian₅ no'₅₄ mi₂juig₂ a₂jme₁ma₂lē₅ co₂ñia₅₄ quió'₅; [lē₂ bá₄ gué₄ dsa₂ mí₂ sián'₂ i₂ca₂jme₃quiong'₅₄].^d

² Jme₁ca₂dsi₃lén₂ ja₁jaun₂, jua'₂ cau₅ bá₄ ma₂i₂mu₃ nī₁cang₁ a₂jme₁rē₂jni₅ tau₂ 'ñio₅. ³ Jaun₂ ca₂i₃toin'₅₄, la₁ tsá₃ ma₃nī₁ñi₁ 'lag₄ [Te₁gui'₅₄ Jesús]a ca₂dsó'₂ ja₁jaun₂. ⁴ [Jaun₂ ca₂lē₃],a tē₃ tióin₂ dsi₂gó'₃ dsí₅ jaun₂, tsá₃ a₂ñi₅ jmo₃, jme₁ca₂jín₂ on₃ dsa₂ i₂qui'₂ tsin'₅₄ tág₅, tión₂ cau₅ quió'₅.

⁵ Tē₃ ma₂gó'₅ jaun₂, ca₂'iin₃ ne₅₄ tē₂ 'uē₃. Jaun₂ ca₂juá'₂ dsa₂ 'éi₂: —¿'E₂ lē₃ 'na'₂ 'nia'₂ jan₂ i₂jén'₃ jin₄ 'lag₄? ⁶ Tsá₃ 'éi₂ chan₂ ja₁lá₃. Ma₂ca₂jein'₅₄ bá₄. Jui₁dsiog'₂ 'au'₂ 'nia'₂ a₂ca₂juá'₂ lia'₂ con'₂ jme₁ñi₂₃ Galilea, ⁷ jme₁ca₂juá'₂ a₂ca₂tín₂ Jaun₅ dsa₂ mi₂güí₃ jáng'₂ dsa₂ o₄gú₃ dsa₂ 'lin'₅₄, a₂tion₃ dsa₂ cróg₄, la₁ a₂'ni₅ jmi₄g jaun₂ jein'₅₄ táng₃.

⁸ Jaun₂ gué₄ ca₂dsáu'₃ dsí₅ 'io₅₄ jág₁ jaun₂ quió'₅ Jesús. ⁹ Jme₁dsi₃lein₃ jaun₂, ca₂dsia₃ ca₂tsí'₃ ta₁guia₃-ján₃ chi'₂ dsi₂guia₃-tín₂ i₂jme₁lē₂ gué₄, ca₂tsí'₃ ca₂le₃jín₃ gué₄ dsa₂ sián'₂ né₃. ¹⁰ Dsa₂ mí₂ i₂jme₁quion₂ jág₁ nē₅ ne₄ chi'₂ dsi₂guia₃-tín₂: María i₂chan₂ Magdala, Juana, María chog₅₄ Jacobo, quiaín'₅₄ gué₄ dsa₂ mí₂ sián'₂.

¹¹ La₁ jme₁ca₂nág₂ chi'₂ dsi₂guia₃-tín₂ jág₁ nē₅, a₂lē₁tē₂'i₅ bá₄ 'io₅₄ 'éi₂, lín₂, jaun₂ tsá₃ ca₂rē₃'éin₂.

¹² La₁ Pe₄ nē₃, ca₂o₃'íin₃ ñó₃ co₂chi'₅₄ ca₂i₁jag₅₄ dsi₂néi₂ tau₂ 'ñio₅. Jaun₂ jmá'₃ tsí₁'mì₂ tióg₃ bá₄ ca₂jág₃ niog₅. Ca₂ñái'₃ bá₄ táng₃ jaun₂ né₃, dsi₂gó'₃ dsí₅ 'e₂ ca₂lē₃.

A₂ca₂lē₃ dsi₂jui₅ ja₁ñó₄ juig₂ Emaús

(Marcos 16:12-13)

¹³ Jmi₄g jaun₂ dé₄, on₃ dsa₂ 'éi₂ tióin'₅₄ jui₅ i₃lén₂ jui₅ juig₂ ja₁tē'₂ dsa₂ Emaús, a₂niog₅ con'₂ guia₃-cáun₃ kilómetros ja₁niog₅ Jerusalén. ¹⁴ Jaun₂ dé₄ tsí'₅ riin'₅₄ i₃lén₂ ca₂le₃jé₃ 'e₂ niog₅ ca₂lē₃. ¹⁵ Tē₃ dsia₂₃ i₃lén₂ jaun₂, ca₂jme₃quían₃ Jesús ñó₃ quiong'₅₄. ¹⁶ La₁ jui₁'a₂ gué₃ la₂ jág₂ i₃lén₂, cha₂ a₂jmo₅ a₂tsá₃ rē₂cui₂₃ 'ein₂ 'éi₂.

¹⁷ Jaun₂ ca₂ñag₃ Jesús:

—¿'E₂ bá₄ jág₁ dsia'₂ 'nia'₂ ja₂nóg'₅?

^d1,3-4 A₂lin₅₄ chog₅₄ si₂ tsá₃ le₁ton₅ jág₁ nē₅.

Jaun₂ ca₂nau₂ ca₂tiá₂ tei₄, le₁'ág₄ 'lia'₂ dsí₅ bá₄.¹⁸ Jaun₂ ca₂ṇag₃ jan₂ i₂chen₂ Cleofas:

—¿On₁ bá₄ jan'₂ 'ne₂ líng'₅ dsa₂ i₂lia'₂ tē₁tsin'₅₄ guan₅ Jerusalén, jaun₂ tsá₃ ṇi'₅₄ 'e₂ niog₅ ca₂lē₃ dsióg₂-jo₃ nē₅?

¹⁹ Jaun₂ ca₂ṇag₃:

—¿E₂ ca₂lē₃ guē'₂?

Jaun₂ ca₂ṇag₃ táng₃:

—A₂ca₂lē₃ quian'₅₄ Jesús i₂chan₂ Nazaret, i₂jme₁lín₄ jan₂ i₂jme₁'é₂ jág₁ quián₅ Diú₄, i₂'uan'₂ tē₂le₃ quian'₅₄ ca₂le₃jé₃ a₂niog₅ ca₂jmo₃, i₂'uan'₂ tē₂le₃ quian'₅₄ jág₁ a₂ca₂jme₃tag₂₃, lia'₂ le₃ne₄ Diú₄ lia'₂ le₃ne₄ dsa₂ mi₂güí₃ né₃; ²⁰ 'a₂ lia'₂ ca₂jáng'₂ juig₅₄ jme₂dsa₂ quian'₅₄ dsi₂tan₅₄ quián₂ jnia'₅₄, ca₂dsi₂ 'éi'₃ ca₂jṇag'₃ tioen'₅₄, ca₂tion₃ cróg₄. ²¹ Jnia'₅₄ jme₁'ín₂ dsi₅ chong₂, a₂lág₂ jnia'₅₄ 'éi₂ bá₄ lín₅ i₂jme₁lión₂ juig₂ Israel. La₁ nē₃ né₃, ma₂'ni₅ jmig₄ ca₂lē₃ le₂nē₅. ²² I₂lín₅₄ dsa₂ mí₂ i₂tion'₅₄ jē₄ quián₂ jnia'₅₄ ma₂nē₂quiong₃ jnia'₅₄ jué'₅, ia₁ ma₃i₁jag₅₄ tē₂ o₃'iog₂ ma₂'míg₂ tau₂ 'ṇio₅, juá'₂. ²³ Tsá₃ ni₁ṇi₁ 'lag₄ dsó'₅. A₂jaun₂ bá₄ dsia₂₃ o₃lein₃ a₂nē₂jme₃jnia₅ ángeles ne₅₄, a₂nē₂juá'₂ i₂chan₂ bá₄ 'éi₂. ²⁴ Jaun₂ né₃, ma₂i₁len₅₄ i₂lín₅₄ rin'₅₄ jnia'₅₄ ma₂i₁jag₅₄ tau₂ 'ṇio₅. Jua'₂ dsón'₂ bá₄ dsau₅ con'₂ lé₅ jág₁ jmóg'₅ dsa₂ mí₂ 'éi₂, la₁ 'éi₂ guē'₂ né₃ tsá₃ nē₂jín₂, juá'₂.

²⁵ Jaun₂ ca₂ṇag₃ Jesús ca₂tsí'₃ 'éi₂:

—i'En₁ jmá'₃ tsá₃ 'e₂ ca₂ṇí'₂ 'au'₂ 'nia'₂! ¿Líg'₂ bá₄ le₃'én'₂ 'nia'₂ ca₂le₃jé₃ a₂niog₅ ca₂juá'₂ dsa₂ i₂jme₁'é₂ jág₁ quián₅ Diú₄? ²⁶ Ia₁ ¿on₁ le₂jaun₂ 'i₄ 'éi'₃ ca₂tín₂ I₂rē₂'ín₁ quián₅ Diú₄, dsi₃ṇí'₂ ca₂le₃jé₃ a₂nē₅ de'₂ jñiá₅, jaun₂ gué₄ dsiáin'₄ ja₁le₃juin'₂ táng₃?

²⁷ Jaun₂ qui₂ca₂juá'₂ 'a₂ lia'₂ niog₅ juá'₂ ne₄ Si₂ quió'₅ Diú₄; ca₂jme₃lióg₃ de'₂ jñiá₅ ja₁juá'₂ ne₄ si₂ quió'₅ Moisés, ṇó₃ ca₂'ē₃ le₂tan₅₄ si₂ quió'₅ dsa₂ i₂jme₁'é₂ jág₁ quián₅ Diú₄, ja₁juá'₂ 'iin₂₃ 'éi₂ 'ṇiog₅.

²⁸ Jaun₂ ja₂quián₃ dsi₁lén₂ juig₂ pí'₁ ja₁tioen'₅₄ jui₅ dsi₁lén₂. La₁ dsa₂ 'éi₂ con'₂ jme₁ma₂ṇó₅ co₂dsau₅ bá₄ ca₂jmo₃.

²⁹ La₁ i₂on₃ 'éi₂ né₃ ca₂chi₃quióng₂ jmig₄ a₂jñia₃, ca₂juá'₂:

—Nē₃ o₁jñia₁ quian'₅₄ jnia'₅₄, ia₁ ca₂rin₂ bá₄ 'iog₂, ca₂'láu₂ ca₂nei₂ bá₄ la₂.

Jaun₂ ca₂'í₃ dsi₂néi₂ ja₁jñia₃ quian'₅₄ 'éi₂.

³⁰ Jaun₂ ca₂lē₃, jme₁ma₂guá₅ ne₄ mesa quian'₅₄ 'éi₂, ca₂can₃ i₁ṇí'₄, ca₂jme₃jñiói₃, jaun₂ gué₄ ca₂'niai₃ ca₂cué'₃ le₃on₃ i₂quiain'₅₄.

³¹ Tē₃jē₄ jaun₂ nē₂jag₄ a₂jaun₂ gué₄ ca₂niá₃ jme₁ne₁₂ lín₂, jaun₂ gué₄ ca₂rē₃cui₃g₂₃. La₁ dsi₂jui₅ jaun₂ ca₂i₃cóin'₅ tē₃ ne₅₄.

³² Jaun₂ gué₄ ca₂dsia₃ jág₁ guioin₅₄:

—Dsón'₂ bá₄ lia'₂ tio'₅₄ jui₅ ja₂náu₅, ca₂lē₃ dsi₅ néi₁ ca₂le₃jé₃ 'e₂ niog₅ nē₂juá'₂ nē₂jme₃ṇí'₂ dsi₅ jniog₄ a₂juá'₂ Si₂.

³³ Dsi₂jui₅ le₂jaun₂ bá₄ ca₂tóin'₂ táng₃ jui₅ ja₂lein₃ Jerusalén. Jme₁o₃lein₃ jaun₂, tion'₅₄ ta₁guia₃-ján₃ chi'₂ dsi₂guia₃-tín₂ i₂lé₂ gué₄, le₁ṇi'₂ quian'₅₄ gué₄ dsa₂ sián'₂. ³⁴ Jaun₂ juá'₂ 'éi₂ tioen'₅₄:

—Të₃dsón'₂ bá₄ ma₂ca₂jen'₅₄ Te₁gui'₅₄. Ia₁ ma₂në₂jme₃jniai₂₃ ne₄
Si₂mu₅₄.
³⁵ Jaun₂ gué₄ ca₂jmóg'₃ táng₃ i₂on₃ 'éi₂ jág₁ 'a₂ lia'₂ ca₂lë₃ le₂'i₄ jui₅, 'a₂
lia'₂ ca₂rë₃cuig₂₃ con'₂ jme₁ca₂'niai₃ i₁ñí'₄.

Ca₂jme₃jnia₅ Jesús jë₄ quió'₅ chi'₂ dsi₂guia₃-tín₂
(Mateo 28:16-20; Marcos 16:14-18; Juan 20:19-23)

³⁶ Të₃ tioen'₅₄ dsia₂₃ jág₁ jaun₂, jme₁ca₂jme₃jnia₅ Jesús ca₂nau₂ jë₄
quió'₅.^e
³⁷ Ca₂i₃gó'₃ dsí₅ tioen'₅₄, lín₂ jan₂ jme₂dsí₂ bá₄ 'éi₂ ñi₅.
³⁸ Jaun₂ ca₂juá'₂:
—¿E₂ lë₃ ñí₄ lë₃ tion'₅₄ 'nia'₂ chí'₅ go₂'i₃? ¿E₂ lë₃ ñí₄ 'lióng₂ a₂'náu'₂
'nia'₂ 'au'₂? ³⁹ La₂ jag₄ 'nia'₂ o₄gu₃ o₄tag₃. Jniá₂ bá₄ la₂. I₂nó'₅ 'nia'₂
i₂níg'₃ quió₃ i₂jag₄ 'nia'₂. Jan₂ jme₂dsí₂, on₃jua'₅₄ i₂ton₅ ñí₅ on₃ i₂'en₅₄
mu₅, jui₁lia'₂ jág'₂ 'nia'₂ lín₅ jniá₂.
⁴⁰ Të₃ juá'₂ le₂në₅, qui₂ca₂'ë₃ o₄gú₃ o₄tag₁₂ né₃.
⁴¹ Të₃ tioen'₅₄ jaun₂ dsi₂gó'₃ dsí₅ tsá₃ 'éin₂ o₄quió'₄ a₂ñí₄ lë₃ 'io'₂ jén'₅,
jme₁ca₂juá'₂ Jesús:
—¿Cha₁ a₂le₃que₅₄ ca₂la₂ ja₁lá₃?
⁴² Jaun₂ ca₂o₃can₅ ca₂'nau₅₄ quió'₅ i₁ju₁ cui₂ ne₄ si₂, [quian'₅₄ guë'₂
ca₂jne₄ ni₁tá'₅ cuing₅].^f
⁴³ Jaun₂ ca₂gue₃ ca₂gué'₃ guá₅ tē₃ne₄ ca₂le₃jín₃.
⁴⁴ Jaun₂ ca₂juá'₂ né₃:
—Ma₁ ca₂juá'₃ jniá₂ le₂jñiá₅ lia'₂ con'₂ jme₁ñi₂₃ jin'₄ 'nia'₂, a₂tion₅₄
le₃ti₃ ca₂le₃jé₃ lia'₂ con'₂ lé₅ tio'₅₄ ne₄ Si₂ 'Éi'₃ quió'₅ Moisés, ne₄ Si₂
quió'₅ dsa₂ i₂jme₁'é₂ jág₁ quián₅ Diú₄, ne₄ Salmos né₃, ja₁'ag₂₃ jniá₂.
⁴⁵ Jaun₂ gué₄ ca₂jme₃ñí'₂ dsí₅ 'éi₂ a₂juá'₂ Si₂, ⁴⁶ jaun₂ ca₂juá'₂:
—Le₂në₅ bá₄ tio'₅₄ ne₄ Si₂: a₂tion₅₄ bá₄ dsi₃ñí₂ uig₅ I₂rë₂'ín₁ quián₅
Diú₄, la₁ jein'₅₄ bá₄ táng₃ a₂'ni₅ jmig₄; ⁴⁷ a₂tion₅₄ dsi₃'ag₅ jág₁ né₃, a₂'nió'₅
qui₂dsi₃quén'₅ dsí₅ dsa₂ ia₁jaun₂ bá₄ lé₂ le₃'én₂ dsáu₁. Jág₁ në₅ dsó₃
qui₂rë₂'é₂ o₄quió₃, ne₄ ca₂le₃jín₃ i₂chan₂ gua'₅₄ 'uë₃, la₁ Jerusalén de'₂
jñiá₅ ja₁le₃lióg₃. ⁴⁸ 'Nia'₂ né₃ i₂qui₂ca₂të₂ ne'₅₄ ca₂le₃jé₃ a₂niog₅ ca₂lë₃,
qui₂o₁jang'₄ 'nia'₂ jág₁ dsau₅. ⁴⁹ Jaun₂ né₃, tsin₅₄ jniá₂ i₂ma₂lé₅ jág₁ chen₃
Ñe'₃. La₁ jñia₄ gué₄ 'nia'₂ juig₂ la₂, ca₂lia'₂ ca₂lë₃ le₁lín'₄ 'nia'₂ quian'₅₄
jui₅bí₂ a₂sió₃ guei'₅₄.

^e36 A₂lin₅₄ chog₅₄ si₂ juá'₂ ján₃: “co₂tan₅₄ ca₂cuag₃ Diú₄, ca₂juá'₂: —Siang'₃. Jui₁'ei₅ bá₄ tei₄
tion'₅₄ 'nia'₂.”

^f42 A₂lin₅₄ chog₅₄ si₂ tsá₃ chi₁ton₅ jág₁ në₅.

Ca₂uíg₂ Jesús guei'₅₄ i₂juíg₃
(Marcos 16:19-20)

⁵⁰ Jaun₂ ca₂jñiai₃ chi'₂ dsi₂guia₃-tín₂ tē₂ juig₂ Betania, jaun₂ ca₂cho₃
 gu₂ ne₄ quió'₅ ca₂le₃jín₃, ca₂jme₃gu'₅₄. ⁵¹ Ca₂lě₃ nē₃, tē₃jě₄ jme₂gu'₅₄
 jaun₂, ca₂i₃uín₂.⁸
⁵² 'Éi₂ nē₃, ja₂lein₃ bá₄ táng₃ Jerusalén, jmo₂₃ 'io'₂ 'ηio₅ lín₃, ⁵³ le₃ó₃
 jmíg₄ bá₄ jme₁ηii'₂ i₁dsi₅ guá'₅ jme₂juiin'₂ Diú₄.
 Co₂ně₅.

⁸51 A₂lín₅₄ chog₅₄ si₂ juá'₂ ján₃: “ca₂ηái'₃ guei'₅₄ i₂juíg₃.”